



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



F. 565 / 3



~~This name must be written in ink~~  
~~date last name first~~

---


17. FEB 1955

20. JAN 1955

16. FEB 1955









**FRANCISCI PETRARCÆ**  
**EPISTOLÆ**  
**DE REBUS FAMILIARIBUS.**  
**ET**  
**VARIÆ.**



F. 565 / 3





300058019Q

**MODERN LANGUAGES FACULTY LIBRARY  
TAYLOR INSTITUTION  
UNIVERSITY OF OXFORD**

**This book should be returned on or before the  
date last marked below.**

---

19. OCT. 1963


17. FEB. 1964

20. JAN. 1993

16 NOV 1999

***If this book is found please return it to the above  
address—postage will be refunded.***









**FRANCISCI PETRARCÆ**  
**EPISTOLÆ**  
**DE REBUS FAMILIARIBUS.**  
**ET**  
**VARIÆ.**



FRANCISCI PETRARCÆ  
EPISTOLÆ  
DE REBUS FAMILIARIBUS  
ET  
VARIÆ

TUM QUÆ ADHUC TUM QUÆ NONDUM EDITÆ  
FAMILIARIUM SCILICET LIBRI XXIII. VARIARUM LIBER UNICUS  
NUNC PRIMUM INTEGRUM ET AD FIDEM CODICUM OPTIMORUM VULGATI

STUDIO ET CURA

IOSEPHI FRACASSETTI.

---

VOLUMEN TERTIUM.



FLORENTIÆ,  
TYPIS FELICIS LE MONNIER.

---

MDCCCLXIII.





FRANCISCI PETRARCÆ  
DE REBUS FAMILIARIBUS  
LIBER VICESIMUS.

---

EPISTOLA I.

FRANCISCUS PETRARCA NERIO MORANDO FOROLIVIENSI S. P. D.

De pessimis ætatis suæ moribus, et præsertim de avaritia et luxuria.  
Nonnulla de adventu abituque Caroli IV Imperatoris.

Gravem curis obsessumque negotiis et perosum  
cuncta quæ video, nec aliter quam fessus atque aridus  
cervus solet ad umbrosum fontem ad solitudinem unde  
latratu canum sequacium pulsus est atque ad silentium  
aspirantem, epistola tua parumper avertit, quæ utinam  
tam longa fuisset, ut, quod ad exiguum tempus fecit,  
rerum me præsentium oblivisci in perpetuum coegis-  
set. Ita enim me sæculi nostri miratorem scito ut vix  
fuisse aliquid ulla ætate miserius aut extremius pu-  
tem. Unum me solatur, quod si nasci oportuit et peni-  
tus necessarium fuit ut inexorabilis Clotho nos ad  
prædurum huius vitæ limen impelleret, nec prius in  
lucem erumpere datum erat, minus mali fuerit nunc  
~~pator~~ esse quam postea. Talia de posteritate coniecto:  
trepido utinam ludar augurio. Sed hanc mihi spem de  
se nostra tribuit iuventus, ea indoles, hi mores sunt,

is votorum modus, is terminus studiorum. Deliros etiam senes nostris iuvenibus admotos sapere ad invidiam putes, et felices dicas quod pridie nati sunt. Sic mundus in dies ad extrema præcipitans secum omnia in deterius trahit. Mitto autem quid serior ætas actura sit, quandoquidem (quod de Sergio Galba fertur dixisse Tiberius Cæsar) ad nos nihil pertinet, et cavendum est ne maior ingenio sit querela: neve mihi forsitan occurrat illud Senecæ ubi ait, omnem ætatem de moribus suis questam. Credo enim: sed, ni fallor, quod ad mores attingit, nulla unquam dignius quæstæ est. Illud non omiserim quod ab amantibus sese et sua cuncta mirantibus opponi posse video. Non sum nescius Italiæ vulnerum, quæ nunc quæve olim perpessa iam malis induruit, et callum crebris cicatricibus superduxit, quanquam non Italia tantum, sed terrarum orbis ab origine clades tulit innumeras. Quid vero est aliud brevis hæc vita quam mors longior? Quid aliud terrena habitatio quam gravis servitii fœdus carcer, et iugis mœstitiæ cœca domus? Scio: sed aliud est ab hostibus, aliud a vitiis obsideri, urgeri, premi, uri, vastari. Deficit aliquando hostis externus, et ipse alium fatigando lassatur: denique omnis hominum incursus brevis, nec ullum omnino bellum mortalium immortale est; cum auctoribus suis intercidat oportet, et suis ipsum viribus extinguatur. Vitia spatio temporis augentur, et exercitio roborantur, et quo plus nocuerint incipiunt plus nocere. Nemo crudelior quam qui diu fuit, nemo tam cito luxuriæ succumbit quam qui sæpe succubuit. Multis ex actibus habitus fiunt, et sic assuescendo curvescimus ut pronos in terram sternere promptum sit. Sic ævo crescit ava-

ritia, sic senum pertinacior ambitio est, et sic reliquis pestibus processus est suus, neve mori unquam morbus possit ægrorum intemperies facit. Cum his hostibus res est nobis, quibus non modo non resistimus sed favemus, et ultro nostros iugulos in ferrum damus, quin etiam, mirum dictu, si lentescere cœperint, irritamus illos, quasi minus miserum fieri sit miseria summa. Quod passim in multis modo senibus usque ad fastidium videmus, quibus nihil obscœnius sol videt. De quibusdam legimus, atque in primis de illo cuius paulo ante memini Tiberio, quem apud inferos quoque Dii sui Deæque male torqueant, ita mihi stomachum torquet bilemque agitat, quotiens senem illum lego miris et infandis modis, atque inter cœteros, relatu etiam turpi, spectaculo concubitus monstruosi, ut Tranquilli verbo utar, deficientes libidines excitantem. Hinc illæ ridiculæ infamesque nostrorum senum querimoniae, quod solito minus voluptatibus æstuent, quod male-suada titillatio et pruritus iuvenilis abscesserit, quod gulæ somnique et ventris illecebris destituti sunt: postremo quod vires corporeæ ad cædem carnificinamque defecerunt. Atqui peius est sanguinarium esse velle quam esse. Quamvis qui malus esse cupit, utique iam malus ac pessimus est, nec quisquam peior quam qui peccato studet et flagitio gloriatur. Delectari equidem in malis, prope malorum omnium est natura. Unde peccandi consuetudo iucundissima apud Ciceronem dicitur. In mediis sane delectationibus inhonestis, molestum aliquid pati et velut frenum aliquod sentire libidinum, malorum adhuc est, sed ad meliora tendentium, et quos sæpe de magnis tempestatibus liberatos in portum per-



venisse cognovimus. Effundi autem in malis et efferri lætitia et gestire et niti et, quod est omnium pessimum, gloriari, prope ultimæ desperatæque nequitiae est. Horum vero plena sunt omnia, hosque inter vivendum est nobis, et si inter hos tantum ac non etiam ex his sumus, bene est: quamquam convictus scelestorum nullis sit molestior quam his qui ab illorum moribus insigni dissimilitudine secernuntur. Utcunque est, inter hos viximus, et quod Psalmista regius deflebat, inverteravimus inter inimicos nostros, quodque miserrimum dixerim, inter hos ipsos. moriendum est. Quo enim patet fuga? Quo ibimus quo non nos sceleratorum acies ac signa præcesserint? Ubi non pessimis moribus imperium partum atque firmatum sit? Trans oceanum navigandum erat, nisi quia credibile est vitia nostra iam ad Antipodas descendisse. Ad cœlum potius evolandum, nisi nostris ad terram ponderibus prememur: illa, si salvi esse cupimus, deponenda sunt: quod facile factu esset, nisi quia malorum exemplo obruimur, quorum cum feracissima ætas nostra sit, ut dixi, feracior est etiam speranda posteritas. Pugnarunt quidem maiores nostri adversus Pœnos, Cimbros ac Teutonas et Britannos, ægre vel Italiam ab Hannibale, vel Capitolium a Senonibus defenderunt, omnium tandem vera et indomita virtute victores. Nos si Capitolii nostri arcem, a tanto barbaricorum vitiorum circumfuso exercitu defendimus, ad tutelam nostram cœlesti alite excitati, si circumstrepentibus vulgi erroribus immota fronte resistimus, et Manlio et Mario et ipso Cæsare fortiores erimus. Illos enim ab hoste murus interdum vallumque dirimebat, sæpe noctibus quiescebant, hiemis asperita-

tem hibernorum solatio leniebant: nobis nulla quies, nullum sine periculo tempus, non bruma, non induciæ, non nox. Nihil usquam tuti pacatique est, assidue de salute certamus, semper in acie stamus, tentamur, circumsedimur, impellimur. Hostes intra muros sunt. Iamque armati ad ipsam rationis arcem sese ferunt, vineasque applicant, intentant arietes, moliuntur incendia, turres scandunt, nec iam aliter quam apud Ilion quondam hærent parietibus scalæ; scalæ criminum parietibus animarum. Quid expectas ut dicam? In ipsas mensas nostras atque cubilia irrumpunt et in iugulos ruunt, quodque proximum exitio est armatum erroribus vulgus omne ferrum movet et pro hostibus partes facit. In hoc tam ancipiti duroque certamine nonnisi de cœlo speranda victoria est. Inde eam amice poscamus: interea tamen ubi sim videns non moveri nequeo, interdumque tam graviter ut meæ sortis impatiens, mœstis pene vincar angoribus. Aberrasse forte a proposito videor: tulit impetus; sed redeo. His ergo hodie curis implicitus quas mihi circumstrepentium rerum fragor satietasque pepererant, dum thalamo egredior, epistolam tuam in limine obviam habui, brevem quidem e longa veluti peregrinatione succinctam; quæ licet ad me sero admodum, nescio quibus obicibus retardata pervenerit, ita ut quæ nuntiat mihi iam pridem omnia nota essent (nempe cum interim ante eius adventum Cæsar noster de quo illa loquitur, non modo coronatus sed velut umbra vel somnium nobis ablatum sit, cuius ego abitum acutis ac fervidis litteris prosequutus sum): epistolam tamen ipsam non aliter et amore mittentis et dulcedine sua captus aspexi, quam si nova

omnia nuntiaret. Multa quidem, qui fessis ac prope-  
rantibus mos est, paucis illa verbis expediit, et quali-  
ter affectus singula putas audierim. Atque in primis  
Lælii mei nomen, cum quo dum potes, cupide oro, ver-  
sare, totaque illum mente complectere. Digni estis alte-  
rutro. Sane quod sequitur nostræ gentis adventu, Pi-  
sanum populum gravi suspicione turbatum mirari non  
debes: nam neque gens ulla suspiciosior, et vipera ista  
terribilis, rubentem dentibus virum stringens, securos  
quoque sollicitat. In quo Cæsaris providentiam laudo,  
quæ et pavori civium succurrit, et pudori militum oc-  
currit. Quod vero de patria mea scribis, læte admodum  
audieram, sed lætius legi, et Romano principi obedi-  
entiam non negari, et si qua iam toto orbe neglectæ liber-  
tatis cura est, eam in patria mea esse. Ultimum nihil  
miror, quod de auri potestate facetissime cavillatus es:  
scio enim esse verissimum illud Flacci:

Aurum per medios ire satellites  
Et perrumpere amat saxa potentius  
Ictu fulmineo.

Quod ipsum in libris Metamorphoseos ponit Apuleius.  
Certus sum (inquit) fragilitatis humanæ fidei, et quod  
pecuniæ cunctæ sunt difficultates perviæ, auroque so-  
leant adamantinæ etiam perfringi fores; quam late pa-  
tens et quam nota sententia est, quæ non modo phi-  
losopho sed philosophanti tribuitur asello. Legisti credo  
apud Pomponium Melam, Cosmographiæ libro tertio, esse  
gentem Æthiopum auri ditissimam, æris indigam, cui  
raritate et frequentia pretia rerum alternantibus, et  
ornamenta ænea et vincla sunt aurea. Nobis, amice,

omnia iam ex auro sunt, et hastæ, et clypei, et compedes, et coronæ: hoc et comimur, et ligamur, hoc divites sumus, hoc inopes, hoc felices, hoc miseri. Aurum solutos vincit, vinctos solvit, aurum sontes liberat, damnat innoxios, aurum disertos ex mutis, ex disertissimis mutos reddit. Auro concionatus est Metellus in Cæsarem, auro Demosthenes orator obmutuit. Aurum et de servis principes, et de principibus servos facit, et audacibus metum, pavidis præbet audaciam, et curas inertibus, sollicitisque segnitiam. Hoc et inermes armat et nudat armatos, indomitos duces domat, magnos populos premit, validos fundit exercitus, bella longissima paucis horis conficit, pacem præstat et eripit, siccatur flumina, terras lustrat, maria concutit, montes æquat, pandit aditus claustrorum, urbes aggreditur, expugnat arces, oppida demolitur: et quod apud Ciceronem legimus: nullus fortis est locus in quem onustus auro asellus non possit ascendere. Aurum claras parat amicitias, magnas clientelas et honesta coniugia, quippe quod generosos et fortes et doctos et formosos et, quod miraberis, sanctos efficiat possessores suos. Itaque qui divites sunt, boni viri in civitatibus appellantur, eisque tantum creditur. Nulla fides est pauperi, quia pecuniæ nihil adest, verumque est illud Satyrici:

Quantum quisque sua nummorum servat in arca  
Tantum habet et fidei.

Postremo, invitatus dicam sed veritas cogit, non modo potens, sed omnipotens pene est aurum, et omnia quæ sub cœlo sunt auro cedunt; auro serviunt et pietas et pudicitia et fides, omnis denique virtus et gloria aurum

supra se vident, inque ipsos animos cœlitus nobis datos, pudet fateri, etiam rutilanti imperium est metallo. Hoc reges ligat atque pontifices, hoc homines, et, ut aiunt, etiam ipsos Deos placat. Nec quidquam inexpugnabile inaccessumque auro est. Quod sciens Iupiter, ut custoditæ mulieris pudicitiam rapturus ferreas portas effringeret, in imbrem aureum sese vertit. Tali Deo dignum opus. Deus autem noster, quidquid sui agant successores, pudicitiam amat, aurum spernit, avaritiam detestatur. Opto tibi valetudinem inconcussam mentis et corporis.

---

## EPISTOLA II.

FRANCISCUS PETRARCA NERIO MORANDO FOROLIVIENSI S. P. D.

De Caroli IV Imperatoris habitu et nonnullis quæ illum respiciunt.  
Qua humanitate ab illo et a Cardinali Legato fuerit Lælius exceptus.

Nondum superiori epistolæ signum impresseram, dum ecce alia superveniens coegit, ut posito anulo, depositum calamum rursus arriperem, et quamvis tua hæc superiore sit longior, responso tamen breviori contenta erit. Nam nec cui nostri querelam iterare est necesse, quam et tacitus loquor et ipsa res clamat, nec quidquam prohibet, quod in illa dixeram, ad hanc transferri. Neque enim aut minor est hodie dolor meus quam heri et nudius tertius fuit, neque minus efficax epistolæ tuæ hodiernæ solatium quam hesternæ. Accedit quod neque de his quæ novissime scripsisti ausim aperte pronuntiare quod sentio, neque tu ideo minus quid

sentiam quidve pronuntiem intelligis. Sæpe silentium ad exprimendos animi conceptus quovis sermone potentius fuit, nec minus silentio Niobe quam latratu Hecuba, dolorem animo insitum designabat: itaque cum illa in saxum, hæc in canem versa fingatur, non minus mutum illius simulacrum quam huius querula rabies suam miseriam loquebatur. Illud non siluerim agnoscere me Cæsarum fatum, quod et in occasu solis et sub austro, denique ubilibet felicius fuerit quam sub arcto: ita ibi gelida omnia, nullus ardor nobilis, nullus vitalis calor imperii. Redde nobis, Fortuna, si Romuleos Cæsares Parcæ vetant, at saltem ab Hispania Theodosios, Severos ab Africa, ex Arabia Philippos, e Syria Alexandros. Heu quid nunc diceret architector ille magnus monarchiæ, successorem suum cum sacerdote humili de humilitate certare, dum meminisset superbissimum olim Galliarum regem, dum supplex, ut ait Florus historicus, in castra venisset, phaleras et sua arma ante Cæsaris genua proiecisse ac dixisse: habe hæc: virum fortem, vir fortissime, vicisti? Multa se offerunt id genus. Nam et locuples materia et multiloqua indignatio est: sed frenabo impetum ut qui hæc ipsa, nonnisi ira cogente ac dictante, profuderim. Sane de Cæsaris Legatique congressu quod providentissime vaticinarius amplector ac probo, et pene rem ipsam videor videre. Non quod omnia ista me moveant, contra quæ multa sæpe disserui, sed ex præteritis ventura coniicio. Itaque non tam tangor, quod Legati sonipes in Cæsarem calcitrarit, quam quod calcitrare animos novi, et scio quod omnis potestas est consortis impatiens; cuius rei nisi antiqua sufficerent, vereor ne re-

cens nobis exemplum casus attulerit, neve iam Pontifex romanus principem romanum Romæ esse vetuerit, quod et fama loquitur, et fuga Cæsaris indicio est, qui non cupidius Italiam petiit quam reliquit, ut mihi quidem supervacuo pelli videatur, qui tam libens fugit, quem tenere si velis sine magno nequeas labore. Ut enim nunc intelligo, non huc aliam ob causam venit, nisi ut diadema Cæsareum sua in sede susciperet. Tantum adhuc reverentiæ, non amplius, superest. At successor Petri Cæsaris successore securior, ista non curat, suumque ipse diadema non pluris apud Tiberim quam apud Rhodanum facit: is nunc diademate contentum et imperii titulo Roma digredi non solum patitur sed iubet: et quem Imperatorem dici sinit, imperare autem nullo sit modo siturus, huic (o artes hominum miræ) penetrale diadematis templum aperit, arcem sedemque imperii urbem claudit. Hæc hactenus. Lælium meum, imo tuum, imo nostrum, familiarissimum Cæsari factum gaudeo, non miror; nihil enim est virtute rapacius, nihilque tenacius: rapit vincitque animos hominum vinctosque semel in perpetuum vinctos tenet. Nulla mihi dubitatio unquam fuit quod non solum ab illo humanissimo principum sed ab alio quolibet, licet asperioris ingenii, cui tamen virtus in pretio sit, posset ille vir amorem promereri, modo notitiam meruisset. Quis enim tam agrestis est ut Lælium non amet, et sapientiæ laude conspicuum et in amicitiiis faustum nomen? Quod si sola virtutis fama efficit ut quem nunquam vidimus senem illum Lælium amemus, quid huius nostri virtus ac præsentia posse debent? Itaque minus miror quod de Legato Sedis Apostolicæ

idem scribis, cum quo familiaritas Lælii vetus est. Illud potius miror quod prioribus litteris prætermissum his inserui, quod ita illum ad coronandum Cæsarem diu ante digressum iste prævenerit, nisi quia, ut arbitror, et ut solet, illum fortuna segnem, hunc sollicitum virtus facit. Unum non mirari nequeo: cum eodem ambo pergerent, Rhodanoque dimisso, Tiberim peterent, unde reverentior adhuc Romanus Princeps diadema supremum poscit, quod Petri successor, Cæsaris successore securior non curat, qui fieri potuit ut Cardinalis rutilo vertice et purpureo fulgidus amictu tantoque spectabilis comitatu, nostri huius lyncea lumina fugerit, et cum hic Pisas, ille vix dum Ianuam pervenisset, ita ut illi obviam iste redierit. Auguror sane alterum terra, mari alterum venisse. De hoc equidem ac reliquo statu vestro tuis ac suis litteris certior fieri velim. Ad singula respondiisse videor. Nam ad epistolæ tuæ finem de familiaribus curis stilo alio et seorsum loquar, ut soleo. Gratias autem tibi, quod quas ipse iam oblivioni tradideram adeo, ut ne loquutum tibi de his aliquid me putarem, tam memoriter tenes, ut facile pateat, rerum te mearum curiosiorem esse quam me ipsum. Mirum et pene incredibile, nisi caritatis tuæ miraculo incuriositas mea longe lateque nota detraheret. Vale feliciter nostri memor.

---



## EPISTOLA III.

FRANCISCUS PETRARCA GALEOTO SPINULÆ GENUENSI S. P. D.

Gratulatur eum Genuensium reipublicæ reformandæ  
fuisse præfectum.

Nihil, o magnanime vir, nihil inquam lætius mihi fingo quam serenam et imperio prædignam frontem illam ubi invicti animi tui nobiles lucent curæ. Nihil suavius retracto quam verba magnifica nescio quid, non modo aliud quam plebeium et vulgare, sed quam humanum et mortale sonantia: nihil dulcius cogito quam me gratiam ac benevolentiam tanti viri vel sero meritum, quarum primitias clarissimo quodam in fratre prægustaveram. Et exilio illi tuo brevi gratulor et gratiam habeo, quod te ad tempus in hanc urbem compulit, et me dilecti antequam cogniti talis amici conspectu atque optata præsentia compotivit. Postremo nihil iucundius expecto quam Rempublicam tuam, in qua principem te Deus et virtus et maiorum sanguis faciunt, alienis modo motiunculis inquietam tua providentia atque auctoritate restitui. Nunc ergo quod sæpe iam fecisti, quis quantusve sis mundo ostende, eoque magis quo te ipso maior, clarior, altiorque factus es. Vera virtus senium non sentit: immortalis est: non ævo minuitur sed crescit et ad summum venit, et quæ in iuventute floruit, in senectute fructificat. Tu quoque qui non in sterili aut palustri solo, sed secus latices vivos in solido radicasti, totius nunc anteactæ vitæ fructus uberrimos et maturam gloriam patriæ tuæ debes. Illa te vocat, in te sperat, auxilium tuum poscit: ac-

celera. Non te ætas teneat. Senior Aratus Sicyonem, senior Trasibulus Athenas, senior Camillus urbem Romam servitio liberavit. Pium geritur negotium et huic maxime debitum ætati, dissoluta patriæ membra componere, ut meliora deterioribus imperent. Cuius si contrarium fiat, necesse est ut hominis sic civitatis aut regni corpus morbis erumpentibus intabescat. Periclitari et ægrotare patriæ tuæ status incipit. Te illi civem egregium, te medicum exhibe, te parentem : ac ne plura quam res exigit, loquens de tua virtute, diffidere videar, nihil his addam, quin tacitus sed non solus, tuæ vetustæ indolis exitum contemplabor. Age, oro, vir ingens, pie ut debes, fortiter ut soles, feliciter ut speramus, meque tuo utere ut libet, si quis tanto rei tam parvæ usus esse potest. Diu sospes nostrique memor vive et vale.

Mediolani, XV. Kal. Ianuarii.

---

#### EPISTOLA IV.

FRANCISCUS PETRARCA MARCO GENUENSI S. P. D.

De studio legum, et rerum forensium experientia.

Crebras ex te litterulas habeo : omnium una sententia est. Poscis ut ad incepti nuper civilis studii perseverantiam te cohorter, aliquam vim profecto meæ vocis existimans ad firmandum novitate rei fluctuantem animum et magnitudine diffidentem. Quod ut ex me speres, hinc mei amor suadet, hinc tua persuadet humilitas, optima dos animi et ad virtutem veramque

ad gloriam primus gradus. Non temere fateor, sed de industria responsum traxi dissimulaturus in finem, si tu sineres. Difficilis nempe materia est, difficilior fortasse quam reris, in qua mihi vel loqui periculosum, vel tacere suspectum est. Ita enim sum ut sermo meus omnis hac in re accusatio sit, silentium contemptus, veritas odium, iocus irrisio. Desertorem suum vocant, et sic habent quasi qui sacris initiatus aris, postea violatis aut neglectis Eleusinæ Cereris arcana vulgaverim. Ego quidem, amice, illi studio puer destinatus a patre vix duodecimum ætatis annum supergressus, et ad Montem Pessulanum primo, inde Bononiam transmissus, septennium in eo integrum absumpsi, eiusque quoad per ætatem et ingenium licuit, rudimenta percepi. Cuius temporis an me hodie poeniteat, si roger, hæream : nam et vidisse omnia si liceat velim, et tantam perexiguæ vitæ partem effluxisse mihi doleo, dumque aliquid vitæ supererit dolebo. Aliud agere per eos annos potui sive nobilius sive naturæ meæ aptius. Neque enim semper in eligendo vitæ genere pulcherrima rerum, sed eligentibus aptissima præferuntur. Alioquin omnes homines unum studium haberent, quoniam in rebus omnibus unum excellere est necesse, quo si omnium mortalium pergat intentio, quid de aliis fiet? Si quidem ad philosophiam omnes aut ad poeticam aspirant, quid aget navigatio, quid agricultura et reliqua quibus vitæ mortalis auxilium quæritur? Da omnes Platones aut Homeros, da Cicerones aut Virgilios, quis erit arator, quis mercator, architectus, faber, sutor, caupo? sine quibus magna ingenia esurient, tectoque ciboque carentes ab ipsa nobilium studiorum

altitudine distraherentur. Bene provisum est ut curarum atque actuum humanorum varietas tanta esset, quo non solum maiora minoribus, sed et minora maioribus ornamento præsidioque sint. Non sum nescius, amice, de Iuris civilis studio multis olim magnam gloriam quæsitam, ea scilicet ætate qua iustitia ultro ab hominibus colebatur, quando apud eos, ut ait Sallustius, ius bonumque non legibus magis quam natura valebat; etsi iam tunc propter infinitam rerum diversitatem labilemque memoriam necessariæ leges essent, quæ hodie ad frenandam audaciam coercendasque libidines, et ob id potius quod absque his genus humanum stare nequit, quam quod virtus aut lex ulla diligatur, in pretio sunt. Harum igitur legum civilium repertores et interpretes et magistri multi diversas apud gentes clari habentur. De quibus scrupulosius loqui velle longum est. Clarissimum inter omnes nomen habet Solon Atheniensium legifer, qui cum patriam suam philosophiæ atque eloquentiæ notum fontem institutis salubribus adornasset, iam senior se ad poeticam transtulisse legitur. Quod si librato iudicio fecisset, quantum deserto studio præiudicium peperisset tanti auctoritas desertoris? Aut quis præferre vereretur, quod illum tunc maxime prætulisse constaret, quando sibi nec animi lumen, nec doctrinæ ubertas, nec rerum longior experientia defuisset? Sed fieri potest, neque valde dissimile veri est, non comparatione studiorum ulla, sed delectatione sola et laboris fuga, senem præstantissimum animo indulgentem suo, durum et grave negotium dulci otio permutasse, ut non tam hinc exempla sumenda iuvenibus essent in Reipublicæ obsequium natis, quam

ne senibus emeritis, si quid tale tentassent, venia negaretur exemplo viri talis expetitæ quietis honestissimæ. De quo ambiguo quid omnino diffiniam non habeo. Quis enim hariolari audeat, quid Solonem moverit, præsertim cum etsi multa de illo, unde tamen coniecturam facias nullum supersit illius ingenii monumentum? In re vero tam dubia tam antiqua suspicionem meam nullis certis suffultam rationibus interposuisse ridiculum. Itaque tota res in dubio relinquenda est, et id agendum de quo constat : fuisse tempus quo iurisconsultis iisdemque oratoribus laus ingens esset. Quod genus certe rarissimum semper fuit, rarius quoque quam poetarum excellentium, quorum haud dubie raritas nota est. Quanti enim ingenii est non modo ius civile infinitum olim priusquam ad certum redigeretur modum, quod quidem Iulius Cæsar instituit sed præventus morte non potuit, multisque post sæculis Iustinianus implevit, nunc vero latissimum adhuc et multa casuum tenuissime differenti varietate perplexum, inextricabile, confragosum, verum insuper rerum pene omnium notitiam, de quibus in iudicio vel extra dicendum oratori est, cum artificiosæ orationis copia ac suavitate coniungere? Summum, nisi fallor, et insigne miraculum intellectus, memoriæque mortalium; quandoquidem scientiam rerum quæsisvisse non sufficit, nisi propter improvisos et subitos insultus adversarii discriminaque causarum omnia in promptu et, ut Augusti Cæsaris verbo utar, in numerato habeas. Denique nec id ipsum satis est, nisi quæcumque vel ingenio studioque quæsieris, vel industria memoriaque servaveris apposite ad persuadendum, ut Rhetorici vocant, hoc est accomo-

dato rebus ipsis efficaci et ornato et moturo animos eloquio proferantur, ut nemo mirari debeat tanti artificii professorum semper magnam fuisse penuriam. Neque enim unam rem, sed innumerabiles profitentur, easque non ut cæteri hominum, sed alio singulari et proprio quodam modo, et super omnia eloquentiam exquisitam. Quæ si per se sola consideretur, magna et varia res est, nec si Severo Cassio credimus, adhuc ulli sic indulset, ut tota contingeret. In hac quidem oratoria facultate, quæ tantis ex rebus constat, excellentes habiti magna gloria fuere, ut non immerito et potiri rerum in dicendo et habere in potestate animos hominum dicerentur. Ex hoc genere est apud Graios Demosthenes, Isocrates, et Æschines: apud nostros autem Cicero, Crassus, Antonius, aliquot alii præterea: sed hi tres facile principatum tenent: etsi Iulium Cæsarem ad summam eius gloriæ vel venisse, quod ne hostes quidem sui negant, vel certe venturum fuisse non sit dubium, nisi illum gerendarum rerum occupatio et bellorum labor et pondus imperii distraxisset. Deinde autem, ut sæpe in summo brevis est mora, et semper facilis descensus, ad illos descendendo perventum est, qui fastigio eloquentiæ derelicto, nudam iuris notitiam adepti, in ea quidem excellentissime flourerunt. Quo in genere Romæ Græciam cecidisse notissimum. Hic nempe sunt illa tuæ professioni veneranda nomina, quæ vos antiquissima soletis opinari, cum propemodum nova sint atque recentia, Iulius Celsus, Salvius Iulianus, Neratius Priscus, Vinidius Verus, Salvius Valens, Volusius Metianus, Ulpius Marcellus, et Iavolenus, et Scævola, scilicet ille breviloquus: nam alii ante

eum hoc nomine fuerant vel virtute animi, vel augurio, vel pontificio clari. Sub hoc sane novissimo professus est Papinianus, quem, si rite recolo, iura ipsa civilia acutissimi ingenii virum dicunt, Ælius autem Spartianus historicus iuris asyllum, doctrinæ regalis thesaurum appellat. Quorum primi tres sub divo Hadriano, quinque proximi sub Antonino Pio, nonus sub Marco Antonino philosopho prudentissimo principe claruisse noscuntur: decimus vero sub Antonino Bassiano crudelissima bellua, a quo tandem, quia parricidium eius excusare noluerat, interfectus est. Post hos Iulius Paulus et Domitius Ulpianus iurisperitissimi, et qui Papiniani assessores fuerant, sub Imperatore Aurelio Alexandro multo in honore vixerunt, tantaque cum laude atque opinione omnium, ut ille quidem summi Imperatoris nomen habuerit ob id maxime, quod talibus consiliis Rempublicam gubernaret. Sileo reliquos; illustriora pertigisse satis sit. Quod ideo certo diligentius feci, quia pars magna legistarum nostri temporis de origine iuris et conditoribus legum nihil aut parum curat, didicisse contenta quid de contractibus deque iudiciis ac testamentis iure sit cautum, utque studii sui finem lucrum fecerit, cum tamen artium primordia et auctores nosse, et delectatione animi non vacet, et ad eius, de quo agitur, notitiam intellectui opem ferat: cum præterea ille mechanicarum proprius, liberalium vero et honestarum artium liberalior quidam et honestior sit finis. Iam tibi, si præmissis animum applicuisti, studii tui descensus alter ostenditur, sed maior multo, quam primus. Neque miraberis si hic quoque respicias ad naturam rerum fere cunctarum, quæ cum semel labi

cœperint, ruunt, ruinamque suo pondere prægravant, ut cum facilius tum gravior a mediis ad ima, quam a summis ad media casus sit. Certe ut primus a doctrinæ multiplicis et cœlestis arce faunditiæ ad unam æquitatis ac civilis scientiæ disciplinam, sic secundus inde ad loquacem ignorantiam gradus fuit, unde iam cadendi amplius plena, ni fallor, securitas parta est. Quid enim iam infra est? Leges a patribus tanta vel gravitate animi vel ingenii facilitate descriptas, aut non intelligunt aut obliquant. Iustitiam tanto ab illis cultam studio dehonestant, quam venale mercimonium fecere. Lingua illis, manus, ingenium, anima, decus, fama, tempus, fides, amicitia, ad postremum omnia venalia, neque pluris pretii quam par est. Et quam nulla proportio temporum ac morum. Illi iustitiam sacris legibus armabant, hi exarmatam nudatamque prostituunt: apud illos veritas in pretio fuit, apud hos fraus: illi certa et inconvulsa responsa dabant populis, hi dolis et fallaciunculis lites alunt, et quibus iudiciaria cuspide perimendis adsciti sunt, fieri cupiunt immortales. Quid pluribus morer? Quisquis horum promptius reluctantem et invitam legem ad libidinem suam traxit, is et iurisconsulti munus implevit, et docti viri meruit nomen. Si quis autem rarus procul ab his artibus rectum nudæ callem veritatis arripiat, præterquam quod lucri et gratiæ exors est, rudis insuper et insulsi hominis sit subiturus infamiam. Ad hoc iter tarde susceptum tibi quasi difficultatis horæque conscius adhortationis meæ calcar exigis. Nescio quibus verbis id faciam. Faciam tamen. Non sunt enim leges malæ, quamvis ad salutem publicam inventæ sæpe in perniciem convertantur: sicut nec aurum



ideo malum est, quia multis peccati, multis periculi causa fuit; nec malum ideo ferrum quia, licet in usus hominum optimos, in culturam terræ, in tutelam patriæ repertum semel, sæpe vel exitii singulorum, vel belli civilis occasio est, alioquin si omnia quibus male utuntur homines mala essent, quid omnino uspiam non malum? Non corporei sensus, non ingenium, non opes, et hæc quibus pascimur alimenta. Ipsa Dei misericordia et patientia abutuntur multi, et sæpe quorum natura optima est, nostri perversitate usus est pessimus. Bonæ equidem leges sunt, mundoque non tantum utiles sed necessariæ. At qui legum in exercitio versantur et boni et mali esse possunt: et quo plures mali sunt, eo maior est bonorum gloria. Humanorum sane actuum primas partes tenet agentis intentio. Multum refert quo proposito rem aggrediare. Neque enim res ipsa sed tua mens est, cui laus aut vituperatio debeatur. Illa est quæ et bona in malum, et mala quæ videntur in bonum flectit. Illa est quæ unam eandemque rem ad tam varios fines trahit, ut non res una sed duæ prorsus contrariæ videantur. Vadit ad templum sacerdos ut sacris vacet: vadit adulter ut libidini serviat; et ante aras de luxuria, et intra ipsum lupanar de pudicitia agi potest. Saul rex servavit regem Amalech, qua clementia inexorabilem iram Dei meruit. Phinees vero Israeliticum virum et alienigenam mulierem gladio confixit, quæ severitas et Deo accepta et populo utilis et sibi extitit ad perpetuam famam iustitiæ gloriosa. Ecce non cuiuscumque iudicio, sed Dei, immane facinus homicidium placet, humanitas reprobatur. Mille talia numerem si necesse sit: sed uno omnium gustum habes. Iuris ad

scholam illum lucri cupiditas, hunc iustitiæ amor ducit. Aderit æstimator mentium et discretor intentionum et distributor ingeniorum Deus, ut ille mercenarius et circumforaneus strepitans, hic præclarus boni et æqui professor et iustitiæ patronus evadat. Iam ex his omnibus quo pergam vides. Si re integra consuleres, totam mihi relinqueres consilii libertatem; iuberem multa te circumspicere, ingenium ac studium æquis lancibus librare. Sunt enim ut rerum sic intellectuum gradus: alia aliis debentur ingeniis: respectum ætatis ingererem: omnino enim cuius temporaneus fructus exigitur, maturum et præcox decet esse principium. Non fructificat autumnus arbor, quæ vere non floruit. Itaque quamvis alii teneræ ferias dent ætati, tamen ut eruditissimis iuris placet, magno profectui destinatus animus non tantum ab infantia sed ab ipso nutricis lacte formandus est. Difficultates obiicerem multas quidem: ante alias coniugii iugum collo haud sane herculeo impositum, et cui non fasce alio, sed levatione potius opus sit. Magnæ corporis magnæ animi vires sunt, quæ simul et litteris sufficiant et uxori. Impensæ rationem habendam dicerem et laborum: ex nulla enim fere artium aut oblectationis minus aut plus tædii provenire. Postremo non negligendam assererem famæ curam, quæ in hoc statu legum magna possit fortasse contingere, non diuturna. Enumerarem causidicos nostrorum temporum, quorum nominibus nihil paulo ante sonantius, nihil hodie raucius, nihil ignotius. Nunc vero quia non agendæ consilium sed peragendæ rei poscis auxilium, et quam solam posse videor verborum opem: hortor ac monco, ut huic saltem studio, cui te vel iu-

dicium vel tua sors appulit, constanter inhæreas, neu quotidie nova vitæ consilia ordiare. Nil turpius viatori quam nescire quo tendat: nil viro turpius quam nescire quid velit. Nequidquam vela feceris gubernaculo amisso. Ibis enim quo te non ratio tulerit, sed fortuna. Nobis fixum a principio debet esse quo pervenire velimus, ne crebra mutatione propositi, quod in nocturno errore viæ accidit, dum procedere credimus, revertamur. Quæ res facit ut ætate decrepitos puerilibus animis videamus, quasi ad ipsum vitæ limen unde discesserant reversos, et errorum tenebris elusos et consiliorum vagis anfractibus fatigatos. Multis ego per hos annos te deliberationum fluctibus iactatum, et incertis opinionum flatibus fessum vidi. Incipe bona fide, precor, unum velle. Cum ad unum litus proram verteris, uni vento vela dederis, clavum regens, tum demum navigatio certa erit, tum certe progrediere, et si non forte quantum cupies, at quantum coelitus datum erit, progrediere, inquam, non rotabere. Nihil est enim tam quieti adversum, nihil tam vertigini proximum quam rotari. Ad summam de his omnibus hæc sententia mea est: sicut inter primos maximum, inter secundos excelluisse magnum fuit, sic temporibus collatis, inter tertios excellere non exiguum, nec indignum laude iudico, modo hic sit animus studentis, hic terminus studiorum, ut voti compos effectus, non cultor nequitiae, non mendaciorum sator, non pecuniæ acervator, ut reliqui, sed defensor iustitiæ et reipublicæ propugnator, sed audaciæ terror advocatorum et iudicum avaritiæ frenum, portus denique miserorum, et scopulus sis nocentium. Vale.

Mediolani, V. Kalendas Iunii.

## EPISTOLA V.

FRANCISCUS PETRARCA BARBATO SULMONENSI S. P. D.

Ne nimis faciles præbeat aures iis qui eius nomine aliquid petunt.

Nunquam hercle ad me litteræ perveniunt tuæ, quin vel gaudio cumulum ferant, vel solamen curis. Id cum semper, tum solito largius nunc fecere, familiares amantium omnium metum atque suspicionem, quibus absentia longumque silentium vires dabant, ex animo secludentes. Accessit ad gratiam, quod cum tuo simul illius egregii et exoptatissimi viri nomen prefebant, quo delector unice, et mira nescio qua non visi hominis suavitate reficior, nisi quia te videns, ut auguror, illum vidi: sic amor e duobus unum facit. Et eorum sane, quos anno altero sub obtentu meæ familiaritatis tibi obrepsisse memorasti, alterum, Bononiensem illum scilicet, plane noram, alterum vero Transalpinum minime. Quæso ut deinceps sis cautior, neu passim singulis in ore meum nomen habentibus pecunias largiaris. Tam late enim nostra amicitia nota est, quod si blanditiis huiuscemodi hominum viam aperias, actum est: cito non modo crumenam tibi exhaurient, sed arculam, sed domum. Ille quidem, mihi quem notum dixi, si ad nos rediisset, haud dubie multis de te votivisque rumoribus nos implesset: verum is absens (ne sibi succenseas, quin potius misereare) inopino prorsus et misero fine præventus diem obiit. Proinde manu eius ad te Parthenias meus, quem petieras, pervenisse debuit his ipsis digitis exaratus, nec non et carmen breve, quod inter epistolas tibi inscriptas

proœmii locum tenet. De reliquis modo nil mittam, quia sperabam ipse, trahente hinc inexplebili oculorum hinc animi voluptate, Romam petere, positurus iam tandem peregrinationibus, ne dicam erroribus meis modum: idque iam ante hoc biennium factum esset, nisi me Ligurum motus Transpadanis compedibus tenuissent. Ibo tamen ut spero, aliquid nugarum nostrarum, quarum semper appetentissimum te memini, mecum ferens. Tunc te meo iure Romam evocabo, vel ipse, quod pridem cupio, in Pelignos, si qua dabitur, penetrabo. Interea conspicuum illum virum mihi cognominem nec minus unanimem salvere iube et vale.

VI. Kalendas Septembris.

---

## EPISTOLÂ VI.

FRANCISCUS PETRARCA FRANCISCO PRIORI SANCTORUM  
APOSTOLORUM S. P. D.

Diuturni silentii causas promit, quas inter adventum amici.  
Litteras queritur in itinere intercipi.

Longævi silentii mei, pro quo litteris tuis nescio an acrius an dulcius an reverentius an liberius increpitus sum, causam brevibus accipe. Multis primum me diebus tenuit meorum impetus studiorum, cui nihil interpositum vellem, et scribendi calor, qui ut vehementissimus sic delicatissimus esse solet minimisque teperescere. Accessit et peregrinatio tua, quæ diu me fecit incertum, nec dum incertus esse desii, ubinam meæ

te litteræ reperturæ sint: et nuntiorum raritas, familiare incommodum mediis et in urbibus, dictu mirum, haud aliter quam in silvis solitario degenti. Nec vero negaverim per hoc tempus, quod tacitum iure tuo queris, aliqua me dictasse, quæ relegens mittenda non censui, non aliam ob rem, nisi quia nimis vera, nimis libera visa erant. Nihil enim sæculis nostris invisius quam duo hæc, veritas et libertas. Itaque præferendum duxi te unum, quo cum esset mihi facillimus semper in gratiam reditus, silentio lædere, quam multos eorum hominum, quos mihi iam pridem sola veritas hostes fecit, rursus infestæ vocis aculeo vulnerare, quorumque nonnullis cruentæ cicatrices nondum hærent, nondum vetustorum dolor vulnerum resedit. Nec illud interpretereunda posuerim, quod sæpius questi sumus, epistolis quidem tuis stili decus obstare, ne ad me intactæ, neve nisi post longum tempus veniant; nec stili modo sed apicum raram et insolitam quamdam formam; hinc rerum ac verborum gratia, ceu nativa specie ingenii, hinc digitorum adventitio ornatu, animum simul oculosque intendentibus. Contra autem meis ad te ire volentibus quid obstet, nescio, cum id sciam plurimas me misisse quæ calle medio subistere, quasi matronæ severiores, a quibus nollent turpibus velut adulteris, vim passæ. Sic non sola nobis actuum, sed affectuum quoque libertas interiit. Proinde nuper Patavio rediens, illic enim ex negotio ieram, etsi Venetias ex otio petiissem, in ipso itinere formosissimas duas ac gemellas, quas novissime partu uno foecundissimum tuum pectus effuderat, inter quorundam manus reperi, non malorum quidem hominum sed

quos mirari ista magis stupeam, quam si talpa speculum mercetur, alas bos, asellus citharam, redimiculum simia, fucum corvus. Et quid putas? Lætus abii quando familiæ herciscundæ iudicio una illis, altera mihi cessit in partem, qui tuo solus elogio scriptus eram. En, amice, causam pollicitus silentii causas solvi; multa nunc etiam scripturus, nisi quia temporum premor angustiis, quas ipse mihi feci, imo vero communis amici suavissimus convictus, cui si brevitatem dempta esset, præter te unum nihil defuit. Non sensi blandos et tacitos dies labi. Sed quod calamo vetitum, viva vox peraget. Hunc ergo audies plena fide, qui omnino quid cogitem et quid agam, quæ vita mea sit, denique qui me totum et omnes reculas ac speculas meas novit. Vale nostri memor.

## EPISTOLA VII.

FRANCISCUS PETRARCA FRANCISCO PRIORI SANCTORUM  
APOSTOLORUM S. P. D.

Discessisse amicum cuius nuntiaverat adventum: se epistolis  
suis colligendis operam dare.

Non tuam, fateor, legere visus epistolam sum, sed Flacci, cum quo iocans Cæsar: vereri, inquit, mihi videris ne maiores res libelli tui sint, quam ipse es. Sane quæ illi defuit, tibi adest mediocris et elegans statura. Sibi ergo vel ludicra, tibi quænam tantæ brevitatis excusatio iusta est? Sed quid loquor? Providisti enim et omnem hanc calumniam in angustias temporis

reiecisti. Credo ædepol, nam et ego persæpe idem patior: ut cum multa scribere cupiam, pauca sinar. Proinde quid quæris? An ad me litteræ pervenerint tuæ proximis ad te litteris meis absolutum legeris, et viva illius nostri voce cognoveris, quem salvere iubeo, cuiusque nunc longam ad laboris historiam nil aliud dico, nisi quod pœnitet et pudet et miseret talem virum a me et meis, imo suis laribus, tam adverso tempore dimisisse. Sed urgebat voluntas eius, cui prorsus obniti nefas credidi, et minaces auras, gravidum cœlum, turbida nubila, herbisque et floribus gaudere soliti vellus arietis imbribus uvidum viderem, et vicissim monstrarem sibi. Quid vis? Non aut Lycomedes Neoptoleмум, aut in fabulis Phætontem Phœbus mœstior dimisit. Sed quid agerem cum amico, quum nec horum alter cum nepote aliquid, nec alter cum filio potuisset. Cessi igitur, et dimissa animi mei parte, anxius substiti, donec litteris suis illum non exiguam ancipitis viæ partem emensum, Padumque et comites supra solitum tumido tunc ore ferventes evasisse didici: non ante tamen animo quieturus, quam quum suis aut tuis litteris in patriam pervenisse didicero. Transmisso enim rege fluminum, superest pater montium Apenninus, cuius sibi iuga substraverit oro Illum qui solus *respicit terram et facit eam tremere, tangit montes et fumigant*. Restat ut fatear te pro his novissimis diebus iure silentium meum queri, quamvis ad hanc ipsam querimoniam satis, ut arbitror, epistola superiore responsum sit. Quod si totum amicitiae nostræ tempus ad calculum trahis, aut ego fallor, aut tu mihi numero litterarum adhuc debitor manes. Siquidem



inter nugellas meas, quas epistolas quidam vocant, quasque nunc maxime cuiusdam ingeniosi hominis et amici digitis coacervo, nullius ferme quam tuum crebrius nomen erit, licet vel tua vel mea vel amborum sors simul intemperans et inepta, nec sui potus appetens quorundam scholasticorum sitis, multas, ut audio, tuas huc, et meas illuc properantes averterit. Vive et vale.

Mediolani, III. Idus Aprilis propero.

### EPISTOLA VIII.

FRANCISCUS PETRARCA AGAPITO DE COLUMNA S. P. D.

*Ægre fert incusari se ob partas divitias  
amicorum oblivione captum inolescere.*

Epistolæ principium tuæ lætus legi, progressum moestus, exitum incertus, stupens omnia usque adeo ut pene in somniis me legisse crederem; tam varie huc illuc hiantem stilo animum egisti, ut nec quid animi scribenti tibi esset, nec quam in partem suspensum lectorem depositurus esses, inter legendum præsagire possem. Quid vis dicam? Nondum mihi videor expectatus et adhuc somnio, nec quem sensum tuis ex dictis eliciam scio: sic amara dulcibus, læta tristibus, obscuris clara, dubiis certa permisces, ut fel melle confusum hausisse me suspicer, aut nectar absinthio, aut si qua usquam rerum similis mixtura, quæ gustum linquat ambiguum. Sed iam pharmacum huius-

modi quo potasti animam dulciora tuis e fontibus expectantem utcumque fando digeram, si possim. Prima epistolæ tuæ pars in memoriam iuventutis meæ tuæque vel pueritiæ vel adolescentiæ me reduxit; ubi quanta mihi per id tempus egregiæ tuæ indolis excitandæ, adiuvandæ atque omnibus modis attollendæ cura fuerit, quo studio, quibus artibus ad solidum cibum te a liquido lacte provexerim, quam denique semper te in primis habuerim, pia et memori diligentia prosecutus es. Ego autem, fateor, in amore cessurus nemini, in profectu nihil omnino mihi arrogo. Totum in te quantumcunque est, quod pro tempore multum esse gratulor, non ego (nisi forte gaudendo et mirando et laudando, qui acres stimuli generosis animis esse solent), non quod sciam alter quicumque mortalium, sed divina largitas et iugis labor ardentisque vis ingenii tui fecit. Quod cum ita sit, gaudeo tamen tibi aliter videri, et delatam falsis licet ex tabulis tantæ gloriæ hæreditatem non invitus adeo. Itaque quidquid in re sit, hac tua a tergo relictarum rerum commemoratione tam sedula, et hoc tali tuo testimonio de me nihil animo meo dulcius, nihil poterat esse iucundius. Sed hanc mihi dulcedinem quanta protinus amaritudo resperserit dicerem expressius, nisi apud te ipsum loquerer, qui eisdem in litteris utriusque mihi materiam præbuisti. Attingam tamen. Dicis ergo aliis quidem verbis, sed hac plane sententia, et sic dicis ut ludens valeas videri, nisi quia obnixè nimis et serio stilum figis, me, alternante et versante res humanas fato ad magnas divitias evectum celsioris status et ædificiorum insigni quadam elegantia gloriantem, te cœli ipsius inclementia ex

altiore fastigio exulem atque inopem, sed modesto victu, veste humili, submoturoque vix imbrem tecto et lare prorsus exiguo contentum, ad litus studii Bononiensis ex illo, quo diu multumque iactati sumus curialium tempestatum pelago, velut e gravi naufragio eiectum spernere, fugere, oblivisci. Nec satis id fuerat, nisi illud insuper addidisses, me, quod peius est, nequid verborum tuorum in hac saltem accusationis parte variaverim, damnati iniuste super tunicam innocentem sortes mittere. Quod crimen me quantalibet intentione animi intelligere nequivisse profiteor. Sicut nec illud, ubi ais me arborem descripsisse vanitatum, cui insertum esse tuum nomen audieris. Ego vero descripsisse me vanitatum arborem nullam scio, nisi quia si verum recognoscere non piget, quidquid scribimus aut legimus, quidquid cogitamus aut loquimur, quidquid agimus aut optamus, tota denique vita hæc, aut certe magna ex parte, vanitas est et, ut ait ille, qui cum omni sua sapientia hanc ipsam publicæ vanitatis infamiam non evasit: *vanitas vanitatum et omnia vanitas*. De quo pridem breve opusculum, meo more stiloque nec elaborato penitus nec neglecto, scribere aggressus, implexsem utique, nisi quia trahenda res visa est, quod novi vanique aliquid quotidie affert vita hominum, unde maior uberiorque sit libellus. Cæterum nusquam ibi, nusquam alibi hactenus tuum nomen inserui, destituente quidem me materia, non affectu. Quamquam si illustres ævi nostri viros attigissem, non dicam te, ne tibi, quod placatus non soleo, iratus adulari videar, at certe nec patrum, nec patrem tuum silentio oppressurus fuerim. Nolui autem pro tam

paucis nominibus claris, tam procul tantasque per tenebras stilum ferre: ideoque vel materiæ vel labori parcens, longe ante hoc sæculum historiæ limitem statui ac defixi. Proinde quia, ut dixi, obiectum mihi abs te crimen illud geminum vestis ac nominis omnino non capio, ut his omissis ad intellecta respondeam, in eo quod de fortunarum mearum prosperitate dixisti, vide ne vel te aliquis vel tu me luseris. Inficiari nequeo mihi nescio quid annui census accrevisse, otiosoque ac sedenti ingestum quod multis occupatis sollicitisque negatum est. Quantum vero simul anni sumptus accreverit, id nempe non æstimant qui obliquis oculis omne alieni patrimonii metientes augmentum, quæ semper eis exigua videntur detrimenta non numerant. Illis ego nil amplius, quos satis sua torquet invidia. Tibi autem, cui vitæ meæ rationem redditam ac probatam velim, hoc præterea dixerim. Plusculum est proventus et plusculum est impensæ. Sub anni exitum attritior, rubiginosior, laxior est crumena, non plenior. Itaque, tanto iam tempore inter divitias exacto, nulla reditior, nisi aliquot annorum accessione, et contemptu liberiore rerum pereuntium factus sum. Hæ divitiæ meæ sunt, non quas invidia prædicat, sed maiores multo et meo quidem, reor itidem tuo iudicio, certiores. Neque tamen ista sic accipies, quasi me fortunæ poeniteat, aut vulgi more contra illam querimoniis attingar inanibus; quod et illam vulgo aliquid magnum dici, vere autem nihil esse per se ipsam magnis auctoribus fidem habui. Et illi uni mea omnis innititur fortuna, cui cum Psalmista olim dixi: *Deus meus es tu, in manibus tuis sortes meæ*. Abunde, large, munifice, etsi

non forte cupiditatibus, at profecto necessitatibus est consultum meis. Illi gratias Deo qui multo verius quam Maroneus ille Tytiri deus

Nobis hæc otia fecit

adeo clementer et in utramque partem æquabiliter, ut animum nec arens inopia, nec exundans copia fatiget, sed hinc illinc æquis, ni fallor, spatiis abesse me gaudeam. Divitiæ meæ hactenus et mihi sufficiunt et amicis non deficiunt egentibus, quique non ultimus opum fructus est, urunt invidos, cruciantque. Mediocritatem optimam ait Cicero: Flaccûs eo amplius auream vocat, credo ut sic optimam probet inter illos, quibus nil auro melius esse persuasum est. Hæc ergo rerum optima, hæc vere aurea, Deo præstante, obtigit, ut tu saltem et mei amator et virtutis, huic statui gratuleris, non insultes aut detrahas. Ego autem si non hac quidem sorte contentus sim, quo progrediar? Ubi metam figam? Seu quid restat, nisi ut inter Arimaspes unus gentis adscitus, uno seu verius nullo oculo cum Arctois gryphibus bellum geram? Et hoc quidem de opibus meis, de quibus hercle nunquam loqui cogitaveram, dicta sint, in quarum æstimatione, si a vero forsitan tua deflexit opinio famæ decepta vestigiis, non mirer, quod et tempus et locus et ipsa rei natura errorem peperisse potuerit. Nam et diuturnæ nobis absentiae moras fecit rerum status Italicarum, et licet inter præsentis rei familiaris æstimatio eo solet esse difficilior, quo facilior est vel iactantia mortalium vel querela, dum vel superbia falsas opes simulat, vel falsam flet avaritia paupertatem. In eo sane quod sequitur, quam vel mei vel

tui ipsius oblivione prolapsus sis, prorsum mirari satis et stupere non possum. Ais enim, quod utinam ratione non expressa diceres, ut mihi liberum reliquisses dictum tuum (quod cupidissime facerem), excusare; sed dicis te propter tuam paupertatem (quæ ut est genus et virtus, quomodo tecum esse possit non intelligo), mihi contemptibilem effectum, si diis placet, propter meas divitias, quibus, ut audisti, nec egeo nec abundo, quibusque posthac minus ac minus vel abundare posse videor vel egere, quod mihi et incuriositas rerum maior, et via minor in dies, cui illud viaticum quærebat. Heu quam vera sunt proverbia! illud insigniter, multos modios salis simul edendos esse, ut amicitiae munus expletum sit. Ergo ego hanc tuæ opinionis iniuriam merui, ut aut propter opes, quantumvis affluerent, superbirem, quia scilicet plurium debitor invidiaeque patientior factus essem, quo altius ascendissem, eo gravius casurus; aut propter paupertatem, non dicam te, quem inter omnes coælaneos tuos singulari quadam veneratione complexus sum, sed quemcunque despicerem? cum contra sæpenumero post divitias despexerim quos ante suspexeram atque colueram, non quia per se vel contemnendæ divitiæ vel amabillis sit paupertas, cum a philosophis hæc inter indifferentia numerari didicerim, sed quia, quod observatio longa me docuit, multis adversitas fuit schola virtutum, prosperitas vitiorum? Verum ego scribendo iam fessus sum, nec minus inquirendo quomodo tibi venit in mentem ut hæc diceres et tuo stilo et meis moribus aliena: nisi forte silentium meum æquo longius, fateor, castigare hoc supplicio voluisti. Quam iuste non disputo: omnis apud me tanti

viri castigatio iusta est, nec modo iusta, sed grata, sed iucunda, sed dulcis. At si mei meminisses, quem tui tibi fingis oblitum, neque tibi penitus persuasisses me quasi Circæis poculis nescio quibus divitiis transformatum, non hoc contemptui adscriberes sed naturæ. Nota tibi pridem tarditas mea est, et occupatio, et curæ, quæ inclinata iam die, crede mihi, viatoribus acriores esse solent. Accedit et penuria nuntiorum. Quamvis enim tu mihi quam miror exquisitissimam ædium insolitamque magnificentiam obieceris, ego tamen adhuc Ambrosii hospes sum, et in extremo civitatis angulo sæpe etiam rure abditus, quid agat urbs nescio. Tu vero iam vale, teque si potes ad credendum coge me nec divitem esse, nec inopem, et quisquis sim, quamlibet non dicam tacitus sed mutus fuerim, tuum esse.

Mediolani, Idibus Aprilis.

---

## EPISTOLA IX.

AD TRES AMICOS.

Se illis invidere quod una vivant.

Tricipitem epistolam tribus magnis textam calamis, et trino murice coloratam ter et amplius lætus aspexi, ad quam modo nil aliud nisi nil esse quod artificiosa non possit eloquentia, quæ quantum sæpe potuerit si exsequi velim, longior sim quam tempus ad hæc scribenda concessum, quod tam breve est, ut nihil potius quam tam pauca scribere mens fuerit. Nunc sane unum potuit quod impossibile prorsus rebar, ut Baby-

lone scilicet habitantibus inviderem. Invideo quidem vobis in urbe omnium pessima, sed honesto illo sublare degentibus, malarum vacuo cupidinum, et Babylo-  
nicis moribus inaccessu, denique simillimo campis Ely-  
siis, quos inter Averni dolores ac miserias lætos dicunt.  
Hæc vobis simul omnibus, quibus tam multa sæpe sin-  
gulis, inter festinationem et somnum et occupationem  
et auroræ metum et frigus et tussim, papyrus quoque  
et calamum ac lucernam rebellantes, ut licuit scripsi  
II. Idus Ianuarias ante lucem. Vivite felices, et valete  
mei memores.

---

## EPISTOLA X.

FRANCISCUS PETRARCA IOHANNI ARETINO S. P. D.

Agrestis vitæ tranquillitatem nactum gratulatur, et suam vivendi  
placidam rationem describit.

Pone spem prolixioris epistolæ, quæ terrere lecto-  
rem solita, te unum propter vivum colloquii desiderium  
delectat. Iam hinc ne vagari valeam provisum; hora,  
gelu, somnus, labor, occupatio, frænum stringent. Ad  
hoc papyrus brevis de industria, velut angustior area  
ad exercitium calami liberioris, assumpta est. Equidem  
tuis in litteris te procellis elapsam, neque tantum iam  
in portu navigantem, sed in litore sedentem video.  
Gratulor tibi. Nil de te lætius nosse potueram. Me au-  
tem versa vice noveris in periculis securum. Oh! ferreum  
caput et in mediis tempestatibus quiescentem usque  
adeo, ut nisi alios circum iactatos æquoreo turbine vi-



derem, et fragore nautico undique pulsarer, in pelago esse me nesciam. Clavum regentis ad pedes sedeo, et fluitantem puppim non immotus certe sed intrepidus teneo, et exitum opperior eo animo, ut omnis prope iam ventus meus sit, et in litore quolibet portus mihi. Ita tædio illi meo rerum humanarum incuriositas primum, inde segnities, post securitas, ad postremum torpor obrepsit, et nisi superbum esset mihi tribuere quod de Marco Catone scriptum est, ipse mihi quoque videor interdum, et præsertim hac tibi hora noctis hoc scribens, eodem illo habitu quo avunculum quondam suum Brutus invenit: *insomnis, scilicet, et cunctis timens securusque mei*. Sed de hoc experientia viderit; imo quæso non viderit. Stulti est enim periculum optare experiendi libidine. Reliquum est ut plebeia togæ tuæ plusquam Crassi divitiis invideam, et rustico lare tuo, quo uti prohibeor, suspirem. Vale.

Mediolani, V. Kalendas Februarias ante lucem, propere.

---

## EPISTOLA XI.

FRANCISCUS PETRARCA STEPHANO DE COLUMNA PRÆPOSITO  
S. ADEMARI S. P. D.

Germanæ amicitiae sensus pandit, et malos quosdam  
homines insectatur.

Litteras tuas summa et sancta cum voluptate perlegi. De voluntate quidem mea te certum esse gaudeo, quæ etsi rerum argumentis careat, suis se prodit indi-  
ciis, eminet, elucet, apparet: contra ego de tua non

aliter quam de propria certus sum. Multa mihi de te litterarum ipsarum sententiosa brevitās, multa quoque noster hic Cicero Pergamensis Arpinatis illius hostis. Sed ad persuadendum mihi de te nemo non satis est-eloquens : nullus autem plura quam animus ipse meus in silentio. Cupio te videre, quod etsi taceam nosti, et licet patribus conscriptis nulla prorsus nostri divortii cura sit, illis tamen invitis, te video melioribus oculis: illos vero licet absentia mea delectentur, qua in re una mecum sentiunt, illos inquam vel invitos video. Quid dixi? Quasi nil amplius quam communi more illos videam? Introspectio ego illos, ubicumque sim, et lippus ad reliqua, mirum ut hac in parte sum lynceus. Video animos affectusque abditos, et quod forte non suspicantur, cogitatibus intersum. Actus enim non unus ego, sed totus terrarum orbis, licet hactenus dissimulet, magis ac magis in dies videt: quos, mihi crede, cum plene viderit non feret. Vellem plura scribere cum vix ista potuerim. Nescio enim unde hodie præter solitum ad calamum lentus et ante etiam quam inciperem fessus accessi. Vale, vir clarissime, nostri memor.

Mediolani, VI. Kal. Maii.

---

## EPISTOLA XII.

FRANCISCUS PETRARCA LÆLIO SUO S. P. D.

Arguit quod mœstus et sollicitus sit, et lepide mortem cuiusdam senis Mediolanensis enarrat.

Iam duabus ex litteris tuis pergraviter te turbatum sensi: admirans dolensque et multa mecum cogitans ad summum nihil invenio quod tam tristem facere debeat, quidquid sit. Decet enim virum hac ætate præsertim induruisse iam contra omnes impetus fortunæ. Optimum inter vitæ huius asperitates remedium est quod nihil stat. Omnia humana volvuntur et fugiunt, ut acriter intendenti nulla hic vel gaudii vel doloris materia magna sit, nulla metus aut spei causa, dum sæpe inter ipsos animi motus id ipsum quod mulcebat aut angebat, quodque vel minabatur vel blandiebatur effluxerit, et inter medios apparatus evanuerit. Omnia hæc, frater, vel læta vel tristia in ictu oculi more somnii transibunt, ut pudeat experrectos de nihilo doluisse seu lætatos esse, inanes præterea spes aut metus de nihilo concepisse. Cesset igitur dolor, quæso, conquiescat motus omnis gravitate tua indignus, et si dolendi causa est, cui per me possit occurrere, quidquid id est, iube: parebitur. Non sum hodie tibi aliud scripturus, nisi quod Mediolanensis amicus noster, qui me patrem et te filium vocabat, cum et tu me senior sis, et ipse proavus esse posset amborum, senex iucundissimus, ad æternam lætitiā non sine aliquali mea tristitia profectus est. Licet enim maturus ævi valde, erat tamen adhuc mihi et curis meis gratum

familiare solatium. Vir bonus et nobilis, sed non dives, supremo honore non caruit. Iacet in ipso Ambrosii vestibulo familiæ suæ busto saxeo ac vetusto. Dilexi hominem a quo diligi nos sciebam, cuius in ore tu præcipue multus eras; hominem prope iam ad infantiam redactum, cuius oratio risum vel mœrentibus extorqueret. Disputabat assidue mecum, et cum omnibus, quos mecum deprehendisset, de rebus ad philosophiam aut ad catholicam fidem spectantibus. Copia argumentorum erat inæstimabilis. Nulli hominum, præter me unum, credere dignabatur: in quo tamen non tam rationi vel ingenio quam amicitiae succumbebat. Ingens ei scientiæ fiducia inerat. Omnes homines, sed in primis religiosos, quæstiunculis agitabat, nec rationibus vinci poterat, nec clamoribus fatigari. Quemcunque verbis aggrederetur prius interrogabat an litteras nosset. Qui si negaret, quasi brutum animal spernebat, excussoque capite tacitus abibat. Sin vero se nosse litteras responderet, mox, aiebat, apparebit: et simul quæstio in medium iactabatur, et quidquid ille dixisset, irridebatur affluentibus verbis et nunquam deficiente materia. Sæpe eum velut admirans percontabar, ubinam libri sui essent, aut unde tanta illa rerum scientia tam multarum? Ipse autem frontem digito contingens: « hic » hic, dicebat, et scientiam et libros habeo. Libri enim » humanæ fragilitatis emendicata suffragia, nonnisi » propter defectum memoriæ sunt inventi. » Ridebamus omnes: nihil enim dicebat quod non crederet, et cum his opinionibus nescio quam feliciter, at lætissime sibi erat. Nil iam fere nisi grammaticæ loquebatur, cum tamen illo loquente, nihil unquam Prisciano nihil Aristarcho

tutum esset, galeatis licet; tantis barbarismis ac solecismis armatus in bellum ibat. Denique nuper librum scribere sub tuo nomine cœperat, quem utinam consummasset relicturus nobis hanc velut ingenii sui prolem. Sed an inexpletum Virgilii exemplo flammis damnaverit, an vero Numam Pompilium secutus, humo infoderit, an quid de eo aliud egerit incertum. Triduo ante mortem solito tristior ad me venit, cumque ego causam mutati oris exquirerem, ille suspirans: « hodie, inquit, » quintum atque octogesimum annum expleo; quantum putas vitæ superest? Quinque forsitan et viginti » annos ad vivendum habeo; breve tempus. » Ad hæc ego subridens: « ne dubita, inquam, triginta comple- » bis. » His lætior: « bene habet, inquit, satis est. » Et hoc dicens abiit, nec deinde hominem vidi; neque enim aut moriturus apparebat, aut morbo alio quam senio laborabat, donec die tertio dolentis mirantisque sub oculis ecclesiæ inferretur, more gentis ad vesperam sepeliendus in crastinum. Hæc tam multa iocose in historia tam lugubri ut in memoria senis nostri lugeas simul et rideas. Ille quidem his moribus mihi talium inter graviores curas avidissimo, iam non conviva tantum creber, ut solebat, sed prope continuus factus erat. Denique senectutem eius ruinosam ac labentem omni qua licuit ope sustinui: quod extremum potui, non abeuntem, sed sepulchri limen adeuntem humentibus oculis prosecutus sum. Vale.

Mediolani, Kal. Maii.

---

## EPISTOLA XIII.

FRANCISCUS PETRARCA LÆLIO SUO S. P. D.

Enixe hortatur ut Socratem in veterem amicitiam recipiat, et hunc nihil omnino adversus eum aliquid obloquutum fuisse defendit.

Animi tui statum ex litteris intelligens, et causæ nescius hortabar, ut tranquillitatem solitam servares et mortalia ista contemneres, quæ transeunt et ad non esse festinant. Postea vero non sine gravi animi mei vulnere causa mihi tuæ perturbationis innotuit, quod nescio cuius, sed profecto maledici oris flatibus accensus, contra tuum ac meum Socratem exarsisses: tuum inquam Socratem ante quam meum: idque te mihi, quod probe noveras gravissime dolituro, celatum esse voluisse nunc intelligo, hinc maxime quod rem tantam tamque atrocem non ex te sed aliunde didicerim. Oh! quid dicam? aut unde ordiar, qui omnino nihil præter meros dolores aut cogitare valeam aut loqui? Sic et animum stravit, et solitum vocis iter obstruxit mœror. Et, oh! utinam nihil unquam lætius illi accidat, qui dissidio vestro et dolori meo causam dedit. Ergo ego frater tam exigui, tam nullius pretii sum apud te, ut in tanta mutatione animi, in abdicando tali amico, tam fidelis, tam veteri, tam probato non fuerim vel per litteras requirendus, vel, si id non mereor, saltem post factum per litteras edocendus, præsertim cum mali totius, ut dicitur, causa sim? Audio enim vipeream illam linguam, quæ tibi indignum illud virus infuderit, nil aliud ipsi Socrati obiicere, nisi quod ille mihi contra te scri-

pserit. Quod quidem, si sapientia illa tua, quæ ab adolescentia tecum erat, et cum tempore crevisse debuerat, cogitare omnia et circumspicere voluisset, ab omni parte falsum prorsus et inopinabile cognovisset. Occurrisset utinam tibi Platonis historia, qui accusatorem Xenocratis amici sui, qui sibi tunc, ut nunc Socrates tibi detraxisse ferebatur, respuit et abiecit, rem impossibilem dicens tam dilectum amicum et tam carum vices amoris sibi non reddere. Tu vero tam facile de amico nescio cui, sed utriusque, ut arbitror, et quod certe scio, veritatis inimico, credere potuisti? Oh! nimium præceps et prona credulitas, quæ mille olim evertit amicitias. Vellem tempus habere ad scribendum ut animum habeo. Multa hic dicerem quæ silebo. In summa tamen, amicitiae venenum suspicio est, quæ quidem in generoso et alto corde non habitat, qualiterque nunc in tuum pectus obrepserit miror. Ergo Socrates tuus de te male locutus est? Cur quæso aut qua spe? Quid tu illi feceras? Aut quid ille lucratus esset quando te mihi, quod nec ipse nec alius posset, odiosum effecisset? Non erat tantus furor credibilis de homine tam discreto. Licet enim extra orbem italicum natus sit, nemo tamen animo et voluntate magis Italicus vivit: quod ut ita esset nos duo ante omnes mortales fecimus. Et proh pudor! Impudens obtrectator non erubuit dicere, Socratem male mihi scripsisse de Lælio. Nunc tu viro sapientissimo atque optimo, stulti et iniqui hominis crimen oppositum quid virium habeat intende. Si fixeris animum, si omnem iracundiæ motum nubemque propuleris, si ante oculos tuos totum ad hanc diem non modo concorditer, sed una prope anima nobis

actum vitæ tempus adduxeris, videbis uno verbo tria magna mendacia nullum colorem veritatis habentia. Quibus animadversis, ipsa veritas pro innocentia partes aget, ipsa, me tacito, tua conscientia perorabit, et amicus apud amicum accusatus absentis amici patrocinio non egebit. Crede mihi, Læli, imo equidem tibi crede qui animos moresque omnium nostrum non aliter quam proprios tuos nosti, et fortassis eo amplius, quo profundius et incorruptius aliena cognoscimus quam nostra: tibi crede non alii: veritati crede tecum intus in animo colloquenti, non in auribus obstrepenti perfidiæ delatorum: crede, inquam, et ut spero iam credis, quod nec Socrates de quoquam male scriberet, et si de omnibus, nunquam de te, et si de te, aliis, nunquam mihi. Quæris causam? Scit quod ego non crederem, potiusque sibi irascerer, quam tibi. Vere hoc dicam: duo estis quibus omnia crederem, nisi hoc unum, si scilicet alter alterum accusaret, præcipueque de crimine contra me aut famam aut statum meum admisso. Quod propositum illi, qui mea omnia plane novit, ignotum esse non poterat. Qua igitur cœcitate animi vir cautus, etsi odisset utique (cuius audeo dicere nec tibi nec alii vel tenuissima suspicio unquam fuit), auderet ad tribunal infestum trahere conspicuæ famæ reum, quem veritas excusaret, iudex nec instrumenta nec testes expectaturus absolveret, unde sibi nil penitus præter accusatoris nomen atque invidiam superesset? Possunt, mi Læli, possunt dici ista. Est enim effræne os humanum, cum nullum æque animal fræno egeat. Dici omnia possunt: credi omnia non debent, dicam quod sentio, nec audiri. Viri amici, in quibus clarissimum semper et



maximum Lælii nomen fuit, surdas delatoribus aures habent, atque omnia respuunt quæ veræ amicitiae sunt adversa. Neque enim satis est falsa respuere. Hac una in re veri falsique discretio inhonesta est. Quidquid adversus amici fidem dicitur, fide careat necesse est. Nunquam ex quo semel de amico decreveris, de amicitia dubitandum erit: alioquin perpetuo nutabit amicitiae fundamentum, fides. Itaque consilium Biantis a Valerio laudatum, quo monemur sic amare ut aliquando osuri, in meretricio forsan amore locum habeat, ab amicitia relegetur; quam cum nisi inter bonos esse non posse omnium nobilium iudicum sententiis diffinitum sit, omnis inde malarum fraus artium, omnis degeneret indecora vafricies excludenda est. Nulla iam diffidentia, nullus metus. Cum enim amicitiae glutino iungantur animi, et e duobus, ut dicitur, unum fiat, par est ut quam quisque de se ipso, eandem de amico spem concipiat. Multo ergo melius multoque iustius apud Tullium Lælius consilium illud et rationis ope et Scipionis auctoritate redarguit, cuius ut nominis sic te morum et amicitiae successorem, eadem qua ille fuit, decet esse sententia: nec amando odium cogitare, sed sic amare ut odisse nequeas si velis. Magna quædam et divina res est amicitia, sed simplex; magnæ consultationis egens, sed unius. Antequam diligas eligendum est: cum elegeris, diligendum: post dilectionem electio sera est. Actum agere veteri proverbio prohibemur. Nullus exinde suspicionibus, nullus odio locus, nihil denique reliqui est nisi amare. Quomodo vero illum ames hodie, quem cogites cras odisse? Iure igitur et responsum illud Platonicum laudatur, cuius supra

mentio est, et factum illud, quod quoniam valde probo sæpe commemoro, Alexandri Macedonis, qui licet in reliquis temeritate præcipiti, in hoc uno constantia tanta fuit, quod cum æger ab amico medico temperatum poculum accepturus, interim non cuiuscumque hominis sed magni alterius amici litteras accepisset, quibus medici illius in necem suam multo auro ab hoste corrupti cavere veneni insidias monebatur, litteras quidem legit, at rem pressit donec qui accusabatur pro ministerio exequendo in cubiculum regis ingresso, illico rex assurgens et læva litteras tenens, dextra poculum incunctanter arripuit, atque hausit intrepide, legendasque mox litteras innocenti stupentique medico dedit: dignus ob hoc ipsum qui ut tunc, sic semper suorum ab insidiis tutus esset. Huc itaque rem deduco, ut amici crimen audire velle turpe, credere vero posse, turpissimum ostendam. Et quisquis in amici vita fidem delatoris examinat, ipse iam læsæ amicitiae reus est. Sed heu! me miserum quam difficile quæritur omnis vitæ delectatio, quam facile perditur. In sola quidem amicitia parum faustus Socrates, in qua ut maxime felix esset, et amicitiae studium et vitæ integritas merebantur. Viginti octo annis amplius amavit te, quod præter te unum nemo me melius novit, ut unus nebulo, una hora paucis te sibi falsis verbis eriperet, nec eriperet modo, sed de amico et fratre dulcissimo durum hostem faceret? Da veniam, frater, non debuit hoc accidere posse me vivo, ut non modo sine causa, sed quantalibet quoque cum causa, tanta distractio fieret animorum, quos et proprio amore coniunctos et visco meæ recordationis inseparabiles arbitrabar. Nunc quid agam, frater, nescio.

et Deum testor, ad suspirandum ne dicam lacrimandum pronior sum, quam ad loquendum; ita me perturbatio vestra perturbat et concutit. Loquar tamen utcunque quod in animo est. Possem sacramentis paginam implere: sed quia sæpe minus creditur multa iurantibus, simplici verbo meo, si mereor et si tibi placuerit, fidem dabis. Nunquam Socrates de te mali aliquid locutus est: mihi bona autem sic multa sæpissime. Multas adhuc litteras digitis suis scriptas, si diligenter excuterem, invenire possem, in quibus apertissime profitetur me alium amicum in curia non habere, nisi te unum: reliquos qui fuerint vel vita vel patria vel officio decessisse: te promotorem, te perpetuum adiutorem vocat mearum rerum: te solum esse, cuius fides illa communia temporis et absentiae damna non sentiat. De his et horum similibus et antiquas et novas illius litteras habeo. Huius ego sibi sum testis. Si furcifer ille his contrarias litteras vidit, nescio: sed hoc scio quod ad me litteræ non venerunt. Tu quidem cui potius fidem habeas an accusatori falso et nequam, an fideli et vero excusatori, ipse videris. Spero tamen apud te non ultimum fidei locum habiturum esse suspirium meum, o amantissime Læli, quod tibi per tot terras et per media Alpium iuga pios affectus meos et has anxias ac sollicitas voces perfert. Audies me, mi Læli, et nisi in te fallor, exaudies. Rogo igitur, obsecro, obtestor, adiuro, per amicitiae fidem, per mutuam caritatem, qua nulli usquam cedere videbamus, per quidquid inter nos pium, sanctum, fidum, iucundum, amabile fuit unquam, aut esse potest, vel si hoc parum est, per memoriam illius modo gloriosissimi ducis nostri, qui licet ob eximiam vereque

cæsaream animi magnitudinem Iulius Cæsar dici meruisset a nobis, vera tamen patriæ pietate Camillus nostrorum temporum fuit, aut Scipio; perque illustris sed heu! nimium caducæ familiæ, natorum eius nostri dum Deo placuit amantissimorum, nobisque prædulcium et carorum pignorum, et super omnia per semper mihi flendi, semper memorabilis Ascanii nostri prorsus heroicam vereque nobilem animam, quæ festino abitu non nostram modo, sed Romæ sed Italiæ spem fefellit, et florem priscae militiæ renascentis acerba morte præsecuit: per hos, inquam, per me, per temetipsum oro te ut hunc scrupulum qui me premit, urit, torquet et cruciat mihi quam primum eximas, et si me diligis aut unquam dilexisti, illico antequam hæ litteræ e manibus tuis abscesserint, Socratem ipsum miraculo tantæ huius tuæ mutationis attonitum, fortunæ nunc iratum suæ vel adeas vel accersas. Hoc precor, hoc facile est. Convenite modo distractosque animos vultusque contrahite, neve alterutrum, quod valde amastis horrescite, et nisi me vultis in lacrimis ac dolore senescere, redite in idipsum, neu viscera mea canibus lanianda discerpite. Nunc videbo si me diligis, ut fama est. Si quidquid aliud scribes, nisi factum esse quod postulo, carus tibi diu falso sum creditus. Sin convenisse vos audiam, voti certus evasero, ut quem tibi amicum abstulit aliena perfidia, restituat fides mea. Nullas susurronum voces, nullas irarum reliquias timebo. Multa inter absentes audet invidiæ murmur. Magna autem intermissi congressus efficacia est. Hanc solam precor, hoc unum ago; id si mihi præstiteris, de reliquis non laboro. Quid te agere oporteat, et quid loqui pietas ipsa et tam

longi amoris recordatio, simul amici frons conspecta monstrabit. In illius oculis leges quod nec ego possim dictare, nec Cicero. Vale.

Mediolani, III. Kalendas Augusti, prima face.

---

#### EPISTOLA XIV.

FRANCISCUS PETRARCA LÆLIO SUO S. P. D.

Gratulatur eius cum Socrate redintegratam familiaritatem, asperitatem hiemis conqueritur: denique se ab omni munere in curia obeundo quam maxime abhorrere.

Crescens occupatio, decrescente vita, facit ut solito tardior ad scribendum sim, ac ne forte aliam suspiceris, occupatio illa vetus sed assidue repullulans studiorum meorum, in qua non seniliter tepesco, sed iuveniliter inardesco. Mirum: cum mihi omnia fastidio sint, illa una sine tædii sensu nova mihi in dies oblectamenta congeminat. Hodie primum mihi videor cœpisse. Impletur ad litteram in me quod ait ille vir sapiens: *cum consummaverit homo tunc incipiet, et cum quieverit tunc operabitur*. Accessit absentia longior. Magna siquidem parte brumæ huius et Patavii et in angulo Venetorum, ut Livii verbo utar, moram traxi. Hoc ipso die et hac hora Mediolanum redii, fessus et ventis ac frigoribus adustus. Non sunt ad scribendum instrumenta nec animus; hebes calamus, atramentum glaciale, papyrus squallida, manus rigens, tempus intractabile sine exemplo, quod usque ad religionem, ut dicitur, et horrorem versum annum fecit insignem. Nunquam enim in me-

moria hominum inter Alpes et Apeninnum tanta vis nivium incubuit. Magna nostris in urbibus domorum, magna in agris arborum strages, magnæ utrobique mortalium querelæ, quas nunquam tamen aut ver florem aut frugifera æstas aut vinifer autumnus omnibus naturæ deliciis atque ubertate sedaverit. Coeterum annus hic annum retro quartum, hoc est sextæ ætatis millesimi trecentesimali quinquagesimi quarti finem et sequentis initium, quibus nihil algentius fieri posse, et ut sic dicam nihil hiemalius videbatur, quando hic in Ambrosii basilica Cæsar noster adeptus ferream coronam ad Romæ percipiendum aureum diadema profectus est, cuius ad urbem iter an cursum dicam tu qui in Galliis quoque tunc eras mira celeritate prosecutus, familiaritatem eius arctissimam moribus et ingenio meruisti; annum inquam illum hic præsens gelu æquavit, nivibus vicit. Sed quid ago? Num supervacuas horas aucupari videor qui necessariæ scriptioni modo imparem me dicebam? Has delectatio vires habet, ut frigus æstumque non sentiat, et laborem amet, et lassitudinem aspernetur, denique nil recuset quod diu illam exoptata in operatione detineat. Ecce dum te alloquor et fatigationis et brumæ et cœpti immemor factus eram. Sed ut domum reversus ad rem redeam, fideli nuntio præter spem reperto, etsi valde properet, nullo modo pati potui eum sine meis ad te litteris abire. Et festinationem eius et occupationem meam et hiemis asperitatem vicit amor tui. Iam in primis totam frater ex ordine tuæ suspicionis historiam intellexi, neque miratus sum, ut putas, potuisse tibi tam multis ingeniis persuaderi. Nil detrahentium dolis impervium, nil quo non

palpitans et blanda vox penetret. Illud potius et miror et laudo quod tam cito iram tuam longo decoctam spatio ac digestam evomuisti: pro salute animi rem optimam. Quid enim, Læli, ais an, te favente, ausim contra Aristotelem mutire? Sacrilegio proximum multis forte videbitur, cum forte potius illum pertinaciter in omnibus sequi velle sacrilegum sit. Certe Cicero ipse vir tantus, elegantissima urbanitate illa sua, interdum culpam sibi tribuere maluit, quam viri huius errorem manifeste refellere: quale est illud quod cum Aristoteles omnes ingeniosos melancholicos esse dixisset, Cicero cui dictum non placebat, iocans ait: gratum sibi quod tardi esset ingenii, clare satis his verbis quid sentiret intimans. Sequamur et nos Ciceronis exemplum. Aristoteles quidem ait in Rhetoricis bene dixisse nescio quos, quod ira multo dulcior est melle. Quid hic dicam nisi pergratum esse quod mihi gustus hebetior sit, qui hanc dulcedinem non sentio, mirarique me gustum hunc Aristotelicum vel illorum, quicumque prius id dixerint? Etsi enim apes, ut aiunt, mel dulcissimum ex amariusculis quibusdam herbis eliciant, ego tamen, ut dixi, hanc iræ dulcedinem non gustavi. Apud quemcunque vero sit melle dulcior, apud me felle tristior est ira. Ita dico si de sensu proprio loqui velim. Quod si Aristotelis in verba iurare oportet, et quidquid ille dixit quasi cœleste oraculum amplecti, ut non solum dulcis sed multo etiam melle dulcior ira sit, fecisti tamen optime qui feram illam immanemque dulcedinem ac stomacho nocituram reiecisti, et segni situ contractam animi rubiginem deterdisti. Pro quo quantam tibi gratiam habeam quantumque mihi vel ad pristinum tui amorem vel ad iudicium tuæ virtutis ac-

cesserit, multo tibi facilius fuerit cogitando, quam mihi loquendo assequi. Ad summam scito, cum multa per omnem vitam mihi gratissima feceris ac dixeris, nihil ex omnibus unquam gratius fuisse, quam quod domitis affectibus tuis radicitusque convulsis, consilio meo, fido licet, opinioni tamen et sensibus tuis adverso, tanta animi facilitate ac pietate tam subito paruisti, ut quoniam te amor urgebat, nullasque moras caritas dabat, litteris meis vix perlectis, easque ipsas manu proferens nostri Socratis in amplexum atque oscula, in illo me etiam complexurus ac deosculaturus irrueres, multisque tam vestris quam adstantium lacrimis, quæ ubertim per vestros oculos de meis præcordiis erumpebant, fraternam in gratiam rediretis. Nunc quid in te possim scio, quod nec prius ignorabam; sed novis experimentis vetus notitia solidata est. Agnosco Lælium meum. Is est quem sperabam: semper detractores oderit, et sæpe hoc perditum tempus flebit. Nam Socratem multo ante noveram lamentis ac gemitibus tabescentem, tuumque dissidium illud inter gravia vitæ damna atque acerrimas fortunæ iniurias numerantem. Totum qui sequitur epistolæ tuæ textum sciens transeo. Credo omnia, imo vero scio. Novi fidem tuam, et curiæ mores novi. Sed unum viceversa mihi credi flagito, quod ne mihi neges caritas iubet: siquidem non modo laborem illum magnum, perpetuum, inglorium, tædiosum, et servitutem illam hominum multorum nulla mihi ex parte placentium, postremo successionem Calvi illius Parthenopeii, boni hominis licet et solliciti, et, ut dicere solebat, amici mei, nec litterati tamen nec famosi: sed rubicundum quoque pileum non dico ambiendum precibus,



sed ultro etiam oblatum si reciperem, ut modo res sunt, et mores ordinis illius, abscissum gladio et rubenti sanguine madidum caput perdam. Crede mihi, si quod in terris est veri, hoc verum, sive, ut emphatice dixerim, veritas ipsa est. Quod ideo sic ardentem deserui, ut nunquam posthac vel pro tali vel pro simili causa laborem inutilem vel tu vel alii capiant amici: neque vero se repulsis obiciant pro eo quod si ingere-retur abiicerem, quodque, si meministi, ante annos duodecim, quando et iunior, et laboris patientior, et dierum largior fui, et curiæ status, et pontificum nobis favor alius, oblatum, amicis licet indignantibus, non recepi. Quo ergo nunc animo, qua mei oblivione, iam senior successor alienæ sollicitudinis fieri velim, eoque aspirem quo cum honestius tum promptius pervenire tanto ante potuerim, quo vel alter nunquam, nisi ego illi cedebam, pervenisset? Sunt quidem, fateor, otiosi ac tranquilli iuvenes, occupati senes: sicut multos quoque vidimus, quorum castissima fuit adolescentia, libidinosa et lasciviens senectus. De avaritia notum est communi senum fere omnium morbo; iuvenum vero non ita, qui non sunt, ut ait Aristoteles, pecuniarum amatores: cuius apud eundem ratio illa est quia nondum indigentiam experti sunt. An me forte igitur his exemplis de quietissimo iuvene laboriosissimum senem fieri vultis? aut unum ex his qui sani iacent, ægri ambulant: aut ex his qui totis diebus stertunt, totis noctibus fabulantur? Non sum ex hoc grege, Læli; cum in omnibus requiem quæsierim, sicut scriptum est, et eam ab annis teneris usque ad desidiæ suspicionem semper amaverim, nunc penitus nihil quæro, nihil amo aliud, sine qua nulla

mihi vitæ conditio non molesta sit. Hanc cum prope iam manibus apprehendisse videar, lectisque rudentibus vela deposuisse, rursus in fretum vocor. Non vos audiam, amici: sed orabo potius ut dextras adhibeatis navim subducere molienti. Notum omnibus desiderium meum, ante alios tibi. Honestæ paupertatis appetens semper fui: nempe nullus melior, nullus tranquillior, nullus denique tutior vitæ modus. Hæc mihi hactenus conscriptorum patrum sancto iudicio negata est, cum sæpe divitias non negarint. Causam scio, ideoque non miror. Non me divitem volunt, sed voti compotem nolunt. Parebo, sortemque meam lætus sequar: nam quis hominum novit quid expediat? eoque me solabor quod quidquid sum per eos utique non sum; Deoque gratias agam, qui absque eis vivendi votum mihi potentiamque largitur. Cessent deinceps, oro te, laborum, cessent repulsarum causæ. Scis ubi, scis qualiter mori optabam. Quid vis? Si pauper esse nequivero, dives ero: quamvis in mediis opibus pauperem spiritu nil aut vivere prohibeat aut mori, quæ una paupertas et habenti facilis et amabilis Deo est. Et de nobis hactenus. Zenobii adscensum lætus audiui. Amo hominem amarique nos ab illo certus sum. Gratulor quidem sibi, imo non sibi sed fortunæ suæ, seu verius nostræ, qui inter tot non Dei non hominum amicos, unum saltem habebimus amicum: sibi vero compatiar et Musis, quæ tale ingenium non dicam perdunt, sed cum indignis consortibus partuntur. Plane fateor, crumenæ ille consuluit, sed nec famæ, nec vitæ, ut auguror, nec quieti. Et oh qualiter eunt res! Non multum tempus est quod ipse mihi fraterne condolebat, meque prædulcibus aculeis urgebat,

quod Mediolanum turbida civitas esset Helicon meus. Et hoc amantissime quidem, sed, ut réor, quid Mediolanum esset nesciens, et haud dubie ignarus, qualiter, quam otiose, quam libere, quam solitarie, quam tranquille hic essem, loquebatur. Iam ante transalpinam moram meam solitus non laudare, dum ad fontem Sorgiæ peccatis homo, sed quiete animi prope angelus degebam, admirans quænam hæc *Italo procul orbe voluptas*. Verba ipsa teneo ; liquit aculeum : dicebat autem hæc non, ut puto, præsagens sponte sua se mox extra Italiam relegandum, sibi que tam prope repositum Babylonicum Heliconæ, de quo non coniecturis inani- bus, sed experientia doctus, si quidquid sentio loqui cœpero nullus erit finis. Mihi autem satis superque odii in illo inferno conflasse iam veritas videtur. Cœte- rum ipse in dies experiendo et videndo quid ego de suo nunc Helicone tacuerim intelliget. Et si bene eum novi, sæpe et horum meminerit verborum, et Neapolitanum otium atque Italiam suspirabit ditior forte, sed occupa- tior certe, sed mœstior. Oh quantum mihi nunc invisu- rus, si ut ego procellas suas hinc video, sic ipse meum otium videret, et quam nihil præter animos nobis si- mile. Salvere illum iube et vale.

Mediolani, V. Idus Februarii ad vesperam.

---

## EPISTOLA XV.

FRANCISCUS PETRARCA SOCRATI SUO S. P. D.

Quod in veterem Lælii amicitiam redierit gaudio gestit.

Iamdudum, mi Socrates, cessat inter nos vicissitudo illa litterarum, magnum absentiae remedium, cuius cessationis et occupatio utriusque nostrum, et multae forte aliae sunt causae. Illa, ni fallor, omnium maxima, quod materia deesse incipit scribendi. Neque mirum id nobis accidere quod Tullio accidit et Attico. Nullus tantus est acervus, qui non assidue detrahendo decrescere, et in nihilum verti queat. Quidquid sciebamus, credo iam iugibus scripturis exhausimus. Quod unum hodie se offert, inter te et Laelium, me hortante, reformatam amicitiam, et in gratiam reditum esse, tuis et suis et multorum litteris audio, et gaudeo, mehercle, deque reconciliatione hac quam de ulla re alia lætior sum. Bene accidit: gratias Deo, gratias vobis. Ille inspiravit hos animos, vos spiritui aditum non negastis. Laudatis ambo certatim stilum meum, qui cum semper incultus, tunc improvisus ac tumultuarius ut esset et anni tempus, et diei hora, et nuntii festinatio coegerunt. Tantis tamen plenus affectibus pietatisque facibus ac stimulis fuit, ut ipse, iam memini, Deum testor, inter scribendum lacrimas non tenerem. Eratis ante oculos vos duo, erant amici omnes vestro dissidio deiecti, erant triumphantes æmuli, erant anni præteriti tanta concordia exacti. Hinc impetus incompti sermonis, hinc lacrimæ scribentis. Non ingenium, non stilus,

sed propositum et adiuta divinitus pietas valuit. Itaque vos ut libet, ego nihil laudo, nisi divinitatem unde est quidquid est boni, et vestram humanitatem bonorum consiliorum non capacem modo sed rapacem. Generosos et mei amantissimos agnosco animos. Benedicti vos a Domino, qui et vobis dignissimam rem fecistis, et mihi gaudium, quantum aliunde præberi non poterat, præbuisistis. Mi Socrates, vale nostri memor.

Mediolani, IV. Idus Februarii ante lucem.



FRANCISCI PETRARCÆ  
DE REBUS FAMILIARIBUS  
LIBER VICESIMUS PRIMUS.

---

EPISTOLA I.

FRANCISCUS PETRARCA ERNESTO ARCHIEPISCOPO PRAGENSI  
S. P. D.

Litteram quam scripserat se prudenti consilio mittere non voluisse.

Multa animo conceperam calamoque pepereram, quæ cur modo tibi subtraham dicet is, qui hæc pauca quæ cernis et plura quæ audies ad te vivis vocibus perferenda suscepit, vir quo nil tibi devotius nil mihi familiarius. Sancta quidem semper et honesta, sed non semper tuta veritas. Multos illa omnibus sæculis, sed nunquam plures quam nostra ætate hostes habuit. Causa est quia nunquam pauciores virtus habuit amicos. Nemo autem veritatem odit nisi qui male vivit. Et hic metus virum fortem nunquam in mendacium, aliquando autem in silentium cogit : quod ego veri studio edoctus et nunc et sæpe alias, nisi postquam non locutus esse non poteram, non adverti. Et in sermone quidem mutuo prorsus irre-meabilis est vox : in scriptis vero liberioribus remedium est vel suppressere vel delere quod scripseris. Primum

feci et multa coercui, quæ fors in posterum delebo, fors vivere patiar ut cum hinc abiero ex insidiis erumpant, meque discipulum veritatis indicent sed occultum, propter metum Iudæorum. Quis autem scit an ut est animus indignans nec larvarum metuens, ipse ego præsens iter faciam prodire volentibus? Sed omissis de quibus mihi sententia nondum stat, de me sic habeto, nihil magis tuum fieri posse quam ego sum. Memini anno altero, dum iniuncta ad Imperatorem nostrum legatione fungerer, hominem peregrinum vix solo nomine cognitum, qua me fronte, quo animo, quibus verbis, quanta humanitate devinxeris. Recole quam suaviter mihi illud identidem inculcabas: compatiar tibi amice qui ad barbaros venisti. Ego vero nihil barbarum minus nihil humanum magis profiteor me vidisse quam Cæsarem, et aliquot circa eum summos viros, quorum modo nominibus scienter abstineo: summos inquam viros et insignes dignos maiori memoria: quod ad hæc attinet abunde mites et affabiles velut si Athenis atticis nati essent. Vale.

Mediolani, III. Kalendas Maias.

---

## EPISTOLA II.

FRANCISCUS PETRARCA IOHANNI EPISCOPO OLMUTIENSI S. P. D.

Ob eius benevolentiam et acceptum ab eo diploma, quo comes Sacri Palatii renunciatur, quam maximas gratias agit.

Ni luce clarius intelligam videamque quid de me sentias, et qualiter sis affectus, valde non surdus modo

sed cæcus sim; neque enim verbo tantum animum tuum mihi, sed his, quæ, ut dicitur, mentiri nesciunt rebus, pandis. Nam quid, per omnes quæso coelicolas, suavius epistola illa tua, qua me vagis usquequaque distractum, et ut sic dixerim sparsum curis, ad te unum cogitandum colendumque dulcissimo quodam et insolito verborum artificio coegisti? Quid humanius, ut reliqua sileam quæ promptius animo metior quam sermone, quid inquam humanius, quid mitius quam quod in epistolæ calce dixisti, nunquam Francisci tui nomen memoria Iohannis abiturum? Amplum fateor et præclarum ac cuilibet virorum excellentium suffecturum in memoria tua locum exiguo et obscuro meo nomini deputasti, ubi iam securius habitans, nihil durum, nihil inhospitum in transalpinis regionibus vereatur. Profecto autem nunquam tibi in animum veniret ut id diceres, nisi ante venisset ut sentiret. Quæ sententia quantæ tibi mansuetudini quantæque mihi sit gloriæ quis non videt? Natura equidem tantum virum parvæ rei tam tenaciter meminisse non patitur. Ita ergo et magnitudinem tuam probas, et me hac tua de meis rebus opinione magnificas. Amori tuo gratiam habeo quanta humanis affectibus haberi potest, qui hoc sæpe mihi præstitit ut doctissimorum hominum iudicia in mei existimatione perstringeret. Ego autem ut totum tibi meum pectus aperiam, neve ullas ibi latebras celem, nihil quo id merear in me scio. Sed ita sum quasi rusticus margaritæ nobilis inventor, qui spem suam successibus victam stupens, ac lucro attonitus percunctatur obvios, et veri pretii ignarus e iudicio pendet alieno. Sic ego parumper tua in primis et illustrium aliquot æstimatorum



crebra laude superbio et mihi (quid rides?) nescio quomodo, iam sentio, solito carior factus sum. Iocor tecum, meum decus, nec sum dubius totum hoc tui amoris esse non meriti mei. Non si me totus orbis una voce collaudet, mihi parvitat<sup>is</sup> meæ conscientiam extorquebit. Quid nunc de certioribus animi testibus, piis erga me semper actibus tuis loquar? Quanto me nuper, nam antiqua prætereo sed non obliviscor, quanto me et quam raro privilegio honestasti? Quod etsi olim feceras, secretum tamen, Imperii signum et ingentem bullam auream liberaliter adiecisti: cuius vel aspectus solus immensum quiddam maiestatis et gloriæ contemplantibus ingerit, et venerabundos cogit summi Imperii et veteris Romæ atque aurei sæculi meminisse: ab altera enim parte Cæsar noster diademate insignis ac sceptro, hinc romana aquila, hinc leone patrio circumfultus celso sedet in solio: ab altera Roma est superba templis ac mœnibus, inque ipso auri pallore, ut Davidico verbo utar, blanditur oculis prædulciterque subrepat sacra et venerabilis almæ Urbis effigies. Pro tali munere precor nudam gratitudinem meam accipe: nam quid referam non habeo. Gratias Cæsari, gratias tibi. Nihil unquam a vobis frustra volui. Ille me numero Palatinorum comitum inseruit, et multa superaddidit, quæ paucis solet. Tu munus Cæsareum augustum omni studio adornasti, atque augustissimum effecisti. Coeterum ut illius gratiæ tuique favoris semper egentem me profiteor, sic auri indigus non sum. Quamobrem ut cœtera in donum non mediocre suscipio, et præsertim studium tuum quod mihi, sicut ipse stilus indicat, in illis litteris vigilantissime dedicasti, sic tu, oro, bullæ aurum a me ac-

cipe, quod tibi fert ille vir optimus militaris Saceramor noster tuarum rerum præco ingens, mearumque secretissime conscius : et quaecumque his litterulis desunt iucundissimo suppleturus eloquio. Vive feliciter et vale.

Mediolani, III. Kalendas Maias.

---

### EPISTOLA III.

FRANCISCUS PETRARCA CHECCO FOROLIVIENSI S. P. D.

Excusat se quod poeticæ eius epistolæ poetice non respondeat, quodque expetito impar sit ferendo auxilio.

Carmen egregium, nec responsione tantum sed petitæ opis exhibitione dignissimum, longo post tempore quam id excuderas legi. Sed neque mihi ad respondendum sat otii est, neque ut sit, iuvenilis ardor ille Pierius solitis facibus ingenium accendit, cui iam satis est congesta digerere, inque id ipsum factus est segnior : neque mihi meis viribus ferendæ opis occasio ulla est. Misereor tamen haud nescius scriptum esse *cur miserearis potius quam opem feras* : at illud, ut dixi, nequaquam arbitrii mei est. Quod si esset aut fuisset, quamvis omnium quas audierim aut legerim, longe iustissimas, preces tuas hactenus expectaturus non fuisset. Sic me vester amor, sic pietas insita, sic ipsa rerum indignitas urgebat iam inde vestrorum ab initio laborum, ut hac in parte fræno mihi non calcaribus opus esset. Me quidem vera loqui Deum omnia videntem conscientiamque meam et huius fidissimi hominis memoriam testor. Quando ergo quod cupio negatum

est, quod negari quovis imperio non potest, nudo licet ac libero affectu rebus oppressis milito, et ut vestrum unus, eventum fati anxius atque animo suspensus operior. Proinde quid sperem, seu quid loquar amplius non habeo, nisi Philonis grave illud et dicentis ingenio et præsenti rerum statui conveniens dictum: bono enim animo esse oportet, quia necesse est adesse Divinum ubi humanum cessat auxilium. Et illud Terentiani senis in Adelphis :

Ita vita est hominum quasi cum ludas tesseris :  
Si illud quod maxime est opus iactu non cadit,  
Illud quoque cecidit forte id arte ut corrigas.

Inde te oro qua potes, afflictæque Reipublicæ solamen hinc consilium elcito : et vale nostri memor.

Raptim ambigua iam luce. VII. Kalendas Novembris.

---

#### EPISTOLA IV.

FRANCISCUS PETRARCA BARTHOLOMÆO GENUENSI S. P. D.

Longis crebrisque epistolis scribendis se operam dare non posse.

Amicum facie ignotum in litteris video : florens atque integra est ætas, ardens ingenium, expeditum, velox, læta mens et otio abundans, amicitiae multa vis. Horum mihi præter ultimum nihil est. Ætas iam devexa, ut qui ægre superato vertice lapidosi montis iam descendere incipit, et qui nitens ascenderat, pronus fertur ad reliqua : ingenium tepidum et

algenti proximum, multaque rerum sarcina pressum pariter ac defessum : mens mundi odio et sui status æstimatione subtristior : non quia senium iuxta est, id enim gaudii materiam, resolutionem proximam, cœci carceris exitum, ac mœsti exilii finem spondet; sed quia lente admodum et serius aliquanto quam vellem iuventæ laqueis absolutus sum. Viden amice quam diversis tramitibus ad unam metam pergimus. Imo quidem prope uno calle gradimur, sed, ut fit, aliis atque aliis viæ spatiis. Ubi es fui, ubi sum eris. Itaque finis idem inter nos amicitiam fecit, euntium imparitas varios fecit affectus usque adeo ut silentium meum, quod apud te mirabile est, et more amantium exquisitis coloribus excusatur, apud me non excusabile modo sed necessarium sit, et mirandum potius, quod inter tot obsidentium me curarum strepitum, seorsum aliquid loqui vacet. Durum id tibi quidem ut suspicor auditu; verum perge feliciter et vive. Cum veneris quo perveni, cernes oculis ita esse ut loquor, et qui mihi vix crederes, rebus credes et tibi perinde. Me, si quis est usus, iure tuo utere, inque amicis certa fiducia habeto. Silentio autem meo parce, neque crebras neque longas epistolas ex me speres. Multa quæ modo mihi solatio erant, ut humana rapiuntur, iam supplicio sunt. Vale.

---

## EPISTOLA V.

FRANCISCUS PETRARCA IOHANNI EPISCOPO OLMUTIENSI S. P. D.

Commendat ei Sacramorem.

Venit ad Cæsarem Saceramor vir optimus et quod sæpe dicere soleo, nisi me amor fallit, hoc nomine atque omni veræ amicitiae laude dignissimus. Non modo enim amans vel amicus, sed, ut quod cupide facio tuo verbo utar emphatico, amor est. Totus est, inquam, amor : neque amor quilibet, sed sacer amor. Venit ergo ad Cæsarem, et ad te venit, cuius me amor compulit ut nota et ardenti fiducia illa mea de hoc viro, quod mihi visum est Cæsari scriberem. Quid scripserim non repeto nec oportet, quod illarum tu solus interpretes et adiutor litterarum eris, ut solitus es. Tibi vero hoc unum dixisse satis sit: si unquam vel credidisti vel crediturus es, mihi crede quod hic tota te mente, tota anima, toto pectore diligit, colit, suspicit, veneratur, teque in summis opibus atque honoribus suis ponit. Aut ego fallor, aut sæpe iure amicitiae in intimas animi sui latebras admissus, semper ibi vel primum, vel primo hoc est Cæsari proximum, te notavi. Cæterum quod exterius patet, nemo certe quem noverim, nemo usquam tui nominis et tuarum rerum clarior atque sonantior præco est. Rite ergo teque rem dignam feceris, si eum reciproca caritate complexus ostenderis te, ut ingenio ut eloquio ut virtute animi, sic benevolentia et amore a nemine vinci posse. Plura dicerem si apud alium loquerer: nunc ad illum mihi sermo est qui me, ut spero,

vel breviloquum intelligit vel tacentem. Cum Africano Minore concludam: *En habes virum dignum te*. Illud sciens sileo, quod in litteris tuis stilo te meo imparem facis usque adeo ut stuporem vel simules, vel si, quod opinari nequeo, verus est stupor, non stili quidem mei, sed tuæ paternæ indulgentiæ stupor sit. Tu ne enim cuiusvis vel ipsius Ciceronis ad stilum stupeas? Quære alium, cui hoc imprimas. Sed ut se superbia super id quod est, sic se humilitas infra aestimat, et cum magna sæpe aliis, semper sibi pusilla est. De reliquo: munus tuum, quoniam ita cogis, accipio non grato animo sed iucundo, licet ut verum fatear, aurum ex te nollem, neque auri egens, ut tibi olim scripseram, et tua contentus aurea voluntate. Vale feliciter, et idem oro ut quod pollicitus es verum sit, ne me unquam de memoria tua locus aut tempus excludat.

Mediolani, VIII. Kalendas Aprilis.

## EPISTOLA VI.

FRANCISCUS PETRARCA ERNESTO ARCHIEPISCOPO  
PRAGENSI S. P. D.

Sacramorem ei commendat.

Multa loqui temporis vetor angustiis: sed pergrati mihi hominis nec minus veri amore loqui aliquid cogor. Ecce enim vir egregius et tui amantissimus quem ita partiri solebamus, ut corpore nunc vester nunc vicissim noster, animo autem semper esset utrorumque,

iam tandem totus ex integro vobis cedit : in quo de se alii iudicent : ego nempe iam hinc quantum mihi, quantumque vitæ meæ solatium decrescat, intelligo, ut accessione vestra lætus, sic meo incestus incommodo. Aut enim male aestimo, aut viro bono invento nullum maius lucrum, nulla iactura maior perditio. Quid hic aliud dicam? Multa quidem dici possent, si ut talium plena mens, sic mihi vacuum tempus esset. Unum tibi dicere ausim, quod Cæsari nostro dixisse ausus sum ; si amoris ac fidei obligatio magna est, multum et tu pater, et quotquot ibi estis debetis huic viro. Nihil æque in terris ut Cæsarem et vos amat, et si nihil de vobis mereretur, esset tamen humanitatis atque animi tui opus, et cœterorum Cæsareum latus ambientium, talem virum ita complecti ut ex merito totus et Cæsaris esset et vester. Plura non dicam utilius arbitrans, ut ait Cicero, te ipsum quam aut me aut quemquam loqui tecum, præsertim de re tibi notissima nec iam amplius inculcanda. Feliciter vale, et inter tuos, si et ipse nulla licet re alia nisi amando mereor, me numera.

Mediolani, VIII. Kalendas Aprilis.

## EPISTOLA VII.

FRANCISCUS PETRARCA CAROLO IV. IMPERATORI S. P. D.

Commendat ei Sacramorem.

Audaces et timidos amor facit. Sæpe quidem hoc dixisse videor, sæpe nunc etiam ut auguror dicturus. Ita est enim : expertus loquor. Et audet ingentia et mi-

nima metuit verus amor. Sed ut metu amantium dilato, de audacia tantum loquar, omissis in quæ humanos animos trahit amor insanus, honesti stimulos amoris, quantum hodiernæ materiæ est opus, attingam exemplo unico præsentique. Quando ego, nisi vehementer amarem, Romano Imperatori auderem ita dicere? Vir hic qui has litteras Maiestati tuæ dabit bene de te meritus et tua gratia tuique benevolentia dignus est. Multum illi non tu modo, sed tuo nomine totum debet Imperium. Quantum vero te amet supervacuum videtur metiri velle, dum te alloquor, quem deceat affectus animorum ipsis in frontibus legere. Scio quotiens ad te ille vel imbribus vel æstibus importunis, quam sagaciter, quamque impigre venerit superatis iugis Alpium, et omni temporum ac viarum difficultate perdomita, dum tibi obsequitur oblitus sui. Tuo ille quidem in Italiam adventu, qui ut tibi tunc præsens dixi, ne forte Germanus miles mutati cœli temperiem exhorreret Arctoum gelu tecum simul finibus nostris invexerat, omnes vidimus quam sæpe nocte media, hieme impia tibi tuæque gloriæ invigilans, ivit ac rediit, ut quodammodo illam tantam cœli terræque duritiem sui amoris ac fidei fervore compesceret, et ardenti animo non sentiens quid exterius ageretur, egregie suum nomen rebus impleret. Neque enim casu fortuito ab ipso fonte baptismatis id sibi nomen impositum reor, ut scilicet Saceramor diceretur, sed certo quodam præsagio futurorum. Nam si omnis iustus amor proximi sacer est, ille profecto multo dignius habet hoc nomen, quo Romanus princeps amatur, vere Christus Domini, vere sacer. Quia ergo tecum ille suum amorem totumque suum



animum tibi dedicaturus nascebatur, æquum fuit ut renascenti sibi nomen hinc eius futuro hincque ipsa Dei præscientia iam præsentī proposito consonum obveniret. Multa de hoc viro narranda suppetit materia, quæ nulli quam tibi, Cæsar, notiora crediderim: unum ex mille perstringam. Siquidem anno illo tui adventus, cum tu me suis verbis ad te Mantuam evocasses, et ego paucis post diebus iter agerem, contigit ut cum Abduæ amnis in ripa sero substitissem, mane meis ipse stimulis excitus et ad te properans ante lucem domo egrederer, non comitum modo sed famulorum murmure, quod ubi vix per diem in thalamis ante ignem tolerari posset insoliti vis algoris, ego per noctem et rigidis nivibus et lubricæ glaciei et cœli inclementiæ minime ferreum corpus obiicerem. Tum ecce limen oppidi transgressus iste fit obviū, qui Cremona sub intempestæ noctis silentio digressus iam duodecim milia passuum exegerat, ut illo totius anni brevissimo die Mediolanum perveniret. Et licet famulis atque comitibus suis frigore enectis et labore confectis, unus ipse sic ibat quasi ad æstivæ noctis auroram herbosum breve iter ingressus, et identidem requiescens in tuo nomine et in tui memoria recalescens. Agnovi vocem: tenebræ notitiam vultus abstulerant. Compello hominem: accedit cupide. Et Deus bone, quos ille de te rumores, quas spes, quos in aurem susurros gavisuro mihi lætus intulit! Ibat enim, Cæsar, ut arduum tibi complanaret iter, et secundum illud Isaïæ: Omnis mons et collis humiliaretur et essent prava in directa et aspera in vias planas; quod mox cœlesti ope tuis favente consiliis supra spem feliciter adimpletum est. Inde post

anni spatium ad te et ad tuam Bohemiæ regiam ambo pariter missi sumus, nihil fere per tam longum viæ tractum nisi de te loquentes deque tuî Imperii rebus. Et ad summam aut ipse nimium astutus, aut ego nimium rudis sum : aut hic te tuumque nomen et salutem tuam præ cunctis aliis suis affectibus cordi habet, et adeo plus tuus est ut nullus æque sit, nempe qui fixum habeat in tuo statu suum statulum contineri, cuique votorum omnium summa sit sub te vivere, sub te mori. Ego autem in re certissima nimis versor. Parce, oro : et de illo loqui, et te alloqui dulce est. Nunc vero preces insererem, nisi quia multum habet, quod de fortuna propria queri possit, si apud te illi vel meæ vel cuiusque necessariæ preces sunt. Testor maiestatem tuam, Cæsar, quæ mihi quasi cuiuspiam numinis loco est, virum hunc Cæsareo favore dignissimum. Nosti hominem, Imperator, qui si tibi semper cognitus fuisset, auderem tamen asserere, non indignum ut tam strenui militis obsequio uti velles, idque vel maxime ad tuam immortalem gloriam pertinere : ut cum cæteri principes cunctique fere mortales et auro inhient et voluptatibus famulentur, princeps romanus primum in hominibus locum tenens et hæc ex alto despiciens delectationibus aliis vacet, et aliarum opum, consilii scilicet ac virtutis atque in primis illustrium abundantissimus sit virorum. Ecce nunc ergo, decus nostrum, quod dicebam, amor fecit audacem. Vive, Cæsar, et vale, et de te, et de nobis, et de Imperio cogita.

Mediolani, VIII. Kalendas Aprilis.

---

## EPISTOLA VIII.

FRANCISCUS PETRARCA ANNÆ CAROLI IV. IMPERATORIS  
UXORI S. P. D.

Filiam enixæ gratulatur et illustrium foëminarum memoriam  
revocans, muliebris sexus laudes celebrat.

Tuæ serenitatis epistolam, gloriosissima Augusta, lætus reverensque suscepi ; ubi quid primum mirer ? Tantam ne hac tam iuvenili ætate sapientiam ? An eminentissima hac fortuna tam insolitam et tam raram humanitatem tuam, qua me unum ex pusillis tuis toto pene orbe disiunctum iucundissimo nuntio, et familiarissimis litteris gaudii tui participem fieri velle dignata es ? Pro quo quidem non Lucinæ, ut olim veræ lucis ignari gentiles, sed Christo lucis et vitæ et honorum omnium auctori quantas possum tecum gratias ago, qui adolescentiam tuam non tibi tantum sed toti Imperio votiva foecunditate lætificat. Tibi quoque pro hac tua dignatione, quoniam aliud nihil est mihi, quod tanto muneri par rependam, in his litterulis venerabundus assurgo. Neque vero tuum hoc, et meum et commune gaudium imminuat, quod primus tibi foëmineus partus est. Nam ut sapientibus placet, sæpe principium debile melior fortuna prosequitur. Solent qui maxima moliuntur humiliter exordiri. Quod in te modo credibile est egisse naturam, et hoc læto unico partu tuo multos tibi lætissimos polliceri. Satis est nobis quicumque de te deque illustri consorte tuo tumores

prosperos exoptamus, iam te summi Imperii nosse puerperam. Non hic desines, sed quod es orsa feliciter felicissime consummabis. Quamquam non potest utique sexus ille contemni, unde cœlestis Imperator temporalem traxit originem, qui, ut ait insignis veri professor Augustinus, ne quis forte sexus a suo Creatore se contemptum putaret, virum suscepit, natus ex foemina est: unde præterea et terreni reges primi hominum et qui summum in regibus locum tenent divi Cæsares oriuntur. Adde quod nec partu tantum, sed ingenio et virtute multiplici et rebus gestis et regni gloria sexus est nobilis. Ut enim pauca de multis prætereundo contingam, apud antiquissimos Græcorum reperitrix variarum artium Minerva virosque omnes ingenio supergressa, atque ob eam rem sapientiæ dea est. Isis, Inachi filia Ægyptiis prima litteras dedit. Apud nos vero Carmentis Evandri Regis mater, harum quibus utimur litterarum fertur inventrix. Sappho græca puella libros scripsit, qui magnorum poetarum ingeniis comparentur. Proba quædam Adelphi uxor utriusque gnara sermonis, apud græcos homericis, apud nos virgilianis versis in rem suam versibus, mundi originem et fortunas patrum, et Christi adventum historiamque, brevissimo suo quidem ordine, alienis verbis amplexa est. Transeo Sibyllas divinas foeminas et præscias futurorum et divini consilii conscias. Unde nomen omnibus unum inditum perhibetur, cum decem fuisse illas et patria et ætate distantes, Marco Varrone teste, noverimus: quarum tam multa usque in finem mundi, præcipueque de Christo, prænunciata didicimus et impleta, ut unum hoc commune omnium Sibyllæ nomen a doctoribus nostris propheta-

rum sacris nominibus inseratur. Aliud dehinc genus foemineæ laudis attingendum est. Orithya Amazonum Regina, ut reliquas sileam, tanta belli scientia et virtute traditur fuisse, ut inter duodecim famosissimos labores, quos Herculi illi invicto Eurystheus Græciæ Rex iniunxit, ceu rem impossibilem afferri sibi reginæ huius arma deposceret. Eiusdem generis et Penthesileæ apud Troiam, et Camillæ per Italiam nota virtus. Cuius non ad aurem venit Hypsicrateæ Reginæ conjugalis amor, et invicti vigor animi, quæ Mithridatem suum Ponti regem illo gravi et diuturno, quod cum Romanis gessit bello non modo dum res anceps stetit, sed victum etiam ac desertum a suis sola per omnes casus indefessa pietate comitata est, neglecta qua singulariter pollebat formæ cura, mutatoque habitu, equo et armis et laboribus cunctis assuefacto corpore, quod inter delicias regias educatum erat, gratum prorsus et unicum illi afflicto regi solatium in extremis miseriis coniux fuit? Apud Pœnos, apud Lacedæmones apud Theutones, apud Cimbros bellicosissimas gentes quibusdam in præliis animosius mulieres egisse, quam viros, notissimæ loquuntur historiæ. Magna hæc: maiora alia. Apud Assyrios Semiramis non regnavit modo, sed mirum in modum prolatavit auxitque regni fines, Indis atque Æthiopibus vexatis bello. Babylonem prima, quod quibusdam placet, condidit; quod nemo dubitat, muro cinxit amplissimo. Cuius urbis inopina rebellio cum sibi capitis cultui muliebriter intentæ subito nuntiata esset, tantus animi foeminei ardor fuit, ut altera comarum parte composita, altera autem adhuc sparsa, 'sicut erat, armis arreptis, ad expugnandam Babylona conten-

deret: adiuvitque fortuna virtutem, ut non prius ad ordinem comæ pars, quam tota civitas ad obsequium remearet. Cuius facti testis statua eodem illo festinantis reginæ habitu multis sæculis in ea urbe perman- sit. Fuit apud Scythas Thomiris tanti animi regina ut formidatum illum famosumque regem Asiæ Cyrum cum ducentis millibus Persarum uno prælio trucidaret, in- que filii vindictam et solamen sui, tantas teneris ma- nibus daret inferias, capite insuper regis trunco et in plenum cruoris utrem merso, exprobrata crudelitate, quod humani sanguinis sitiens atque insatiabilis exti- tisset. Regnavit apud Ægyptios Cleopatra: Zenobia apud Persas, quæ se reginam diceret Orientis: mulier fiducia ingentis clarissimæque virtutis: inter cætera, quod Cleopatræ defuit, castitatis eximiae, cuius laudem formæ raritas geminabat. Harum utraque Romanum in- vasis imperium tanto nisu ut prior ancipitem Augusto victoriam faceret: secundam vero Aurelianus princeps et pugnantem metuere videatur et domitam gloriatur. Ac ne tótum sibi vindicet vetustas, apud nos nuper non exiguam Mathildes comitissa partem Italiæ posse- dit, et ipsa Romani imperii non levis æmula, et quæ virili animo bella tractaret, imperiosa in suos, in hostes acerrima, liberalissima in amicos: cuius profusam et plusquam foemineam largitatem Romana in primis Ec- clesia testatur. Minora illa forsitan relatu, vera laude vel paria vel maiora, miseram matrem in carcere destina- tam ultimo supplicio sed commiseratione reservatam ut fame consumaretur, exorato custode sæpius admissa filia sed excussa diligentius nequid alimoniae subinfer- ret clam uberibus suis pavit. Altera autem patri eodem

in statu par obsequium impendit. Quod vel Athenis vel Romæ factum opinari licet. Nam et utroque trahentes coniecturas habeo de scriptorum dictis, nec ab utriusque urbis reliquis moribus res abhorret, et utrobique factum esse nil prohibet, præsertim cum historici quidam Cimonis Atheniensium magni ducis filiam, alii humilem et ignotam fæminam scriptis indiderint. Cœterum ut omissis dubiis certa commemorem, cum admiratio primum orta quod ultra naturalem modum cibi inops vita protenderetur, deinde observatio intentior adhibita esset, atque ita res a custodibus intellecta, ad triumviri qui suppliciis præerat, ac per eum ad prætoris qui sententiam tulerat, inde autem ad consulum notitiam pervenisset, vel humanitate Attica vel Romana maiestate dignum opus, donati liberis ereptique legibus rei, et utriusque filiæ pietatem parentis absolutio consecuta est. Nam cuius, oro, animum spectacula illa non flecterent, iuvenis natæ ubera famelica mater anus, sed multo maxime inedia confectus et senio pater sugiens? Itaque hinc illud amplum sacellum ex carcere et in memoriam pii actus pietati consecratum locum legimus. Iam quis illud apud Lacedæmonios non audivit ut fidissimæ uxores quasi viros capitalium rerum reos supremum allocuturæ permissu custodum noctu carcerem ingressæ, quo tempore more gentis de condemnatis supplicium sumebatur, permutatis vestibus et per speciem doloris capitibus obvolutis, et hora consilium adiuvante, illis emissis, eorum in se periculum transtulerunt: utque in eadem urbe Leonidæ Regis soror virgo, viris in consilio hæsitantibus, prima bellum patriæ imminensprehendit? Quis non novit in Asia

Ephesum urbesque alias a foeminis conditas Asiaeque et Europae magnam partem a foeminis subiugatam? Quis nescit in Africa Carthaginense Imperium unius viduae virtute fundatum? Quis non legit Israeliticum populum et duarum unius viri coniugum totidemque sponsalium ancillarum foecunditate progenitum, et unius viduae constantia liberatum ducis hostium caput in gremio referentis? Europa quidem, nisi amore decipior, optima et nobilissima pars terrarum, unius regiae virginis nomen servat, cuius materna avia mater Agenoris Libyae nomen dedit. Nec minus Asia numero tertia, spatium dimidia mundi pars, et ipsa foemineum nomen est. Ita trina tripartiti orbis appellatio dictu mirum et pro sexu infirmiore magnificum, non aliunde quam de trium foeminarum progressa nominibus manet hactenus: nec video cur non cum ipsa mundi aetate mansurae sint. Italiae urbes Mantua, Parthenope, Caieta, Lavinia, Graia insuper urbs Athenae, ne cunctas enumerem, quid sunt aliud quam muliebria nomina? Quid vero nunc romanas eloquar matronas, quibus nihil honestius habuit, nihil candidius orbis terrae? Profecto si cepero, vix desinam. Huius enim orationis, quod de magni Pompeii laudibus ait Cicero, difficilius est exitum quam principium invenire. Nam quis, quaeso, Lucretiam verbis aequet pudicitiae severissimum exemplar? Cuius etsi factum usquequaque non probem, quod alienum scelus tam graviter in suo corpore ulta est: nequeo tamen generosam iram et omnis turpitudinis impatientem animum non mirari. Quis Cleliam virginem digne explicet, quae hostilis exercitus elusa custodia, Tiberino gurgiti innatans, virgineam aciem puellarum obsidum



patriæ reddidit? Quam virtutem stupuit hostis, ac civis æque honore et præmio dignam duxit. Quis Corneliam Africani filiam Gracchorum matrem? Quæ duodecim filiis partim morbo, partim ferro amissis, quorum fortissimos interfectos a populo atque inhumatos et in Tiberim abiectos oculis suis ipsa conspexerat, tantam ruinam atque orbitatem viriles quoque animos concussuram tam invicte pertulit, ut nullis complorantium matronarum fletibus induci posset, quin se miseram, sed felicem diceret quæ tales filios genuisset? Digna, me iudice, mulier, quæ tales pareret, indigna quæ perderet. Quis Catonis Martiam, quam sanctam vocat antiquitas? Quis huius natam Porciam, quæ viri morte nuntiata, ne illi superviveret, quia præsens ferri copia non erat, vivis ore carbonibus absorptis, viri sui amantissimum et sequi properantem spiritum exhalavit? Multas sciens volensque prætereo, præcipue tibi notissimas, e virginibus nostris, quæ non pro terrenis affectibus, sed pro pietate, pro veritate, pro castitate, pro fide, pro æternæ vitæ desiderio teneris corporibus fortibus animis dura tulere supplicia, duras mortes. Et fateor in his ipsis de industria longus sum, ut sexus cui infamando scriptorum aliqui studuere, qualicunque stilo, vero certe, ni fallor, rerum testimonio ornatus laudum suarum parte non careat. Verum ut in summo pedem figam, teque prælustri Augusta cum altissima omnium et tuæ sortis foemina dimittam, quæ virtus Liviae, quæ maiestas, quæ gloria? Hæc apud Cæsarem Augustum eum tenuit locum quem tu hodie apud eius successorem Cæsarem nostrum tenes, non thori tantum sed consilii totiusque vitæ particeps, facunda ante omnes

et affabilis, et quæ fide prudentiaque sua meruit integrum atque perpetuum tanti principis amorem, quantum ante se coniugum nulla meruerat. Quod te quidem iisdem artibus et fecisse et facturam esse confido. Sed ne sermo longior tædium ferat, filiam tibi datam cœlitus velut arrham nobilioris partus et gaudii plenioris læta complectere, et quod te seque dignum est, tuis illam moribus imbue, tui effice imitatricem. Neque diffidas quam Cæsar ex te genuit et parentibus similem et Cæsareo quoque coniugio dignam fore.

Mediolani, X. Kalendas Iunias.

---

### EPISTOLA IX.

FRANCISCUS PETRARCA SOCRATI SUO S. P. D.

Hortatur ut fortem in adversis se exhibeat, invidiam temnat  
et rerum humanarum vanitatem despiciat.

Movisti animum fateor, et nisi iam ratio viam gemitibus obstrueret, fixumque esset fortunæ nolle succumbere, movisses forsitan et lacrimas. In litteris quidem tuis verum sensi quod oratoribus placet, plus ad commiserationem excitandam posse virilem querimoniam quam femineos eiulatus. Si enim status tui duritiem molliter questus esses, si fortunæ violentiam ut magna pars hominum muliebriter deplorasses, doluissem utique; nam quis unquam amicus amici damnum lætus audivit? Nunc vero cum te videam inter procellas humanarum rerum, quamvis iratum, ventis erectum tamen, eo tibi profundiori caritate compator,

quo magis intelligo indignum te hac sortis iniuria, et nisi me amor fallit, lætiora promeritum. Præcipue autem motus sum et altius indolui ad illum epistolæ tuæ locum, ubi ais te et naturæ tenerioris, et in diebus iam progressum tuis vereri ne deserta patria ubi mori optabas, cogaris tandem alienas ambire provincias peregrinatione intempestiva et molesta, et qua nil tristius pati possis. Quid ad hæc dicam? Negem gravia esse, quæ sensus animi docet esse gravissima? Iubeam ferreum esse cum sis carneus? Moneam non videre quæ in oculis sunt? Horter oblivisci vulnerum quæ novis ictibus assidue recrudescent? Facilius dicuntur ista quam fiunt. Fiunt tamen si ingenti nisu assurgens animus fræna momorderit, seque supra se ipsum erigens, pedibus humana substraverit. Quod ipsum fateor, sine præsentissimo Dei auxilio fieri nequit. Hoc unum, hoc primum atque ultimum, quod scrutantes cuncta philosophi non viderunt, nobis in omni nostra adversitate suppliciter implorandum est. Coetera illa vulgata sunt, ludos suos agere fortunam, dum blanditur metuendam, irridendam dum tonat, dum fulminat contemnendam; eo sibi minus fidei esse, quo lætiora promiserit, eo minus constantiæ inesse quo maiora præstiterit, eo minus telorum superesse quo plus sparserit, facilius illam sub iugum mitti quam ad stabilem amicitiam trahi posse, cedere solitam insultantibus, cedentibus insultare, nutantes impellere, cadentes opprimere, nullis hanc armis melius quam patientia superari: magnis malis magno animo resistendum: nullam in hac area laborum spem quietis; non militiam modo sed prælium esse vitam hominis, in aciem ve-

nire quisquis in lucem venit; nil vallo, nil excubiis profici, nullum tempus induciarum, paratum semper esse discrimen, nec nisi nocte, hoc est morte pugnam dirimi: contra fortunæ impetus fortitudinem esse pro clypeo, pavidos pro inermibus haberi, his qui plus metuunt, plus esse periculi, urgeri profugos, stratos obteri, stantes non posse calcari, corpus etsi nolit, animum nisi consenserit, non prosterni: nil volenti difficile, nil importabile sapienti: nil moestum nisi quod moestum creditur, pro arbitrio fingi vel amara vel dulcia, omnia ex opinionibus pendere, forti animo nihil durum, molli autem dura omnia videri, felicibus male, miseris bene esse si velint; non cedendum difficultatibus, adesse finem terribilium, iri per labores vitæ ad sepulchri requiem: fugere ista dum torquent, gravia vitæ bella sed brevia, et perexigui operis ingentia præmia; in alto sitam esse gloriam, in imo dedecus, in aprico voluptatem, in confragoso virtutem; marcescere animum deliciis, laboribus splendescere; e mollitiæ contrahi solere rubiginem, asperitate detergi; nil tam viro proprium quam laborem; ad hunc nasci hominem ut ad volandum avis, ad natandum piscis; scortum infame sub meridie in sinu foedi amatoris conquiescere, virginem sacram gelu hispidam media solam nocte consurgere; iacere ægrum in grabatulo, sedere parasitum in convivio, stare in prælio bellatorem, inter fluctus nautam, inter pocula bibulum, inter vulnera militem spectari; sudare Thersitem sub lodice, sub armis Æacidem, Sardanapalum somno et voluptatibus infamem, clarum laboribus Herculem, stertere lixas ac leones; dum dux vigilat, durum athletam duellis du-

rioribus exerceri: cariores regi suo quem gravioribus probat experimentis: languidum otium his permitti in quibus spes gloriosi negotii nulla sit: cum prosperitate pacem nobis ambiguam, honestum cum adversitate certamen: unum in vita bonum esse, unum malum, reliqua indifferentia, et quæ sequi soleant animum possidentis speciosam, sed onerosam sarcinam esse divitias, errore potius vulgi quam doctorum iudicio pretiosas: splendidam esse, sed gravem auream catenam: eminentis fortunæ gradum præcipitio proximum: humanam potentiam nil aliud quam claram optatamque miseriam; sublimis vitæ cursum nil aliud quam sonoram et lucidam tempestatem: nil exitum aliud quam ruinam: non minus pungere gladium cuius capulum iaspis illustrat, neque minus stringere laqueum cui pretiosus e serico nodus est: patriam viro omnem mundi angulum, exilium nusquam esse, nisi quod impatientia fecerit; cum inhiare cœlestibus mens ceperit ubique illi exilium fore, donec pervenerit quo suspirat: sapientem bona sua secum ferre quocumque ierit, nihil illi naufragium obesse, nihil incendium seu rapinam: eam quæ paupertas dicitur, levamen esse solitudinum atque discriminum: id quod exilium vocant, fugam innumerabilium curarum: mortem bonis et laborum finem et felicissimæ quietis initium. Mille sunt huiusmodi et magna, licet ex parte vulgo incredibilia videantur; inter doctos tamen atque expertos nihil verius, nihil est certius. Quæ quoniam supervacue, nisi fallor, auribus tuis inculcem, ad alia protinus stilum flecto. Sentio te persecutionem pati propter meum nomen. Quod in me non audent, in te lividum virus effundunt.

Curabo ne noceant, sed quod invidiæ proprium est, sese malo suo crucient, eo miseriores quo nobiscum agi senserint felicius. Non patiar ut mali plus quam boni tibi attulisse nostra dicatur amicitia. Afferri tibi vis non potest. Ne te vilissimorum minæ hominum deiiciant, cave. Solare mœstum animum. Non est ille miser nec erit quidem, nisi se faciat. Vis videre quam non sis miser? Cogita quam multis invidiam facias. Nemo simul invidiosus et miser est: dum urgeris, sta: dum terreris, fide: assurge dum premeris: dic animo, dic corpori, Virgilianum illud famosissimum:

Durate et vosmet rebus servate secundis.

Dic illud eiusdem:

O socii neque enim ignari sumus ante malorum:

O passi graviora, dabit Deus his quoque finem:

ille, inquam, Deus qui aliis multis et variis finem dedit. Cura, obsecro, ne tuis et bonorum omnium publicis hostibus captatam ex te gaudendi præbeas materiam, neve illis vacuum locum linquens, patriam deserendam putes. Non est firmi animi in solido fundati, levis auræ flatibus agitari. Cannensi clade debilitatis animis, auctore Cæcilio Metello, consilium initum fuerat Italiæ relinquendæ. Id Africani tunc adolescentis virtute discussum est, qui stricto gladio super capita consultantium iureiurando astrinxit, eos neque patriam deserturos, neque passuros deseri. Aude vir in primo fortunæ murmure, quod adolescens in extremo eius vulnere est ausus. Aude in te ipsum quod ille in alios: aude in unum, quod ille in plurimos ausus est. Consternatis affectibus gladium rationis

intenta: coge illos mutare consilium, si consilium abeundi placuit: alioquin fluctuantem siste animum, et coge in meliorem iurare sententiam. Multa fert secum dies: nulla fortuna perpetua est, multa remedia non expectantibus pervenere. Nunquam desperatio sera fuit: unde forte non putas, veniet auxilium tibi. Quod ad me attinet communicare tecum omnia propositum est, atque in primis amicitias. Qua in re nulli usquam meæ sortis homini cesserim vel nobilitate, vel gratia vel fide, vel numero. Scripsi iam nunc magno illi amico de rebus tuis ut petisti, opemque eius minime defuturam tibi persuadeas velim. Interim forte ipse adero. Psyllum venturum credito: abrotanum erit in manibus; spero fore ut vel afflatu ipso serpentum sibilis conticescant. Sin omnino pro tempore subducere caput invidiæ decrevisti, habes in tempestate hac vicinum et paratum portum. Scio te magno mei desiderio teneri. Etsi enim animos virtute coniunctos, utque ait Hieronymus, Christi glutino copulatos, nihil sit quod separet, non locus, non tempus, non oblivio, non tædium, non spes, non metus, non invidia, non ira, non odium, non fortuna, non carcer, non vincula, non divitiæ, non paupertas, non ægritudo, non mors, non sepulchrum et resolutum corpus in cineres, ideoque veræ amicitiae immortales sint: est tamen dulcedo quædam non parva præsentia. Ea nunquam ex quo primum distrahi cœpimus tamdiu nobis ante hoc tempus erepta est. Iam mihi septimus sine te in hac regia urbe annus agitur. Age ergo, quid cessas? Expectatus, exoptatus, exoratus, adveni: sic tamen ut non metu hostium pulsus, sed amici tractus desiderio videare,

verequē ita sit. Pelle moram, propera: mihi simul tibi-  
bique morem gesseris, multisque præterea quibus pri-  
dem carus, nondum notus, magnam tui opinionem, quam  
præsentia, mihi crede, non minuet, præmisisti. Surge: non  
te desuetudo segnem fecerit, nil te terreat, nil moretur.  
Surge; breve est iter. Alterum fiet: aut ego te hic vin-  
ciam, aut tu me hinc solutum tecum revehes: utrum-  
vis accidat, haud irritus fuerit adventus tuus: nempe  
et me reviseris, et Italiam inviseris, et tantisper inte-  
rea quieveris frustra in ventos invidia sæviente. Diri-  
ment te Alpes ab anguibus, quæ nunc dirimunt ab ami-  
co, et quem impediunt tuebuntur, et contegent, donec  
veneni fons ac principium aruerit: quod propediem mihi  
futurum spondeo. Tu, quæso, ne dubites: sed sive mo-  
ram, sive iter elegeris, magno fiat animo quidquid  
fiet. Quæ summa spei est, aderit Deus superborum  
hostis, dux humilium, Deus, inquam, ipse aderit, et ego  
pro viribus absens præsensque non deero. Proinde  
quia facilitatem simul ac magnitudinem animi tui novi,  
non instabo amplius, ne quod amicitiae est, diffidentiae  
videatur: unum peto memorem te mei, nec oblitum tui.  
Demum, ut Cæsareo verbo utar, iubeo te bene sperare.  
Vive et vale.

Mediolani, IX. Kalendas Iulias.

---



## EPISTOLA X.

FRANCISCUS PETRARCA NERIO MORANDO S. P. D.

Hortatur ut valetudinem curet, narratque magnum Ciceronis codicem in lævum crus suum semel iterumque incidisse, et vulnere inde accepto se adhuc laborare.

Gratum ut in malis habui quod ad me convalescentiæ tuæ prius quam ægritudinis fama perlata est. Deo gratias, qui minatur crebrius quam ferit, tonatque sæpius quam fulminat, et sæpe nos concutit non ut deiiciat, sed ut firmet, nostræque conditionis admoneat. Nullius unquam patris pietas tanta fuit, quæ patris æterni collata clementiæ, non severitas, imo vero crudelitas videretur. Hanc ille clementiam in nobis iugiter, et sæpe non sentientibus nobis exercet. Cuius intermissio si ulla esset, nos nihil essemus: sed tunc conspectius eminet quando gravi cuiquam præsentique periculo eripimur. Et ubinam, quæso, mortalibus non grave semper præsensque periculum? Nec unquam certe, nec usquam sine periculo vivimus. Etsi interdum alicubi sine periculi suspicione vivamus, par ubique periculum, non par metus. Unde fit ut non semper periculo liberati gratias agamus, ignari scilicet rerum et ingrati salutis, ut Maro ait: alioquin nunquam mens, nunquam lingua cessaret, nunquam cessante misericordia. Compresso autem metu aliquo insigni, tum demum grates agimus, tum vota persolvimus. Pro hac causa et tu nunc in propria et ego in amici salute voti reus sum, non profanis extorum sacris, sed sacrifi-

ciis laudis aram cordis restitutori tuo, servatori omnium adolentes. Tibi vero præterea pauca subiunxerim. Sæpe te monui ne corpus tuum necessariis satis attritum atterendumque laboribus supervacuis premeres, ne ingenium ad litteras natum, ad arma converteres, ubi et periculi amplius et minus delectationis aut gloriæ est; quamvis, ut verum tibi præconium non subtraham, vix norim cui magis hac ætate conveniat illud Catoni seni a Tito Livio tributum, cui scilicet versatile ingenium sic pariter ad omnia fuit ut natum ad id unum diceret, quodcumque ageret. Non tamen id mihi negaveris ipsum ingenium tuum si suam illi libertatem addideris, si frena laxaveris, etsi ad omnia possit, ad litteras diversurum. At tu quasi consilii mei tuique corporis immemor et tui desertor ingenii, per æstus et glaciem, per imbres et pulverem, per vepres et lubricum assidue voveris, nec ancipites casus vides, nec circumfusa discrimina. Oro te, opiniones hominum pessimas atque falsissimas aversare et naturam sequere. Illa te ducet ad tuum finem. Nunc aliena sectaris, non quia tibi hæc placeant, cui nil penitus præter honestum placet, sed ut tu aliis placeas quibus forte non placuisse sit satius. Et de te quidem hactenus. Ad me ipsum redeo. Ruri habito haud procul Abduæ amnis ripa. Et quoniam non aliter mei te quam tui me sollicitum scio qualiter mihi nunc sit cum audieris, puto, miraberis. Scis olim me ex omnibus, qui apud ullas gentes quocumque tempore scripserint, tecum in hoc, ut in multis unanimem singulariter Ciceronem mirari et amare. Neque enim vereor ne parum Christianus sim, si Ciceronianus fuero. Nihil enim contra Christum Cicero

loquitur quod certe meminerim. Et si quid forte contra Christi doctrinam loqueretur, id unum est, quod nec Ciceroni, nec Aristoteli crederem, nec Platoni. Quando enim homini crederem, qui nec angelo crediturus sim Apostolico consilio fretus ubi ait ad Galatas: *Sed licet vos aut angelus de cœlo evangelizaret vobis præter quam quod evangelizavimus vobis anathema sit?* Neve a Cicerone digrediar, sæpe ille quidem Deos nominat sæculi sui morem sequens: quin et volumine integro Deorum naturam tractat, ubi si acrius attendatur, Deorum turbam et inania nomina non tam celebrat quam irridet ac detegit. Et certe ubi ex proposito loquitur, unum Deum eumque principem mundi rectorem vocat. Et licet, ut sæpe dixi et scripsi, forte paratum veritati periculum timeret, alicubi tamen ingenue fassus est non convenire philosopho dicere Deos esse. Quis mihi igitur veræ fidei obiicere Cicero-nem statuatur ut quasi peregrini, vel quod maioris incitiæ sit inimici nominis confluet invidiam? Christus equidem Deus noster: Cicero autem nostri princeps eloquii. Diversa fatear: adversa negem. Christus verbum est et virtus et sapientia Dei Patris: Cicero multa de verborum arte, deque virtutibus et humana sapientia loquutus est, vera utique et idcirco veritatis Deo absque ulla dubitatione gratissima. Cum enim Deus veritas viva sit: cum, ut ait pater Augustinus, omne verum a veritate verum sit, haud dubie quidquid ab ullo verum dicitur, a Deo est. Christum fateor, nosse non potuit paulo ante rebus humanis exemptus, quam Christus Deus homo fieret. Flenda nempe viri sors. Nam ut altissimi et divini prorsus fuerat ingenii, si vi-

disset Christum aut nomen eius audivisset, quantum ego opinor, non modo credidisset in eum, sed eloquio illo incomparabili Christi præco maximus fuisset. Quale aliquid de altero principe latinæ facundiæ Virgilio poeta cum ad eius tumulum venisset Apostolus Paulus, et flevisse legitur et dixisse. Cur autem id Christus ipse noluerit, non est quærenda ratio ab illo cuius voluntas ratio summa est. Quantum tamen ad altitudinem divini consilii humanæ se erigunt coniecturæ, nec potentiam cum posset, nec mundanam sapientiam, nec eloquentiam quæsivit, cui non persuadere dictione ut rhetoricos deceret, sed cœcis et errantibus nudæ lumen veritatis ingerere propositum erat, atque infirma mundi eligere, sicut scriptum est, ut fortia quæque confunderet, et sapientiam sapientum perdere, et prudentum prudentiam reprobare, denique stultam facere sapientiam huius mundi, et per stultitiam prædicationis salvos facere credentes; ne, si aliter fecisset, non cœlestis et divina veritas quam docebat, sed terrena vis aut humanum artificium videretur, atque in sapientia verbi, ut ait Apostolus, evacuaretur crux Christi. Cæterum vir ille de quo loqui cœperam mihi ab ineunte ætate tam carus semper et tam cultus Cicero qualiter modo mecum luserit hinc audies. Est mihi volumen epistolarum eius ingens, quod ipse olim manu propria, quia exemplar scriptoribus impervium erat, scripsi, adversa tunc valetudine; sed corporis incommodum et laborem operis magnus amor et delectatio et habendi cupiditas vincebant. Hunc librum, ut mihi semper ad manum esset, in bibliothecæ ostio postî in-nixum stare solitum vidisti. Dum vero ut sæpe, locum

aliud cogitans ingredior, accidit ut togæ fimbria inadvertens librum ipsum impingerem. Ille cadens lævum mihi crus non multo supra talum ictu exiguo perstrinxit. Ego illum iocans: et quid, inquam, rei est, mi Cicero, cur me feris? Ille nihil, sed eodem postridie redeuntem rursum ferit rursumque cum iocis erigitur in suam sedem. Quid te moror? Læsus iterum atque iterum expergiscor, et quasi indignantem humi esse, altius attollo, sed cum iam crebra concussione repetiti loci fracta cutis nec spernendum ulcus extaret. Sprevi tamen, potius rei causam quam rem ipsam librans. Itaque nec aquis abstinui, nec equestri vectatione, nec pedestri itinere temperavi expectans finem. Paulatim quasi se sperni dolens vulnus intumuit, et subinde nescio quænam caro discolor et virulenta succreverat. Tandem igitur cum iam dolor non iocos tantum sed somnos requiemque laceraret, ut non magni animi contemptus sed amentiae videretur, medicos coactus accerso, qui multis iam diebus huic non amplius ludicro vulnere incumbunt non sine cruciatu et periculo læsi artus, ut perhibent. Etsi illorum prognosticis in utramque partem quantum sit fidei apud me nosse te credam, et fomentis tamen crebris urgeor, et solitis cibis arceor, et insueta corporis quiete contineor. Invisa omnia, atque illud in primis quod voluptuosorum epulis uti cogor; sed iam res ad salutem spectat, ut et tu quoque prius convalescere quam ægrotasse me noveris. Una mihi frequens indignatio quod omnis ferme collisio ac dolor in hanc unam corporis partem præscripto de more incidit, ut non inepte famulus mecum iocans inter familiaria servitia sæpe fortunarum tibiam

nuncupare soleat. Sæpe illa me per omnem vitam exercuit et multum tempus, a puero incipiens, id quo nihil tristius facio, iacere compulit. Quid dicam? Parum abest quin, non dico admittam, sed lentius respuam fati nomen, quando non modo quisquis hominum, sed humani quæque pars corporis atque animæ suam sortem habet. Et sane suspectum potius nomen hoc pro eo quod ad impium sensum quibusdam pravis et obliquis ingeniis trahi solet, quam res ipsa falsa est. Siquidem a fando fatum dicitur, et, ut ait David, semel locutus est Dominus et quod ille locutus est, utique fatum est. Ut enim propheticae gravitati poeticum adsit eloquium, grave et inimitabile sanctis pondus adest verbis:

Et vocem fata sequuntur,

ut ait Statius Papinius. Atque ita fatum ac divina providentia unum sunt. Quod qui ita intelligit, non fallitur, licet propter eam quam dixi suspicionem nominis tenendam sententiam, corrigendam linguam admoneat Augustinus. Nos autem verbi disputationibus omissis, rem ipsam pia et minime pertinaci opinione teneamus, ipsam in omnibus veritatem, non victoriam aucupantes, et semper ex verbis animi præsidium elicientes, intrepidi paratique simus, non ad hoc aut illud mali genus, sed ad omnia. Nihil enim mali est, quod non homini dum vivit impendeat. His malis omnibus, vitæque periculis sola mors liberat. Cæterum in hoc meo casu de quo plusquam pro re dixerim suum forte impletur nomen, sic enim vulgo quod infaustum est lævum aut sinistrum dicitur: quamvis illud non me lateat in auguriis læva eadem esse quæ prospera: unde est

apud Poetam: *intonuit lævum*, lætumque est tonitru quod est lævum, ea scilicet ratione, quod quæ læva sunt nobis, dextera sunt superis, unde omnis prosperitas expectanda est. Licet hic quoque inter nos Graiosque et barbaros multa sit lis, quod, ut diximus, nos sinistra, illi etiam in auguriis dextera putant esse felicia. Quæ ambages quoniam procul ab incepto sunt, illud ad summam noveris hanc infaustam ac sinistram tibiam passam modo quod solita est, sed insperato ab hoste. Ita dilectus meus Cicero cuius olim cor, nunc tibiam vulneravit. Tu integer et illæsus, vale.

Idibus Octobris, nocte media.

## EPISTOLA XI.

FRANCISCUS PETRARCA NERIO MORANDO S. P. D.

Narrat singularem Henrici Capræ in se benevolentiam, cuius visendi gratia se Bergamum contulit.

Iam satis rerum mearum minutias legisti, satis Ciceroniani vulneris processit historia. Ne autem solum Ciceronem diligere ab ignotis credas, unum illis adiiciam, quod licet vetus apud te, nova animum admiratione perfundat. Est hic semper in oculis Pergamum Italiæ alpina urbs. Nam, ut nosti, alia huius nominis in Asia est, olim Attali regia, Romanorum post hæreditas. In hac nostra vir est unus litterarum tenui notitia, sed ingenio acri, si tempestive litteris datum esset: artificio autem aurifaber, inque eo longe eminens, quodque optimum habet hominis natura,

mirator amatorque rerum excellentium, auri vero quod quotidie tractat, opumque fallacium, nisi pro necessitate, contemptor. Et hic quidem iam ætate proVectior, cum forte meum nomen audisset famæ lenocinio confestim in amicitiae meæ studium vehementer exarserat. Longius eam si quibus ille tramitibus ad huius modestissimi voti successus ambierit, exequar; quid fidei honestarumque blanditiarum in me meosque omnes exercuerit, ut ad me longe positum familiariter atque ardentem accesserit, ignotus facie, sed iam proposito notus et nomine, quidve animo gereret in fronte atque oculis scriptum habens. Quid putas? Num sibi me negaturum, quod nulla barbaries, nullum ferox animal negasset? Delinimentis et fido ac perpetuo flexus obsequio tota virum mente complector. Neque enim sat me hominem rear, si honeste amanti sim durior ad reddendam vicem. Ille autem exultare, gloriari, gaudium animi vultu, voce, gestu prodere, et quasi voti compos augustissimi altiora respicere et totus in virum alterum repente converti; iam primum patrimonii sui partem non exiguam in meum decus expendere, signum, nomen, imaginem novi amici in omnibus domus suæ angulis, sed in pectore altius insculptam habere: partem alteram scribendis quæcumque mihi stilo quolibet effluxerunt. Et ego negata maioribus sibi haud duriter scripta largiri ardore hominis ac novitate propositi delectatus. Quid vis? Paulatim ille priorem vitam, actus et studia moresque dedidicit, et pene omne quod fuerat, sic exuit, ut sui omnes mirentur ac stupeant. Ad extremum, me dehortante et sæpius admonente, ne sero litterarum studio curam rei



familiaris abiiciat, ad hoc unum mihi surdus et incredulus, fabrilem deseruit officinam, gymnasium et artium liberalium magistros colit, delectatione eximia, mira spe, quam fortunatus studiorum nescio, sed votivo, nisi fallor, dignus eventu, qui tanto impetu tam honestam rem tantoque reliquorum omnium contemptu appetat. Et sibi quidem ingenium fervorque animi, civitati autem illi magistrorum copia semper fuit. Obstare sola videtur ætas hominis: quamvis et Platonem et Catonem tales viros, illum provecta ætate philosophiæ, hunc in senectute litteris Graiis haud frustra operam dedisse compertum sit: fortasse autem hic meus ob hoc ipsum non indignus fuerit, qui aliqua in parte mei operis inveniat locum. Est igitur viro nomen Henricus, cognomentum Capra, animal expeditum, impigrum, frondis amans, et natura semper in altum nitens. Inde autem dictum Varro æstimat quod virgultum carpat, ut sit capra, transportata littera, quasi carpa. Quod si cuiquam, haud dubie huic nostro debitum scias, qui si mane silvam attigisset, crede mihi, distentum uber atque uterum retulisset. Hæc tibi olim cuncta notissima, sed noscenda aliis dicta sint. Quod sequitur adhuc nescis. Hic ergo talis in se, et erga me talis iamdudum orare institit, ut seque suumque larem adventu dignarer meo, et unius saltem lucis mora sicut ipse aiebat, omnibus sæculis gloriosum ac felicem facerem. Hoc eius desiderium non absque difficultate aliquot iam per annos traxeram. Nunc tandem et vicinitate loci et non precibus solum sed obsecrationibus et lacrimis evicit ut flecterer, elatioribus licet amicis obstantibus, quibus honore indigna videretur hu-

militas. Veni ergo Pergamum III idus octobris ad vesperam eodem illo viæ duce qui hortator fuerat, et subinde trepidulo ne me interim consilii pœniteret, atque ideo modis omnibus satagente per se perque alios, ut a sensu itineris confabulando diverterer. Itaque planum iter et breve non sentientes egimus. Quidam vero me nobiles prosecuti erant ob id maxime ut tam fervidi hominis secreta cognoscerent. Cum ad urbem igitur ventum esset, et ab amicis obviam progressis multo cum gaudio excipior, et a præside provinciæ, et a belli duce, et a primoribus populi certatim pro se quoque instante in palatium publicum et nobilium domos vocor: illo interim mire anxio et tantis precibus pavente ne vincerer. Feci autem quod me dignum credidi; ad humilioris amici domum cum sociis descendi. Ibi vero ingens apparatus, cœna non fabrilis, non philosophica, sed regia, thalamus auratus, cubile purpureum, ubi nec iacuisse nec iacitum esse alium persancte iurat, librorum copia non mechanici sed studiosi hominis et litterarum amantissimi. Ibi noctem illam egimus: nec unquam puto lætiore hospite ulla nox acta est. Tanta enim lætitia gestiebat, ut timerent sui, ne forte in morbum aut amentiam verteretur, sive quod multis olim accidit, etiam in mortem. Inde vero die proximo honoribus et concursu hominum pulsus abii, præside ipso atque aliis multo pluribus longiusque quam vellem comitantibus, et amicissimo hospite vix serum lateri avulso sub noctem ipse rus redii. Habes, mi Neri, quod tibi non incognitum volebam. Hic nocturnarum epistolarum limes sit. Iam enim hæc iugiter ad auroram scribendo tulit impetus, fessumque

matutinæ quietis admonet soporifera noctis pars. Tu  
vale feliciter, nostri memor.

Scripta rurali calamo, Idibus Octobris, ante lucem.

---

## EPISTOLA XII.

FRANCISCUS PETRARCA FRANCISCO PRIORI SS. APOSTOLORUM

S. P. D.

Suum studendi ardorem describit quo temporis angustias  
laxare conatur.

Angustum vitæ spatium laxare proposui. Id quibus artibus fieri possit interroges: fugacissimum quidem tempus est, frænarique ullo ingenio non potest. Seu sopito, seu vigili labuntur horæ, dies, menses, anni, sæcula; omnia quæ sub cœlo sunt, mox ut orta sunt properant, et ad finem suum mira velocitate rapiuntur. Nulla intermissio, nulla quies; non maior dierum quam noctium fuga est, ex quo solliciti procedunt ac segnes, et qui videntur stare festinant. Non ut in mari ventis alternantibus varia navigatio, sed unus semper est vitæ cursus isque celerrimus: nunquam regredi nunquamque subsistere est; tempestate qualibet et omni vento provehimur. His mollior, his durior, his longior, his brevior via, omnibus una celeritas est. Non eodem calle, sed iisdem passibus gradimur, diversisque tramitibus omnes unum petimus finem: nec ideo quod hic illo serius pervenit, lentius incessit: sed viæ plusculum et meta remotior fuit, quæ quam-

vis remotissima videatur, haud dubie iuxta est. Ad hanc imus magno impetu, omne momentum nos impellit et invitos ex hoc pelago in portum trudit viæ amantes, metuentes termini, præposteros viatores. Frustra tergiversamur, ire oportet, immo vero pervenire. Iter a tergo est, finis ante oculos. Quid faciam ergo, seu quod istud laxandæ vitæ propositum est? Dicam tibi. In primis, fateor componendum animum ad morem finis. Nam quid, quæso, tam salubre quam discere ut libenter facias, quod facere vel coactum oporteat? Ubi didicerit animus inania non timere, amare naturalia, inevitabilia etiam optare, tum securus atque alacer expectabit, quod tam mœste, tam trepide humanum genus expectat. Id ego nulli penitus posse contingere arbitror, nisi qui peregerit omne id propter quod maxime vivere exoptabat. Rarum genus, soliusque virtutis studio deditum; hoc est enim illud *vivere vita perfecta*, cuius mentio apud Senecam est, quo vitæ genere, ut opinor, nihil est dulcius, quando nihil terret, nihil sollicitat, nihil angit, nihil expectatur, nisi quod adeo venturum esse certum est, ut nullo obice possit arceri: quando præsens bonum, recordatio præteriti, venturique spes accumulunt. Ad hunc finem non perveniunt qui post concupiscentias suas eunt; nunquam enim peragunt qui semper incipiunt, nunquam impletur futile aut pertusum vas, nullus infinito finis est; semper autem recens, semper incipiens, semper vaga et infinita cupiditas est. Qui hanc igitur sectantur infinitum iter arripiunt, atque ideo nec quiescunt, nec quiescere quidem possunt, quia dux eorum concupiscentia non quiescit. Horum vita non finitur sed abrumpitur, inter

ordiendumque succiditur. Illorum vero vitæ peractis officiis felices otiosæque reliquiæ sunt. Horum igitur imperfecta desinit, illorum perfecta durat vita, et tum demum iucunda, tum vera vita esse incipit, dum perfecta est. Mihi uni ex eorum grege qui medium locum tenent, cui nec dum peracta, nec in longum cupiditatis imperio protrahenda, nunquamque peragenda vita est, cui aliquid, cui multum desit, sed finitum tamen, cui præterea ad peragenda quæ superant non multis sæculis sit opus: sed tantum tempore opus sit, et solæ temporis angustiae timeantur, ea quam dixi laxandi temporis necessaria ars videtur. Id interim quonam modo fieri queat percontabere. Totum in ipsius temporis dispensatione consistit. Fundunt vina ebrii, obsessi etiam aquis parcunt; prodigalitatem copia, egestas parsimoniam parit. Sæpe sub extremum quid ab initio agendum fuisset apparere incipit, immo nunquam fere consilium et facultas coeunt. Hebet illud dum hæc viget, dumque illud intenditur, hæc lentescit: alioquin feliciora essent humana negotia, et ceptorum exitus lætiores. Nunc mihi nosse incipit, posse desinit; mallet prius, sed non est iuvenilis ingenii tempori pretium imponere. Male enim æstimat quisquis abundat: par est autem abundare, quantum ad hæc attinet, et abundare se credere. Siquidem error omnis non in rebus, sed in opinione consistit. Nulli mortalium tempus abundat, sed huiusce rei penuriam non ex æquo omnes intelligunt. Equidem omni ætati caligo venturi temporis æque suffunditur, nihilque plus certi habet florentissimus adolescens, quam procurvus et capularis senex, nisi quod plus sperat, eoque sæpius et gravius hac spe

fallitur, et sæpe tutior est qui minus sperat. Mille sunt rerum, mille hominum species, sed in his omnibus nihil magis quam spes una circumvenit. Hac ne in finem circumveniar aperire oculos incipio. Satius est enim sero quam nunquam sapere. Cuius rei primum prodigus, exhinc largus fueram, iam parcus iamque avarus et tenax fieri velim. Hora quidem admonet, necessitas cogit; non est iocandi locus: præveniemur et prævertemur in mediis, mihi crede, conatibus: nisi expergiscimur et obstamus, et nisi totis animi viribus assurgimus, opprimemur. Itaque iam me ipse mearum status rerum, et intellecta iam tandem periculi magnitudo, non minus quam Themistoclem trophea Miltiadis, e somno excitant. Sæpe me semisopitum adhuc clausis oculis sed experrecto animo cura vigil stratis excutit, ita ut lumen, quod mihi de more pernox excubat, non videam, sed prætenta manu quasi per tenebras ad proximum famulum excitandum proficiscar. Interdumque mihi accidit, quod rideas, ut apertis interim oculis, conspectum lumen extinxerim, ne superveniens famulus frustra quia se vexatum intuens secum ipse vel tacitus meas rideret ineptias, et nescio quid aliud rerum nescius cogitaret. Sic sum, et quamvis moræ poeniteat, consilii non pudet. Utinam hæc iuveni mens fuisset! Unum hoc saltem gratulor seni erit. Utile illud et magnis principiis opportunum: sed hoc quoque non inutile nec spernendum: et si in alterutro delinquendum erat, mane dormitasse maluerim quam sero. Graviores sunt enim quæ ad exitum spectant: periculosissimus error extremus: de omnibus vitæ annis una mortis hora pronuntiat. Ad hanc componi singularis et

summæ providentiæ opus est. Huc olim omne tempus atque omne studium vertendum erat: quod si effusum inutiliter dolemus, saltem reliquias relegamus, et quod desidia periit, diligentia reparetur. In hoc nitor haud veritus ne id mihi vitio detur, quod parcior irreparabilis rei sim. Ut enim pecuniæ infamis, sic quarumdam rerum exacta tenacitas gloriosa est. Quis cæremoniarum observantiam in religioso non laudet, tenacitatem pudiciæ in matrona, in studioso temporis parcitatem? Hanc amplectar, hanc teneam, hac, qua datur, amissi temporis damna restaurem. Hoc meditor, huc suspiro, huc forsitan duce Deo et magna animi intentione, perveniam. Curabo ne quid pereat: si id non assequar, ut minimum. Cum somno et voluptate tempus partiar: non sinam ut ullam partem mei iuris occupent. Est ad quam provocem si premar, virtus, incorrupti fons iudicii, et rationis arx inexpugnabilis atque invicta. Si lis finium incesserit, huc quæstio referenda, hinc pendenda sententia est. Optarem sine competitoribus agere; sed non licet. Hos mihi consortes corpus dedit; communi dividundo iudicium experiar. Cogam si potero tertia parte temporis esse contentos. Septem horas dormiebat Augustus in deliciis stratoque aureo, easque sæpe interpellantibus somnum curis. Paciscar ego cum oculis meis sex illis ut sufficiant. Horæ duæ in reliquos necessarios usus eant: residuum mihi cedat. Non poteris inquires. Pactus et expertus possum.

Nil mortalibus arduum

ait Flaccus. Ita est. Quædam nobis impossibilia torpor fecit. Nihil prorsus impervium est virtuti; multa pos-

semus, nisi desperata prius quam tentata liquissemus. Fuit, ut fama est, et qui cœlum pennis peteret, et qui sub fluctibus animam conservaret. Rara sunt, fateor. Sed talibus delectamur, omninoque fastidium frequentia, delectationem raritas parit. Habes non parvam propositi mei partem, cui illud addendum est, quod in hac parcite tempore Augustum sequens, et inter commendum radendumque legere aut scribere, aut legentes audire, et scribe ntibus dictare soleo. Et quod neque de ipso neque de alio quod meminerim legi, inter equitandum cœnandumque idem facere consuetudinem feci: itaque sæpe, quod miraberis, equo sedens viam simul carmenque complevi, et dum procul ab hominum turbis sum, in alterutro Helicone nostro, nisi peregrini convivæ respectus impediât, semper calamus agrestes inter epulas eminet, nec ulla mihi mensa sine pugillaribus tabellis instruitur. Sæpe etiam nocte media experrectus, sopito lumine, ante omnia pulvinari hærentem calamum arripui, et ne concepta defluerent, inter tenebras scripsi, quod reversa luce vix legerem. Hæ sunt curæ meæ. Gloriabundus forte aliis visurus sim; tu in hoc familiari colloquio vitam atque animum meum cernes, et intelliges me ex his pudorem potius captare quam gloriam, quod scilicet hac ætate ullam aliam quam animæ curam geram. Sic sum tamen, et mihi persuadeo animæ etiam profutura quæ molior. Procedo enim cum securior, tum lætior, quodque ait ille, quotidie discens aliquid senesco. Et quid, inquires, iam discendum censes? Multa quidem: disco qualiter sponte mea iuvenis esse iam desinam, et quod semper cupide didici, nec unquam nimis discitur, disco sene-



scere, disco mori. Quorum in altero quorsum studio provector sim, dies extrema testabitur: ancipitis enim experimenti est, quod in omni tempore fieri nequit amplius quam semel. In altero autem eo usque prodii, ut accedente senio in dies uberius grates agam, malisque vinclis me absolvi, et gravi onere levari, et immerito convicio diffamatam ætatem illam rear. Profecto enim non ætatis, sed ignaviæ est quod accusator naturæ excusatorque sui populus senibus imputat. Omnis ætas et virtutis et vitii et gloriæ et infamiæ capax est, ex quo primum intelligere ac ratione uti cœperit. Verum sicut humano victui per se ipsa bruma non sufficit, at si providentia æstiva præcesserit, haud inamœna pars anni est, sic longæ senectus inertiae succedens inops, tristis et sterilis atque inutilis vitæ pars: eadem iuventæ studiis præfulta, dives bonarumque ferax artium, atque utilis et iucunda est: quæ si ad nil aliud prodesset quam quod præcedentium ætatum omnium æstus lenit, abunde, ni fallor, causæ erit cur et optanda esset et amanda. Quis etenim, nisi ingratus, non gratiam habeat ætati consulenti meliora et consummanti ea quæ ratio hactenus pigra neglexerit, denique quod est in homine pessimum extirpanti, quodque est optimum inserenti? Sed redeo ad inceptum, et præcipuam illam studiorum curam, in qua ego sic exerceor anxie quasi nunc ceperim, et si nihil amplius, satis est quod multis interea curis gravibus abstrahor, et obliviscor temporum, et delector et iuvat vivere, et ea quibus maxime conflictantur homines vix sentio. Itaque divitiis alii honoribus aut voluptatibus inhient. Ego in hoc divitias meas, in hoc honores voluptatesque reposui:

quod propositum nec puero defuit, nisi quod cum lentus ex commodo quasi matutinis ibam horis, nunc gradum quasi pulsus ingenio, versa ad occasum die, memorque quantarum rerum fundamenta iecerim festino laborum certus ambiguusque successuum. Serum consilium non nego; sed quo serius sumptum, eo promptius exequendum. Accedunt exempla clarissimorum hominum, quæ salivam excitant torporemque decutiunt, totisque iam fessum noctibus agitant. Nolo enim æstimes unum Themistoclem, aut unum esse Miltiadem: multi sunt. Plura deinceps et cum maiora, tamen, ut spero, etiam tutiora sunt quæ restant. Nunc præsentem animi mei statum, cuius noscendi avidum te sciebam, nosti. His artibus nitor fugam rapidissimi temporis frænare si liceat, et hos pauculos dies morti subripere legendo, scribendo, cogitando, vigilando. Si enim, quod magni dixerunt viri, somnus est mors, vita vigilia est, sic saltem pluribus horis vivam. Vale.

Mediolani, Idibus Novembris.

---

### EPISTOLA XIII.

FRANCISCUS PETRARCA FRANCISCO PRIORI SS. APOSTOLORUM  
S. P. D.

Suam vivendi rationem pandit amico.

Neque quod sæpius paucorum semitam, neque quod interdum iter sequeris multorum miror. Alterum ut philosophus facis, alterum ut homo. Nemo tam sapientiæ deditus, qui non quandoque ad humanitatem redeat

communem et publicis moribus condescendat. Quamvis, ut verum fatear, non vulgaris sed philosophicus mos sit, quem in te hodie notare decreveram, atque ideo prope iam principii poeniteat, semperque tu mihi idem sis, semperque unus ex paucis. Siquidem vulgus inscium quo plura quæsierit, pluribus indiget: pauci autem, hoc est docti homines, quo plura didicerint, pluribus inbiant: itaque ut habendi sic noscendi cupiditas inexpleta est. *An ubi ultro superiorem epistolam hanc minime ut arbitror exegisses? (sic).* Ille haustus hanc tibi peperit sitim, ut quoniam mei partem status audieris, nosse velis et reliqua: quid de victu faciam ac vestitu: de utroque dudum meis litteris edoctus, sed opinor veritus ne quid tenori tunc descripto locus aut tempus dempserit. Repetam ergo quem vitæ modum in his teneam, et quod hominum genus sequar dicam. Sunt qui nisi intra crustatos ebore parietes et nisi molibus in plumis aut in recenti rosa nolunt membra componere: qui nisi aureis ac gemmatis poculis leniri sitim posse non putent. Quid ergo? Horum ne fieri iuvat ex numero? Ego vero longe non posse pati hæc quam carere his non posse maluerim. Sunt quibus delicie bilem excitent: continuata voluptas nauseam ferat. Si gloriari licet apud te, ex his me non minus natura quam studium fecit. Ab annis teneris exquisitas epulas nisi perraro, longas vero mensas et in noctem tracta convivia semper exhorruui: semperque meum fuit quod serius sibi Flaccus idem tribuit:

Cœna brevis iuvat, et prope rivum somnus in herba.

Semper, quod ut stupeas dico, voluptatem ac divitum

delicias, non tam studio virtutis, cuius amantior fuisse cuperem, quam illarum contemptu atque odio, et quod secum ferunt tædii metu, eiusque quam felicem vulgus iudicat, vitæ fastidio aspernatus sum. Rebellat tamen animus interdum, rebellantque oculi: animum subit æmulatio, oculos lassitudo, eosque in quibus aliquando mihi placui demens, nunc in speculo sæpe nocturnis vigiliis attritos, liventesque conspiciens miror: et an ille ego sim tacitus mecum quæro. Verum ita rebellant ut facile superentur. De vestibus et reliquo apparatu olim ex me, dum in Transalpino Helicone agerem, audisti. Ne falsam tamen opinionem plenæ frugalitatis indueris, cogita ruris incolam et rusticanæ faventem continentiae dum id scriberem me fuisse. Coëterum quod fateri oportet, etsi non ad extremum solidos, du-ros tamen ac rigidos affectus vel frangunt loca, vel molliunt. Alexandrum Persis, Hannibalem fregit Capua, quem Roma non fregerat: ut illud ab hoste eius acerrimo eleganter ac proprie diceretur: Capuam Hannibali Cannas fuisse. Neque solum viri unius virtus loci mutatione, sed sæpe totius gentis robur elanguit. Macedonicum robur debilitavit Babylon, Gallicam feritatem mitigavit Asia, romanamque virtutem fregit Hispania, fregit Africa, non quidem ferro hostili, sed exercituum ignavia et disciplinæ militaris interitu. Hic ipse populus tantus et tantarum opum, cuius iam pene pars factus sum, haud dubie barbaram habet originem. Nunc (quid non mutatio loci potest?) nihil moribus gentis humanius, nihil est mitius. Transplantatæ succos mutant herbæ. Arbusta silvestria si inserta fuerint, loci mutatione primævam exuunt naturam, assumuntque

aliam. Quid intendam vides? Nam et ego (quid enim tibi res meas celem quod non soleo?) prope alius rure mihi videor, alius in urbibus. Nempe ibi naturam sequor, hic exempla. Inque hoc maxime sentio quam adhuc remotus inde sim quo pervenisse iam debui, uniformitatem dico votorumque constantiam, quam quisquis attigerit metam tenet, et in quem stultorum navigatio non penetrat tutum ac placidum vitæ portum. Vel victor itaque vel invictus ad reliqua in hac parte belli hæreo, et qui gulæ somnoque frænos dedi, qui libidinem non frænavi, sed ope divini roris extinxi, leviora ægrius domo, et in eo plus mihi negotii est quod ad communem, ne dicam philosophicum vestis modum, vix dum inclinare animum incipio. Invaluit in me vetustæ consuetudinis durum iugum. In quo discutiendo utique multus sum, multumque brevi tempore profecisse videas: ita tamen ut et multum restet. Sed iam magis adversus obsoletæ pudorem quam adversus pretiosæ vestis inanem gloriam frons atque animus sunt armandi, et fortassis efficiam necubi magnopere armis indigeant. Tu vale nostri memor, et ora obsecro, ut sic vivam qualiter vellem vixisse dum moriar.

Mediolani extra muros, VII. Idus Novembris.

---

## EPISTOLA XIV.

FRANCISCUS PETRARCA FRANCISCO PRIORI SS. APOSTOLORUM

S. P. D.

Se Mediolano in cœnobium Sancti Simpliciani recepisse, cuius cœlicolæ vitam ab ignoto auctore enarratam fastidit, eamque ex Augustini operibus summatim ipse excerpt.

Potuit te in admirationem trahere superior data, quod adhuc tonante graviter bello extra muros ierim: quamquam fieri possit ut intra urbem habitans extra muros scripserim casu aliquo, ut fit, ad tempus, urgente urbis tædio, egressus. Sed non ita est. Itaque ut rem noris, scito me ad tertio nonas novembris ex Ambrosii domo ac vicinia, ubi mihi iam septimus annus agebatur, extra civitatis ambitum antiquum, ab Occidua scilicet ad Arctoam plagam, ad Simpliciani claustrum commigrasse. Tantus est amor libertatis et solitudinis et quietis. Etsi enim, ut res sunt, vix hic speranda solitudo videatur, ea tamen conditio novæ domus est, ut latenti postico saluatorum importuna acies facile falli queat: quæ facultas alteri habitaculo deerat. Mille passus et eo amplius in directum habeo secessus amœnissimi. Nam si extrema civitatis ambire voluero multa sunt millia intra vallum, ubi fere semper verso in tabernas et in forum vulgo, solitudo ingens sit. Sed hos mille passus ita mihi cessisse totos noveris, ut partem ager arduus et densior sepes cingant, alteram apertam suapte natura secretus et infrequens inherbosus trames secet, per quem sæpe solus aut uno comitatus, nemine obvio, nullo nisi exiguo

viæ flexu, sed apricis et umbrosis locis eam ac redeam, ita ut, nisi me prospectus et strepitus vicinæ urbis admoneat, silvis in mediis esse mihi videar. Hæc me opportunitas et fuga hominum ex urbe detraxit: nec sum veritus ne ægre ferret Ambrosius, cum ab eo nequaquam mente discesserim, quod ad patrem eius accesserim: sic enim Augustinus vocat Simplicianum patrem in accipienda gratia Ambrosii episcopi, nec timui ne dedecori mihi esset ad illius domum pro quietiore vita pergere, ad quem se pro vitæ consiliis perrexisset idem ipse commemorat Augustinus. Illico autem ut hic fui nihil antiquius habui quam ut sancti huius historiam flagitarem, non ultimam oblectationum ratus tanti hospitis vitam nosse. Oblatum est mihi a monachis novum quoddam scholastici nescio cuius opusculum, sine gravitate, sine lepore, sine ordine, quamvis, ut intelligere erat, sumptum ex Augustini confessionibus, ubi illi scilicet viri huius mentio inciderat. Coeterum non ut ibi, sed huius novi litteratoris arbitrio non modo inornata sed deformata et confusa omnia. Stupens et stomachans librum pono. Nam quid aliud agerem? Transacta res est: iamque talis apud vulgus est vita Simpliciani quale fuit scribentis ingenium: sed apud omnia videntem longe alia. Unde legentis ad memoriam rediit litterati cuiusdam, sed non æque boni viri, dictum unum qui aiebat: tantam esse gloriam sanctorum quanta esset eloquentia scriptorum. Venenatum plane verbum, licet consonum vel poetæ dicto vel historici. Flaccus enim ait:

Paulum sepultæ distat inertiae  
Celata virtus.

Crispus ait: *eorum qui fuere virtus tanta habetur quantum eam verbis potuere extollere præclara ingenia*. Sed illorum evidens et vera, huius autem de quo loquor occultæ hæresis suspecta sententia est. Illi enim de iis agunt quibus virtute gloria quæritur, quibusque supremum virtutis opus est maioris poetæ consilio famam factis extendere: quæ profecto sine scriptis aut nulla esset aut brevis. Hic vero de sanctis qui non in strepitu popularis auræ, sed in Domino gloriantur, quorum nomen in libro vitæ digito Dei scriptum mortalium scriptorum patrocinio non eget. Si omnis calamus iaceat, omnis lingua taceat, omnis hominum favor ac recordatio evanescat, nihilominus in memoria æterna erit iustus, et terrisoni sermonis angustias spernet cœlestis gloriæ magnitudo. Equidem Simplicianus hospes meus apud Dominum magnus valde: apud hunc suum historicum nimis familiariter et inculte habitus, limationis stili operam merebatur, ex quo sibi nihil omnino, sed legentibus imitandi studium et devotionis fervor accederet. Esto autem ut scriptor idoneus non desit: ubi tamen rerum veritas quæretur, si ignota domui suæ est? Constat ipsius Augustini testimonio Simplicianum bonum Dei servum extitisse, in quo luxit gratia divina, et qui a iuventute in senium devotissime Deo vixit, virum longo studio dominicæ viæ sectandæ; multa edoctum pariter et expertum, qui Victorino claro primum rhetori urbis Romæ, post pio Christi martyri familiarissimus, et ad veram fidem magnus et efficax hortator fuit: qui deinde Augustinum ad se, ut dixi, pro consilio venientem, quod utique magnæ virtutis opinione non caruit, ad humilitatem Christi et



spem vitæ melioris erexit: denique qui ætate extrema omnibus aliis multis quidem et insignibus viris ad episcopatum huius iam tunc magnæ urbis obeuntis Ambrosii iudicio, sic prælatus, qui ut tanti suffragatoris sententiam honestaret, assumptum munus pastoralis curæ summa rexit integritate atque eximia sanctitate. Hæc mihi hactenus de hoc novo meo hospite nota sunt: cætera novit æthereus hospes suus. Et hæc tibi dolore corporis cum animo decertante intempesto noctis silentio iacens scripsi difficillimo accubitu. Quid vis dicam? Omnia cum labore: vel requies. Vale.

---

### EPISTOLA XV.

FRANCISCUS PETRARCA IOHANNI DE CERTALDO S. P. D.

Obiectam sibi calumniam reiicit se gloriæ Dantis Allighierii invidere.

Multa sunt in litteris tuis haudquaquam responsionis egentia, ut quæ singula nuper viva voce transegimus. Duo ex omnibus non prætereunda seposui. Ad hæc breviter quæ se obtulerint, dicam. Primum ergo te mihi excusas, idque non otiose, quod in conterranei nostri popularis quidem quod ad stilum attinet, quod ad rem haud dubie nobilis, poetæ laudibus multus fuisse videare. Atque ita te purgas, quasi ego vel illius vel cuiusquam laudes meæ laudis detrimentum putem. Itaque quidquid de illo prædicas, totum si pressius inspiciam, in meam gloriam verti ais. Inseris nominatim hanc huius officii tui excusationem, quod ille

tibi adolescentulo primus studiorum dux et prima fax fuerit. Iuste quidem, grate, memoriter, et, ut proprie dicam, pie. Si enim genitoribus corporum nostrorum omnia, si fortunarum auctoribus multa debemus, quid non ingeniorum parentibus ac formatoribus debeamus? Quanto enim melius de nobis meriti sint qui animum nostrum excoluere, quam qui corpus, quisquis utrique iustum pretium ponit, intelliget, et alterum immortale munus, alterum caducum et mortale fatebitur. Age ergo, non patiente sed favente me, illam ingenii tui faciem, quæ tibi in hoc calle quo magnis passibus ad clarissimum finem pergis, ardorem præbuit ac lucem, celebra et cole, ventosisque diu vulgi plausibus agitatam, atque ut sic dixerim fatigatam, tandem veris, teque seque dignis laudibus ad cælum fer: in quibus omnia placuerunt. Nam et ille dignus hoc præconio, et tu, ut ais, huic officio obnoxius: ideoque carmen illud tuum laudatorium amplector, et laudatum illic vatem ipse quoque collaudo. In excusatoria autem epistola nihil est quo movear, nisi quod parum tibi nunc etiam notus sim, cui me plane notissimum arbitrabar. Ergo ego clarorum hominum laudibus non delecter, immo et glorier? Crede mihi: nihil a me longius, nulla mihi pestis ignotior invidia est; quin potius (vide quam procul inde absim) scrutatorem mentium Deum testor, vix me aliud in vita gravius pati, quam quod benemeritos et gloriæ et præmii omnis expertes video: non quod aut hinc damnum ipse proprium querar, aut contrario lucrum sperem, sed publicam sortem fleo, ad obscoenas artes honestarum præmia translata conspiciens. Etsi non sim nescius, quod quamvis merito-

rum gloria ad merendi studium animos excitet, vera tamen virtus, ut philosophis placet, ipsa sibi stimulus, ipsa est præmium, ipsa sibi cursus et bravium: proinde quia tu mihi materiam obtulisti, quam quæsiturus sponte non fueram, libet insistere, ut non tantum falso, sicut de se ipso et Seneca Quintilianus ait, sed insidiose etiam penitusque malivole apud multos de me vulgatam opinionem in iudicio viri illius apud te unum et per te apud alios expurgem. Dicunt enim qui me oderunt, me illum odisse atque contemnere, ut vel sic mihi odia vulgarium conflent, quibus acceptissimus ille est. Novum nequitiae genus et mirabilis ars nocendi. His pro me veritas ipsa respondeat. In primis quidem odii causa prorsus nulla est erga hominem nunquam mihi nisi semel, idque prima pueritiae meae parte monstratum. Cum avo patreque meo vixit avo minor, patre autem natu maior, cum quo simul una die atque uno civili turbine patriis finibus pulsus fuit, quo tempore inter participes ærumnarum magnæ sæpe contrahuntur amicitiae; idque vel maxime inter illos accidit, ut quibus esset præter similem fortunam, studiorum et ingenii multa similitudo; nisi quod exilio cui pater in alias curas versus et familiae sollicitus cessit, ille obstitit, et tum vehementius cœpto incubuit, omnium negligens soliusque famæ cupidus. In quo illum satis mirari et laudare vix valeam, quem non civium iniuria, non exilium, non paupertas, non simulatium aculei, non amor coniugis, non natorum pietas ab arrepto semel calle distraxerit, cum multi quam magni tam delicati ingenii sint, ut ab intentione animi leve illos murmur avertat: quod his familiarius evenit,

qui numeris stilum stringunt, quibus præter sententias, præter verba, iuncturæ etiam intentis, et quiete ante alios et silentio opus est. Odiosum ergo simulque ridiculum intelligis odium meum erga illum nescio quos finxisse, cum ut vides, odii materia nulla sit, amoris autem plurima, et patria scilicet, et paterna amicitia, et ingenium, et stilus in suo genere optimus, qui illum a contemptu late præstat immunem. Ea vero mihi obiectæ calumniæ pars altera fuerat, cuius in argumentum trahitur, quod a prima ætate, quæ talium cupidissima esse solet, ego librorum varia inquisitione delectatus, nunquam librum illius habuerim, et ardentissimus semper in reliquis, quorum pene nulla spes supererat, in hoc uno sine difficultate parabili novo quodam nec meo more tepuerim. Factum fateor, sed eo quo isti volunt, animo factum nego. Eidem tunc stilo deditus vulgari eloquio ingenium exercebam. Nihil rebar elegantius nec dum altius aspirare didiceram, sed verebar ne, si huius aut alterius dictis imbuerer, ut est ætas illa flexibilis et miratrix omnium, vel invitus ac nesciens imitator evaderem. Quod, ut erat animus annis audentior, indignabar, tantumque fiducia seu elationis indueram ut sine cuiusquam mortalis auxilio, in eo genere ad meum et proprium quemdam modum suffecturum mihi ingenium arbitrarer. Quod quam vere crediderim alii iudicent. Hoc unum non dissimulo, quod si quid in eo sermone a me dictum illius aut alterius cuiusquam dicto simile, sive idem forte cum aliquo sit inventum, non id furtim aut imitandi proposito, quæ duo semper in his maxime vulgaribus ut scopulos declinavi, sed vel casu fortuito factum es-

se, vel similitudine ingeniorum, ut Tullio videtur, iisdem vestigiis ab ignorante concursum. Hoc autem ita esse, si quid unquam mihi crediturus es, crede. Nihil est verius. Quod si mihi nec pudor, ut credi debeat, nec modestia præstitisset, iuvenilis animi tumor præstabat. Hodie enim ab his curis longe sum. Et postquam totus inde abii sublatusque quo tenebar metus est, et alios omnes et hunc ante alios tota mente suspicio. Iam qui me aliis iudicandum dabam, nunc de aliis in silentio iudicans varie quidem in reliquis, in hoc ita iudico, ut facile sibi vulgaris eloquentiæ palmam dem. Mentiuntur igitur me illius famam carpere, cum unus ego forte melius quam multi ex his insulsis et immodicis laudatoribus sciam, quid id est eis ipsis incognitum, quod illorum aures mulcet, sed obstructis ingenii tramitibus in animum non descendit. Sunt enim ex illo grege quem Cicero in Rhetoricis notat cum inquit: *legunt orationes bonas aut poemata, probant oratores aut poetas, neque intelligunt quare commoti probent, quod scire non possunt ubi sit, nec quid sit, nec quomodo factum sit id quod eos maxime delectet*. Id si in Demosthene et Tullio inque Homero et Virgilio inter litteratos homines et in scholis accidit, quid in hoc nostro inter idiotas in tabernis et in foro posse putas accidere? Quod ad me attinet, miror ego illum et diligo, non contemno. Et id forte meo iure dixerim si ad hanc ætatem pervenire illi datum esset, paucos habiturum quibus esset amicior, quam mihi. Ita dico si quantum delectat ingenio, tantum moribus delectaret: sicut ex diverso nullos quibus esset infestior, quam hos ineptissimos laudatores, qui

omnino quid laudent quidve improbent ex æquo nesciunt, et qua nulla poetæ præsertim gravior iniuria, scripta eius pronuntiando lacerant atque corrumpunt: quæ ego forsitan, nisi me meorum cura vocaret alio, pro virili parte ab hoc ludibrio vindicarem. Nunc quod unum restat, queror et stomachor illius egregiam stili frontem inertibus horum linguis conspui fœdarique. Ubi unum quod locus exigit non silebo, fuisse mihi non ultimam causam hanc stili eius deserendi, cui adolescens incubueram. Timui enim in meis quod in aliorum scriptis, præcipueque huius de quo loquimur, videbam, neque volubiliores vulgi linguas aut spiritus molliores meis in rebus speravi, quam in illorum essent, quos vetustas et præscriptus favor theatri ac compitis urbium celebrassent. Meque non frustra timuisse res indicat, quando in his ipsis paucis, quæ mihi iuveniliter per id tempus elapsa sunt, vulgi linguis assidue lace-  
ror. Indignans quodque olim amaveram perosus, quotidie nolens et ingenio iratus meo in porticibus versor. Ubique indoctorum acies, ubique Damoetas meum in triviis solitus

Stridenti miserum stipula disperdere carmen.

Sed iam satis multa de re modica nunquam mihi tam serio agitanda: cum hanc ipsam horam minime amplius redituram curis aliis deberem: nisi quia excusatio tua horum accusationi nescio quid simile sapere visa est. Solent enim plerique mihi odium, ut dixi, alii contemptum viri huius obiicere, cuius hodie nomine scienter abstinui, ne illud infamari clamitans cuncta audiens, nihil intelligens vulgus obstreperet. Alii autem invidiam

obiectant, hi scilicet qui mihi meoque nomini invident. Nam etsi magnopere invidiosus non sum, tamen quod aliquando non credidi, quodque sero admodum adverti, certe sine invidis non sum. Atqui ante multos annos quando equidem in me magnis affectibus licebat, non verbo aut scripto quolibet, sed carmine ad insignem quemdam virum misso, conscientiae fidens profiteri ausus sum, me nihil ulli hominum invidere. Sed esto: non sim dignus cui credatur. Quam tandem veri faciem habet ut invideam illi qui in his ætatem totam posuit, in quibus ego vix adolescentiæ florem primitiasque posuerim, ut quod illi artificium nescio an unicum, sed profecto supremum fuit, mihi iocus atque solatium fuerit, ingenii rudimentum? Quis hic, precor, invidiæ locus? Quæve suspicio est? Nam quod inter laudes dixisti, potuisse illum si voluisset alio stilo uti, credo ædepol. Magna enim mihi de ingenio eius opinio est: potuisse enim omnia quibus intendisset, nunc ex quibus intenderit palam est. Et esto iterum: intenderit, potuerit, impleverit; quid tandem ideo, quæve inde mihi invidiæ et non potius gaudii materia? At cui tandem invideat qui Virgilio non invidet? Nisi forte sibi fullonum et cauponum et lanistarum cœterorumve, qui quos volunt laudare vituperant, plausum et raucum murmur invideam, quibus cum ipso Virgilio, cumque Homero carere me gratulor. Novi enim quanti sit apud doctos indoctorum laus: vel nisi mantuanus florentino cive mihi carior est credendus, quod origo per se ipsam, nisi quid aliud accesserit, non meretur: quamvis illud non inficier, inter vicinos potissimum invidiam regnare. Sed suspicionem hanc præter multa, quæ

diximus, ætatum quoque diversitas non recipit; quoniam ut eleganter ait ille qui nil inelegans ait; mortui odio carent et invidia. Iurato mihi fidem dabis, delectari me hominis ingenio et stilo: neque de hoc unquam me nisi magnifice loqui solitum. Unum est quod scrupolosius inquirentibus aliquando respondi, fuisse illum sibi imparem, quod in vulgari eloquio, quam in carminibus aut prosa clarior atque altior assurgit. Quod neque tu neges, nec rite censentibus aliud quam laudem et gloriam viri sonat. Quis enim non dicam nunc extincta complorataque iam pridem eloquentia, sed dum maxime floruit in omni eius parte summus fuit? Lege Senecæ declamationum libros. Non id Ciceroni tribuitur, non Virgilio, non Sallustio, non Platoni. Quis laudem tantis ingeniis negatam ambiat? Uno in genere excelluisse satis est. Quæ cum ita sint, sileant, quæso, qui calumniam struunt. At qui forte calumniantibus crediderunt, hi si libet, iudicium meum legant. His ego quibus premebar apud te depositis, ad secundum venio. Quod de tua salute tam sollicitus fuerim gratias agis: urbane potius et vulgari more quam quod nescias supervacue id fieri. Nam cui unquam pro sui ipsius cura proque re propria bene gesta gratiæ actæ sunt? In te, amice, mea res agitur. Etsi equidem in rebus humanis amicitia post virtutem nihil sanctius, nihil deiformius nihilque coelestius, tamen referre arbitror, an amare incipias an amari, aliquantoque religiosius colendas amicitias in quibus amoris vices reddimus quam in quibus accipimus. Nempe ut sileam multa, ubi me tuis obsequiis atque amicitiae muneribus victum scio, unum illud oblivisci nunquam possim, quod tu olim me Italiae



medio iter festinantius agentem, iam sæviente bruma, non affectibus solis, qui quasi quidam animi passus sunt, sed corporeo etiam motu celer, miro nondum visi hominis desiderio, prævenisti, præmisso haud ignobili carmine. Atque ita prius ingenii et mox corporis tui vultum mihi quem amare decreveras ostendisti. Sera tamen diei illius et ambigua iam lux erat, dum me longo postliminio redeuntem, et intra muros tandem patrios deprehensum, officiosa et supra meritum reverenti salutatione complexus, renovasti illum poeticum cum Anchise congressum Regis Arcadii:

. . . . . cui mens iuvenili ardebat amore  
Compellare virum et dextræ coniungere dextram.

Quamvis enim ego non ut ille *cunctis altior irem*, sed humilior, tibi tamen non minus ardens animus fuit. Non tu me Phinei sub mœnia, sed amicitiae tuæ sacris penetralibus induxisti. Nec ego tibi *insignem pharetram Lyciasque sagittas*, sed perpetuam et sinceram benevolentiam meam dedi. Multis rebus inferior hac una nec Niso unquam, nec Pythiæ volens cesserim, nec Lælio. Vale.



FRANCISCI PETRARCÆ  
DE REBUS FAMILIARIBUS  
LIBER VICESIMUS SECUNDUS.

---

EPISTOLA I.

FRANCISCUS PETRARCA PANDULPHO MALATESTÆ S. P. D.

Utrum expediat uxorem ducere, eamque e vicinia,  
vel e longinquo petere.

An magis expediat uxorem ducere an vitam cælibem agere consulis. Gratiam habeo quod me idoneum tanto negotio consultorem ducis. Atqui, si experientia artem facit, quanto tu de hoc certius loqui potes, qui utrumque, quam ego qui alterum sum expertus, de altero vero vel scriptis auctorum veterum, vel relatis modernorum coniugum, vel proprio quodam motu animi coniecturam facio? et idcirco responsum distuli veritus de quæstione ambigua tanto sub iudice respondere. Tandem omnibus circumspectis rudis malo quam contumax, vel tui tuarumque rerum negligens videri. Historias igitur et argumenta seposui, libri opus non epistolæ; nempe cum de hoc ipso libros quidam scripserint, brevem ac nudam sententiæ meæ summam audies, in qua ingenium si fortasse culpaveris, laudabis fidem. Ante omnia quidem meminisse profuerit Socra-

tici responsi illius ad adolescentulum, qui cum similiter dubius ac tu, ex illo quæsiisset quod ex me nunc quæris, ait Socrates: utrum eorum fecisset pœnitentiam acturum esse; et adiecit causas quas sileo: notæ enim sunt. Quo dicto satis ostendit quid de hoc quod inter nos agitur sentiret, quamvis idem magna de parte rerum humanarum similiter dici possit, in quibus, quidquid eligis, undique labor tædium periculum. Nec miraberis si intendas vitam nostram, qua tantopere delectamur, quocunque te veritas non esse aliud quam periculum et tædium et laborem. Quid inde enim aliud speres quam quod ibi est? Quis ardenti fornace rorem gelidum, quis mari medio dulcem fontem, aut vivas altis sub nivibus prunas quærat? Unaquæque res suis in sedibus est quærenda, et si alibi quæritur altam quoque frustratur indaginem. Itaque cum in hoc fusco scrupuloso et lubrico vitæ cursu nec requies vera, nec mera dulcedo aliqua, nec certa possit esse securitas, quotiens rei cuiuspiam ambiguitas orta erit, ut nunc tibi, sæpe aliis, omni fallacium spe reiecta, virtus sola relinquitur. Illa dirigendi flectendique consilii signum dabit, ad quod respiciens non errabis; et quamvis forte res effectui careat, ipse tamen electivi habitus gloria non carebis. Cæterum in ipsa etiam utilium electione dum quid expediat quæritur difficillima examinatio est; quod sæpe tibi unum, domui autem tuæ vel patriæ vel amicis aliud, unum patrimonio, aliud famæ, unum delectationi, aliud valetudini expediat ac saluti. Quo in bivio illud observandum censeo, ut communia privatis et nobilia ignobilibus præferantur. Neve diutius te anxium dubio sermone detineam, huc rem traho. Satis

equidem credo et tibi et ocio et quieti tuæ aptius coniugio caruisse, verum tua domus et patria et amici aliud ex te poscunt. Nec tibi natorum nec ætatis excusatio ulla est, cum et filiis careas et viridi sis ætate. Quid ergo? Ex quo me in consilii partem vocas assentior ut uxorem ducas. Quamquam enim nihil dulcius cælibatu arbitrer, nihilque tranquillius, status tamen tuus ac tuorum hanc tibi dulcedinem ac tranquillitatem invidet. Non magis diu potest altior fortuna quam sublimis mons aut tumidum mare quiescere: suis et ipsa ventis exposita est. Nec est quod dicas, me solum respicio, mihi consulo: cum et patriæ et parentibus et amicis, secundum laudatam illam Platonis sententiam, natus sis. Age ergo, Christo auspice, duc uxorem, in qua eligenda iudicium volo purum et semotum ab omni opinione vulgari, ut non tam dotem ac divitias, quam genus et pueritiæ rudimenta; non tam ornatus elegantiam quam pietatem; neque omnino tam corporis quam animi formam spectes. An vero vicinam an longinquam potius (ea enim percontationis tuæ secunda pars fuerat) contra omnium fere sententiam loquar. Vicinam nempe omnes, ego, cæteris paribus, longinquam præfero. Alii enim favores metiuntur, qui et rari sunt et multo constant, quorumque te non valde indigum tua sors fecit. Ego animi libertatem et tædiorum, et sæpe etiam odiorum fugam, quæ affinium præsentia frequentissime secum affert; nec vero illud ultimum facio quod seu sapiens matrona (quem enim dedeceat quod nec David Regem nec Magnum Pompeium dedecuit, nec Augustum Cæsarem) seu rudis forte virguncula primis tuum limen hymeneis attigerit, utile hoc consilium

reor, præcipue autem si coniugii tibi secunda sors fuerit. Si quidem puella nobilis a prima ætate tibi dedita et suorum divulsa blanditiis ac susurris anilibus, castior humiliorque et obsequentior fiet, et sanctior, lævitatem quoque maturius puellarem exuens matronalem induet gravitatem ; denique seu tibi virgo nupserit, seu vidua, ex quo vos genialis thalamus contraxerit, unum illa te audiens unum videns, unum cogitans, in te unum moresque tuos transformabitur, oblitaque comitum ac nutricum, in solis coniugis requiescet affectibus. Hæc, vir clarissime, sententia mea est, tam fausta utinam quam fidelis. Tu quidquid elegeris secundet omnipotens. Vale feliciter mei memor.

Venetiis, III Idus Septembris.

## EPISTOLA II.

FRANCISCUS PETRARCA IOHANNI DE CERTALDO S. P. D.

Se scriptis alienis abstinentissimum nihil ex illis in operibus suis scientem inseruisse : quocirca rogat amicum ut quædam Virgilii et Ovidii inconsulto sibi usurpata emendet.

Statim te digresso, etsi habitu tuo angerer, quia tamen nihil agere nescio, quamvis, ut verum loquar, totum ferme quod ago nihil aut nihilo proximum dici possit, in opere tecum cœpto amicum illum nostrum meo quodam iure detinui Bucolici carminis quod tecum abstuleras exemplaribus revidendis. Quæ dum confero cum eodem illo utique viro bono priscique moris, et lectore quidem tardo, sed non segni animo, animadverti

aliquot verbula crebrius repetita quam vellem, et nescio quid præterea nunc etiam limæ indigum. Itaque ne transcribere festinares admonui, neu Francisco nostro copiam dares, non ignarus ardoris vestri in omnibus et præsertim meis litteris, quæ, nisi amor iudicio obstaret, nec digitis certe nec oculis quidem vestris dignæ sunt. Acturum me quod in rem esset paucis horis ex commodo speravi, cum rus commigrassem : quo parabam Kalendis Quintilibus proficisci, sed fefellit opinio. Liguriæ enim crebri nimis et iam anniversarii motus me ruris amantissimum et osorem urbium in urbe tenuerunt. Novissime cum periculo metus maior videretur, circa Kalendas Octobris, sero quidem, sed aliquando moram trepidam vincente fiducia, Abduæ amnis ad ripam veni. His enim locis hoc tempore solitudo mea est. Hic vero iam mihi dies octavus agitur, ubi breve ocium perpetui imbres spondent et autumnus præceps, seu verius præcox bruma. Inter hanc tamen ipsam morulam, quam cœli facies et intemperies angustant, ad revidendum carmen illud recollegi animum, et sensi sane corrigentis ingenio tarditatem prodesse lectoris. Profecto enim sicut quod legitur ut delectet lepidus expeditus intelligens lector facit, sic ut appareat et vitia detegat, durus hæsitans hebesque præstabit. Nec hercle aliter hac in re quam in cæteris accidit. Da equum vitiosum sessori industrio et equitandi perito, latebunt vitia: adhibe inexpertum, apparebunt. Causam iniustam patrono egregio committe, iniustitiam coloribus obumbrabit: advocatum rudem ad rostra producito, cum oratoris infantia causæ patescet iniquitas. An oblitus es ut Marcus Cato censorius Academicum Carnea-

dem principem philosophicæ legationis ab Atheniensibus Romam missæ quamprimum censuit remittendum, ratione addita quod, illo viro loquente, non facile quid verum in rebus et quid falsum esset intelligi posset? Sic est equidem: rerum mendas artificum celat industria, ruditas aperit. Vidi legente illo quod te legente non videram, et nunc maxime didici, ubi voluptas operum quæritur promptum et dulcem adhibere lectorem, ubi correctio tardum atque asperum. Quod autem in eo carmine mutatum velim, ne stilum parvis obicibus implicem, seorsum leges. Unum nec tibi nec epistolæ subtrahendum credidi mihi hactenus ignoratum, fateor, et nunc quoque mirabile stupendumque. Si quidem omnes nos quicumque novi aliquid scribimus sæpius fallunt quæ melius didicimus, inque ipso scribendi actu familiarius ludunt. Certius scimus quæ lentius sunt mandata memoriæ. Quid ais? inquires; non te pugnantia loqui vides? Fieri non potest ut duo simul contraria vera sint. Quomodo igitur efficies ut quod scimus amplius id sciamus minus, et quæ pigrius hausimus ea firmitus teneamus? Quæ Sphinx, quodve istud enigma est? Dicam. Neque vero non hoc itidem in rebus aliis evenit, ut et patrifamilias sæpe quod diligentius abdidit minus ad manum sit, et quæ sunt altius obruta ægrius eruantur. Sed hoc in rebus corporeis locum tenet. Itaque non prorsus hoc intendo. Neu te ambagibus suspensum teneam, exemplum accipe. Legi semel apud Ennium, apud Plautum, apud Felicem Capella, apud Apuleium, et legi raptim, propere, nullam ibi ut alienis in finibus moram trahens. Sic prætereunti, multa contigit ut viderem, pauca decerperem, pauciora reponerem,

eaque ut communia in aperto, et in ipso ut ita dixerim memoriae vestibulo : ita ut quotiens vel audire illa vel proferre contigerit, non mea esse confestim sciam, nec me fallat, cuius sint, quæ ab illo scio, eo quod vere sic ut aliena possideo. Legi apud Virgilium, apud Flaccum, apud Livium, apud Tullium, nec semel legi sed millies, nec cucurri sed incubui, et totis ingenii viribus immoratus sum. Mane comedi quod sero digererem ; hausi puer quod senior ruminarem. Hæc se mihi tam familiariter ingessere, et non modo memoriae sed medullis affixa sunt, unumque cum ingenio facta sunt meo, ut etsi per omnem vitam amplius non legantur, ipsa quidem hæreant actis in intima animi parte radicibus, sed interdum obliviscar auctorem ; quippe qui longo usu, et possessione continua quasi illa præscripserim, diuque pro meis habuerim, et turba talium obsessus, nec cuius sint certe, nec aliena meminerim. Hoc est ergo quod dicebam notiora magis fallere, quæ si quando forsitan ex more recursantia in memoriam redeunt, accidit ut nonnunquam occupato et in unum aliquid vehementer intento animo, non tantum ut propria sed quod miraberis, ut nova se offerant. Quamquam quid dixi miraturum te, quod potius sic esse fatebere, necessario, ut auguror, in te ipso tale aliquid expertus ? In his quidem discernendis non parvus mihi labor oritur : nostrum enim testor Apollinem unicum ætherei Iovis natum, et verum sapientiæ Deum Christum, me nec ullius prædæ avidum et ut patrimonii sic ingenii alieni spoliis abstinere. Si quid aliter inventum erit ac dico, vel in iis quos non legi similitudo fecit ingeniorum, de quo epistola ad te superiore dis-



serui, vel in aliis error aut oblivio, de quo nunc agitur. Vitam mihi alienis dictis ac monitis ornare fateor est animus, non stilum; nisi vel prolato auctore, vel mutatione insigni, ut mutatione apium e multis et variis floribus mel unum fit: alioquin multo malim meus mihi stilus sit, incultus licet atque horridus, sic in morem togæ habilis ad mensuram ingenii mei factus, quam alienus, cultior ambitioso ornatu, sed a maiore ingenio profectus, atque undique defluens animi humilis non conveniens staturæ. Omnis vestis histrionem decet, sed non omnis scribentem stilus: suus cuique formandus servandusque est, ne vel difformiter alienis induti vel concursu plumas suas repetentium volucrum spoliati cum cornicula videamur. Et est sane cuique naturaliter ut in vultu et gestu, sic in voce et sermone quiddam suum ac proprium, quod colere et castigare quam mutare cum facilius tum melius atque felicius sit. Et quem te facis? Dicit aliquis: non tu, amice, qui me nosti funditus, sed unus aliquis ex iis tacitis, qui silentio tuti securique repræhensorum observant alios, et e singulis verbis nostris totidem aculeos conflare didicerunt. Audiant plane qui solo sæviunt auditu; non me facio quem descripsit Iuvenalis egregium vatem:

cui non sit publica vena  
 Qui nihil expositum soleat deducere, nec qui  
 Vulgari feriat carmen triviale moneta:

nempe quem ipse qui scriberet non monstrare sed cogitare se tantum posse fateretur. Non cum Horatio:

Libera per vacuum posui vestigia princeps  
 aut  
 . . . . . patrios ego primum iambos  
 Ostendi Latio,

nec cum Lucretio :

Avia Pieridum peragro loca nullius ante  
Trita solo :

Nec cum Virgilio :

. . . . . Iuvat ire iugis qua nulla priorum  
Castaliam molli divertitur orbita clivo.

Quid ergo? Sum quem priorum semitam, sed non semper aliena vestigia sequi iuvat. Sum qui aliorum scriptis non furtim sed precario uti velim in tempore, sed dum liceat, meis malim. Sum quem similitudo delectet, non identitas, et similitudo ipsa quoque non nimia, in qua sequacis lux ingenii emineat, non cœcitas non paupertas. Sum qui satius rear duce caruisse, quam cogi per omnia ducem sequi. Nolo ducem qui me vinciat sed præcedat : sint cum duce oculi, sit iudicium, sit libertas ; non prohibear ubi velim pedem ponere et prætereire aliqua, et inaccessa tentare, et brevior, sive ita fert animus, planior, callem sequi, et properare et subsistere et divertere liceat, et reverti. Sed nimium vagor, nimium distrahor ab eo quod hodiernum erat. Est decima pastorii carminis Egloga, cuius quadam in parte ita scripseram : *solio sublimis acerno* : postmodum vero dum relegeretur attendi simile nimis esse Virgiliano carmini. Ille enim ait in septimo divini operis ;

Solioque invitat acerno.

Mutabis ergo, et loco illius pones ita : *e sede verendus acerna* : omnino enim acernam esse sedem volui Romani Imperii, cum equus Troiani excidii apud ipsum Virgilium sit acernus ; ut sicut in theologicis lignum

humanæ prius causa miseriæ post salutis, sic in poeticis non modo lignum idem genere, sed arbor eadem specie sit redivivi Imperii materia quæ ruinæ fuit. Habes intentionis meæ summam nec opus est pluribus. In eadem Egloga scriptum erat aliud mirum inde quod quia valde noveram ignorabam, et in eo fallebar, quod si nossem parcius non fallerer, nec vero erat alieno persimile, quoniam alienum prorsus: sed sic mihi accidebat, ut illi qui apertis oculis amicum coram positum non videt: erat autem ad hunc modum. *Quid enim non carmina possunt?* Tandem ad me rediens deprehendi non meum esse finem versus. Cuius autem esset diuticule hæsitavi, non aliam ob causam nisi quia ut dictum est, iam mea illud in ratione posueram. Ad postremum reperi esse Nasonis vii Methamorphoseos. Et hoc ergo similiter mutabis, ponesque ita, *quid enim vim carminis æquet.* Nec verbis nec sententia versus inferior. Hic igitur nostri sit, si tamen hic ipse vel sic etiam noster est: ille alter ad dominum suum redeat et Nasonis sit, quem illi eripere nec si velim possim, nec si possim velim. Etsi enim non me lateat quosdam veterum Virgiliumque ante alios versus innumeros non modo e græco in latinum versos, ubi abstulisse clavam Herculi gloriatur, sed ut erant ex alienis in suum opus translulisse, non ignorantia quidam ulla, quæ in tot tantisque rebus hinc illinc ereptis fingi nequit, neque furandi quantum intelligitur, sed certandi animo, tamen aut plus illi licentiæ fuit, aut mens alia; certe ego, nisi res adigat alieno sciens uti non patiar. Si quid adversus hæc ab ignorante peccabitur, fac sentiam. Agnosco libens bonam fidem et usurpata restituo. Et ex hoc quidem genere

duo hæc sunt quæ modo aderant. Tu si plura notaveris, vel iure tuo corrige, vel me familiariter admone. Mihi enim nil gratius aut tu potes aut omnino quisquam amicorum, quam in reprehensionibus meis vere amicum et liberum ac intrepidum animum habere. Nulla vero hac acceptior nisi sola morum potest esse reprehensio : æquissimo animo paratus sum et stilum et vitam non tantum amicorum vocibus moderari, sed etiam latratibus æmulorum, si modo inter invidiæ tenebras scintillam aliquam veritatis adspexero. Tu vive feliciter nostri memor et vale.

---

## EPISTOLA III.

FRANCISCUS PETRARCA BARBATO SULMONENSI S. P. D.

Mittit espitolas poeticas ipsi inscriptas.

Diu multumque dubius fui, Barbate carissime, an epistolas metricas olim tibi inscriptas aliquando mitterem, an vero supprimerem et penitus abderem. Alterum desiderio tuo, alterum famæ meæ consentaneum videbatur. Nempe expectationem atque ardorem animi tui novi, nil aliud in huiuscemodi rebus quærere soliti, nisi an ego dictaverim ; cuius audito nomine prorsus Pythagoreum in morem locum rationis auctoritas occupet, et, velo magni amoris interposito, iudicii acies perstringatur. Equidem hæc ea vel ætate vel desidia scripta sunt, ut non facile sub externis iudiciis tuta sint ; quæ ego ipse dum relego in illius temporis me-

moriam sic retrahor, ut quod penitus nolim, repuerascere mihi videar interdum, et idem esse qui fueram, cum id unum iamdudum moliar ut alius sim. Sed vehementissima pars animi nostri recordatio est, et quæ levibus ex causis totum sæpe virum assumit, ut manu iniecta eo nos cogat quo nollemus, ibique detineat reluctantes. Demum omnibus excussis famæ propriæ quam vel tui (parce, oro) vel mei ipsius amantior occultare ista firmaveram; et fecissem, nisi quæ in prima operis parte perstrinxi ferme omnia in publicum exivissent, iamque ad ipsius quam dixi famæ custodiam pertineat ea domi amplius non esse, ut quæ penes amicos sparsa quidem et ut auguror incorrecta sunt, normam qua possibile fuerit horum capiant ab exemplo. Quid plura? Do tibi quod libentius negarem, non quia meum aliquid tuum esse nolim, sed quia per tuas manus ad alios perventura hæc ægre fero, quæ tamen non pervenire non possunt. Nec vero quia promiserim do, sed quia sic oportet. Non hic bonæ fidei sed necessitati pareo, famæque discrimen, quod iam nec latebris nec silentio vitari potest, nequid coactus egerim, sponte subeo. Unum est in omni necessitate remedium: consensus. Vale.

---

## EPISTOLA IV.

FRANCISCUS PETRARGA BARBATO SULMONENSI S. P. D.

Dolet absentiam amici quem tamen brevi se revisurum sperat.

Aliquotiens, Barbate, queri soleo cum de multis vitæ mortalis incommodis tum vel maxime de hoc uno,

quod tam coniuncti animis sic corporibus et conversatione disiungimur, ut neque tu me neque ego te videam senescentem, neque vel semel priusquam ex hac vita seu verius morte discedamus, vivis nos vocibus invicem compellare permittimur. Quamvis enim ut est animus liber atque in primis amantium honeste ab imaginario congressu nullis obicibus arceamur, quamvis inter bonos amicitia recens semper maneat, nec ego te mihi sciam, nec me tibi minus hodie carum rear, quam quo primum die apud regiam Neapolim per illum vere regem, qui mox cœlum petiit, in amicitiam vincti fuimus (qui profecto nisi similitudinem aliquam insignem animadvertisset in nobis, nunquam ut divino erat ingenio sub unum iugum disparia colla iunxisset: etsi enim quod nemo nisi tu solus neget, esses ipse candidior, unum tamen studium, una ætas, unus mos, una mens erat) quamvis hæc inquam ita sint, nec ullum in nostros animos ius habeant loca vel tempora, tamen, si nostra sors sineret mihi, pergratum credo itidem tibi esset interdum etiam *ora tueri* ut est apud Maronem, et *notas audire ac reddere voces*: vicissimque nos ad ea quæ restant et ad terminum cohortari. Id si fato vetitum, quod vetari nequit animo et cogitatione supplebitur: tu me tuis affectibus, ego te complectar meis: nulla dies, nulla nox, nulla peregrinatio, nulla lucubratio, nulla confabulatio, nulla iucunditas, nullus labor, nulla requies alteri sine altero transigetur. Quem librum alter nostrum arripuerit, alter aperiet: ubi alter oculos coniecerit, alter leget: quocunque alter cespite sederit assidentem alterum habebit: quotiens secum aut cum alio loqui cœpit absentem amicum intentis auribus adesse conspi-

ciet : denique quidquid alter egerit, ubicunque fuerit, quocunque se moverit alter ad dexteram erit. Et quoniam extrema hominis dissimulari possunt non vitari, ne differri equidem, quando alter obierit, alter illum memoria prosequetur, illum vivere opinabitur; nec fallitur : vivet enim vere, illo præstante, apud quem fons vitæ est : superstitem nondum vivere incipientem et miserans et expectans : cumque ille consecutus fuerit, tum demum si ante non possumus, una erimus sine divortii metu; tunc alterutrum, tunc et tuam iuvabit despectare Parthenopem et meam Romam, et nostram Italiam quam parva sit, quæ nostro convictui distrahendo tam magna est, ut semel digressos congredi amplius non sinat: neque vero tantum oculis sed litteris quoque neget aditum, et ad summam brevi terrarum spatio ita nos separet quasi alter Indum alter Iberum servet Oceanum. Animus, nobilissima pars rerum et naturæ opificium excellens, nec cogi potest nec teneri : ille montes et maria transvolat, carceres aperit, repagula disiicit, vectes frangit, quando et ubi voluerit præsens est. Parvus illi saltus ab Alpibus ad Apenninum, aut a supero ad inferum mare est. Hi sunt enim qui nos dirimunt fines ; exigui quidem : sed quid refert quam breve interstitium sit si impermeabile est? Sæpe cogitavit pietas iter durum vincere, ut pertingeret cum Ænea ad illum quem supra dixi tui oris intuitum et tuæ notæ vocis auditum. Tentavi amplius quam semel segnes moras frangere, ut tot annorum desiderio finem darem. Nil enim ferme magis cupio in terris quam semel adhuc Romam et te et paucos qui in medio sunt amicos cernere ; id me olim tibi pollicitum, non viarum labor hactenus non curarum

pondus, sed multos iam per annos verius ferme cum floribus renascentis belli pericula tenuere: nec dum ideo spem dimisi, fierique potest, ut quod expectavi desiderio iuxta sit. Sicut autem malum omne quo improvisius eo durius, ita bonum quo insperatius eo dulcius. Interea fortiter feramus absentiam, quæ nonnisi mortalia segregat, et hac arte, de qua multa loquutus sum, hanc fortunæ violentiam retundamus. Vale nostri memor.

Venetiis, XII Kalendas Maias.

---

### EPISTOLA V.

FRANCISCUS PETRARCA PHILIPPO EPISCOPO CAVALLICENSI

S. P. D.

Gratulatur reditum amici eumque a novis laboribus itineribusque suscipiendis dehortatur.

Quantis laboribus quantisque periculis ereptum te nobis revehit omnipotens Deus, cui beneficio pares grates agere mens infirma non sufficit! Agit tamen mens devota quas potest, quia timui ne Rhenus, Mosa et Mosella Rhodano Sorgiæ ac Ruentiæ nostris amnibus insultare ausi, te insignem illis accolam eriperent, et sibi perpetuum usurparent. Licet autem longa dilatio rapinæ proxima sit, tu tamen diu dilatus non iam ablati es patriæ, quæ te meis verbis obtestatur, ne se amplius deserendam putes. Itum satis ac reditum et ambitum est; dixi olim et in dies dici rectius videtur. Advesperascit: de hospitio cogitandum. Sæpe inquam



hoc dixi : sæpe etiam scripsi : nunquam tamen opportunius. Nam quietis consilium iuvenibus utile, senibus vero necessarium est. Oh ! si sit otium quantam hic loquendi materiam res dabat. Sed non magis me loquentem intelligis quam tacentem. Nil enim non dicam loqui, sed vel cogitare queam, quod tibi iam novum sit : quamvis hac in re non modo ego certe, sed Cicero frustra te moneat. Bonarum enim rerum omnium doctissimus in hac una te ipsum tuumque ingenium supergressus, in incude experientiæ exercitii malleo artem eius tibi certissimam excudisti. Equidem quam sit grata securitas nusquam certius quam in periculo : quam quies dulcis nusquam melius quam in labore cognoscitur. Si hæc ergo vera sunt, quid iuvat totiens experiri, quod periculo aliquid semper, notitiæ iam nihil adiiciat ? Frustra dubios casus retentare temeritas est, qua nihil minus doctrinæ professioni ætati ac statui et naturæ moribusque tuis convenit, quæ si a te semper olim procul abfuit, vide ne cuius vitii expers iunior fuisti eius suspicionem sponte subeas ætate hac, cui et necessitas rerum minor, et veri iudicium maius sit. Ultro enim periculis ac difficultatibus se offerenti inevitabilis est ista suspicio. Nec excusat superioris auctoritas, quæ utique si coegerit excusaret : sed Romanus Pontifex, etsi te diu fidissimo atque officiosissimo usus sit, huic ipse idoneos muneri multos habet. Atque utinam non tot essent, quos avaritiæ stimuli et flatus ambitionis in omne præcipitium impellunt, qui nullum iter nullam horreant mundi plagam, qua ventosi honores et perituræ divitiæ adeantur. Cede tironibus, veterane inclite, et vicissim illi cedant tibi. Vidisti

aliquem sedendi simulque alium ambulandi fessum? Fac officia permutent: uterque lætabitur. Idem vobis eveniet. Illi enim sunt laboris avidi, tu quietis, unoque actu geritur res duorum. Quod si Pontificis iussus premit (est enim imperiosum dominorum genus in iubendo, se solos suasque commoditates cogitantium) eloquium tuum ingeniumque te adiuvet. Excusa valetudinem atque ætatem. Non doceo te mentiri: sed evadere. Finge te paulo seniore. Cum in multis tum in ætate ad utramque partem multa finguntur: testes enim veri absunt obstetrices ac nutrices, ipsique parentes obierunt. Frontis comæque testimonium multos fallit; de se loquenti creditur, præcipue si plus dicat. Delicati corporis imbecillitatem laboribus imparem, et defectus abditos finge. Nam occupationes officii tui veræ sunt, nec fingendi egent artificio. Nemo præsulum tam moestam et tam viduam sedem suam linquit quam tu tuam. Sic te ovibus tuis approbasti, ut sine te pascua læta non ruminent: in oculis tuis et in lingua pax ecclesiæ tuæ est: pusillus sed devotus et mitis grex pastoris ab ore pendens vocem alterius non agnoscit. Itaque non tam alteri creditur quam proditur. Atqui non de illius qui te distrahit, sed de tuis manibus ratio exigenda est. Non ille populi unius debitor, sed plurium, sed maiorum. Tu de tuo grege respondeas oportet et non alius. Potest ille, fateor, te cogere ut qui sui gregis es portio. Sed mihi crede, si bona fide volueris, nunquam coget: ratiunculam enim tuam suis inferre rationibus et pro te debitor fieri nolet. Tuum illi gregisque periculum expone acriter, explicite; nihil omiseris, imo si vera destituunt, simulata iungantur. Non est menda-

cio imputanda simulatio veri adiutrix. Ut sis liber, ut sis tuus, ut sis salvus, ut sis bonus omni ingenio enitendum est. Apud scriptorum aliquos Ulysses arguitur simulasse insaniam quo militiam detrectaret; et sane si vera simulatio, et accusatio iusta est, suæ opis et consilii egentem Græciam inter maximos apparatus belli iustissimi militarem virum deserere voluisse. At non in regina Scytharum Thamiri simulatus metus, nec dissimulatus in Cæsare, nec in Ventidio simulata cupiditas ac formido reprehenditur; non in Themistocle simulatus morbus, non in Claudio Nerone inque aliis multis dissimulata profectio: quippe quod his artibus decus sibi quærerent, exercitibus salutem, et patriæ libertatem. Tua simulatio nulli damnum, tibi pacem animi fugamque periculorum, patriæ requiem ac gaudium allatura est. In tuis tam diuturnis tantisque laboribus non tua vel tuorum salus, non tuæ vel universalis ecclesiæ libertas agitur, pro qua viris iustis ac fortibus et laborare propositum est et mori: sed (patere me solita fiducia verum loqui apud illum cui nihil dixi unquam quod in animo non esset, nihil tacui quod esset, permitte me non minori fide quam audacia animum tuum ubi curandus est pungere) ministerium agitur nescio quod alienæ cupidinis, et negotium voraginis inexpletæ. Vis tu ab omni cupiditate semper atque ambitione liberri-  
mus, alienæ nunc avaritiæ servus esse, et alienis affectibus obsequi, qui tuis imperas? Non id tui ut puto certe, neque consilii mei est. Ad maiora officia natus es, quam ut cuiuscunque sis quæstor. Simplicitatis et libertatis veniam peto. Tunc mihi verus eris Episcopus, verus pastor, cum quæstor esse desieris. Non est

tui animi cura tam humilis, et si a te reiicitur reperi-  
tura alios, et cuique melius credenda quam tibi. Ostende  
Pontifici te non posse quod poteras. Ostende et posse  
alios et optare quod tu fugis. Ora ut illis optata mili-  
tia, tibi debita vacatione provideat: denique constanter  
nega. Pluris ille te faciet: et si repulsam oderit, virtu-  
tem diliget constantiamque mirabitur, ac rogare desinet.  
Verum est enim declamatorium illud apud Senecam  
*nemo fortiter negantem iterum rogavit*. Hæc tibi tali  
viro, clarissime mihi Pater et carissime, non auderem  
loqui, nisi illinc modestia et humanitas tua, hinc meus  
amor, mea fides, zelus, pavor animos darent. Has enim  
peregrinationes tuas tam crebras tam difficiles simul-  
que tam longas ac longævas metuo, et morte peius in  
quò ipse periclitor periculum tuum odi. Subsiste, obsecro,  
tempus est. Quanto autem nunc te videndi desiderio  
trahar promptius tibi cogitando fuerit, quam mihi lo-  
quendo assequi. Ab annis teneris intus et extra tibi  
cognitus quid a te semotus hoc septennio profecerim  
dicam. Siquidem cum iam ætas vanis amoribus fere  
omnia subtraxerit, infinitum quiddam iusto addidit  
amori. Solebam mirari multa quæ nunc sperno, quæ-  
dam amare quæ nunc ardeo, ita quo senior in dies eo  
hinc algentior, hinc ardentior fio (*hic desunt nonnulla*). Et  
fortassis implebit hoc pulcherrimum desiderium meum  
Deus, ante quam moriar, dumque minus expectabor ade-  
ro. Oh! si inter libellos tuos improvisus exoriar, oh! si  
herbosa in ripa puri amnis, oh! si alta sub rupe unde ille  
noster tanto cum murmure fontium rex erumpit! Inte-  
rim Socrates meus ibi est, imo vero Socrates tuus. Il-  
lum precor ut facis, et in illo me solitis paterni animi

ulnis amplectere, atque omne quod de me aut pro me faceres in illo exhibe ; et vale mei memor ut soles, tui autem plusquam soles.

Mediolani, V Idus Augusti.

---

## EPISTOLA VI.

FRANCISCUS PETRARCA ZENOBIO FLORENTINO S. P. D.

Narrat magnum Siciliae Senescallum se visum venisse.

Mœcenas tuus Augustum meum, fidenter adiiciam, et me visit. Bibliothecam meam ausus opes contemnere bis adiit, nec occursus hominum, nec acervus rerum, nec eum denique tenuit labor viæ: siquidem in extremo civitatis olim, nunc extra civitatem habito, loco cum salubri tum solitario admodum ac reposto. Huc ille vir tantus venit, et submissis fascibus, ut quondam Magnus Pompeius Possidonii parvam domum, atque ita venerabundus hoc exiguum limen ingressus est, adaperto capite, prope affusus, quasi Apollinis ac Pyeridum sacellum unus aliquis e Parnasi accolis, usque adeo ut mihi et iis qui aderant illustribus viris, et devotum quemdam tam generosæ humilitatis horrorem incuteret, et prope lacrimas tantæ pietatis excuteret. Ea maiestas oris, ea morum comitas inerat, ea primum silentii, mox verborum gravitas fuit. Libellis oculi mei auctoribus comitibusque nunc omnibus nunc singulis tam suaviter inhæsit ut nil dulcius. Multus ibi de multis, sed præcipuus de te sermo. Nec vero brevem moram traxit

ut viantium mos est, sed longam adeo ut coactum diceret abire: ad summam fecit locum quem cuncta revisant sæcula, quem non Romanus modo vel Florentinus hospes, sed virtutis amicus quisque erit hac transiens adoret. Et quid dicam? Totam hanc regiam urbem suo lætificavit adventu, et fronte siderea serenavit mirum in modum, et dominis gratus et populo, mihi vero quam plurimum, quod iam impossibile factu rebar, antiquam illam sibi pridem dati animi benevolentiam, cumulavit, effecitque illud inter mortales eximium ac rarum, ut diu cogniti sed nunquam visi hactenus famam viri non modo non minueret præsentia sed augeret, quod fere de nullo unquam vidi, de paucis legi. Tu tali amico felix vive et vale nostri memor.

Mediolani, XVI Kalendas Septembris.

## EPISTOLA VII.

FRANCISCUS PETRARCA ADOLESCENTI SUO S. P. D.

Graviter eum obiurgat, quem domo iam eiecerat, et frustra reditum postulantem hortatur ut resipiscat.

Possem ego te amare, si amare tu te ipsum posses, si vel non odisses. Et quis est, inquires, qui se oderit? Quis omnino qui non quam maxime se amet? Scio sic persuasum publice, nec mihi vox Pauli, nec sententia Ciceronis ignota est. Negare difficile est, hunc malorum prope omnium fontem esse quod nimium nos amamus. Nempe hinc furta, hinc adulteria prodeunt, hinc rapinæ et quæ sunt generis eiusdem, ad quæ nos

præceps et nimius nostri amor impellit, dum pati non possumus deesse aliquid nobis omnium quæ delectant, et idcirco forte confitear multos esse qui se nimium ament: at qui satis, paucos. Quomodo enim quæso se satis, hoc est sobrie, amat qui sibi volens sempiternam mortem quærit? Quomodo se amat qui se inexpriablebus probris obruit? Denique quomodo se amat qui Creatorem suum odit? Profecto enim qui se ipsum amat illum amet oportet, qui se fecit, quem si odit utique se non amat. Neque vero id in se tantum, quo nil est propinquius cogitanti, sed in rebus aliis cogitare promptissimum est. Quis umbris arborum et concentu fidium gaudens radices odit et citharam? Quis aquæ rivum diligit fontis osor? Atqui si amator uxorius tanto socerum veneratur affectu qui in filiam præter nomen ac peccatum nihil habet, quid debemus Deo qui uxorem qui filios et quæcunque amamus, qui denique nos atque animas nostras, quibus nos ipsos atque alia quælibet amaremus, condidit? Si dentur (*sic in Codicibus Florentinis, in quibus aliquid deesse manifestum est*) et intrepide repetam necesse est sese oderit, quia idipsum, quod dicebam, nimis amare odisse est. Contra amati salutem est enim, quam ut suum finem respicit verus amor; falsus in contrarium fertur, quod suum ac proprium est odii. Possem ego quoque te non spernere nisi tu Deum atque homines animamque tuam sperneres: possem te pati nisi tu patientia diu multumque esses abusus. Possem tibi mitior fieri, nisi tu meam nescio an dicam mansuetudinem an facilitatem an mollitiem stulte simul atque impie calcare non veritus, meos diurnos nocturnosque actus tuo diurno ac nocturno non ocio sed torpo-

re, meas tibi notissimas vigilias tuo iugi ac languido mortique simillimo sopore, meum et amicorum cultum et amicitiarum fidum ac perenne studium inepto risu, et contemptu hominum, quos videre vel audire non es dignus, denique naturam, vitam, mores, studia et postremo mea omnia contrariis moribus atque artibus deformasses; ut quantum mihi gaudii mea mens dabat non exactæ quidem innocentiae neque magnæ virtutis, sed hercle voluntatis optimæ sibi conscia, tantundem plusque aliquid doloris animus tuus ac propositum quod celare nec poteras nec sciebas, credo equidem nec volebas (tantus nescio unde mearum rerum atque opinionum contemptor evaseras) et inæstimabilis illa dissimilitudo naturæ, (quæ, si suspicio hominum vera esset, persimilis esse debuerat) ac stupenda votorum omnium diversitas daret. Quæ omnia dum potui tuli, sed tam graviter ut ex omnibus sarcinis quas fert mundus et vita hominum nulla mihi molestior, nulla esset aut fuisset indignior; nempe cui baculus imbecilli senio provisus in pondus ac præcipitium versus esset. Substinui tam gravi et indignante stomacho multos quidem per annos, quod nunc miror: sed vires patientiæ pietas dabat, et obstabat nausæ spes iam tenuis mutandæ vitæ, quæ ubi prorsus evanuit tandem te non fessus modo sed fractus malis atque expugnatus evomui, et infastum onus domo exegi. Et si finem exilii tui quæris, idem, scito, non alius quam peccati erit. Victus amor, exhausta spes, consumpta patientia mea est, nec ferre te limen meum potest, nec murus capere, nec tectum tegere, nec audire aures, nec videre oculi: proinde dum is es qui hinc abisti, et optare reditum pudeat, et spe-



rare ut admitti queas. Alius redi, alio habitu, aliis mentis affectibus, alio pedum incessu, alia manuum iactatione, alio pectoris ac cervicis motu, alio vocis sonu, alio flexu supercilii, alio frontis nutu. Cave nil revehas illius quod te iis etiam odiosissimum fecit quibus fecerat natura carissimum: sed in primis illum, quo turpissime tumes, fastum atque contemptum, quo nihil indignius, nihil difformius statui tuo est, quo, dum fuerit qualis hactenus fuit, nihil humilior habet, nihil contemptibilius orbis terræ. Tu ne mihi creatorem tuum patremque omnium Deum, tu ne homines fratres tuos, eos maxime qui nos amant, tu animam salutemque tuam spernens, hoc maior, hoc clarior fieri putas? Tumidior fis; e tumore autem tuo, rogo, quid unquam nisi ridiculus mus nascetur? Minus dico: ridicula enim frontes atterunt, ilia quatiunt, iocos movent. Tumor tuus aliis ridiculum forte, tibi autem veros luctus et æternæ materiam mortis spondet. Colubro enim tumes flebili, non mure ridiculo, atque ita cum sis te felicem reris. Cœce falleris, cœce tota erras via, cœce, inquam, veræ callem gloriæ non vides, quodque est pessimum, malo tuo gaudes miser, tuoque dedecore gloriaris, nec intelligis quo te error hic ducat, et his moribus vel latere forsitan, vel placere insuper credidisti, et hanc spem vanissimam ex me fateor concepisti: eo scilicet quod suorum nemo esset amantior, quasi vero semper verum sit amantum cœca esse iudicia, et non illud interdum verius, nullius animo severius esse iudicium quam amantis: sic enim exacta omnia a suis exigunt qui amant ut sæpe delicatissimi sensus minimis etiam offendantur. Tu utinam, non dicam exacta, sed vel communia

præstitisses, teque si non virum, at hominem, vel si id nolles, at certe non belluam meminisses. Evanuisti autem in cogitationibus tuis, usque ad funestam tui ipsius oblivionem, soporemque mortiferum, unde ut absolvi possis non vocandus modo vel vellicandus, sed urendus ac secandus es. Surge, amens, expergiscere, atque ubi nunc iaceas vide. Non cessent oculi tui perditum tempus flere, non cessent manus tuæ tumidum pectus tundere, non cesset lingua simulque animus veniam precari. *Numen confessis aliquod patet* inquit Naso. Quid a quoquam verius dici potest, quid religiosius, modo de numine conveniret? Patet equidem confessis et contritis numen aliquod, illud scilicet de quo stupentes Iudæi, *quid hic loquitur*, aiebant, dum peccata dimitteret; quod cum solius Dei opus esset, fieri ab homine mirabantur, ignari et Deum esse qui faceret, qui peccata hominum non modo post tergum suum proiicit, sed etiam in profundum maris, qui quantum distat ortus ab occidente longe facit a nobis iniquitates nostras, qui prope est omnibus invocantibus eum, sed invocantibus in veritate. Ille tibi aderit si vere invoces, si timore deposito, si præteriti dolens et futuri metuens, et de te diffusus et de illo sperans, qui quamvis multos subito sæpe iustificaverit, nec tempore ad agendum egeat. Tu tamen longa tibi purgatione opus credito. Diurnæ et concretæ sordes non facile diluuntur. Bene tecum agi putes si quantum tempus errasti, tantum redeunti suffecerit ad rectum iter. Solet enim error pronus esse, reditus non ita: remetiendum omne tibi viæ spatium, quo tam procul a iustitiæ semitis aberrasti: repetendi anfractus, relegenda vestigia, ut omnia in adversum

agas, proque effrenata libidine modestiam colas, pro contemptu Dei et hominum, quod tutius fiet, mundum spernas ac te ipsum, et hortatricem criminum carnem tuam, qua nil tibi inimicius vitæ est, cuius consilio et in me, et quod est longe gravissimum atque miserri-  
mum, in Deum tuum nefarie rebellasti. Mecum tamen ut videbitur: cum illo prius in gratiam redeas velim: alioquin domini mei hostem volens meis sub Iaribus non videbo. Illum si rite placaveris (est enim supra fidem mitis ac placabilis) facile ipse meas iniurias obli-  
viscar etsi multæ sint, et cui dominus pepercerit, con-  
servus veniam non negabo; neque oblivisci potero il-  
lud Ecclesiastici. *Ne despicias hominem avertentem se a peccato, neque improperes ei: memento quoniam omnes in corruptionem sumus.* Sed hæc hactenus. Scripsi plura quam credidi. Misericordia hodie iram vicit; hæc tibi autem, infelicissime adolescens, frustra quidem ut puto, sed quia maxime meum erat sæpe tibi rectum iter mon-  
strare, iterum atque iterum ne tuum crimen aliquam mihi culpæ suspicionem applicuisse videretur, si te in omne malum lapso in silentium ego collaberer, teque præcipitem tacitus spectarem; hæc tibi, inquam, vitæ perditæ et obiectæ spei remedia atque instituta præ-  
scripserim pro desperati ac neglecti veterani tui quali-  
tate brevia, sed, ni respuis, nunc etiam fortassis utilia. Etsi enim acriter intuenti nullum in te mihi prognosticon salutis appareat, dat tamen spei aliquid ætas tua, sed multo amplius læsi domini clementia, quæ sibi sæpe de hostibus amicos fecit. Nec minus quam quod in multis potuit in te potest, modo illi ad te aditum præbeas, obicemque dimoveas. De hoc tamen ipse videris. Quod

meum erat, et verbo millies et nunc scriptis implesse videor; quam ad extremum efficaciter, iterum dico, tu videris. Deinceps enim tacere eligo, et rei exitum in silentio opperiri, ita ut si evaseris saluti tuæ, si perieris fidei meæ gratuler, quæ, contumacem licet et ingratum, magnis tamen sæpe clamoribus atque in finem tacitis notis, usque ad tumulum prosecuta sit, ut nisi valde me fallit opinio, nec mea solum sed multorum, immo omnium, nisi-forte complicum tuorum, nunquam de me iuste aliquid vivus aut mortuus quæri possit. Cæterum quia te reditus avidum ut sentio, non mei amor aut virtutis, sed exilii tui forsán incommoditas facit, quamquam tibi perproprie dici posset quod Tiberio respondit Augustus e secessu in odio ad revisendas necessitudines reditum flagitanti, ut « dimitteres omnium tuorum curam quos tam cupide reliquisses, » respondebo tamen aliter. Dum te sanum et qualem esse iubeo non tam opinaberis, quam scies, inque hac pagina quasi in speculo deter sam animi tui faciem videbis, tum demum, nec volente me prius, vultum meum, quem serenum tibi ac facilem contempsisti, non ut soles, sed ut tibi expedit, ut me decet, te visurum spera. Scio enim quod te perdidit facilitas mea. Curabo ne te amplius pietate impium fecisse, vel amando perdidisse videar. Hoc tibi non ex oraculo Apollinis Pythii, ut ait Cicero, sed Christi ore dictum puta: nihil certius, nihil est verius.

Mediolani, III Kalendas Septembris.

---

## EPISTOLA VIII.

FRANCISCUS PETRARCA SOCRATI SUO S. P. D.

De duobus qui se visum venere, quorum alterum importunum  
alterum acceptissimum habuit.

Applicuit Bolanus noster ad vesperam ingenti pluvia sed multo maiore verborum copia. Quid vis? Solitudinem hanc fori instar turbidi suo fecit adventu. Scis quid loquor: nihil homine quidem illo gravius: non ea gravitate quæ sapientis est propria, sed alia quadam importuna morum sarcina. Cui vero nunc hominem describo? Nosti omnia. Non est mihi elephantis aut cameli dorsum: solo visu fessus inclinor, et quod ait Flaccus,

Dimitto auriculas ut iniquæ mentis asellus,

et sudare incipio quamvis algerem. Quid agerem quove me verterem? Hora, locus, imber, urbanitas hortabantur, ne abire sinerem, quem abiisse seu potius non venisse valde cuperem. Sola pro me stabat verecundia quædam, ut decora in multis, sic in illo monstrum. Nimis sibi comitatus videbatur, et sic erat: et vereri coeperat ne turbam hospitem solitarii hominis tecta non caperent. Pendebat adhuc tamen fatum meum: proximæ noctis pervigilium ac requies in dubio erant: unius comitum modestia me liberum fecit illum facile hospitio indulturum identidem vellicantis monentisque abitum. Quod ubi animadverti instare iam tutius et videri velle liberalior incipio, utque per noctem maneat hortari. Oh! artes moresque hominum! Orare cuius contrarium fieri velis! Sed sic est usus. Ille autem negare,

occupationes vel proferre vel fingere. Quid te moror? Si fregisse me illi tunicam putas, falleris. Sino hominem, lætior quam qui febribus liberantur. Laborasti, non dubitem, me loquente, et de fine dubius pependisti. Sed ut dempta solitudine iam hinc incunditate simul atque invidia repleare, non ita multo post, hora illa quæ apud veteres prima fax dicitur, supervenit noster ille lætissimus hominum. Oh! quanta diversitas! Nullum animal æque ut homo a se ipso differt: alter nullius, alter infiniti pretii est. Mutata repente domus facies, timèrique cœptum quod optatum fuerat, ne qua illi scilicet abeundi vel necessitas esset vel occasio; et vesperi et nubibus actæ gratiæ, quibus hospes talis pernox fieri debuit: nec sane compedibus opus erat: non ego tenendi hominem, quam standi ille cupidior. Itaque nobis non modo noctem illam, sed complusculos dies lætos præbuit. Sed habet hoc insitum nostra lætitia: subito desinit, et cum desierit nulla est, et idipsum fieri posset, nisi lætitiae locum dolor invaderet. Ille abiit, ego deiectionior quam si hominem non vidissem, substiti. Ita dictu mirabile, quod illic timui hic speravi, et quo ille lætum, hoc iste me mœstum fecit. Vale nostri memor.

---

### EPISTOLA IX.

FRANCISCUS PETRARCA SOCRATI SUO S. P. D.

Narrat se veniam cuidam licet immerito indulsisse.

Homo blandus et fallax, idemque si liceat et violentus et minax, quem mecum exitum invenerit quæ-

ris. Quid verum inficier et non potius cum Cicerone confitear qua mollitie sum animi ac lenitate? Nunquam illius lacrimis ac precibus restitissem. Sic est fateor. Illo enim loquente sentiebam nescio, quid tenerum atque femineum oberrare præcordiis, parumque aberat quin supplici meo collacrimarer, et ipse personam offensoris ac deprecatoris induerem. Sed dum illud in animum veniebat; quisnam est iste qui tecum loquitur, quid egit, quid voluit, quid optavit, quid molitus est, quid peregisset ubi consiliis sceleratis occursum non fuisset, quam multorum iniuriæ se miscuit, quam nihil eum poenitet, nihil pudet, nihil omnino præter impotentiam conatibus impiis nunc etiam obstat, quam fictæ sunt hæ lacrimæ, simulatæ blanditiæ, coactæ preces, qui spiritus, quæ mens illi est, qui lupo in hoc agno latet; hæc per se singula cogitans indurescebam sensim, et in silicem atque adamantam vertebar. Quid credis? Poteram homo alter, et ipse mihi dissimillimus iam videri. Iubebat ratio veniam pessimo homini negare; siquidem indulgendi facilitas bonos lenit, malos asperat: et adstipulabatur iræ iustissimæ facultas præsens ac prompta vindictæ. Vicit tamen natura suavior: hac igitur lege veniam tulit ut dehinc nec amicus nobis ille, nec hostis sit: quorum primum haud dubie præstabit: de secundo viderit, dum sibi tam facilem secundam veniam nunquam speret. Ad hunc modum se res habet. Mallem medium tenere: sed si in alterutro labi oportet, malo malis etiam pius esse, quam trux bonis. Tu oratus da veniæ meæ veniam, et vale.

---

## EPISTOLA X.

FRANCISCUS PETRARCA FRANCISCO PRIORI SS. APOSTOLORUM

S. P. D.

Sacrarum litterarum studio se intentius vacare.

Animadverti ex epistola quadam tua placere tibi, quod sæcularibus sacra permisceam. Idque vel Hieronymo placitum censes: ea varietatis amœnitas, is decor ordinis, ea est ut asseris vis iuncturæ. Quid vis dicam? De reliquis ut videtur iudica, certe nec falli facilis, nec fallere solitus, nisi quod qui amant non facile modo, sed cupide falli solent. His ergo omissis, de me dicam deque affectu novo quidem sed iam valido, quo ad litteras sacras stilus animusque meus agitur. Irrideant superbi, quibus divinorum eloquiorum sordet austeritas, et ceu castæ matronæ cultus parcior offendit oculos meretriciis assuetos fucis. Ego non permittentibus solum sed plaudentibus Musis, et secundo fieri rear Apolline, ut qui iuvenilibus iuventam studiis dedi, maturiorem ætatem melioribus curis dem; neque mihi dedecori vertendum, si qui totiens ad inanis famæ præconium ventosasque hominum laudes, ad laudes Creatoris mei media nocte consurgens, quietis tempus somnosque illi meos fregero qui non dormitat neque dormit custodiens Israel, neque universali custodiæ contentus, me quoque custodit, et sollicitus est mei, quodque ego in me clare admodum, in se omnes non ingrati sentiunt, ita singulos servat quasi omnium oblitus, ita omnes regit quasi singulorum negligens; denique sic statutum fixumque animo est, si ex alto dabitur,



inter haec studia et has curas spiritum exhalare. Ubi enim melius possim, aut quid agendo tutius hinc abeam, quam amando et memorando et laudando semper eum, qui nisi me semper amasset, nihil penitus vel, quod minus est nihilo, miser essem, et si eius amor erga me finem habuisset, mea finem miseria non haberet? Amavi ego Ciceronem fateor, et Virgilium amavi usque adeo quidem stilo delectatus et ingenio, ut nihil supra: alios quoque quam plurimos ex illustrium caterva, sed hos ita quasi ille mihi parens fuerit, iste germanus. In hunc amorem me amborum duxit admiratio, et familiaritas cum illorum ingeniis longo studio contracta, quantam visis cum hominibus vix contrahi posse pates. Amavi similiter Platonem ex Græcis atque Homerum, quorum ingenia nostris admota, sæpe iudicii dubium me fecere. Sed iam nunc maius agitur negotium, maiorque salutis quam eloquentiæ cura est. Legi quæ delectabant, lego quæ prosint. His mihi nunc animus est, immo vero iampridem fuit, neque enim nunc incipio. Neque vero me id ante tempus agere coma probat albescens. Iamque oratores mei fuerint Ambrosius, Augustinus, Hieronymus et Gregorius: philosophus meus Paulus, poeta David, quem, ut nosti, multos ante annos prima egloga bucolici carminis ita cum Homero, Virgilioque composui, ut ibi quidem victoria anceps sit, hic vero, etsi adhuc obstet radicatæ consuetudinis vis antiqua, dubium tamen in re esse non sinit victrix experientia, atque oculis sese infundens fulgida veritas. Neque ideo quia hos prætulerim, illos abiicio, quod se fecisse Hieronymus scribere potius quam sequenti stilo approbare visus est mihi. Ego utrosque simul

amare posse videor, modo quos in verborum, quos in rerum consilio præferam non ignorem. Nam quid, oro te, prohibet diligentis patris familias in morem suppellectilis aliam partem necessitati, aliam ornatui deputare, servorumque alios nati custodiæ, alios iocis alere: insuper et argenti simul et auri divitem fieri, cum utriusque pretium sic noveris ne in alterutro falli queas, præsertim cum veteres illi nil aliud a me requirant, nisi ne oblivione deleantur, et primitiis studiorum contenti, omne iam melioribus tempus cedant? Id sane cum per me ipsum sic facere decrevissem, te auctore et laudatore fidentius faciam. Ad orationem, si res poscat, utar Marone vel Tullio, nec pudebit a Græcia mutuari siquid Latio deesse videbitur: ad vitam vero, etsi multa apud illos utilia noverim, utar tamen iis consultoribus atque iis ducibus ad salutem, quorum fidei ac doctrinæ nulla suspicio sit erroris. Quos inter merito mihi maximus David semper fuerit, eo formosior quo incomptior, eo doctior discretiorque quo purior. Huius ego psalterium et vigilantem semper in manibus semperque sub oculis, et dormienti simul ac morienti sub capite situm velim; haud sane minus id mihi gloriosum putans, quam philosophorum maximo, Sophronis Mimos. Tu vive et vale feliciter.

Mediolani, XIV. Kalendas Octobris.

---

## EPISTOLA XI.

FRANCISCUS PETRARCA GULIELMO DE PASTRENGO

S. P. D.

Hominem quemdam ex artifice senili iam ætate ad litterarum studia conversum amico commendat.

Virum hunc si nosse cœperis et amare incipies et mirari. Longa est historia. Summa est: quod honestis ex causis familiarissimus et amicissimus factus est mihi: et, sero licet, tantus eum discendi ardor cepit ut neglecto studio rei familiaris et deserta fabrili officina, in qua insigniter eminet, totum se litteris dederit. Itaque iam nil nisi scholas, libros et magistros cogitat, inque hoc uno noctes insomnes et sollicitos dies agit. Amplexere eum, oro te, et proposito suo fave. Nihil est deformius quam iustis desideriis opem non ferre. Et quid putas ambiat? Non opes, non potentiam, non honores, non vulgi compedes ac venena mentium voluptates, sed unicum otii sui præsidium et vitæ solatium libellos quærit sine tuo ductu tuisque auspiciis nil ausurus. Suspirabis intelligens quo aspiret, et tacitus dices; utinam tempestivius cœpisses,<sup>1</sup> sola enim ætas obstat ingenio, quamvis et Plato provector philosophiæ et Cato senex græcis litteris operam dedit. Hæc hactenus. Raynaldum nostrum mei memorem salvere iube, cui hoc

<sup>1</sup> Huius epistolæ codex Passioneianus bibliothecæ Angelicæ urbanæ (Vide Vol. I, p. xxiii, litt. C) aliquantum diversam exhibet lectionem. Nam pro *Nihil est deformius etc.* habet: *Nihil est Deo similis quam iustis desideriis opem ferre.* Epistola vero desinit in verba *tempestivius cœpisses* adiecto *Vale*. Cætera quæ sequuntur, quæque nos e veteribus editionibus descripsimus, in eo codice desiderantur.

ipsum scribere nec volui nec potui. Expecto enim Calpurnii Bucolicum carmen et tuam Varronis agriculturam; valde enim memini si quid mihi promittitur. Vale.

Patavii, XVII. Aprilis, propere.

## EPISTOLA XII.

FRANCISCUS PETRARCA ALBERTINO DE CANOBIO MEDICO  
S. P. D.

Mortem fuga haud vitari posse. Furti domestici quod passus  
est historiam enarrat.

Nil nisi pergratum in litteris tuis legi. Etsi enim aliquid supervacui timoris inesse videatur, totum tamen puri amoris manat e fontibus, de quo magister amorum scripsit:

Res est solliciti plena timoris amor.

Certe quem securum videas non amantem scito; nam licet secura sui virtus sit, aliis tamen timet: quod inter illos civilis belli motus de Marco Catone legimus. Sed ne quod apud te ultimum erat apud me sit primum, ordinem tuum sequar ad hoc ipsum postea reversurus. Læte audio quod excusatio, apud vulgus forte non verisimilis, in se vera, et apertas aures tuas et facilem animum invenerit. Signum bonæ mentis est fidere. Solent qui multa mentiuntur nihil credere, et qui nihil omnia. Fere enim ita accidit ut qualem quisque se novit, tales alios opinetur, nisi inopinum forte aliquid

emerserit, quod mutare sententiam cogat: quod nostra ætate quotidianum adeo est, ut Psalmistæ *in excessu* suo dictum *omnis homo mendax* nunquam alias tam certum tamque compertum fuerit; interque tot mendaces, quid paucis vera loquentibus credi possit subdificilis coniectura sit. Fecisti igitur ingenue quod amico fidem habueris non fallenti. Nempe si indigis manibus vacuus et inanis inveniar, durum; sed sic est, et ferendum quod mutari nequit. Ut enim re intelligo nihilo melior œconomicus quam politicus sum. Omnia hæc unus solitudinis ac litterarum amor abstulit, nec deinceps mutandi habitum spes est. Nam etsi semper aliquid in dies discere moliar, artem tamen prorsus incognitam aggredi serum est. Eat ergo res familiaris ut libet, sive ut potest, modo ego integer nudus evadam. Peregre rediens Anaxagoras, desertasque conspiciens possessiones suas, nihil damno motus: *Non essem inquit salvus ego, nisi istæ periissent*. Philosophice, graviter, magnifice. Quid autem refert quam prope seu quam procul sim, dum mea diripiuntur ac pereunt? Improperie quidem nec sat Bianteo more me locutum fateor, mea enim nec diripi possunt nec perire. Sed mea dixi quæ fortunæ sunt, vulgi potius errorem in loquendo, quam meum certe iudicium secutus: vulgare sermonis malum. Quid inquam refert dum hæc pereunt ubinam sim, si inter ipsum thalami mei limen, sic ab omni custodia rerum pereuntium peregrinor quasi trans Indiam extremamque Thaprobane habitarem? Hanc occasionem nacti qui dicuntur servi, cum sint hostes asperrimi, et suis usi fraudibus, et facilitate mea abusi, impie atque nefarie eo me non sentientem rede gere, ut experrectus pericu-

lum meum viderem ; nihil enim ferme iam reliqui erat, præter corpus ac libros, in quod avidi possent ac famelici sævire carnifices. Dum illos fugio, nullas latebras nullas angustias recusarem. Tam latis enim tam remotis in ædibus habitanti vel familiare discrimen de quo dixi aderat, vel si illos eiicerem, erat in eo statu solitudo ipsa discrimen. Si quidem paucitas quæ ampla in domo solitudo est, ad angustam si transeat, turba erit. Sic hospitium et magna ex parte modum vitæ ad tempus mutare coactus sum : non sine cogentium gravi tamen incommodo. Nam cum eo usque progressus esset illorum furor avaritiæ, stimulis et rabie actus invidiæ, ut me coram neque vultu meo, neque minis aut precibus inflexi sese gladiis usque ad mortem confoderent, victa demum patientia, abdicavi illos a me. Utor enim verbo patrio, quod ego illis vere pater fueram, quamquam illi mihi non filii sed insidiatores essent, ac sicarii furesque domestici. Et nunc habeant sane sibi fructum scelerum suorum : nempe non sopitum modo sed insensibilem me rati, eoque sibi perpetuam grassandi licentiam promittentes, et furtorum, pro ! Dii, nihil sibi ex omni sua nequitia præter fluxum gulæ negotium ac libidinis quæsivere. Itaque bene habet : brevi, ni fallor, esurient. Iam enim fastu deposito, submissi ac deiecti reditum orant : quem si impetrent, plane omnis præteritæ futuræque perfidiæ veniam licentiamque percipient : ego autem non modo damnis, iniuriis, fastidiis premar ut soleo, sed solatio etiam priver inutilium querelarum. Multo quippe facilius inducar quibuslibet hostibus me dedere, quam iis quorum ipse segnitiam sævitiamque cogar alere ; nam ut te hostis lædat, com-

munis et vulgata calamitas ; ut hostem ipse tuum nutrias, ea vere singularis quædam et extrema miseria est. Et quid, quæso, nunc cogitas, amice? Quam libenter hoc furum genus satyra pungerem immortalī, nisi quod et sæpe alias et hodie satis multa de vilissimis pessimisque furciferis et indignis, qui calamum melioribus destinatum diutius occupent, dicta sunt. Illud autem quod ex hoc aere semper hactenus laudato nunc nescio cur infami me ad patriam tuam saluberrimasque Alpium radices anxius atque sollicitus vocas, fideliter quidem facis ut soles, utque in ipsa precum instantia splendor sole meridiano amor mihi tuus illuxerit. Sed vide, oro, quale sit, ut homo licet indoctus, doctorum tamen hominum libris ab infantia delectatus, iamque provector mortem aut fugere cogitet aut differre. Nempe iampridem et nobis et omnibus qui sunt, quique postvenient, constituti sunt termini, qui ut præteriri non poterunt, sic et cum præterierint reparari et antequam prætereant prævideri nequeunt. Neve nostris hoc solis persuasum esse aut sacris tantummodo litteris scriptum putes, audi quid sæcularium litterarum et Romanæ facundiæ primi duces dicant. Alter enim *moriendum* inquit *certe est, et id incertum an hoc ipso die, nec est aliquis tam stultus, quamvis sit adolescens, cui sit exploratum se usque ad vesperam esse victurum*. Alter ait :

Stat sua cuique dies; breve et irreparabile tempus  
Omnibus est vitæ.

Possem multos veri huius auctores in medium adducere ; sed nota res est, neque egens testium ; ad hæc

non numerus sed auctoritas testibus fidem quaerit. Quid hæc igitur sciens agam nisi ut expectem, seu progrediar vel lætus certe vel intrepidus? Lætum mori enim nimis alta felicitas, trepidum vero nimis ima fragilitas est: imperterritum inter terribilia quæ videntur stare, immotisque mortem oculis spectare, id medium quidem et profecto verum viri opus. Fuga autem mortis cum in iuvene stulta, sic in sene ridicula, tum in cunctis inefficax esse deprehenditur. Sive enim nos ad mortem imus, ut quibusdam placet, sive illa ad nos venit, ut aliis visum est, fieri potest crebroque fit ut in illam dum fugimus incidamus, propterea quod non semper sed perraro vel quæ, vel ubi creditur mors est: quin sæpe alia, sæpe alibi, maiorque pars hominum et alio loco et alio quam timebat genere mortis absumitur: et verissime ait Flaccus quod:

improvisa leti  
Vis rapuit rapietque gentes.

Ut ergo pestem fugiam, quæ hactenus urbem hanc terruit potius quam invasit, quot sunt alia, quam diversa mortis spicula, quibus assequitur fugientes, et quorum forte plurimis subductum, uni caput obiicio? Hic ferrum metuens naufragio periit, ille procellam dum vitat æquoream hosti iugulum dedit in littore. Illum prælio fugientem equi lapsus allisit, hunc parcentem laboribus sopor et requies oppressere. Vide ut Alexander Macedo pugnando invictus, bibendo vincitur. Magnus Pompeius Thessaliæ superstes a se optatam in Ægyptum incidit, tutiorque illi hostilis acies fuit quam clientis domus. Iulius Cæsar externorum victor hostium a domesticis



circumventus est. Augustum fulmina metuentem morbus ac senium resolvit, et Domitianum fungis abstinentem invenerunt gladii, et cessantem a gladiis Claudium boletus sed medicatus extinxit. Africanus iunior, quem nulla acies nullus hostis fregerat, non Numantia, non Carthago, mortem reperit in coniugali cubiculo, quod magno illi Græcorum regi Troiæque victori atque eversori tanto prius acciderat. Sed quo pergo? Quid impræmeditate morientium exempla coacervo, cum potius in contrario laborandum sit, et exemplorum non copia sed raritas acervanda? Quotiens enim quisque mortalium ut opinatus est moritur, et non, ut dictum est, tempore, aut loco, aut ipso mortis in genere fallitur, et interdum falsi fuga in verum impulit discrimen? Unius fuga periculi alterius causa est: multos mali metus in malum trusit, iuxta illud propheticum Isaïæ: *Qui fugerit inquit a voce formidinis cadet in foveam, et qui se explicuerit de fovea, tenebitur a laqueo.* Ut certissima quidem rerum omnium mors, sic circa illam incertissima omnia, nihilque tam ambigue fit quam quod non fieri non posse non ambigitur. Quænam vero hæccura est quando, ubi, seu quibus peream instrumentis, an sit ignis, an laqueus, an febris, an gladius, an rudis, an lapides, an sitis, an æquor, an fluvius, an venenum. Non dico itidem an fames, an crapula, an honestus labor, an turpis inertia: quoniam inter hæc prælargiter differt. Sed dum cesset culpæ virus, conscientiae vulnus, febris affectuum, insolentiae tumor, livor infamiae, per se ipsam omnis mors una atque eadem est, illa quidem evitabilis nulli, æqualiterque omnibus impendens, et opulento regi, et inopi agricolæ, et defecto

seni, et prævalido iuveni, et florido adolescenti, et teneræ pueritiæ, et lacteæ communis infantiae. Moriendum omnibus : atque omnia in hoc uno paria, cum in reliquis tam multa sint varia. Nullum privilegium ætatis, nullum loci, nullum dignitatis aut gloriæ. Mortem ipsam intueamur. Quid metiris adventitia, moriturum ac mortale animal, quid trepidas, quid externa circumspicis? Apud veros æstimatores rerum apparatus exterior nihil ad rem: res nuda, si verum rei pretium quæritur, æstimanda est. Si mors igitur una est, si statutus locus præfixusque nascentibus mortis dies, quid de locis atque temporibus angimur? De utrisque iam cautum. Si audirem dicentem nobis Ieremiam: *Quicumque manserint in civitate hac morientur gladio et fame et peste, qui autem profugerit ad Chaldæos vivet, et erit anima eius sospes*, non dubitarem ad Chaldæos usque profugere. Contra autem si Moyses Deo iubente loqueretur et diceret: *Cavete ne ascendatis in montem, nec tangatis fines illius: omnis qui tetigerit montem morte morietur*: auderem te hortari ut quam primum e monte descenderes. Nunc neutrum audio, sed mulierem illam Thecuitem dicentem David regi: *Omnes morimur et quasi aquæ dilabimur in terram*. Quod cum ita sit, nec exceptio sit ulla, quid nisi laborem irritum et peiorem morte mortis metum fuga contulerit? Velox quidem metus, sed velocior mors est et fortuna. Honestius invenimur stantes quam profugi prævenimur. Expectemus ergo æquis mentibus in terra quid de nobis cœlum statuit, ne velut aviculæ visco seu laqueo implicitæ volitando nitendoque amplius implicemur. Iam quod te perpetuum comitem lateri meo spondes, et hoc rursus amantissime

facis ac gemino iure tuo, professionis tuæ scilicet, amicitiaque nostræ. Verum hercle medicinæ ars, etsi saluti præservandæ morbisque minoribus aliquid conferat, tamen ubi ad extrema perventum est, illico metu subsistit. Hinc illa medicorum fuga desperatioque de rebus ægrotantium humanæ vel inscitia vel imbecillitatis inditium : quo monemur medico illi soli fidere qui ægros suos non deserit in extremis, de quo scriptum est : *Et si ambulavero in medio umbræ mortis non timebo mala, quoniam tu mecum es.* Oh ! potentem medicum qui mortis umbram discutit solo sacrae Sole præsentia, eumque cum quo fuerit timere aliquid non sinit : qui verbis curat et non herbis, neque curat modo, sed suscitatur. Non est enim illorum unus de quibus scribitur : *Numquid mortuis facies mirabilia aut medici suscitabunt?* sed ille est unus altissimus, qui creavit de terra medicinam hanc in usus hominum, sibique aliam reservavit increatam, et divinæ suæ substantiæ coæternam, qua et quatrduanum foetentem ab inferis suscitaret, et humanum genus ab æterna morte servaret. Amicitiam sane ingens vitæ mortisque solatium non nego, atque illud absens præsensque non respuo, sed amplector ; et licet undique placeas, aliquanto tamen dulcius te ut amico fruor quam ut medico, Proinde non tam periculo meo quam desiderio tuo consulens, neque tam medicum cogitans quam amicum, cupidissime nunc vocanti obsequerer, nisi et corporeo et aliis impedimentis mille retraherer, et venirem te visurus tuamque solitudinem mihi semper optatum laudatumque portum vitæ, non mortem fugiturus memor ut nuper et olim, quod est apud poetam, aerias Alpes et Norica

castella pestis sæva corripuit: alioquin si morti imperviae Alpes essent, crede mihi, ut est vitæ cupiditas innata mortalibus, multo et tu angustius habitares, et nos latius. Vale.

Mediolani, VII. Kalendas Novembris.

### EPISTOLA XIII.

FRANCISCUS PETRARCA PETRO PICTAVIENSI S. P. D.

Litteram, quæ hanc sequitur, se in itinere scripsisse narrat, et suam de Fortuna sententiam aperit.

Anno altero, dum ad serenissimum omniumque mitissimum Francorum regem legatione fungerer, tanto licet impar muneri, colloquioque tuo, cuius insatiabilis sum, quotidie recrearer eo avidius quo diuturniorem eius penuriam passus, ex te didici regem ipsum primogenitumque eius illustrem Normannorum ducem ardentissimi spiritus adolescentem in verbis quæ coram eis habueram, super eo maxime quod de Fortuna mihi mentio incidisset fuisse permotos, quod ego ipse dum loquerer ex vehementi illorum intentione notaveram: sic erectos in me oculis animisque defixos ad Fortunæ nomen vidi. Mirantur enim, ut intelligo, et quasi quibusdam magnis monstris attoniti sunt pro hac tanta varietate Fortunæ, quæ cum sæpe parva et magna, nunc maxima rerum sic affligerit, ut regno felicissimo et multa olim invidia laboranti, nunc miseratio deberetur. Super quo tunc tibi respondi debere neminem admirari:

quoniam seu Fortuna seu alius fuisset regni largitor, licitum sibi non tantum quod dedisset atterere, sed auferre: habendam tamen spem in Illo per quem reges regnant, qui suos non interimit sed castigat, et pro qualitate nostrarum ægritudinum sæpe fortassis amarior, nunquam vero nisi pie ac salubriter nos exercet. Coeterum orta hinc occasio regio erat adolescenti ut die festo, quo cum collegis meis invitatus ad convivium regis eram, tu ipse cum quibusdam clarissimis viris atque doctissimis ad hoc opus electis, me post prandii finem verbis aggrederemini, ut de hac ipsa Fortuna dicerem quid sentirem. Quod cum mihi sera iam nocte nuntiatum esset per hominem famæ anxium sollicitumque meæ, quamvis et indispositus ad hanc rem et longe aliis implicitus, quia tamen non is erat cui facile posset obstari, ne improvisa et subita re turbarer, recollegi animum quantum cum tot curis sine ullis libris potui, ut qui uno verbo expedire sententiam meam possem: credere me scilicet et semper credidisse dicentibus, nil omnino aliud quam nudum et inane nomen esse Fortunam, tametsi in communi sermone populum sequi, et sæpe Fortunam nominare solitus coloratius aliquid dicens, ne eos, qui illam Deam seu rerum humanarum dominam opinantur atque asserunt, nimis offenderem. Sequenti autem die, ut vidisti, rege multum in nostris seu verius suis honoribus occupato, Duce quamvis in id unum quod optabat intento, regemque nunc verbo nunc nutibus admonente, hora illi nostro destinata colloquio in aliis est absumpta: et ego respondendi onere liberatus abii, ut lætus quod contra publicam sententiam in publico loqui non essem

coactus, sic moestus quod tantorum hominum de hoc ipso sententias non audissem. Paratior enim multo eram discere quam docere : quamquam illius diei ipsius quod reliquum fuit ab hora illa sexta ad vesperam, tecum et cum eisdem magistris tribus in thalamo meo, quo vos urbanitas vestra contraxit, hoc ipso et alio quidem vario sermone traductum sit. Sed postquam inde atque ex illa regia urbe discessi per Alpes et glaciem hieme horrida, de te tuisque de rebus sæpe mecum fervide cogitans, dictavi tibi per hospitem thalamos inamœnos atque incommodos epistolam longam valde, quam idcirco non misi quia fidelis nuntii copia non fuit. Nunc tandem, oblato hoc religioso et insigni viro utriusque nostrum amantissimo, eam ipsam iam sepositam ac neglectam non sine labore transcripsi, in qua quidem de Fortuna nihil, sed de causis quibus, ut reor, et vestrum Galliæ et nostrum Italiæ regnum in hoc statu sunt, multa dixi, non magna nec culta, fateor, sed vera : tibi que qui nugellas meas diligis forsitan placitura. Vale mei memor.

Patavii, VIII. Idus Septembris.

#### EPISTOLA XIV.

FRANCISCUS PETRARCA PETRO PICTAVIENSI S. P. D.

De militia veterum, et Romanorum præsertim,  
militiæ sui temporis comparata.

Admiratio inexperientiæ argumentum est. Miramur insolita : communium stupor nullus. Pone igitur iam stuporem : trita sunt et communia quæ miraris : mu-

tantur assidue res humanæ, et ut reliquarum sic militiæ gloria præterfluit, ac de gente in gentem sedem transfert. Denique una est horum quæ videmus omnium stabilitas, non stare: una fides, fallere: una requies, circumvolvi. Non te longe oculos reflectere iubeo, sed tuam patriam, tuum tempus aspicere. Adolescentulo me, Britanni, quos Anglos sive Anglicos vocant, omnium barbarorum timidissimi habebantur: nunc bellicosissima gens Gallos diu bellica gloria florentes stravit tam crebris insperatisque successibus, ut qui modo vilibus Scotis impares fuerant, præter miserabilem et indignum summi regis casum, quem sine suspirio meminisse non possum, sic regnum omne igne ferroque contriverint, ut mihi nuper illac iter ex negotio agenti vix persuaderi posset regnum illud esse quod videram. Sic ubique solitudo infelix et mœror et vastitas; sic ubique horrida et inculta arva, sic dirutæ desertæque domus, nisi quæ cinctæ arcium mœnibus aut urbium evasissent; sic demum locis omnibus Anglorum mœsta vestigia et recentes fœdæque cicatrices gladiatorum extabant. Quid tibi vis? Ipsa Pariseos regni caput usque sub ipsum portæ limen deformata ruinis et incendiis tremere, extremosque casus horrescere; quin et ipse, qui muros interlabitur Sequana, non sine sensu quodam quasi miseriæ suæ urbis eventum flere mihi simulque metuere visus est. Ecce iterum in dies ignobilis ille tractus Illyrici sensim caput extulit, et diu bellaci Germaniæ vult æquari. Nonne vides quod nemo unquam divinasset, ut fugaces Histri sagittarii post votivum unum atque alterum successum, non tam virtute partum sua quam diffidentia lenti hostis inge-

stum, in eam fiduciam sunt evecti, ut Teutones contra stare audeant, et terrori esse illis incipiant; experimentoque deprehenditur non tam verum esse quod Lucanus ait :

Ensis habet vires, et gens quaecumque virorum  
Bella gerit gladiis,

quam quod ait Iulius Capitolinus, quod scilicet nulla res magis contra Germanos valet quam expediti sagittarii? Cæterum hæc Fortunæ constantia est, sic eunt res mortalium : nil cuiusquam proprium atque perpetuum. Cuius rei si doctrina brevior aut antiquior desideratur auctoritas, Crispum audi : *Fortuna inquit simul cum moribus mutatur, et imperium semper ad optimum quemque a minus bono transfertur.* Ita est haud dubie, et quidquid hic latius dici potest, brevitatis ista complectitur. Transferuntur ut opes hominum sic et vires et ingenia et virtutes et nomina, quæve unius fuerant, alterius fiunt. Nempe cum ponderosissima res aurum sit instabile, quam putas fama ipsa volatilis ac vaga? Est aura illa quidem inanis ac tenuis : hoc unum mobilis et incerta fixum certumque sibi retinet : virtutem sequitur, ignaviam fugit. Hinc effectum, quod Iustinus ait, ut inter vitia Græcorum sordidum et obscurum antea Macedonum nomen emergeret; hinc Carthago, ab exilio et angustis sedibus pretio quæsitis, late omnibus tremenda littoribus ; hinc urbs Roma e pastoralis culmo mundi culmen et regnatricis gentium facta est. Harum vero varietatum quænam causa nisi unius gentis inertia de prosperitate oriens, et ex conscientia parti nominis priscae indoli luxus obrepens, alterius



vigil industria, et inter difficultates rerum sese animus erigens, patiens laborum, gloriæ appetens, contemptor-que libidinum, qui ubi se vicerit, facile omnium victor efficitur? Idem ipse lentescens veriusque destitui incipiens mox vincendus ab omnibus in luxum socordiam-que resolvitur, quod in his tribus quas proxime memoravi, inque illis quatuor, quorum primo memineram, aliisque quam plurimis regnis ac gentibus promptum esset ostendere, nisi quia et longum et notum adeo est, ut nil inter homines sit notius. Et hæc nimirum illa est a minus bono ad optimum quemque imperii quam dicebam Sallustiana translatio, fortunæque mutatio cum moribus. Prima quidem victrix exercituum atque enervatrix virium voluptas, contra quam sola virtus invicta est. Qui hac armatus illi restitit, nulli hostium cessurus immortales titulos celso fixerit trophæo. Scis quid Scipio apud Numantiam edixit: et clarissimum enim et notissimum est edictum, quo scorta scilicet institoresque et lixæ castris eiecti, sive, ut breviter quod est dicam, missa voluptas in exilium accitataque virtus in auxilium, ac virtutis comes accersita victoria est. Quem imitatus in Numidia Metellus pari consilio, pari fine, voluptate itidem relegata, nervisque militiæ restitutis, ad Romana signa insuetam tamdiu exulanti victoriæ viam fecit. Nostræ autem militiæ disciplina quænam sit non expectas ut loquar: qui mores, quæ castrorum species, quæ ducum providentia, qui militum vigor, quæ modestia. Non virorum castra putes ingredi sed lupanaria meretricum, tabernasque ganeonum ac popinas: neque hercle aliter est, neque vero æquanimiter vino quolibet barbarica madet ebrietas. Nisi pe-

regrinis poculis aestuet, inopiam ac defectum et sitim vocat intollerabilem, quæ fugam quæque deditionem sufficienter excuset. Hic profectus rei bellicæ: sic ab armis ad cyatos militaris ambitio processit: non qualiter pugnent, sed qualiter potent atque inebrientur est quæstio, qua cum hostibus fœderati totos dies noctesque cum commilitonibus decertant suis, et ille victor famosiorque qui vini capacior profusiorque est miles. Venit in hoc genere hominum (solo utinam) quod venturum vaticinatus est Seneca: *habebitur inquit aliquando ebrietati honor, et plurimum meri cepisse virtus erit.* His tu institutis et his studiis magnum aliquid speres? Iure tales exitus rerum sunt quales ebriorum decet. Quamquam quod infelices Itali vel dissimulant vel non vident, hæc latronum acies non ad prælium sed ad prædam atque ad potum nostris degat in finibus. Vetus malum. Legimus gentem illam frugum et præcipue vini dulcedine primum olim in Italiam transcendisse, quod utinam hodieque non tam cupide facerent, nosque prohibitores in limine et non magis imitatores insanix repirent: quo fit ut paulatim cuncta degenerent, mos patrius, sermo, habitus, vitæ modus domi militiaeque, quodque nequidquam queri soleo, faventibus nobis, Italia hæc, quam etsi non videris plane nosti, dictu mirum et vel hostibus miserandum, in truculentam barbariem transformetur: cuius monstri, prodigiosa licet delectatio sit insanis, quam tamen patribus rationem reddituri simus non intelligo. Sed de hoc sæpe multa nec unquam satis multa disserui. Nunc peragam quod incepti. Quid est ergo quod miremur si apud nos et sepultum imperium et libertas oppressa est, aut si nostro nunc

in orbe neque pax durat, neque bella finiuntur, cum neque ipsi quiescere valeamus, neque his unquam stipendiis debellare? Quando enim, oro, vincerent qui vicisse iam nollent, immo quidem quibus vincere vinci est? Horrent in patriam reditus: haud immerito: gustarunt enim Italiae saporem, oderuntque et metuunt belli finem, qui ebrietati ac licentiae modum ponat. Quamvis nec si valde cupiant hostem vincere, iam possint, suis ipsi vitiis ac moribus victi, capti, oppressi, exarmati, servi degeneres voluptatum. Quid vero nunc eis diceret prisca illa Romana militia masculorum militum, quibus praeter arma cibum quoque dierum plurimorum, non hunc mollem multa arte confectum, sed praedurum panem, vallumque insuper humeris ferre mos fuerat, quo et famem diurnam sero pellerent, et se inter caecos hostium insultus nocte protegerent, munirentque; audire soliti a ducibus suis si quando sub fasce nimio, lentius incederent, *miles, cum te gladio vallare scieris, vallum ferre desinito*, et ingentem clypeum ferenti aegre exprobratum ita: *amplius iusto scutum fers, neque id reprehendo, quando melius scuto uteris quam gladio?* Nulla ibi epularum, nulla vini mentio: rivus omnis, licet turbidus, sitientibus nectareos potus dabat. Nullus usquam voluptati locus: omnia virtus occupaverat, et gloriae studium et pudoris metus. Militabant sub severis ducibus, qui mollitiem neque in se neque in alio ferre possent. Habebant illos non luxuriae magistros sed sobrietatis exemplar, in qua principem non sequi militibus indecorum esset. Vini parcissimum Iulium Caesarem hostium quoque confessione didicerant, et adeo victus indifferenter, nec gulae minus

quam hostium domitorem, ut in pace etiam, non modo plebeios sed nec inamœnos quidem et insulsos cibos aspernaretur. Augustum cibi minimi ac vulgaris fere, et qui secundum panem et pisciculos minutos et caseum bubulum manu pressum et ficus virides biferas maxime appetebat. Hadrianum parce ac militariter viventem cibusque castrensibus in propatulo libenter uti solitum, hoc est lardo, caseo et posca, exemplo Scipionis Æmilianī et Metelli et auctoris sui Traiani. Hæc enim de iis, ut minores sileam, a præclaris auctoribus scripta sunt. Quem vero non puderet turpium dominorum gulæ ac ventris esse mancipium, dum audiret aut cerneret tantos imperatores ita vivere? Assueverant præterea milites pro qualitate facinoris pœnam aut præmium sperare. Neque enim aut occultum aliquid, aut neglectum iudicium sub æstimatione tantorum fingi poterat. Cernebant statuas insignium bellatorum, videbant coronas civicas, murales, obsidionales. Audiebant Cosium Scævam ob inauditam et stupendam pugnam, qua totum Britannici exercitus impetum uno pectore unoque victor umbone propulerat, ab illo martiæ virtutis æstimatore præcipuo, cuius gesta sub oculis res erat, Centurionatus insignibus exornatum. Lucium Dentatum ob innumeras incredibilesque victorias, non unius militis, sed integræ legionis exuviis onustum. Ex diverso autem propter ignaviam notatas infamia legiones, ademptos equos, arma, patriæ conspectum, pugnae copiam: siquidem et promptus ad præmia est qui præmio digna meditatur, et durus ad veniam qui vel nil veniæ egens agit, vel si quid erraverit, nihil ipse sibi parcere soleat. Semper igitur et hostium spoliis et meritis terga

suppliciis, si ita res tulisset, semper aures ut honestis laudibus sic iustis reprehensionibus præparatas habebant. Noverant Pescennium Nigrum in Ægypto vinum flagitantibus respondisse: *Nilum habetis et vinum quaeritis?* eundemque aliis qui a Saracenis victi essent, tumultuose vinum poscentibus, sine quo pugnare non posse se dicerent, insultasse his verbis: *Erubescite: illi qui nos vincunt aquam bibunt.* Marium nempe Pescennius ante oculos habebat, cuius imitator in primis miratorque magnus fuit, qui non vinum sed aquam petenti exercitui respondisset: *Viri estis: en illic habetis:* castra hostium ostendens qui ripam fluminis obtinebant. Quo responso inardescens virtus eo militem perpulit, ubi neque vinum certe neque puram aquam sitiens inveniret, quoniam, ut ait Florus, tanto ardore pugnatum est ut victor romanus de cruento flumine non plus aquæ biberit quam sanguinis. Quid autem durissimi duces aliud quidquam militibus suis in acie responderent, quando mitissimus princeps Augustus domi in pace querentem de inopia et caritate vini populum severissima oratione compescuit, ut Tranquillus ait, satis provisum ab Agrippa genero suo dicens perductis plurimis aquis ne homines sitirent? Nigrum ipsum quoque meminerant tam infracti a voluptate animi, ut non argentum modo detraxerit ex usu militiæ, ne forte militaribus sarcinulis in manus hostium delatis, nostris spoliis superbirent barbari, sed pistorum sequi castra vetuerit, vinique potum prorsus interdixerit, iubens omnes aceto ac biscocto pane contentos esse, de quo ita scribit Ælius Spartianus: *Nunquam sub eo miles provinciali lignum, oleum, operam extorsit, et ipse a*

*milite nihil accepit cum tribunatum ageret, nihil accipi passus est. Nam et imperator tribunos duos, quos constitit stellaturas accepisse, lapidibus obrui ab auxiliaribus iussit. Neque alterum Marii miratorem obliti erant Cassidium Avidium, qui, ut Vulcatius Gallicanus ait in historiis, arma militum septima die semper respexit, vestimenta etiam et calceamenta et ocreas, delicias omnes de castris submovit, iussitque eos hiemem sub pellibus agere, nil omnino præter lardum et buccellatum et acetum in expeditionem portare; si quid præterea luxuriæ reperiisset non levi puniens supplicio. Atque ille quidem merito præfectus, cui princeps suum de Cassio iudicium scribens curam commeatum iniunxerat, in hæc verba rescripserit: « Recte consulisti, » mi domine, quod Cassium præfecisti Syriacis legionibus: nihil enim tam expedit quam homo severior » Græcanicis militibus. Ille sane omnes excaudationes, » omnes flores de capite, collo et sinu militi excutiet. » Annona militaris omnis parata est, neque quidquam » deest sub bono duce. Non enim multum aut quæritur aut impenditur. » Hæc præfectus principi de Cassio, sub quo duce exercitum septimi diei fuit omnium militum, ita ut sagittas mitterent et armis luderent; dicebat enim: « Miserum esse cum exercentur athletæ, venatores et gladiatores, non exerceri » milites, quibus minor esset futurus labor si consuetus » esset. » Qui denique, ut historicus idem ait, cum exercitum duceret, seque inscio, manus auxiliaria, centurionibus suis auctoribus, tria millia Sarmatarum negligentius agentium in Danubii ripis occidissent, et cum præda ingenti ad eum rediissent, sperantibus centurio-*

nibus præmium, rapi eos iussit et in crucem tolli, servilique supplicio affici, dicens evenire potuisse ut essent insidiæ, ac periret romani nominis reverentia. Cumque ingens seditio in exercitu orta esset, processit in medium sine armis, et : « Percutite me, inquit, si » audetis, corruptæque disciplinæ cæsi etiam ducis » scelus addite. » Quæ res tantum obedientiæ romanis addidit, tantum terroris barbaris iniecit, videntibus damnatos romani ducis iudicio etiam eos qui contra fas vicerant, ut pacem centum annorum, absente Antonino Romano tunc imperatore, deposcerent. Ad postremum hic est ille vir quem unum corruptis ac perditis legionum moribus reformandis idem ipse Marcus Aurelius Antoninus principum sapientissimus sano maturoque consilio delegisse, cuique per epistolam severitatis eximiæ verum et insigne testimonium reddidisse laudatur. Multa dixi de Cassio, quod et multa de eo legeram, et multum ille nostræ modernæ militiæ dissimilis, multumque ideo vitiorum nostri temporis convicio idoneus videbatur. Cui hac in re similis Maximinus, quamvis in reliquis crudelis ac barbarus, quinta quaque, ut in vita eius legitur, die iubebat milites decurrere, inter se simulacra bellorum agere, gladios, loricas, galeas, scuta, tunicas, et omnia arma illorum quotidie circumspicere, quin etiam ipse prospiciebat prorsus ut verum se patrem militibus præberet. Probus quoque sub oculis erat qui, ut ait Flavius Vopiscus, nunquam militem otiosum esse perpessus est; siquidem multa opera militari manu perfecit, dicens annonam militem comedere non debere. Ac ne leviora gravissimis inseram, utque omittam Quintum Cincin-

natum, qui dictator Minutio, quod se atque exercitum Romanum obsideri ab hostibus apud Algidum passus erat, consulatum abstulit; ut Calpurnium Pisonem sileam, qui consul præfectum equitum, quod arma hostibus tradidisset, vario contumeliarum genere deformatum, succisis togæ laciniis, discinctum nudis pedibus a mane ad vesperam adesse ad primam aciem per omne militiæ tempus iussit, ut qui omni iure sanguinis, quo præfectus illi vinctus erat, potiolem duceret esse rempublicam atque observantiam militarem: ut hos ergo præteream, omittendus non est rigor acerrimus Manlii Torquati, qui filium raræ indolis, quod iniussus in hostem pugnaverit, quamvis egregie feliciterque pugnasset, occidit: parque Postumii Tiburtii, ob eandem causam in filium quoque imperii severioris atrocitas, quamquam huius incertior fama sit. Nec multo inferior Papirii Cursoris acrimonia, nisi quod non in filium exarsit sed in Quintum Fabium magistrum equitum, quem dictator, quod iniussu eius alioquin prospere ac strenue decertasset, securi ferire voluit, et fecisset, ni conceptam severitatem pietas publica temperasset, et non insignis rei virtus aut dignitas, non tumultuantis metus exercitus, non longævi patris lacrimæ, non senatus auctoritas, sed solæ ad ultimum piæ preces populi Romani nobilissimum ac fortissimum adolescentem ab interitu liberassent. Noverant sane tam difficilem tam tremendam hoc duce militiam, ut perpetuo labore ac metu corpora militum atque animos attereret, atque, quod est apud Livium, aliquando ausis equitibus ab eo petere ut sibi pro re bene gesta laxaret aliquid laboris, sic illuderet: *ne nihil dimissum dicatis*



*remitto, ne utique dorsum demulceatis cum ex equis descendetis: et prætorem Prænestinum, quod per timorem segnius suos duxerat in primam aciem, lictore cum securi accito ludens quoque mortis terrore, confusum increpitumque dimitteret. De reliquis succurrebat Quintus Messius qui, quod a Livio prætermisum miror, bello punico secundo, eo prælio quod ad Trebiam gestum est, quinque cohortibus, ex ea statione cuius custodiam illis commiserat, hostium vi deiectis, ut eamdem illico repeterent imperavit, non quia id fieri posse confideret, sed ut militarem culpam acri imperio castigaret, desertique loci mors supplicium esset. Illud enim præcepto additum erat, ut si quis ex eo numero in castra refugeret, tamquam hostis occideretur; quod ultimæ necessitatis acutissimum calcar adactum animis, et lassitudinem corporum et desperationem rerum et loci difficultatem et hostium turbam vicit, quodque impossibile duci invicto visum erat, victis militibus pronum fecit. Obversabatur animo Iulius Cæsar qui, ut Tranquillus ipse meminit, *inclinatam aciem solus sæpe restituit, obsistens fugientibus retinensque singulos, et contortis faucibus convertens in hostem, et quidem adeo plerumque trepidos, ut aquilifer moranti se cuspidē sit comminatus, alius in manu detinentis reliquerit signum.* Sub iis ducibus militare durum fateor, sed lenibat asperitatem gloria, quodque vitæ periculum ac labor horrendum fecerat, sola virtus optabile faciebat. Rari ibi transfugæ: rari desertores: fides et metus leves animos frænabant. Erant exemplo Fabius Maximus, qui omnes quos cepisset transfugas, truncis manibus dimissos, fugam cogitantibus documentum dedit.*

Erat Africanus maior, qui sic natura benignum ac mitem animum necessaria severitate vel invitus armaverat, ut pendente bello gravissimo, cuius sibi confecti gloria parabatur, defectionis auctores ad palum deligatos ac virgis cæsos securibus obtruncaret, et Carthagine domita finitoque bello, transfugas, qui comprehensi essent latini nominis, securi quoque percuti iuberet, romanosque et gravius iussisset crucifigi. Erat et Minor Africanus qui, non victa tantum sed eversa Carthagine, transfugas inter victoriæ ludos populo spectante laniandos feris edacibus obtulit: et Æmilius Paulus, qui Macedonici belli victor, similis noxæ reos elephantibus proculcandos præbuit, salubri omnes et memorabili documento, si modo ducum virorumque illustrium iudicia eo trahimus, quo illorum virtus et gloria merentur, neque livor interpret pessimus iustæ severitati superbæ crudelitatis nomen imponere nititur, cuncta peiorem semper in partem trahens. Libet enim huic loco adscribere unum Valerii Maximi grave dictum, quod ipse iis ac talibus exemplis adnexuit: *Aspero enim inquit et abscisso castigationis genere militaris disciplina indiget, quia vires armis constant, quæ ubi a recto tenore desciverint, oppressura sunt nisi opprimantur.* Neque vero tantummodo in suos duces atque exercitus, sed in socios incorrupta constabat fides. Nam quis fallere, quis furari prædarive aliquid auderet, dum meminisset ut milites qui regium in præsidium missi, mactatis nefarie principibus civitatis, ipsam sibi crudeliter usurparunt, et erant millia hominum quatuor, ut Livius ait, ad unum omnes virgis cæsos securibusque percussos inhumatos abiici

iussit flerique vetuit senatus? Dum ad memoriam revocaret ut Pescennius idem Niger, sicut in vita eius scriptum est, ob unius gallinacei direptionem decem commanipulones, qui raptum ab uno comederant, securi percuti iussit, quamvis impendentem veritus seditio- nem, toto exercitu deprecante, rigidam sententiam victus inflecteret? quod non fecit Cassius, de quo ita scribitur: milites qui aliquid provincialibus tulissent per vim, in ipsis illis locis in quibus peccaverant, in crucem sustulit. Et ut supplicia severitasque cessarent, quem quæso nisi omnis virtutis et gloriæ contemptorem non moveret ac sociorum ab iniuriis abstinentem faceret illa modestiæ laus eximia apud Ciceronem lecta in oratione, quam de Magni Pompeii laudibus scripsit: *Cuius legiones inquit sic in Asiam pervenerunt ut non modo manus tanti exercitus, sed ne vestigium quidem cuiquam pacato nocuisse dicatur? Iam vero quemadmodum milites hibernent quotidie sermones ac litteræ perferuntur; non modo ut sumptum faciat in militem nemini vis affertur, sed ne cupienti quidem cuiquam permittitur: hiemis enim non avaritiæ perfugium maiores nostri in sociorum atque amicorum tectis esse voluerunt.* Hæc Cicero, cæterorum enim sententiæ huius etiam verbo venerabile pondus habent. Neque tantum in socios innocenter, sed in hostes quoque fideliter se gerebant foederum ac pactorum servantissimi. Hinc Veturius atque Postumius consules, quod iniussu Senatus et populi Romani pacem cum Samnitibus fecissent, volentes hosti dediti privato periculo fidem publicam exsolverunt: quamvis eam deditionem hostis argueret. Hinc decem illi qui Cannensi prælio capti

ad Senatum ab Hannibale missi erant, pro redimendis seu permutandis captivis, iuratique se, nisi id impetrassent reversuros, cum vel unus eorum vel, ut alii volunt, omnes, peractis mandatis in urbe taciti remansissent, a Senatu ad Hannibalem sunt remissi; utque horum ac similium fraus iure reprehenditur, sic Attilii Reguli spectata usque ad crudelissimam mortem fides, cum omni temporis perennitate laudabitur. Nam ut hostem armis vincere præclarum, quamquam pietate præclarius, sic fallere, nisi bellicis artibus, turpe est. Possem nunc exterarum nationum exempla subtexere, sed neque ego hunc sermonem ingressus alterius quam Romanæ militiæ mentionem feci, neque ulla gens, quod pace omnium dixerim, hoc in genere gloriæ par occurrit. Iis in castris enutritus miles atque iis imperiis assuefactus exercitus, quid usquam tam difficile reperit quod non superaret, quid tam durum quod non frangeret, quid tam altum quo non scanderet? Omnia expertis novi nihil, nihilque formidolosi accidit. Experientia mater est artium, et consuetudo discriminum metum premit. Nulla ex iis viris collecta acies parva erat. Nam quod numero defuisset, et obedientia militum et maiestas ducum et utrorumque vis animi exercitatioque et vita carior semperque ceu numen aliquod culta castrensis disciplina suppleverat. Tubæ signum, seu in prælium excitantis seu receptui canentis, ut nemo tam surdus qui non audiret, sic nemo tam hebes qui non intelligeret, nemo tam segnis seu timidus, qui non dicto citius exequeretur. Simul in hostem ruebant, simul subsistebant, simul feriebant, simul acie excedebant: ingens unitæ virtutis efficacia est, et

prope nihil inexpugnabile multis fortibus viris unius more pugnantibus, ubi virtus et eruditio rei bellicæ in unum coeunt. Hæc nempe acies dirum vicit Hannibalem, magnanimum Pyrrhum fregit, Syphacem in carcerem, Persen in vincula, Mithridatem in mortem egit: Antiochum regno, Cyrum opibus exuit, piratas pelago: hæc Punicam classem toto regnantem mari suis mersit in fluctibus: hæc Iugurtham parricidiorum perfidiæque pœnas pendere compulit: hæc Britanniam muro diremit, Rheni ripas ponte coniunxit, Danubii vortices impetumque compescuit; hæc eadem, cui modo Ciminiam silvam transiisse magnum fuerat, mox iuga Alpium aperuit, Arduennam et Pyrenæi saltus atque Hircinias latebras penetravit: nivalem Caucasum, saxum Atlanta pertransiit, permeavit ardentem Lybiam, Euripi fremitum atque æstus Euxinios et dubias Syrtes et tumidum navigavit oceanum: hæc die uno Hispalim et Carthaginem expugnavit. Nam in maiore altera plus negotii par eventus; hæc ipsa Numantiam, hæc Hierosolymam, hæc Corinthum diruit, hæc Syracusas, hæc Capuam, hæc Tarentum cepit, hæc Hispanias, hæc Gallias, hæc Germaniam, hæc Africam Asiamque. Sed quo feror? Hæc Italiam, hæc Europam, hæc terrarum orbem armis domuit, atque virtutibus, unoque capite iussit esse contentum: semper victrix et semper indomita, nisi illi victoriæ comes insolentia nocuisset, et ut dixi, luxum semper ac funestos mores paritura prosperitas in sua demum præcordia ferrum vertens, in sese victi orbis iniurias vindicasset.

Et hæc quidem illi. Nostri autem exercitus pleni furum prædonumque, crebriores sociorum quam

hostium prædas agunt, fugæque amplius quam virtutis, stimulisque quam gladiis fidunt: fallunt expeditius quam pugnant, sæpiusque fidem suam violant quam feriunt hostem. Nullus enim domi punitor scelerum, castigator ignaviæ Senatus: nullus in castris Fabius, nullus Africanus, nullus Æmilius Paulus, nullus Magnus Pompeius, nullus Iulius Cæsar, nullus denique Niger aut Cassius, sed qui omne dedecus militiæ suis exemplis foveant et excusent. Unde fit ut impunita omnia et poenis meritis plus non modo licentiæ sed præmii sit. Innocentia probro datur, abstinentia pavoris, fides stultitiæ, fraus vero prudentiæ et boni ingenii nomen habet. Modestia sordium subit infamiam, avaritiæ frugalitas, pudicitia feritatis, pluresque nunc hostes virtus invenit quam olim perfidia. Itaque non inhonorata tantum sed vix tuta est, et si forte odium evaserit, in contemptum incidit. Sic bonorum princeps honorabilium vel opprimitur vel ridetur. Quomodo autem hi nostri duces hanc militiam, nisi se, regant, aut qua fronte alios corrigant quibus maxime necessarius est corrector? Ideo hoc recipit natura ut det quisquam quod habet, *neque, ut ait Cicero, potest exercitum is continere imperator qui se ipsum non continet, neque severus esse in iudicando qui alios in se severos esse iudices non vult.* Nostri ergo ducibus ebriis milites temulentis post crapulam quid agant, nisi quod consequens est? stertunt, sudant non virilem sudorem, sed febrilem, neque militariter sed muliebriter sed scurriliter sub tentoriis senescentes, iocis student, cœnis inhiant, incumbunt aleæ, libidinibus se immergunt, muliercularumque sarcinulas suarum foedo agmine præ se

ferunt; negligentes ordinum ac vagi, quasi apes dissipatis alvearibus, quisque sibi dux est. Amant umbras, ocia, belli nomen, cui se stipendii debitores sciunt, cum bellum ipsum oderint: de quo tamen, ut de sua arte non erubescunt: pigri, inscii, timidi, loquaces, arma et equos non ad obsequium dominorum, non ad patriæ tutelam, neque ad gloriam, sed ad quæstum, ad ornatum corporis et voluptatem habent: onusti auro, quo et amico gratius spectaculum, et hosti opimior præda sint. Cum suis ducibus de virtute nunquam, sed si sui similes nacti sunt, de somno atque ebrietate contendunt, et illorum scholæ dignos sese exhibent discipulos, futuri mox præceptores æque docilibus ingeniis: sui fortasse dissimiles contemnunt, invident, criminantur, vixque sapientibus paucis tot inter stultos impune licet non desipere. Neque vero nunc primum inter malos bene agere capitale est. Quibus ita se habentibus, desine iam mirari, non dico quod hæc gens attollitur, illa deiicitur, et rursum illa concidit, hæc assurgit, quod, ut dixi, sola varietas morum facit: sed quod nos, quibus uniformitas mala est, in dies premimur ac nutamus, nostræque res in extremo positæ, non fundamento aliquo virtutis, sed pondere suo stant, magnique ruinam ædificii hiantibus rimis produnt. Mirum potius si quando causæ suos non pariant effectus; neque enim penitus fieri potest quin his ducibus, his militibus, his moribus et ruina iam proxima, et interim dum differtur, et mortale nobis bellum, pax extincta, virtus exul, atque hinc externis hinc propriis manibus discerpta respublica serva semper ac misera sit. Vale.

III. Kalendas Martias ex itinere.



FRANCISCI PETRARCÆ  
 DE REBUS FAMILIARIBUS  
 LIBER VICESIMUSTERTIUS.

---

EPISTOLA I.

FRANCISCUS PETRARCA AD IGNOTUM.

Adversus agmina militum, quæ Magnæ Societatis nomine Italiam  
 misere vastabant, humanam et cælestem opem implorat.

Loquor quia cogor : urget enim pietas ardentisque  
 stimulos anxio figit in pectore qui me tacere non sinunt.  
 Et scio me nequidquam loqui, neque Ovidiano relevor so-  
 latio, quod scilicet perdere verba leve est; imo enim, ni-  
 hil gravius homini silentium amanti. Loquor tamen, sed  
 coactus ut dixi. Et loquor vobis.... Quibus? Heu! nescio.  
 O libertatis et pudicitiae ingens ultor Brute, qui super-  
 bos foedi servitii auctores solio deiecisti, et impudicitiae  
 magistros usque ad inferos gladio vindice persecutus  
 es, utinam viveres; tibi loquerer. O gloriose Camille,  
 qui nostro sanguine despumantem Transalpinam rabiem  
 in ipsis adhuc fumantis patriæ cineribus extinxisti,  
 utinam viveres; tibi loquerer. O summe virorum Sci-  
 pio, qui Hannibalem septimum decimum annum iam  
 Italiae incumbentem hinc vi detractum in propria patria,



virtute ac fortuna concurrentibus, mirabiliter confregisti, utinam viveres; tibi loquerer. O Paule Æmili, qui reges Macedonum vetusto imperio elatos et adversus Italiam rebellantes vinctos ante currum in Capitolium egisti, et Romani iugum imperii ferre docuisti, utinam viveres; tibi loquerer. O Mari, ut compatriota tuus ait Cicero, rusticane vir sed vere vir, qui barbaros in Italiam irrumpentes ipsis eorum in finibus tanto impetu superasti, ut de cruentis fluminibus ab exercitu sitiente non plus aquæ quam sanguinis biberetur, qui-que mox ad aliam mundi plagam mira celeritate conversus, ita furorem Cimbricum oppressisti ut vix cadaveribus suis utrobique victa barbaries, vix agminibus captivorum victrix Roma sufficeret, utinam viveres; tibi loquerer. O Magne Pompei, qui infamem prædonum catervam Romanis classibus Italicisque litoribus infestam ac toto iam pelago sævientem brevissimo tempore domuisti, atque in vincula coniecisti, utinam viveres; tibi loquerer, et precarer ut sicut omnia maria infecta purgasti, ita nunc, non dico omnes terras, sed Italiam saltem tuam nova prædonum manu miserabiliter inquinatam solita virtute purgares. O Iuli Cæsar, qui incursus hostium non expectans, raptim superatis Alpibus, Rheno, Rhodano ac Garumna fluminibus impigre transmissis, incertum an fortunatior an fortior, victrici acie Germaniam, Gallias, Britanniam atque Hispanias peragrasti, utinam viveres; tibi loquerer. O Cæsar Auguste, qui Reges terræ et legationes populorum omnium ad genua procumbentes, atque, ut proprie dicam, ipsum orbem terrarum supplicem et affusum ex altissimo solio vidisti, et pace terra marique com-

posita, bellicum Iani templum felicissime conclusisti, utinam viveres; tibi loquerer. O insigne par hominum Vespasiane et Tite, digni alterutro et patre filius et filio pater, qui uno curru, quod nunquam antea visum erat, et Christi gloriosissimam ultionem, et triumphum clarissimum de Hierosolymis retulistis, utinam viveretis; vobis loquerer, et ut Christi iniurias iterum vindicaretis hortarer. O fortissime vir Traiane, qui iam senio frigescentis imperii membra multo spiritus fervore refovisti, ac præter spem iuvenescere coegisti, nunquam certe vel tam gelatum atque decrepitum imperium, vel tam necessarius fervor tuus, utinam viveres; tibi loquerer, et rogarem ut moribundæ patriæ opem ferres, nec ideo quod in Hispania natus esses, Italicæ oblivisceris originis. O bone Theodosi, qui parva hominum manu sed divino fultus auxilio, tibi militantibus elementis et coniurantibus tecum ventis, sagittas barbaricas ex immanibus pharetris adversus nos eductas, in ipsas frontes atque exterminium barbarorum miraculose et incredibiliter retorsisti, utinam viveres; tibi loquerer. Nunc quid agam? Et loqui oportet, et cui loquar non invenio. Effundam voces in nubila, si quis forsan amicior spiritus, et bonis favens e labiis meis eductas ad aliquam generosam aurem illas perferat ubi fructificent, ut cupio potius quam spero. Quid enim spei reliquum est? Quid agitur? Summe Iesu, ubi sunt oculi tui, quibus nos ab alto intuens, non modo claros sed invidiosos mundo feceras? Hanc tantam fortunæ vertiginem, hanc tam subitam fati vim, sine aliquibus aliis verbis quod moestum animum premit expediam. Vidisti equidem certe præsensque aderas quando patrum no-

strorum manus exigua nunc sub Arcton, nunc sub Austrum, nunc sub Orientis, nunc sub Occidentis solis extrema, stupentibus et attonitis gentibus ac regibus, victricia late signa circumtulit, hic avaritiæ frenum stringens, illic tumidam premens insolentiam : hic iracundiæ mitigans truces motus, illic sævæ libidini iugum ponens: postremo aliquid ubilibet semper agens, quo magnifici transitus gloriosa vestigia superessent, et orbis ipse perdomitus caput tamen vel veneraretur acceptum, vel dilatum silentio suspiraret. Quot maiorum nostrorum opera omnibus terris effulgent velut cœlo sparsa sidera? Quot mirifici actus? Quot exempla virtutum? Quantum nomen, quanta memoria gestarum rerum? Quot per orbem urbes? Quantæque coloniæ? Quot trophæa minacia horrifico marmore victis terris extantia: quis cuncta dinumeret, quæ mundus ipse, licet invitus, sentit indignansque recordatur? Quid nunc igitur rei est? Quid quæritur? Quid defleam? Quid accusem? En parva prædonum manus ex mille collecta fornicibus terrarum omnium dominam atque victricem Italiam pervagatur; et provinciarum omnium reginam sibi ante alias provincias depoposcit. Heu quisnam consulet pudori nostro, quando iam de salute cogitare serum est? Quis vultibus nostris velum dissimulationis aut ignorantiae prætendet, quando non est qui malis nostris auxilium ferat? Liceat saltem vel nescire quæ patimur, vel fœdissimas cicatrices nostrorum vulnerum non videre. Volebam te orare suppliciter, o vir ingens, quem nominare non audeo, ut nobis dexteram dares, quod et posse videbaris, et quam maxime tuum erat: sed, ut video, prorsus obsurduisti. Itaque postquam

nulli hominum loqui iuvat, ad te ultima et maxima spes mortalium preces verto. Si tibi, creator omnium, beneficiis tuis parum memoriter usi visi sumus, si supercilium altius forte quam decuit, tanto et tam præsenti divinitatis favore sustulimus, et contrario vis ulcisci, rebus faciem muta. Tua est enim fortuna, tuæ sunt sortes, tuæ successuum humanorum vices. Imperavimus insolenter, serviamus humiliter. Averte latronum iugum, si unquam latronum more pugnavimus. Si te offendimus et si tibi libertas nostra non placet, at saltem illorum cædes, sacrilegia, rapinæ, furta, adulteria, stupra displiceant: obsta tot malis, et te Dominum illis ostende, qui dixerunt in corde suo: *Non est Deus*, tuosque pater adiuva fortassis immeritos, sed de te sperantes, tuumque nomen cum lacrimis invocantes, et ingenue fatentes quod *non est alius qui pugnet pro nobis, nist tu Deus noster*.

Kalendis Septembris.

## EPISTOLA II.

FRANCISCUS PETRARCA CAROLO IV. IMP. AUG. S. P. D.

Neglectam Romani Imperii curam iterum exprobrat, et novas exhortationes eius caussa veteribus addit.

Lætum me fecit epistola tua, Cæsar. Quid ni autem, cum sola tui recordatio lætum facere soleat, dum subit animum me, nesciō quidem unde, nisi ex tua humanitate et fortuna mea, sive ut hoc ultimum sanius loquar, non certe solari virtute sub qua essem natus

(qua mihi adhuc puero famosus quidam prædixit astrologus futurum ut fere omnium principum aut illustrium, quos mea tulisset aut latura esset ætas, familiaritates eximias atque insignem benevolentiam habiturus essem), sed eius qui solem fecit et stellas omnipotentis Dei munere, maiestati Cæsareæ carum esse? Cuius rei argumentum habeo unum ex multis, quod e tam longinquo seu temporum seu locorum, tibi magnanime imperator usque adeo mei memoria recens est, ut prope ex æquo summus hominum humillimo vices amoris reddere dignum putes. Nostra ætate monstrum ingens, qua ut vides, quisque pro exigui gradus eminentia solet esse superbior, atque infra se positos gravi fastu vel fastidire vel premere. Quod ipse tacitus mecum librans, sentio quantū pretii apud me hæc dignatio tua sit. Nam si pro fortunæ fastigio, ut mos est, animi quoque fastidium assumpsisses, nec nosse me dignareris. Sed generosum pectus vereque Cæsareum nec inflat certe, nec contrahit, nec attollit fortuna, nec deiicit. Itaque tu me non tantum familiari notitia, sed dulcibus insuper dignaris epistolis, quæ res inter meos, si qui sunt aut erunt tituli, non extremum tenet aut tenebit locum. Si enim Virgilio, si Flacco gloriosum fuit Augusti Cæsaris et notitiam et convictum et epistolas promereri, cur ego illorum, etsi non ingenii successor, at tempore et opinione hominum fortasse aliqua, ab illius principis successore similia promeritum me fuisse non glorier? Nimirum et humanitatis et litterarum tuarum non minor mihi unquam illis duobus sui imperatoris est copia. Ut convictu superer non in te imperii altitudo, quam supra modum humanæ conditionis extantem benemeritis aut certe

tuum nomen amantibus attollendis facile soleas libenterque submittere, sed in me vel animi tarditas vel amor patriæ verior causa est. Ridebis forte mollitiem et cognosces quantum ad veram philosophiam mihi nunc etiam desit. Potui interdum, sed iam, fateor, non possum æquanimiter esse diu procul ab Italia, sive ea natalis soli sola dulcedo est, sive rerum æstimatio, nescio quam vera, sed constans et immobilis et a prima ætate pectori meo insita, nihil omnino terrarum sub cælo esse quod Italiæ comparari queat, seu naturæ seu hominum consideres ornamenta. Quod nisi sic mihi penitus persuasissem, facilius procul dubio fuisset, et tibi olim quem sensi quamvis immeriti præsentiam optare, et nudius tertius cognato tuo Francorum regi vere serenissimo mitissimoque regum omnium, qui non modo prece fervida, sed manu amica pene mihi iniecta, tenere me voluit abeuntem, denique litteris persecutus ardentibus, ad hoc per vicarios ac fideles suos ut suasu placido inflexum me sibi remitterent, postremo nihil omnino omisit; quibus nihil mihi mentitus, multa mentiri solitus, astrologus videretur. Nec eram nescius sine insolentiæ quadam nota negligi non posse desiderium tanti regis, ni me validior uncus obstringeret ille, quem dixi, patriæ amor, neve quid dissimulem eam animi sarcinam ævi flexus iam ingravescentis exaggeraret, ut non facile totus loco movear. Accedit opinio illa, cuius paulo supra memini, de Italiæ principatu, quæ una mihi animum fecit ut te sæpe hactenus verbis aggrederer, non tantum hortari ausus, sed arguere, quod sic ultimam facere videreris quam natura parens, me iudice, primam fecit. Et si pergis scripto etiam, ne non prædictum

quæri possis, te notatum posteris tradere sum ausurus. Quid enim agis, oro te, Cæsar? Quid moliris? Quid cunctaris? Unde autem nisi tuo de labore gloriam speras? Mirum! tanti animi vim, tanti acumen ingenii non dicam obtusum in te (absit ut id verear), sed situ nimio rubiginem contraxisse. Undecimus, nisi fallor, annus agitur ex quo primum moras tuas increpui, homo tunc incognitus tibi, sed nosci cupiens et amator imperii: et si libertatem meam tunc non tantum tulisti sed laudasti, certe iam senioribus et mihi plus libertatis, et tibi excusationis aliquanto est minus. Relege quæ tunc scripsi. Videbis quanto tibi nunc singula convenientius dici possint, eo quod et occasio ingens prætermittitur, et plus vitæ abiit, minus restat. Nonne vides fluxum temporis et prærapidam ætatis fugam? Non sentis quanto studio virtuti primum conscientiaque, dehinc gloriæ tuæ de posteritatis iudiciis vacandum sit? Non cogitas ubi abieris solioque descenderis, quod utique faciendum est, neque tibi reditus ullam spem, neque successoris tui virtutem, quod Traiano dixisse fertur anus illa miserabilis, pudori tuo posse consulere?

Cum semel occideris, et de te splendida Minos  
Fecerit arbitria,  
Non, Torquate, genus, non te facundia, non te  
Restituet pietas

inquit Flaccus. Non audis Virgilium :

Optima quæque dies miseris mortalibus ævi  
Prima fugit?

eundemque :

Stat sua cuique dies : breve et irreparabile tempus  
Omnibus est vitæ, sed famam extendere factis  
Hoc virtutis opus?

Non audis Flaccum ipsum:

Truditur dies die

Novæque pergunt interire Lunæ:

Tu secanda marmora

Locas sub ipsum funus; et sepulchri

Immemor struis domos?

Non audis Lucanum:

. . . . . veniet quæ misceat omnes

Hora duces: properate mori?

Et eundem:

. . . . . me nec oracula certum

Sed mors certa facit: pavidò fortique cadendum est?

Hoc satis est dixisse Iovem?

Non audis Statium:

Utere luce tua longamque indue famam?

Et eundem?

Immites scis nulla revolvere Parcas

Stamina?

Non audis Iuvenalem:

. . . . . festinat enim decurrere velox

Flosculus angustæ miseræque brevissima vitæ

Portio: dum bibimus, dum certa, unguenta, puellas

Poscimus, obrepit non intellecta senectus?

Hanc si forte longam tibi seramque pollicitus, ut multi solent, iacturam temporis levem ducis, an eundem ipsum non audis: olim, inquit,

. . . . . olim

Prodigio par est in nobilitate senectus?

Id si olim, quid hodie? Et si in nobilitate, quid in imperio senectus? Cum omnium mortalium sit brevis, tamen brevissima principum vita est, et interno cura-



rum praelio oppressa et externis insidiis circumventa. Itaque cum in cunctis segnis cunctatio foeda sit, tamen in imperatore foedissima est, cui et rerum plus et minus est temporis, atque, ut dici solet, via longior et brevior dies. Ecce nunc, Cæsar (sentio enim hinc quid ibi agitur: magnus quidem explorator amor est, et magnus excubitor), in consiliis vitam teris. Consilia vero nisi in actum prodeant, nudi sunt cogitatus, et inanes curæ. Cras incipiam, postridie movebor. Cur non quæso hodie? Ita ne semper lux ventura serenior præsensque nubilosior? Nempe vatum maximus, ut audisti, *optimam primam* dicit: prima autem præsens est, quando in præteritis præter memoriam nil habemus, neque impossilium consultatio ulla est: in futuris nihil præter augurium et spei fallacis illecebras; ut sint pares in reliquis hæc et sequens dies, quod saltem sit ista præsentior eoque certior negari nequit; et illa quamquam ventura utique nos an inventura sit dubium; hæc certe cum abierit: non redibit. Quid semper absentia quærimus? Præsentia complectamur, neu nobis inutiliter effluant enitamur. Id cum omnibus utile, tibi necessarium adeo, Cæsar, est, ut sine hoc quantalibet industria seu virtute rationarium imperii non absolves. Et cui, inquires, rationem imperii redditurus sum? Tibi, Cæsar, ipsi, quam non dubitem quin a te sæpe exigas. Parum dura tibi videtur exactio? Nulla quam sui ipsius increpatio acrior, nulla salubrior. Quin et huic ætati quæ te suspicit, et in te unum oculos defixit, et sequentibus sæculis, quorum et diuturniora erunt et liberiora iudicia, demum et imperatori illi æterno qui huic temporali imperio te præfecit, non ut solium, non ut sceptrum, non ut imperii nudum no-

men occupes, sed ut regnes, ut imperes, ut afflictis opem rebus feras. Quid te subtrahis, quid in crastinum prominens hodiernum prodigis? Nullus in hodierna necessitate crastino locus est. Fac tu hodie quod incumbit: cras si quid emergerit, vel tu facies, vel alius: non deerunt temporibus sui duces, et ut desint, nunquam alienæ ignaviæ reus fies. Tu ne tempori tuo desis cura. Porro cras istud quod suspensos tenet et inertes facit, quodque quasi venturum expectatur, iam præteriit: nullus enim, præter primum, dies, non diei alterius cras fuerit. Vis audire quid hic adolescens poeta quidam dicat?

Cras hoc fiet: idem cras fiet: quid? Quasi magnum  
Nempe diem donas? Sed cum lux altera venit,  
Iam cras hesternum consumpsimus: ecce aliud cras  
Egerit hos annos, et semper paulum erit ultra:  
Nam quamvis prope te, quamvis temone sub uno  
Vertentem sese, frustra sectabere canthum,  
Cum rota posterior curras, et in axe secundo.

Quid igitur? An ætate Persius inexperta et acerba publicam cœcitatem funditus introspectit, nostra id ætas maturior non videbit? Aperire oculos et figere animos oportet ne fallamur, et errore qui corrigi nequeat implicemur. Quid vero nunc ostiatim poetarum domos ambio, nisi ut quem forsitan mea vox auctoritatis inops non movisset, tantorum testimonio moveare? Nemo poetarum aut philosophorum fuit, qui non idem et diceret et sentiret: discordes et multi hic conveniunt. Quod si omnes taceant aut negent, certe, ut dici solet, ipsa res loquitur, et si dissimulare quisquam velit, sentiet vel invitus. Sic in foribus experientia est, seque vel con-

tendentibus veritas ingerit: proinde ut reliqua sperni possint, quæ quidem sperni tali ingenio tamque incorrupto iudicio non possunt, an in ea ipsa saltem, quam mihi dictabas epistola, non animadvertisti sextum imperii tui annum agi? Quid tum igitur? An sextum forsitan et quinquagesimum expectas? Augusto Cæsari dumtaxat id contigit, nescio an optandum, sed sperandum minime. Venisti, Cæsar, post exhortationes illas meas ad Italiam, cuius ego mihi particeps gloriæ visus eram, eo quod animosum quoque cornipedem calcar impellit. Venisti, inquam, atque ut tibi de cœlesti ope confisus repromiseram, invenisti aperta et prona omnia, quæ obstrusa et ardua videbantur. Intrasti Mediolanum. Inde Romam, in quibus geminum diadema sortitus, erectis in spem magnam populis atque urbibus, subito in Germaniam remeasti. Cur autem aut quis te error, seu quis horror perculit? An forte quorundam seditiosorum motiunculas timuisti? At hoc affixum animis esse debet, ut quisque navigaturus tempestatem cogitet. Nesciebas quod nullum sine fluctibus mare est, nullus sine ventis mons, nullum sine curis imperium? Sileo Scipiones ab exercitibus desertos suis militumque perfidiam nunc proditorum nunc, quando ita res tulit, propria etiam morte vincentes. Alexandrum taceo suorum seditiones et latentes dolos ac molimina comprimementem. Iucundius tuorum exempla lecturus sis. Iulius Cæsar unus a toto circumvallatus exercitu non modo non timuit, sed timeri etiam promptissimo animo atque indomita virtute promeruit, paucorumque supplicio uniusque legionis ignominia et saluti omnium consuluit et decori proprio. Quem imitatus Alexander princeps Romanus et ipse, sæpe no-

xios milites supplicio dedisse et tumultuantes legiones integras exauctorasse legitur, insigni fiducia et interdum memorando discrimine, ut aliquando frementibus ferroque minantibus diceret: « Deponite dextras contra » hostem erigendas, si fortes sitis : me enim ista non ter- » rent. Si enim unum hominem occideritis, non vobis dee- » rit respublica, non senatus, non populus Romanus, qui » me de vobis vindicet. » Augustus Cæsar tot petitis insidiis, vel iusta severitate, vel levi misericordia tandem omnibus finem dedit. Mitto alios ne occupatum animum longis historiis implicem. Ad te redeo tantis sæpe periculis non cum salute solum sed cum gloria ereptum. Quid vidisti, sive quid audisti, quod te talem virum, tali stirpe progenitum, tantis assuefactum rebus, tamque alto de culmine despectantem res humanas, e tranquilla Cæsareæ serenitatis arce deiiceret? Nihil magnum, nihil grave videri debet animo, qui subire humeris imperii molem pondusque non timuit. Rem omnium maximam transegisti, quo die nomen Imperatoris ac titulum suscepisti. Quid summis interritum parva perturbant? Sed forte respondeas, non terrore te hinc pulsum, sed amore illuc tractum: cur non enim et tibi licitum quod mihi, patriam amare? Non obluctor, Cæsar, immo vero suadeo ut patriam ames. At profecto sive a viro virtus, ut vult Cicero, sive a virtute vir dicitur, nil hac vere viro carius, nil amabilius esse potest, qua amissa, non modo quod habeat optimum amissurus sit, sed desiturus etiam esse quod fuerit. Licet igitur te nunc patria vellicet, invicta te virtus huc pertrahit, iubetque de officio tuo, hoc est de imperio cogitare. Si enim de minoribus loquens, nullo casu arbitratur, apud Ciceronem,

Lælius hoc constanti homini posse contingere ut ulla intermissio fiat officii, quid nos de supremo et maximo officiorum omnium arbitremur? Nihil omnino evenire potest, quod in te oblivionem excuset imperii: curæ aliæ te exornant, hæc perficit, verumque facit Imperatorem. Itaque huius et reliquarum non una ratio est. Cæteras forte differre possis vel abiicere: hæc, dum tui memineris, ossibus semper ac præcordiis hæreat oportet. Illic enim decus, hic debitum, cui deesse præter curam gloriæ, fidei quoque respectus vetet. Nam quod ais, idem tibi licitum quod mihi, non ita est: multa mihi licent quæ non tibi: sic et famulis multa meis licent, quæ mihi sunt vetita. Quantum crescit honor, tantum licentia decrescit, quantumque iis gradibus adscenderis, tantum illis descendisse te noveris. Scis, imperator, quid fundator imperii dixerit? *In maxima fortuna minima licentia est.* Quid quod patriam ipsam tuam nullo modo magis amaveris, nullo studio magis ornaveris quam nomen ipsius quam latissime divulgando? Si Alexander se intra fines Macedoniæ tenuisset, non tam notum Macedonum nomen esset. Quis putas magis amet uxorem, an qui omnium negligens diu noctuque in illius hæret amplexibus, an qui ut illam honeste ubertimque educet, nullam peregrinationem refugit, nullum renuit laborem? Est ubi magnus amor odium sit. Nunquam Romam magis amavit Africanus quam dum, illa relicta, adiit Carthaginem. Molles affectus et externi monitus coniugum natoremque ac vulgarium amicorum altis consiliis semper adversi sunt. Obserandæ aures Ulyxeum in morem, ut in portum gloriæ Sirenum inter scopulos evadamus. Quid quod hæc ipsa, quam tuam dicis, fuit quidem sed

iam non patria tua est, ex quo primum ad imperium pervenisti, aliamque nascendo atque aliam renascendo patriam es adeptus. Audisti ut Alexander idem Macedo, regno accepto, non Macedoniæ se sed mundi regem dici iussit, a quo ut multa præcipiti, sic unum hoc magno animo gestum non inficier. Idem ne tu olim feceris, patrii regni viduitas inhihebat, quod abitu tuo deseri videbatur; et si quid tibi humanitus accidisset, ad alienas manus perventurum. Hanc seu iustam seu iniustam excusationem propitia divinitate sublatam vides, quæ tibi et imperio expetitur votis infantem ex augusta tori consorte largita est. Habet iam Bohemia suum regem, tu Italiæ mundique rex, post tergum linquendi orbis iam securus, et patriam et solium tuum pete. Nam etsi secundum Apostolicam sententiam manentem hic non habeas civitatem, si qua tamen in terris patria est tua propria, Cæsarum domus, ac vera patria Roma est: quin et communis omnium est patria, rerum caput, orbis atque urbium regina, nobiliumque tam fertilis exemplorum, ut conspecta facile animos excitet detergatque rubiginem. Quas vero nunc moræ causas aucupabere, quibusve deinceps te compedibus tentum dices? Nescio quid Romano Pontifici pollicitus, iureiurando interposito, quasi muro valido seu monte invio, Romanæ urbis aditu prohiberis. Sic et summo principi suum imperium, et summo imperio suus princeps, quæque iacturarum omnium maxima est, tua tibi libertas eripitur. Sed iurasti: quod utinam non fecisses! Sed fecisti. Dispensatione opus est. Quid in plano hæsitās? Quem unus iunxit, sæpe idem, sæpe alius solvit. Quid refert unde redeat libertas, redeat modo? Qui impedivit expediet: si is no-

lit, veniet qui volet: quomodo autem, nihil ad rem, modo ut velit, seu tua virtus amorem, seu stuporem gloria, seu timorem paritura felicitas. Nemo qui iustum ac famosum et felicem principem non vel amet mireturque, vel metuat. Incipe. Vetus est verbum: multis itineribus Romam peti. Si torpes, nullus non satis tenax laqueus est: si te moveas, vanæ circum exciderint tendingulae, tuque non tantum liber, sed, ut par est, mundi dominus atque hominum rector eruperis, neque soli tibi sed humano generi quæsieris libertatem. Ægrotantem aprum ipse morbus alligat, validum frémentemque cohibere magnus est labor. Excute torporem, cernes illico cuncta facilia: alioquin torpor ipse pro vinculis erit. Nemo leonem araneorum telis, nemo visco aquilam captam vidit. Quid tuæ nunc aquilæ morantur, quid tui mussitant leones? Facile in servitium trahitur qui libertate se indignum æstimat. At qui se liberum novit, non ante libertate privabitur quam vita, immo ne tum quidem: vita enim spoliari naturæ est, libertate socordiæ. Nunc vero quænam ista superbia est, principem Romanum publicæ libertatis auctorem libertate privare, ut cuius esse debent omnia, ipse non sit suus? Quomodo enim liber sui que dominus est, cui sit interdictum ire quo libeat, minus dico, immo quidem cui suæ domus limen obstrusum sit, atque ipse, ut proprie dicam, quam longissime relegatus? Intelligis, Cæsar, non quæ dixi tantum, sed quæ dicere volui: multa enim occursant, nisi verear ne supervacua tibi sit, mihi etiam periculosa narratio. Sat odii iampridem pro veritate contraxi: studio inimicos quærere non simplex amentia est. Itaque satis hodie dixerim: quam effica-

citer tu videris. Mihi, si ultra nequeam, satis est, et ætati meæ et posteritati insuper fideli officio functum esse, quod et sæpe olim fecisse videor, et si quid deerat, hæc dies implevit. Nec dum tamen curam illam attigi quæ animum tuum semper gravi pioque negotio urgere, sæpe oculos lacrimis implere debuerat. Nonne enim vigilantī sopitoque tibi occurrit Hierusalem vidua, inops, captiva, serva, misera quæ nullum iam nisi ex te poscit ac sperat auxilium? Inter hæc tu somnum oculis, aut palpebris dormitationem, aut requiem temporibus tuis præbes. Expergiscere, imperator: hora est, immo vero iam transiit: accelera, et virtuti calcar ingemina ut segnitiam velocitate compenses. Surge, inquam, surge iam Imperator, surge, et clamorem urbis atque orbis te vocantis exaudi; confrica oculos et circumspice, Imperator; videbis multa quæ corrigi velint, et intelliges non tibi hoc nomen impositum ut quiescas. Mihi quidem in epistolis omnibus ad te missis stilus idem ac materia una est, exhortatio scilicet increpatioque, querimoniæ et verborum stimuli. Aude, oro, aliquid quo mihi non semper exorandus atque urgendus, sed coerendus aliquando videare, et interdum fræno, non semper calcaribus eguisse. Aristotelis disciplina est quantum mihi videtur non inefficax, ut qui in altero extremorum peccare solitus fuerit, sese in contrarium trahat, quod tortuosa lignorum dirigentes faciunt, ut verbo utar ipsius: sic enim ad medium et ad rectum facilius pervenitur. Hactenus quod mens tulit. Nunc restabat ut epistolæ tuæ satisfacerem: sed quoniam tu illud vis secretum, ego autem hæc nota omnibus velim, dividam res diversas, et quod ex me flagitas seorsum leges.



Vale, Cæsar invictissime, et sæpe, oro, cogita quid viro debitum, quid principi.

Mediolani, XII. Kalendas Aprilis.

---

### EPISTOLA III.

FRANCISCUS PETRARCA CAROLO IV IMP. AUG. S. P. D.

Milem amicum suum Cæsari commendat.

Tacitus transire decreveram: sed cogit ut loquar non minus tui reverentia quam eius amor pro quo loquor. Miles hic tuus et amicus meus olim meis in literis tibi fiducialiter commendatus fuit, non quia vel tu, vel ille, vel ego mihi sim ignotus, sed quod sentirem apud maiestatem tuam humilitati meæ gratiam non deesse, meum rebar non tacere quod scirem ad tuum decus pertinere. Dixi, Cæsar, et repeto: plurimum huic debes, nec tu modo sed imperium. Causas sileo: notæ sunt tibi sollicitudo, fides et industria. De nullo hominum sperat nisi de te hic talis vir ita de te meritus, qui inter multa pericula cruciabili cum labore quotidie it et redit, nulla re auctior nisi ætate in dies senior. Cur non et in dies ditior? Da, obsecro, libertati fideique meæ veniam: nunquam, nisi fides multa esset, tanta suppetet libertas. Tuum est, Cæsar, ut calcare improbos, sic bonos attollere. Fac ut hic vir fidus ac nobilis, qui iuventam suam pro tua gloria tot laboribus atterit, te duce teque auspice, possit in senectute quiescere.

---

## EPISTOLA IV.

FRANCISCUS PETRARCA BONINCONTRO S. P. D.

Gratulatur a servitute in libertatem restitutum.

Iam sero licet, optime vir, vivere incipis: gaude: satis est enim, modo incipias antequam desinas. Quidam certe, ut Annæus ait, ante desierunt quam inciperent. Iam classico non obstrepente nec stringentibus curis, integros et tranquillos et placidos somnos carpis: iam lætos dies securasque noctes agis: iam in portu navigas et post terga respiciens, turbidas et ancipites procellas cernis intrepidus. Præsenti statui tuo gratulor, præteritum miserabar, etsi forte vulgo felicior videretur. Potuisti in tempestatibus et in bello mori. Ecce iam in pace morieris, in pace vives. Occultum divinæ providentiæ munus agnoscito. Longæ consuetudinis visco explicitum, ac fortassis ut est animus hominum sæpe rerum nescius et periculis suis favens, vel invictum te ventus optabilis patriæ reddidit, ut ad æternam illam patriam, unde nunc exulamus, liberior sit regressus. O quanto tibi melius accidit quam sperabas! Et pelagi monstra, et sirenum cantus surda tutus aure transiisti, et salva puppi Scyllam et Charybdim ac multa cum laude curiarum fluctus et scopulos evasisti. Iam in patria tua degis. Iam ad patriam pergis: iam denique tuus es. O invidiosum, o beatum te, si quid fueris, quidve sis noveris!

Mediolani, VI. Kalendas Februarii.

## EPISTOLA V.

FRANCISCUS PETRARCA BONINCONTRO S. P. D.

Magni senectutem faciendam: nil mortem habere quod terreat.

Audio te in senium valde descendere. Quid loquor? immo equidem ascendere. Alta est enim et spectabilis et, quod omnes consentiunt, venerabilis senectus. Vis altitudinem veram nosse? Adolescentiæ lubricum iter ac libidinum et irarum nebulas supergressa, cœloque propinquior quæcumque suspicere reliqua ætas solet, iam sub pedibus habet ac despicit. Curvet illa humeros licet, generosos certe animos attollit, et quamquam qui nihil præter corpus cogitant, oculorum fallaci iudicio curvam ætatem ac depressam putent, vere sublimis et recta est. Itaque senuisse doleant qui spes omnes et felicitatis suæ summam in corpore posuerunt. Tu ad eam ætatem pervenisse gaude, cui maior sit animi cura quam corporis. Quod enim iuvenis, quasi in adversum remigans, summo nisu et magnis viribus faciebas, ecce ut secundo ætatis alveo navigans, et quibus oppugnabaris adiutus, nullo iam labore facis. Insisterem sane curiosius huic loco, ut omnes qui videntur angores ac molestias senectutis excuterem, nec graviter ferrem tibi hunc calamum et hanc unam dieculam præstare, qui mihi plurimas præstitisti, nisi quia et senectus satis apud Ciceronem a Catone non excusata tantum sed laudata est, et ego te fortissime senescentem nullis hortatibus induci posse arbitror ut fortiore animo senescas; supra summum enim nihil est quo sit locus ascensui.

His ergo sepositis, quæ sequuntur exequor. Quanto cum gaudio me illam epistolæ tuæ partem aspexisse aestimas, ubi ais, assidue mortem intrepidum expectare? Oh! docto viro, oh! vere te dignum verbum! Mori timeant qui vivere nescierunt. Tu qui sic vixisti, ut non inutiliter natus sis, non tibi, non patriæ, non amicis, cur quæso mortem timeas, quæ tibi quid aliud quam defessum corpusculum, et cum illo multum laboris ac tædii ablatura sit, animæ nil prorsus nocitura vel nomini? Mors quidem ut malis omnibus suppliciorum introitus, voluptatum exitus, sic bonis, quorum ego te númeris fidenter ascripserim, laborum finis et vitæ melioris initium est. *¶* securus igitur, ut facis, nihil trepidaveris. Senectus *se* mors liberatrices sunt humani generis: animorum morbos, qui innumerabiles et pene incredibiles sunt, prima mitigat, secunda convellit. Prima a malis atque laboribus abstrahit. Secunda veris bonis et quieti nos inserit sempiternæ. Quod de morte præsertim, quam a multis infamatam video, forsitan dicere non auderem, nisi Plotinus ille Platoniorum princeps, ut sileam cæteros, et secuti eum aliquot ex ducibus nostris, nominatim Cyprianus et Augustinus, id dicerent, misericordiam scilicet Dei esse nos fecisse mortales: et, ut Platonis utar verbis, misericordem patrem vincula nobis fecisse mortalia. Bona ergo senectus, quæ iam iuxta, iam tecum est; et mors melior quam expectas. Ut enim *mors peccatorum pessima*, quod Psalmista ait (eorum intelligo quos peccasse non pœnitet sed delectat, ne si prærupte nimis acceptum sit, omnes homines peccatorum appellatio apprehendat), sic optima mors iustorum. Hæc haud dubie iam propinquat. Nam cum nulla ætas de vitæ

longitudine certa sit, hæc de vicinitate mortis incerta esse non potest. Bonum ingens, sed ignotum vulgo, tibi nunc obviam venit: imple feliciter tuum nomen, et bonum contra non modo intrepidus sed exultans vade, repertumque non mœstus, ut magna pars mortalium quibus mori, hoc est naturæ obsequi, pœna est, sed lætus ut pauci, quasi magnum aliquod Dei munus amplectere, teque de multis vitæ tempestatibus votivis auris in portum non in scopulum vehi credas, neque quod, etsi malum esset, declinari nequit exhorreas. Ibi-mus quidem omnes: ibimus. Ire omnibus est necesse: sed ibimus impavidi. Pavere enim non natura rei sed opinio est animi, non communis acerbitas sed imbecillitas singulorum: alioquin omnes pavidi morerentur. Nec incomitati ibimus: e cunctis terris ac sæculis ante, retro, circum innumerabilis turba est, et qui nati sunt et qui nascentur diversis gradibus unum finem petunt. Ab egressu materni uteri omnes ad hoc iter destinati sumus. Hos ipsos vel ætate tumidos, vel regno, qui conditionis obliti immortalitatis spem ventosis erroribus conceperunt, vel sequi oportet, vel præcedere, eoque mœstius quo et radices hic altius egerunt, et illic culti provisique minus est. Quamobrem cum omnium vitæ finis densa nube obsitus, cumque omnibus certa necessitas, nulli præterea certi exploratique quidquam sit, sic instituendus est animus, ut hoc ipso die tranquillius expectet, et hæc ipsa hora quidquid omnium annorum series minatur. Nam quid, oro te, refert hodie ne an cras, an vero nunc fiat, an tardiuscule quod utique cito fieri oportet, usque adeo quod impossibile sit differri? Hæc subterfugia et has morulas humana nequidquam

captat ignavia, quæ vivendi avida vixisse contemnit: ingratorum more, qui quod importune ambiunt, fastidiunt consecuti. Sic est: longitudo vitæ concupiscitur, etsi nihil in hac brevitate longum sit. Esto autem: utcumque contigerit exoptata vivacitas, postquam punctus ille novissimus ingruit, et solutura longævum vinculum manus mortis, quæro quid habet amplius qui centum vixit annos, quam qui ab ubere ad sepulcrum rapitur: quandoquidem et utrique finis adest, tempus utrumque præteriit? Audivimus sæpe morientes senes dicere videri sibi vix unum diem integrum vixisse: profecto inter brevissimum hibernum diem, ac longissimum Nestoreæ vitæ tempus tractu aliquid, exitu nihil intersit, ubi ad metam et utriusque, ut sic dicam, ad vesperam ventum est. Atqui ita esse ut dixi, vitæque spem, quam rem ipsam pluris fieri, facile de stultorum votis lamentisque colligitur, Sapientium vero nec iniustæ querimoniarum nec inania vota sunt, ut quibus persuasum sit felicem fieri non vitæ spatio sed merito, non fortunæ præsidio sed virtutis. Quæ cum ita sint ad summam sic habeto, nil me lætius auditurum quam hunc talem animi tui statum. Quid enim si opibus immensis auctum an obsessum et oppressum dicam? Quid si factum Italiæ Regem scirem? Quam breve gaudium, quam caducum? Regna, opes, et quidquid omnino fortuna tribuit, novit eripere. Fingatur fortuna liberalior, quodque per rarum est, usque ad exitum amica: figatur rota illa volubilis. Cuiuspiam inauditi favoris obicibus, morte saltem, cuius nulla talis liberalitas fingi potest, relinquenda imperia, deponendæ divitiæ, et nudis unde nudi venimus redeundum. In hunc vero tuum animum nihil iuris

habet fortuna nec mors. Virtus quidem ipsa hic te in finem et post finem comitabitur, teque in coelum, unde sibi origo est, virtutum alis attollet. Ego autem, magnanime vir, ut vicissim gaudeas, magno studio talem quoque animum nitor induere, et prope iam videor induisse. Vivo interim et valeo, si qua valetudo integra, si qua vita mortalibus vera est. Certe si cum legifero graiorum gloriari ausim, et ipse quotidie discens aliquid senesco, et minus in dies frustra formidatam inevitabilem illam horam metuo, paratus te in senium et in mortem sequi, vel, quia moriendi nullus est ordo, si ex alto datum est, ad mortem, nihil ipse quoque, nisi fallor metuens aut hæsitans, anteire. Cæterum dum hic sumus, utere me, precor, ut re tua, et si quid forsitan ex me cupis, iubendi tuus labor, parendi delectatio mea sit. Vale memor nostri.

Mediolani, VII. Kalendas Martias.

## EPISTOLA VI.

FRANCISCUS PETRARCA IOHANNI EPISCOPO OLMUTIENSI S. P. D.

Immeritas sibi laudes respuit: eique inscriptum mittit  
Bucolicum carmen.

Unde hoc mihi ut dominus ac præceptor meus me magistrum et dominum suum vocet, nisi quia magnus amor sui obliviosus nihil meminit nisi quem diligit, illum sibi qualem vult fingit, illum attollere nititur; id si nequeat, ipse descendit, denique modis omnibus illum sibi æquare contendit? Tibi uni, nisi tuos e pulvere erutos supra verticem tuum loces, nihil est actum. Ego

vero quo me altius extuleris humilior fiam, neque me unquam tanti viri favor meæ conditionis immemorem faciet. Olim te in dominum prælegi: magistrum te non mea fecit lectio, sed ingenii tui vigor et industria. Deinceps igitur quemcumque me facito: rem tuam in alto, vel in imo ponere tuum fuerit. Meum est nosse me ipsum, et res meas, neque cuiquam facile de me ipso plusquam mihi credere, eoque minus fidei habere meis laudibus quo plus me laudator amaverit. Gratiam tamen tibi tam pii affectus, tamque urbanæ dignationis habeo, teque felicem tali animo, me tali iudicio fortunatum reor. Multa nunc cogito, sed occupatio ingens: tempus breve est. Et præterea multis sæpe et magnis ad Cæsarem epistolis abunde oculos tuos occupaturus videor, ac linguam, quæ illas, ut auguror, sacris aurbus invectura est. Huic calamo ardenti et plurima sategenti, si paulo liberius fræna momorderit, ut ignoscas quæso. Accedit et Bucolicum carmen quod integrum ante te nulli permiseram habere, videre autem multis, cuius expositionem, vel potius expositorem, ut simul habeas velim, quod non prius sperare incipiam, quam Cæsarem nostrum meis tot mundique clamoribus expectectum audiero. Reliqua ex eo, qui has tibi litterulas dabit, percontabere; omnium atque in primis mearum rerum gnarus ad te venit. De quo nihil aliud: nam nosti omnia, nisi quod inter præcones tui nominis, quos multos habes, non facile cuiusque altior tuba est. Vale feliciter, nostrum decus.

Mediolani, XII. Kalendas Aprilis.

---



## EPISTOLA VII.

FRANCISCUS PETRARCA IOHANNI EPISCOPO OLMUTIENSI S. P. D.

Commendat generosum adolescentem ut gratiam Cæsaris  
illi conciliet.

Quod ex meis multis ad te litteris intelligere potuisti, vulgatus hic adeo erga me tuus est amor, ut omnes quicumque favoribus tuis egent, meo itidem egere se existiment interventu. In præsens generosum hunc et sua mihi virtute carissimum ardentis ingenii iuvenem agilisque facundiæ, qui missus a patruo ad Cæsareos pedes venit, tibi et per te principi commendatum cupio in iis quæ iuste optaverit. Cæsar quidem amare, ni fallor, totam prosapiam illam solet; tu bonorum omnium adiutor paterque et susceptor semper fuisti, et hic nil magis quam tuorum unus esse ac dici expetit. Non possunt homines creando similes Deo fieri, sed amando, adiuvando, sublevando, sustentando, miserendo, promovendo. Præclare Cicero *homines, inquit, ad deos nulla re propius accedunt quam salutem hominibus dando*. Quis vero mortalium propior Deo esse quam summus hominum Cæsar debet? Nempe qui humanæ naturæ verticem tenet, consequens est ut proximus sit divinæ. Te sane proximior nullus est Cæsari: hic autem, pro quo rogo, vir industrius est, quique ope facili possit ascendere, et cui, si fortuna adsit, natura non defuit, iuvenis tamen adhuc, in quo nondum est quod futurum est. Sed quid loquor, aut cui loquor? Illico ut hominem videris, agnoveris, et an me amor fallat intelliges. Vale.

---

## EPISTOLA VIII.

FRANCISCUS PETRARCA CAROLO IV IMP. AUG. S. P. D.

Maximas pro cratere aureo gratias agit, seque exacta  
æstate eum invisurum promittit.

Suaviores multo quam pro utriusque nostrum fortuna litteras tuas, Cæsar, aliquot mensibus postquam datæ erant ad me noveris pervenisse: simulque cratera pretiosissimum, quem mihi *auro solidum atque asperum signis*, ut Virgilii verbis utar, non meæ quidem sed tuæ sortis munus eximium destinasti. Oh! non hominum modo sed rerum omnium sors stupenda! Vasculum insigne materia, insigne artificis ingenio, sed super omnia ore Cæsareo consecratum, a tuis in meos translatus usus, quamvis ego illo quidem non tam utar hoc communi usu, quam libabo, dicerem, ad aras, si nobis qui veteribus mos esset: nunc vero mensis lautioribus rarum ad spectaculum adhibito dies festos exornabo, habebo illum in deliciis, ostendam mirantibus amicis et gaudentibus; nec minus æque auream epistolam tuam, quam ad tuæ humanitatis meæque licet immeritæ gloriæ certam fidem, dum vita comitabitur asservabo, quotiensque quam tu bonus ego felix sim probare voluero, ad iudicium illa vocabitur: denique gemino semper tali munere gloriabor, pro quo grates agere tentarem, si aut mihi sat virium ad expromendum tam vehementes animi conceptus, aut tibi ad tuorum affectus intuendum verbis opus esset. Quid vero nunc ad litteras ipsas dicam? Tu qui regibus iubes, qui gentibus imperas, tu me rogas, Cæsar? Ego autem tanto magis precibus moveor

quam praeceptis, quanto maior tua est virtus quam imperium. Sed quid fiet? Hinc animi promptitudo, hic rerum perplexitas multa est. Huccine enim quaeso tot mearum epistolarum clamor irritus pervenit, ut vocatus totiens, tamdiu, tamque anxie, tamque a multis expectatus, ad extremum te vocantem ad te voces, quodque in litteris profiteri tua dignata clementia est, desideres, expectes? Quid hic, inquam, fiet Cæsar? Tu me in Germaniam, ego in Italiam te voco. Tu auctoritate me superas, ego te causa. Tu me ad delectationem honestam, non inficior, iucundamque, ego te ad virtutem atque officium necessarium ac debitum usque adeo, ut ob hoc unum in lucem editus videare: cuius executio te felicem cœlo, clarum posteris transmissura sit. Parere tamen est animus, et causa victor, tuo imperio vinci velim. Sed multa obstant. Primum æstas sic naturæ meæ hostis, ut hac temporis parte non vivere sed languere quodammodo videar ac torqueri, quæ si molesta mihi semper fuit, quid nunc putas quando minus æstum forte metuam, sed laborem magis? Nunquam tam iuvenis quidem fui ut nescirem me senescere; sciebam vero nec sentiebam: quin hactenus, ceu qui navi vectus dormiens secundo alveo descendit, nil sentiens procedebam. Ecce iam sensim, Cæsar, incipio ætatem sentire, fragiliorque, et in dies tardior fieri. Accedit quod, etsi tu omnium maior, etsi tuus ille penes quem iamdudum ago, non modo licentiam daturus videatur, sed ut animum eius novi, ipse quoque venturus si tu iubeas, mihi tamen, dum sub umbra eius sum, licentia opus est. Verum hoc non magni facio, quia, ut dixi, nihil ille, ni fallor, negaturus domino suo sit. Quid de libellis autem

meis faciemus, quorum mihi, etsi non nimium, at pro ingenii ac doctrinæ inopia satis est, quibus etsi forte onerer potius quam orner, longa tamen consuetudine sic affectus sum, ut sine illis esse nesciam? His transvehendis, ut vides, Cæsar, non Alpium sola obstat asperitas et longissimi labor itineris, sed prædonum metus, et viarum mille pericula, quorum æstimatio sæpe quidem ad illud sapientis hæbreorum flectere animum me cogit, ubi *cunctas res difficiles* prægnanti brevitate pronuntiat. Sic est enim, et sic esse qui dubitat, vivat modo, et ante senium intelliget: nam profecto si senuit intellexit: alioquin, non senuit, mihi crede, sed marcuit, atque oculis clausis iter longum egit. Dicam tamen inter tot difficilia ac perplexa quid cogitem. Si cedente æstate, et superioris mei fidelis tui consensus, et viæ comes adfuerint, venire, quantamque tibi placitum moram trahere, et librorum et sodalium et patriæ absentiam sola Cæsarei vultus optata multum mihi præsentia consolari. Vive feliciter et vale, Cæsar, nostri memor.

Patavii, XV. Kalendas Augusti.

## EPISTOLA IX.

FRANCISCUS PETRARCA CAROLO IV IMP. AUG. S. P. D.

Se accinctum nuntiat itineri eius visendi gratia suscipiendo.

Vicisti, Cæsar, et longæ viæ duritiem et senescentis animi segnitiem fregit humanitas tua. Expectabam, differebam, dicebamque tacitus mecum: præcepti sui promissique mei forsā obliviscetur: certe interim quie-

scam, et naturæ tantisper meæ et ætati et lassitudini morem geram. Fessus enim rerum fessusque animi sum, Cæsar, fessus omnium, fessusque negotiorum, fessus ad extremum mei, utque afflictus ille senex ait: *factus sum mihi metipsi gravis*. Et ut verissime dixerim, ipse sum pondus meum. Sperabam, tot grandibus ac profundis curis ex toto orbe quotidie in tuum pectus ceu fluminibus undique in altissimum quoddam mare fluentibus, exigui nominis mei facile opprimi posse memoriam. Mihi vero, præter imperium tuum, cui omnia debeo, nil prorsus antiquius est quiete, quam cum ubique semper anxie a prima ætate quæsierim, nusquam reperio: quodque est gravius, nunquam spero, donec illam in huius vitæ tempestatibus quæram, quam tamen ipsam reperturum me illico, ut in sua sede quæri cœperit, non diffido: sed illam ibi quærere quæ in alto habitat, animæ vagæ atque in diversa distractæ, insuper et ponderibus suis pressæ et in terram pronæ subdifficile. Nitor sane, et sæpe sub hac spe verbis Davidicis me cohortor: *committere anima mea in requiem tuam, quia Dominus benefecit tibi*, nec viribus fisus meis, circumspiciensque auxilium externum, et cum eodem illo rege suspirans dico: *quis dabit mihi pennas sicut columbæ, et volabo et requiescam?* Sed interea laboriosam hanc requiem qua datur amplector, illam alteram cogitans ac suspirans. Itaque tibi, cui ut vultum meum sic animum notum velim, meum crimen ingenue fateor: etsi nihil sit quod libentius videam quam te, præsertim si cœlitus datum sit, ut in tua sede te videam, nemo cui devotius paream quam tibi, præsertim si non in extremis terræ, sed expectantis te Italiæ claustris adesse me

iubeas, tamen interdum singula versantem atque omnia librantem in animo habuisse ut meo silentio et tua oblivione te fallerem. Oh! quid dixi? Oh! quem fallerem? Meum atque universi dominum! Etsi utilis fallacia videbatur ignoranti cui usui tibi futurus sim, et ut dixi, libentissime quiescenti. Verum id, ut video, frustra est: nimis enim, ut acuti ingenii maturique consilii, sic tenacis quoque memoriæ es, Cæsar, in hoc, ut in multis, primum illum Cæsarem secutus, ad quem Cicero loquens memoriam eius implorat, qua valere illum plurimum dicit, ut qui nil soleat nisi iniurias oblivisci. Quæ cum ita sint, non est amplius dissimulandi locus; non possum tertio me vocantem Romanum principem non audire. Satis superque non insolentiæ, Deum testor, sed inertiae fuerit, non statim primo iussui paruisse. Ecce me iterum, Cæsar, vocas: venio: teque utinam inveniam paratum visere non semel, aut iterum, sed sine intermissione diebus ac noctibus te vocantes. Vale, Cæsar, et gloriæ et Italiæ tuæ memor et imperii.

Mediolani, XII. Kalendas Aprilis.

## EPISTOLA X.

FRANCISCUS PETRARCA IOHANNI EPISCOPO OLMUTIENSI S. P. D.

Sua imminuens, eius merita extollit, et de proximo suo  
in Germaniam itinere certiores eum facit.

Mirus es, mi domine, mirus es valde: nam quid, oro, mirabilius quam in hac tua excellentia rerum omnium tam singularis tamque sublimis humilitas? In omni sermone tuo modis omnibus te deprimis, quem natura,

quem fortuna, quem naturæ fortunæque dominus Christus attollit, quem summus hominum Cæsar amat, quem mirantur procures, populi venerantur, Romanum colit imperium, et quorum primo sapientium an eloquentium choris æquet an præferat in dubio est. Contra autem me vix dum viciniæ notum meæ, non meis laudibus obrutum, in lucem rapis et fando tollis ad sidera. Quid vis? Novi quod in animis audientium omnipotens est disertus. Ipsi in rebus ubi veritas regnat nullum ius habet oratio. Ornare me facundiæ tuæ floribus potes, mutare non potes: non si me Cicero ipse laudaverit, non si Demosthenes, non si Maro. Etsi præstringere enim possint aliena iudicia, an et mihi oculos eruent ut me ipse non videam? Tuum ergo est, quod olim scripsisse tibi videor, rem tuam quantivis pretii facere. Meum est menosse, de me nulli credere, et præsertim cui sim carus ut tibi. Humi fixus talibus auris non facile quator, et si quator, non convellor; parvitatique meæ conscius tantum fidei nullis habeo quantum sine odio et sine invidia vitam meam famamque carpentibus; et ad summam nisi te plane nossem, aut si quæ dicuntur abs te ab alio dicerentur, illudi crederem. Sed absit ut de tanto viro tam mihi propitio, tam spectatæ fidei, tam notæ virtutis, quidquam suspicer, nisi rectum, candidum, sincerum. Credo ædepol te loqui quod in animo tuo est: sed in animo tuo esse quod in me non est. Ego quidem in reliquis tui mirator acuminis, huic uni gratulor errori tuo, quem non defectus ingenii, sed amor, pietas, urbanitas radices nobilissimæ peperere. Sed ut desinam, ecce venio, quando sic penitus Cæsari placet et tibi: et venio non, quod ais, ut doceam, sed ut discam,

tuisque doctrinis, et tuo proficiam ab exemplo. Siquidem Plato, et Aristoteles, et Xenophon, et tota illa philosophorum vetus ac nobilis familia non plus creditur Socraticis disciplinis profecisse quam moribus. Vivacius in anima est quod per oculos, quam quod per aures introit. Moræ autem meæ tempus moderari vocantium erit arbitrii. Auguror sane Imperatorem nostrum cito mihi valedicturum, si cogitare cœperit quantum mihi deinceps expediat de me ipso deque altera vita cogitantem ad Imperatoris ætherei stipendium me transferre. Ac ne forte tarditatem stupeas, morem nosti meum; non tu hirundinem cœlo volantem, non cervum in montibus salientem, sed reptantem cum labore testudinem cogitabis.

Mediolani, XII. Kalendas Aprilis.

---

## EPISTOLA XI.

FRANCISCUS PETRARCA IOHANNI PERGAMENSI CAUSIDICO S. P. D.

Nefas esse in Iudæa equestrem dignitatem  
aureis calcaribus ostentare.

Malo consilium quam satyram meam legas. Hoc enim amore ingenuo plenum est: illa, ut sunt mores animique hominum, odio non vacat. Profecto autem quod non fieri consulo, si factum erit arguam, quod ne accidat, iam hinc mihi tibi que providendum est. Magis quidem cupio millies te laudatum quam reprehensum semel, idemque te optare non sum dubius: solet enim ut gloria, sic et gloriæ cupiditas virtutem sequi. Ad hanc



ergo tendentibus vigili studio opus est per singulos vitæ passus, necubi animus labatur aut deviet. Audio ego te Hierosolymam proficisci velle, sepulchrumque Dominicum invisere: audio, inquam, et probo, et laudo, et qui valde te amabam validius amare hoc tam pio proposito tuo cogor. Nam quid homini pietate prius? Quid antiquius? Aut quæ pietas iustior, quam ut ei qui pro te gratis sanguinem fudit, animam posuit, vitam dedit utcumque tanti amoris vicem referas? Et si maior occasio non adsit, at loca saltem ubi ille te amando se neglexit, memori fletu et piis lacrimis riges? Sane quod dehinc fama loquitur non laudo: decrevisse te scilicet illic aurea quæ feruntur calcaria et militiæ insignia titulumque suscipere. Inolevit fateor hic mos unde ortus nescio. Apud poetam enim utique ferratæ calcis est mentio: auratæ vero, quod meminerim, nusquam. Sed esto: vera viri virtus non in animo sed in habitu sit: neque in gladiis, sed in calcaribus sint vires, eaque nisi rutilantia fuerint, non possit esse vir fortis; quod, ut puto, non tam scriptis authenticis, quam inani et, ni fallor, brevi consuetudine cautum est. Certe si ad militiam hanc ipsam, de qua loquor, quando ita fert usus et opinio, te nunc genus, ætas, forma sollicitant, non miror. Illud hortor ante actum cogites, an idcirco deceat, ut ubi creator et Dominus tuus humilitate ineffabili ac stupenda pro tuis, tuique generis peccatis coronam spineam gessit, crucem subiit, mortem tulit, illic tu stimulis auratis, et nitido conspiciare cornipede: atque ubi frons illa sanctissima, cuius nutu cœli volvuntur, venti silent, maria conquiescunt; cuius signum felices Angeli expectant, infelices tremunt, fuso

sanguine rubuit, illic calces tuæ fulvo radient metallo. Cæterum tu ut libet. Ego ne amico consilio res egeret præstiti. Sic ne exemplo careat efficiam. Godfredus dux virque adeo clarus, ut per ora hominum et per aulas fere omnium Galliarum inter trium sectarum ternos, ut perhibent, excellentes, ipse quidem scriptus et pictus Christianorum tertium teneat locum, terram sanctam adiit, expugnavit, domuit, et ad cultum veræ fidei reduxit; multoque illi felicius successit hæreditatem nostram de manu fortissimi hostis eripere, quam posteris suis eandem ab ignavissimis custodire. Sed hæc transeo. Neque enim nova mihi, neque omnino nostrarum virium querela est. Ad id vero quod sequitur cor intende. Nullo equidem pacto duci illi et regii animi et victori persuaderi quivit ut Regis nomen ac purpuram assumeret. Negavit enim posse ibi se coronam auream gestare, ubi Christus spineam gestasset. Oh! præclaram modestiam! Oh! virum vel ob hoc unum ante alios dignum qui Christi iniurias vindicaret! Quod si ille victor armatus, spinarum Christi memor, aurum victrici et emerita fronte contingere renuit, qua fronte quove animo Christianus homo nostri temporis, non terrarum victor illarum, sed humilis et trepidans peregrinus, udis aut pulverulentis calcibus aurum premet? Non agam pluribus, nec oportet; et licet forte quamplurimis, qui contrarium vel fecerunt vel facturi sunt, hac diffinitione displiceam, ego tamen nihil ut diffiniam dico, sed ut consulam. Cœptis abstinuisse consilium meum est, tam sapientiæ plenum utinam quam fidei. Et si quid amico credis, nil ad gloriam est necesse aureo capulo gladium vibrare, auro equum et frenare et pungere, et quod sæpe iam diximus, cal-

ces aureas habere, quas nec Scipio habuisse legitur, nec Cæsar. Aliquanto tamen honestius reverteris phaleratus victor ex acie iusta pioque bello aliquo pro salute patriæ ad defensionem iustitiæ suscepto, quam a sepulcro Christi, unde toga humili, lætisque cum lacrimis sospes ut redeas malim. Vale.

## EPISTOLA XII.

FRANCISCUS PETRARCA GUIDONI ARCHIEP. IANUENSI S. P. D.

Levius fieri patientia quidquid corrigere nequeas. Quam male de se meritis omnique vitiorum labe coinquinatus suus adolescens evaserit. Sæpe uni parata in alterius utilitatem cedere.

Nemo miser esse vult aut unquam voluit: non enim id recipit natura. Ex diverso autem felicitatis appetitum, perdita licet felicitate, non perdimus, imo vero tum maxime felices fieri optamus dum miserrimi sumus, augeatque boni desiderium mali præsentia, et si quando aliud velle videmur, hoc volumus, neque omnino velle aliud quisquam potest: et ipsi, quorum actus votis obstant, volunt tamen: sed hoc volentes in adversum agit ignorantia, viatorum more, qui sæpe quam petunt animis, eam pedibus metam linguunt. Nam et qui peccant faciunt quidem unde sint miseri, sed felicitatem quamdam in explenda libidine sitam putant; et qui sibi manus iniiciunt eo calle miseriam fugiunt: sed falluntur non videntes brevium fuga in æternas misérias se relabi. Profecto autem nunquam, nisi vel miseræ vitæ odio, vel beatæ spe, ad voluntariam mortem itur: perniciosum odium, stulta spes. Nam et illud in id quod fugit

incidit, et hæc quod cupit abiicit: nempe sicut ærumnam cupere animus non potest, neque si posset sani animi votum esset, sic eius, si res poscat, tollerantiam et optare prudentiæ, et consequi pars est una felicitatis. Esset quidem plena felicitas nil miserum pati, nil asperum, nil adversum, affluentem perpetuo lætis omnibus securumque. Quod cum sperari in hoc calamitoso et flebili non possit exilio, proximum est quidquid acciderit forti animo perferre, et fortunæ ictus patientiæ clypeo propulsare. Hæc volventi mihi quantum mœoris ægritudo tui corporis, tantum et plus gaudii attulit æquabilitas ac sanitas vigorque animi; plus enim in hoc boni est quam in illa mali. Quin potius, si stoice loqui velim, multum in hoc boni, in illa autem mali nihil, etsi molesti aliquid. Sed facile est sanum et bene habentem de ægritudine ac dolore philosophari; malis sese autem solari, et a sensu proprii doloris avertere aliquanto difficilius. Non in omni grabato Posidonius iacet: ad quem graviter ægrotantem magnus Pompeius, tunc et Romæ verendus et terribilis terrarum orbi, visendi gratia cum venisset, ac superbus regibus se philosopho præbuisset, ille quam poterat tanto viro vicem ut redderet honoris, inter medios cruciatus atque aculeos dolorum, audiente et mirante Pompeio, de hac ipsa famosissima sententia disputavit: nil bonum nisi virtutem, nil malum esse nisi vitium: dumque loquentem dolor interpellaret, identidem ad se versus aiebat, ut Cicero meminit, si tamen ut sensum sic et verba teneo: *Nihil agis dolor: quamvis enim sis molestus, nunquam te esse confitebor malum.* Viden ubi vim sententiæ reponebat? In differentia mali scilicet et molesti: sicut vice versa inter

bonum et commodum differre autumant. Et profecto si unum est bonum virtus, et nihil est malum nisi quod oppositum bono est, cum vitium solum oppositum sit virtuti, nihil omnino nisi vitium malum. Sed omittamus ista magnifica, et loquamur ut cæteri, præsertim cum et hæc vel vulgo vel sensu iudice non probentur, et adversa etiam philosophorum acies, duce Aristotele, magno clamore dissentiat. Leve est autem, ut dixi, assidentem ægro sanum disputare, et opinionum angustias argumentorum flexibus ingredi, ac sonantia eructare problemata. Sed fomentis non verbis dolor tollitur: quamquam et verbis mitigatur dolor et frangitur. Sæpe vel amica increpatio, vel virilis exhortatio pudore vel ardore sic armavit animum, ut ingestum suo corpori supplicium non sentiret. Sed enim tunc verba suum pondus habent, dum adfuerit hinc docilitas audientis, hinc loquentis auctoritas. Ea vero tunc magna est, quando qui loquitur, præter ingenium, experientiam est adeptus, ut qui quandoque tale aliquid passus, quod ab alio exigit, in se ante præstiterit; tunc autem maxima et consummata, quando dum loquitur patitur. Neque enim arguit, sed demonstrat, et adstipulatur dictis fortibus præsens dolor: et idcirco ad omnem patientiam efficacissimæ voces sunt quæ ex ipsis cruciatibus emittuntur; hæc mihi ratio, suasori alioquin forte non sat gravi, auctoritatem fidemque nunc peperit. Siquidem non minores puto quam podagricos dolores, quos perferens te alloquor, tuis obsessum oppressumque doloribus iisque sic invicto et magno animo resistentem, ut utrique fides simul ac docilitas non desit, uterque vel idoneus sit magister vel discipulus. Ego in præsens magistri vicem assumpsi

futurus discipulus, cum voles: equidem de re loquor, quæ nunc maxime in manibus est; nihil dico quod non probem: certius quoque quam vellem loquor de dolore, quem acerrimum sentio dum loquor, usque adeo ut sæpe per hos dies Posidonii memor, de eius opinione tantum hæsitaverim varie actus huc illuc. Nam si vera complexio est, quam superius audisti, cur non hæc, oro, itidem vera sint? si delectatio, si sanitas, si membrorum integritas bona sunt, et quæcumque bonis opposita mala sint oportet, utique molestiam corporis et morbum et dolorem mala esse consequens est. Inter hæc ergo viri constantiam illius non tam facile assequor, quam miror. Et ad summam sic me invenio, ut sæpe ratio Stoica, sensus mihi Peripateticus semper sit. At ne super corporeum dolorem inquisitione supervacua etiam animos affligamus, difficultatibus scholarum in limine abiectis, atque sepositis in tempus aliud fortasse tranquillius, illud eximium inter tuos meosque nunc angores gaudium cepi, quod in litteris tuis non solum patientiæ scriptum nomen, quam exculptam vere patientiam ipsam vidi. Quæcumque enim sit hæc philosophorum nullum finem habitura discordia, in hoc unum et philosophi omnes, et experientia, et veritas ipsa consentiunt: in rebus asperis, seu mala seu incommoda dici mavis, patientiæ unicum esse remedium. Indignatio enim, et querelæ, et muliebris eiulatio, et luctus præter quam quod viros dedecent, ipsum quoque dolorem non leniunt sed acerbant. Sicut contra prosperis in rebus, seu bona illa seu commoda dici placent, unum est remedium, modestia, cuius freno lætitiæ gestientis impetum teneamus. De quibus simul remediis ambobus nuper nescio quid

latiusculum ut scriberem mens incidit et feci. Quem libellum habuisses, nisi quia et ego iam scribendi fessus, et adiutor nullus. Amici enim vel absentes vel suis rebus impliciti, occupatam seu longinquam mihi dexteram accomodare non possunt. Quanta vero sit scriptorum fides, quanta constantia, quantus denique intellectus experti sumus. Pollicentur plurima, corrumpunt omnia, nihil expediunt: unde in multis, quod in me quidem sentio, in aliis auguror, tepescit novarum ardor inventionum, metu iniecto ne speciosas curas tuas aliena foedet incuria. Ille autem industrius adolescens noster, quem inter tantas rerum difficultates tres et viginti annos educavimus, ut ingravescenti ætati et laborum levamen, et domesticum decus esset et gaudium, ille mihi (oh! falsum æque illis meis ad te litteris eradendum mentis augurium) ecce unicus vitæ labor, unicus pudor, unicus dolor est; contraque præsagium meum illud, et scientiæ si velit aptissimus et virtuti, hostis utrique, pessimis moribus, iners, invidus, contumax ac rebellis passionum servus sectatorque libidinum. Sed ferenda omnia ne illa mihi, de qua loquor quamque in aliis laudo, defuisse meis in rebus patientia videatur. Lætus dicere non audeo, sed feram volens, ne coactus feram. Neque vero ipse sim ferendus, si cum fortissimus et maximus hominum Augustus tres, ut ipse vocitabat, vomicas suo de sanguine tulerit, ego in meo unam ad laborem natus homo non feram. Sic undique destitutus ad illius Frigii docti hominis fabellam vertor ut, conventis scilicet ac speratis desertis auxiliis, messem meam falce metam propria; hoc minus habeo quam Æsopicus senex, quod illi filius, mihi nullus est comes. Itaque quod

et sæpe sum questus, et quotiens ad actum redeo queri oportet, omnis labor, omne opus ad hos iam defessos attritosque digitulos revertitur, omnis sarcina hos imbecilles onustosque premit humeros. Et hoc ipsum magno animo ferendum: nam vepricosis callibus ascenditur quo suspiro. Nunquam tam iuvenis fui ut ad requiem me venisse crederem, quamvis illam sæpe, de quo hodie miror, ubi non erat infelix, et nescio quid cogitans quasi per tenebras palpando quæsierim. Hæc dixi omnia, ne me accuses quod rem ad te maxime pertinentem nondum tibi transmiserim, cui etsi non plena curatio, at lenimen forte aliquod, et certe dum legitur occupatio quædam, malorumque utilis insit oblivio. Cæterum quod præsentis epistolæ fuerit, morbum tuum odi, patientiam amo, ut nesciam an optabile malum sit, si tamen recte malum dicitur, quod te in experientiam tui ipsius, et possessionem pacificam tanti boni duro licet tramite duxerit. Et sic, oro, age, neve defatigare, sed insiste, teque inter ipsas angustias increpa et hortare et obdura animum atque attolle. Non indiges adiutore nisi æthereo. Ille aderit et dextram porriget laboranti, quotiens ad eum poeticum illud christiana pietate clamaveris: *Eripe me his, invicte, malis*, modo ne dubites, ne diffidas, neu te humi fessum inclines, sed ad cœlum erigas, et memineris illius te opem implorare, qui multo magis quam tu ipse tibi succursum velit, sed quibus id optime fiat ignotas homini vias novit. Est ubi votorum dilatio pars beneficii magna sit. Salutem optare nostrum fuerit, modum ac tempus in illius arbitrio relinquamus, cuius nec voluntas variatur, nec iudicium fallitur, nec potentia fatigatur. Et nihil de illius auxilio desperes,



etiam si oblitus tui, si tibi iratus appareat: de ipso enim scriptum est: *Cum iratus fuëris misericordiæ recordaberis.* Familiariter, confidenter et vere dicito illud ulcerosi senis memorabile et devotum verbum: *Etiam si occiderit me, in ipso sperabo:* ita dic, ita fac, ita cogita, ita spera. Poteris omnia, si te posse credideris, non in te sed in eo qui te confortat. Proinde, quod soles, age perseveranter, eoque promptius quo proximior fini es. Breve est iter, nihil autem breve difficile: nulla vel præceps paucorum passuum via fatigationem elicit; contra autem solo aspectu via longior fatigat, etsi plana sit. Et quid putas? Magna pars lucis acta est falsis in gaudiis, in laboribus veris, inter spes ambiguas, inter certa pericula; et quantulum est quod restat? Advesperascit, mihi crede: dum confabulamur et circumspicimus, transit dies non sentientibus nobis. Respiciamus ad solem: finem adesse videbimus, qui etsi dissimuletur, aderit tamen, et quod plerisque viantibus accidit, iis præsertim qui vebuntur, ante expectatum hospes erit in limine, atque ultima nos domus excipiet. Eundum igitur alacriter et caute, invictisque animis viarum reliquiæ peragendæ, ac spe quietis permulcendus labor. Et quoniam huc loquendo pervenimus, ille mihi ex multis viatorum mos probatur, qui hospitio propinquantibus eunt lentius, ut diurno æstu collectus fervor temperetur. Itaque de industria gradum tenent, fumantesque frenant equos, atque ita perveniunt quo pergebant, ut nulla in parte vestigia festinationis emineant. Et nos qui ferventibus animis per adolescentiæ pulverem iuventutis montana transivimus, iam plano et solido redditi, tempereamus ardorem, frenemus impetum, et ad finem sic

tranquilli et placidi et intrepidi veniamus, ut qui nos sero viderit, vix illos putet qui sub meridie currebamus. Si quid nunc etiam sub extremum duri est, dico iterum, difficultatem brevis consolatur. Hæc te ita per te ipsum facere gaudeo, ut vix lætius animo meo sit, si quid ego fortiter egerim quam tu: et illud ad cumulum gaudii mei est, quod hac in re utilem tibi profiteris epistolam unam, quam ante tot annos religioso illi seni scripseram, qui pressum se podagra, paupertate, senio et super omnia mei quoque, qui longe aberam, desiderio, in litteris questus erat; quorum tu, duobus tantum, primo premeris atque ultimo, quod ego plane tibi auferam mox ut belli fragor bona fide quieverit. Primum utinam sic auferre possem: pati enim te diutius non paterer: satis nam tuæ virtutis experimentum habes. Et licet, ut incipiens dicebam, optanda patientia, tamen, quod rigidissimi quique philosophorum fatebuntur, non optandus sed est ferendus dolor. In hoc vero te laudo, huc currentem urgeo, quando aliud non possum, et epistolam tibi illam profuisse gloriôr: quæ an illi profuerit, ad quem scripta est, ipse tunc senserit. Ego enim postea nisi semel hominem non vidi, idque perbreviter Prænestina sub arce, et mihi solito lætior atque æquanimior visus erat cum incommodis suis omnibus et cum senectute luctari. Mihi autem sic gratias egit, ut diceret meum esse quod sine lamentis in pace senesceret, et terribilem illum diem interritus expectaret: nec ita multo post obiit. Quamquam illud quoque vulgatissimum sit ut alii parata prosint aliis. Quærit opes filio pater: alienus, et quod durius, hostis parto fruitur. Nec in iis solum quæ fortunæ serviunt, sed in quibus nul-

lum ius habere dicitur: id novi, et stupui. Est enim haud dubie res indigna, sed communis adeo, ut sit in talibus iam admiratio ipsa mirabilis. Et quoniam nec longior sermo meus tibi tædio esse solet, et res exemplo eget, insistam. Nec attingam illos qui reipublicæ aut militiæ disciplinam filiis ingerentes, omnibus profuerunt, præterquam quibus ante alios prodesse decreverant; quod in litteris quoque vel crebrius evenisse video, ubi illud monstri instar, quod perraro summi viri filius summus evaserit; sic natura vices alternante, ut quisque quod fuerit Deo debeat non patri. Possem duos reges et Cæsares in testimonium adducere, sed non vacat. Ad illa venio quæ litteris comprehensa, et in omne ævum multis utilia, in iis ipsis quibus scripta erant parum visa sunt virium habuisse. Scripsit Aristoteles Ethicæ libros ad Nicomacum quemdam, sive ille scribentis pater, ut quidam volunt, sive is filius, sive amicus fuit: adeo enim nihil fuit, ut quid fuerit nunc etiam dubitetur inter multos; quamvis Cicero filium indubitanter affirmet; nulla re alia quam aliena notus industria: immo vero ne sic quidem notus: prorsus obscurum nomen, quod nec Aristoteles illustravit. Scripsit ad Neronem Seneca, et quod miremur, *de clementia*: qui liber quantum illi cui inscribitur profuerit, toto orbe notissimum est. Scripsit Eustathio filio Macrobius in Ciceronem commentarios, et Saturnalium libros: operosa volumina. In alterius primordio, quidquid ipse per omnem vitam legisset, totum filio esse vult doctrinæ supellectilem et litterarum penu. Quid vis? Ingenium, scientiam, eloquentiam, labores suos illi consecrat, successoremque illum sibi quasi testamentarium

facit, non parvi census aut angusti prædii, sed animi bonorum omnium. Præclara hæreditas, sed obscurus hæres, et nisi patris elogio nominaretur, incognitus. Scripsit Virgilius Mæcenati Georgicorum libros, ingeniosum et iucundum opus, quo an agricolam effecerit incertum. Certe constantem illum ac modestum virum non fecit Horatius, qui eidem utilissimas et succi plenissimas epistolas sermonesque gravissimos scripsit. Nunquid, oro, tot monitis tantisque consiliis obtinuit ut altius erigeretur, ut maturius loqueretur, ut prosperitate levem animum iactantem consisteret? Longum est ire per singulos : ad supremum transeo. Cicero tantus vir Ciceroni fratri suavem atque artificiosam exhortationem scripsit. Nunquid illius animum ab ea, in quam naturaliter pronus erat, iracundia retraxit, aut motus inconditos oratione compescuit? Scripsit idem Officiales libros ad Ciceronem filium nil patris habentem præter nomen, oh! quanta refertos elegantia et gravitate. Omnia præceptis salubribus plena sunt : nulla pars operis stimulis vacat, quibus excitet iuvenilem animum et accendat ad imitandam saltem domesticæ gloriæ claritatem. Quid expectas? Qui Iulium Cæsarem studio partium infestum et elatum victoriis, et offensionibus irritatum mollire quivit et flectere, qui iudices, qui populum, qui senatum fando totiens movit, quem saxa moturum voce diceres, dissimillimum patri iuvenem movere non potuit, hac una maxime re infelix et impar cæteris, quibus abunde clarus ubertimque felix fuerat in vita. Sed non omnia uni data sunt : miscentur læta tristibus, clara obscuris, tranquilla turbidis, adversa felicibus, et in magno acervo rerum humanarum

si ad cribrum veniant, boni minimum, mali plurimum deprehendetur. Tibi, mi Cicero, boni multum, gloriæ immensum, natus degener. Vere tibi, ut ait Lælius Spartianus, melius fuerat liberos non habere : habuisti enim qui contemptis officiis, quæ in eis quos dixi libris legerat, quæque ut credi debet, sæpius viva voce et vere viva una ex omnibus, ut mihi videtur et Senecæ visum est, viva, inquam, voce paterni oris audierat, non vivendi sed bibendi nobilitatus officio, duos vini congios uno impetu hauriret. Egregius tanti patris filius et præclarus vindex, qui interfectori eius Antonio, non vitam, non potentiam, non opes, sed quod ille in libro quem de sui ipsius scripsit ebrietate conqueritur, bibendi gloriam et famam ebrietatis eripuerit. Oh ! portentum lævo sidere editum, oh ! naturæ varietatem incredibilem, talem tanta de luce caliginem ! Heu, Marce Tulli, vir insignis, sed infelix pater, quanto studio laborasti ut ex te alterum Marcum Tullium exprimeres. (Oh ! quam sæpe maximorum artificum falluntur ingenia !): Marcum Bibulum expressisti. Hactenus quasi præsens cum Cicerone defleverim : ad te, pater, ad propositum revertor. Siquidem, ut dicebam, tantorum hominum studia sæpe illis inefficacia quibus instituebantur, sæpe aliis post annorum millia profuerunt, proderuntque : in quibus fortassis et nos sumus. Si forte igitur, ut me tantis immisceam, epistola illa mea sive apud ipsum efficax, quod magis puto, sive inefficax ad quem missa est, tibi post tam longum tempus utilis fuit, gaudeo, et illi calamo gratiam habeo, et illum diem amo. Nimis te hodie detineo. Da veniam : tecum sum. Vale.

Mediolani, Kalendis Decembris.

## EPISTOLA XIII.

FRANCISCUS PETRARCA SOCRATI SUO S. P. D.

Haud ægre ferendum quod nostrorum laborum fructus  
alteris quærantur.

Ægre fers quod in labores tuos alter irrupit. Pone indignationem: admirationem pone. His plena ludibriis vita est, et communia non miramur; immo quidem vix aliud invenias. Pauca admodum iis a quibus facta sunt serviunt. Sæpe ubi plus laboris minus est præmii. Iacent sub exiguo marmore fundatores urbium maximarum quibus advenæ imperitant. Domum alter ædificat, alter inhabitat; architectus sub divo. Hic serit, ille metit, sator esurit. Alter navigat, alter æquoreis mercibus ornatur, navita inculto. Denique alter textit, alter induitur, nudo interim textore; alter pugnat, alter occupat victoriæ præmia, inhonorato victore; alter aurum fodit, alter expendit, fossore inope atque egeno. Alter gemmas legit, alterius digiti radiant, squalente gemmario: altera in labore parit filium, altera in gaudio illi nubit, desertaque matre illum suum facit. Dies ante deficiet quam exempla rerum talium. Nosti tetrasticon illud Maroneum:

Sic vos non vobis nidificatis aves:

nota sunt reliqua. Vetus et popolare præterea proverbium est: qui plura iugera vineæ foderit, pauciores eum vini sextarios bibere: neque de nihilo est quod propheta idemque rex ait, *labores manuum tuarum quia manducabis, beatus es, et bene tibi erit*. Quæ secutus

filius: *Omnis homo, inquit, qui comedit et bibit et videt bonum de labore suo, hoc donum Dei est. Rarum, inquam, et insigne donum: sic enim, ut intelligi datur, et patri et filio visum erat: quod cui obtigit, ille gratias agat; cui negatur forte, ille se publica consoletur, neque ulla singulari iniuria se affectum sciat, neque illud eiusdem Salomonis dictum excidat: Nam cum alius laboret, ait, in sapientia et doctrina et solitudine homini otioso quæsitâ dimittit, et hoc ergo vanitas et magnum malum. Magnum fateor sed commune. Tu vero quotiens aut naturam aut fortunam accusare voles, primum cogita an tu solus, an unus ex millibus patiare quidquid est quo premeris, ne si commune omnium aut plurium malum est, ad accusandam providentiam divinam unus querulorum omnium compareas procurator. Et de querelis hactenus. Ad id vero quod mihi tam obnixe gratias agis quasi fortunarum tuarum propugnatori unico, quia neque meum meritum verbis attollere, neque deprimere fidem velim, nil aliud dicam nisi Terentianum illud in Andria :*

. . . . . Gaudeo  
Si tibi quid feci aut facio quod placeat, et  
Id gratum fuisse adversum te habeo gratiam.

Vive et vale nostri memor.

---

## EPISTOLA XIV.

FRANCISCUS PETRARCA IOHANNI EPISCOPO OLMUTIENSI S. P. D.

Vituperat eam scribendi rationem qua unum uti plures alloquimur;  
et narrat se Germaniam versus profectum, itineribus præclusis,  
Venetias divertisse.

Non exiguum in stuporem tua me traxit epistola. Novus enim in primis ac nobis insolitus stilus erat. Pluraliter me compellas cum sim unus, integerque utinam, nec in multa dissidentium sententiarum bella distractus. Ego stilum non mutabo, quo et docti olim omnes, et nos diu invicem usi sumus; modernorumque blanditias ac meras ineptias execrabor, inque hoc ipso verecunde tecum ac familiariter gloriabor, quod stilum illum patrum, hac in parte femineum et enervem, unus ego, seu primus saltem per Italiam, videor immutasse et ad virilem ac solidum redegisse. Ita tamen hoc faciam, nisi te penitus aliud velle cognovero. Accessit quod nullam mearum litterarum huius temporis ad te video pervenisse. Nulli enim respondes admirans nec immerito, quod ita te inscio, quem præcipuum semper habui, tantam fecerim mutationem, ut fortunas domiciliumque transtulerim. Ego vero non Venetias, sed ad Cæsarem et ad te venturus, Mediolanò abii. Iter autem fortuna præcluserat; nec iter modo sed reditum. Quid ergo? Terentiano fretus consilio, quum quod volebam non potui, cœpi velle quod poteram. Itaque circumspiciens et multa considerans, propinquum diversorium, et hunc publicum, ut ita dixerim, humani generis protum petii, nihil præter libellos et calamos mecum ferens. Hæc et



alia multa tuam in notitiam perferenda curaveram : sed ut video non sat fortunatus in nuntiis. Tuus hic, quem meum factum esse gaudeo, noster hic inquam, si rite præsagio, nos non fallat, qui ut nunc etiam nescio quid Cæsari nostro scriberem celerans, occupatum dulci instantia et profundo suspirio me coegit. Vale.

---

## EPISTOLA XV.

FRANCISCUS PETRARCA CAROLO IV IMP. AUG. S. P. D.

Hortatur iterum ne res Italiæ despiciat, seque Romanum imperatorem esse meminerit.

Vereor ne tam creber hic epistolarum clamor apud multos mihi vel inopportunæ superbiæ vel ridiculosæ detur amentiae, qui tranquillum serenissimi pectoris habitum quibusdam quasi nubiferis flatibus impleam ac perturbem. Nam quis ego aut unde mihi hoc animi? Profecto de sola conscientiae puritate, quam mihi non in aliis nisi tuis in rebus, Cæsar, arrogo: non ignarus tui, non ignarus mei, non ignarus rei loquor tamen. Etsi sæpe Davidicum illud occurrat: *Quid enim mihi est in cælo, et a te quid volui super terram*; solatur me atque erigit humanitas tua et integritas veri potius appetens, licet acris, quam blandi alloquii ac mulcentis. Tibi quidem, providentissime imperator, medullitus notus esse confido, non quia magna tibi animi experimenta præbuerim, sed quia talem te aestimo, talemque me scio ut translucere tibi arbitrer fidem meam. Itaque non metuo ne offendam quem sincere amem,

fideliter horter atque arguam. Tui autem certus aliena et praesertim falsa iudicia parvipendo, et si nulla innocentia tanta est quæ reprehensionibus careat, malo procacitatis mea fides, quam perfidiæ silentium reprehendatur. Quamvis mihi quidem pene iam nihil est reliqui: exhausisse animum videor, dumque te tuum in solium, Cæsar, voco, raucae factæ sunt fauces meæ: nil iam lingua, nil calamus, spretæ totiens preces, fusæ voces, arefactæ lacrimæ, consumpta suspiria: solo corde iam loquor. Sed spero me audias raucum licet ac tacitum: dum magis enim tacere videor, tunc altius loquor, teque diebus ac noctibus obsecro, obtestor, adiuro, increpo. Ita vero mihi accidit ut fesso amanti, cui consumptis omnibus quæ ad persuadendum valeant, solum in labiis, iamque nec in labiis, sed in præcordiis, amati nomen sonat. Et mihi et tuis omnibus hoc unum superest, ut te in animo habeamus numinis instar, sed aversi et nostras miserias non curantis. Quod si quid est spiritus, nihil est artificii, nisi quod affusi et supplices non semel sed millies te vocamus. Est ubi artis in locum nudæ voces atque adeo nudi subeant affectus, et carum nomen sæpius iterasse efficacissimum ad movendum animos habeatur. O gloriosissime Cæsar, patere æquis auribus, æquiore animo importunitatem nostram, neque te sæpe vocantibus irascaris. Satis est supplicii non audiri. Clarum ac suave nomen est Cæsar, verendumque omnibus gentibus ac regibus: nobis vero etiam salutare. Sine illud in nostro ore dulcescere, seu illud clamantes, seu taciti invocemus; audi vel in silentio tuorum voces. Tua te, Cæsar, vocat Italia, idque tantis clamoribus, ut si au-

ribus audiantur, non principem modo suum, sed Indorum reges ultimos sint moturi: tua te, inquam, Italia, Cæsar, vocat; Cæsar, Cæsar, Cæsar meus ubi es? Cur me deseris? Quid cunctaris? Certe ego nisi immobilis forem, et dextra lævaque mari gemino, a tergo autem Alpibus circumsepta, ipsa iampridem meum Cæsarem longe trans Danubium petiissem. Vale, Cæsar, et vigila dies.

Venetiis, V. Idus Martii.

---

### EPISTOLA XVI.

FRANCISCUS PETRARCA IOHANNI EPISCOPO OLMUTIENSI S. P. D.

Carere se litteris eius ægre fert, et quamdam spem suam  
in irritum cessisse minime dolet.

Ergo quia non potes quod velles scribere, nihil scribis? Noli, obsecro, noli damno damnum addere. Gravius multo mihi est litteris tuis quibus assueveram, quam successu spei ambiguæ caruisse. Illa enim externam corpori sufficientiam exoptatam forsitan, ut est inexplebilis animi infinita cupiditas, sed certe non necessariam promittebat: hæ animæ cibum internum ac solatium afferebant. Hoc me ne privandum censeas, per temetipsum, tuumque mihi cultum semper et colendum caput, et si quis unquam tibi mei nominis amor fuit, oro anxius atque obtestor. An quia non vales quod optabas dare, aufers quod solebas? Et quia nequis esse beneficus, eris nocens? Quid hoc aliud fuerit quam infirmum, quem curare non possis, occidere? Vide,

pater optime, semperque mihi (si latine dicitur) piissime, ne affectu nimio tua pietas exorbitet. Volebas me magnum aliquid facere: non successit: at quod nemo vetuerit, parvum ama. Nil novi postulo: fac quod soles, meque tuum in hac magna, quod stupeas, urbe solivagum, etsi rite olim a me ipso mundus alter Venetia dicta est, toto semotum orbe ne deseras, sed optatis scriptis refove sitientiem animam, et sacris ac dulcibus solare colloquiis: denique unum hoc iure meo postulo, ut si nulla mei erga te animi mutatio facta est, apud te ego talis inveniar qualis eram, dum me alium facere voluisti. Et certe novi animum quoque tuum ad me similem sui semper; sed si affectus idem, cur diversus effectus? Doles puto quod nunc primum non valuerint pro me apud Cæsarem preces tuæ. Ne doleas precor. Ego namque non doleo: doleant amici, quibus quidquid id erat subsidii quærebat; mihi iam pauca sufficiunt. Si naturam meque sequor non sat modo sed abunde, usque quoque ad invidiam locuples sum. Si quid et forte nunc deforet, en senectus in limine expetita votis hospes, morsque illi a tergo adæquatrix optima, secumque, divitiæ ingentes, nulla scilicet amplius re egere. Voluntati ego igitur tuæ gratias ago: inefficaciam fortunæ meæ imputo, non tibi, non Cæsari, cui semper supra meritum carus fui, quique, vel quod nunc negat mox præstabit, vel fortasse quod ab illius altissima providentia non abhorret, negando mihi consulit: qui postremo quamvis hoc semper neget, tam multa tamen olim præstitit, ut ex debito tenear, dum vivo, pedum eius adorare vestigia. Hæc hactenus. Is sane qui hanc tibi litteram

dabit, semigermanus semique italus, dilectus meus, homo vigil atque acer in litteris poeticisque artibus satis exercitus, ad solius famæ sonitum, quod si imitatores invenerit nostro non ultimum studio decus erit, posthabito Patavio, Pragam petit, discendi avidus docendique: nullius quidem rei egens, sed tui appetens favoris. Peregrino homini faciem tuam videre potuisse multum fuerit. Id se meis litteris adepturum sperat, cui si se dignum præbuerit, et si placet, tua nulli bono difficilis condescendat humanitas. Vale feliciter, et, si quod est amoris nudi meritum, rescribe aliquid, quod me nondum e memoriæ tuæ arce deiectum læter.

Venetiis, VI. Kalendas Septembris.

### EPISTOLA XVII.

FRANCISCUS PETRARCA HUGONI SANCTI SEVERINI COMITI S. P. D.

Flocci se facere quod res suæ Neapoli secus ac optabat acciderint ex culpa aulicorum hominum quos valde vituperat.

Litteras tuas, inclyte vir, diu expectatas et sæpe forsitan interceptas tandem hodie recepi legique libens. Erat enim stilus ingenio meo mirifice coaptatus. Recognovi equidem in verbis tuis Curiae mores olim mihi cognitos atque invisos. Neve in longum exeam, quod valetudine inquieta et occupationibus multis vector, quod ad illustrem attinet reginam voti compos debitorque omnium sum. Quam vere enim nescio, sed sic mihi persuasi, nihil se meque dignum sponte sua generosum illum serenumque ac beneficum animum

negaturum; sed habet sub iure Photini affectus ensesque suos: doleo propter ipsam, propter te, propter bonos, raros licet, denique propter Italiam, in qua ægyptia monstra regnare molestissimum animo meo est; propter me autem nihil: quod et tam procul inde absim ut me ista non tangant, et ante annos plurimos præsens apud ipsam in confinio felicitatis ac miseriæ positam Parthenopem pene oculis malum hoc omne præviderim, atque prædixerim, deque hoc scripserim quod mens tulit: proinde divinum ac sidereum illum regem olim terris ereptum, cœlo redditum, qui grandævus iuventutem meam quamvis ultra meum meritum, longe tamen citra suum desiderium ac propositum, nescio quam claris, certe admodum raris insignibus honestavit, nomenque eius et cinerem et quidquid suo de sanguine ortum erit fide perpetua venerabor. Id me sibi pollicitum et implesse scio, et impleturum saltem spero. Nil ad hoc recentibus beneficiis opus est, cum abunde sit veterum. Quod ad te autem idem dico: nempe quod in te fuit præstitisti, etsi caritatem livor vicerit, ut mos est, cariorque mihi multo est inefficax fides, quam efficax perfidia. At quod ad aulicos canes, nihil dico aliud nec video quod altius dici possit, modo mihi conveniat, quam Cæsareum illud: *nihil, enim inquit, malo quam et me mei similem esse et illos sui*. Certe ego paupertate mea dives sum, neque id meo tantum sed multorum iudicio et consensu: illi opibus suis inopes ac mendici, atque utinam dolituri acrius si scire possent, quanto mihi uni tranquillior feliciorque dies unus, quam illis omnibus tota est vita obsessa curis pessimis, voluptatibus foedis marcens,

tremula, nutans spe, vanis elusa gaudiis, veris et oppressa mœroribus et gelata terroribus et cupiditatibus inardescens, quamque nemo est eorum cum quo statum meum ullis conditionibus permutatum velim. Licet enim inter vasa aurea miserum esse, inter fictilia felicem, neque ad bene vivendum aut argilla auro melior, aut Samos est inferior quam Corinthus. Tu vale, et si bonus esse vis, stude illis esse dissimilis, neu te contagia morum lædant cave.

---

## EPISTOLA XVIII.

FRANCISCUS PETRARCA NICOLAO ACCIAIOLO MAGNO  
REGNI SICULI SENESCALCO S. P. D.

Laudat, grates agit, commendat amicum, et loquitur de morte regis.

Te quidem, vir omni ætate rarissime, nostra unice, totum ulnis animæ venerabundus amplector, possideoque civiliter, thesauri instar inventi, seu tu præsens sacrum os vivo aperis sermoni, seu tu absens stilum aureum scripturæ applicas mellifluæ, et rursum seu idipsum militariter et vulgari mōre, seu oratorie verbis atque sententiis exquisitis, quod nunc altius multoque divinius, quam inter armorum strepitum posse te crederem, fecisti. Aliis licet atque aliis rivis et sapore vario fontem unum tui cœlestis ingenii recognosco, mirorque mecum cogitans quid hic esset, si his tantum studiis animum innutrisset, qui ex minimis temporum reliquiis tantus sit, quas maximarum rerum curis sparsim furtimque subripiens, huc convertit; ut maiora

illa præteream, non hoc calamo inopi sed Homérico digna præconio, neque epistolæ materiam sed libri, quemadmodum vel bella armis et castrensi peritia, vel legibus vel civili iustitia pacem regas. Quarum tibi hactenus artium Neapolis, et illa ante alios laudata Campania; nunc Sicilia est testis, et Arethusa iam lætior, atque Æthna tepentior, et Carybdis reverentia tuæ frontis et tuorum actuum admiratione placatior. Macte virtute multiplici, atque in primis omnes animi dotes adornante modestia, qui tibi apud posteros non minorem ex his nugis meis quam ex omni tua magnitudine famam speres, idque persæpe tuis ad me litteris fateare: error fortassis honestior, sed non minor ex amore oriens. Ego vero non dicam apud illos qui post me nascentur, ad quos nescio an vestigium aliquod mei nominis sit venturum, sed apud præsentis utique tanti viri gratiam non diffido gloriæ mihi fore: nam gaudio quidem et honestissimæ voluptati non spero illam mihi esse, sed sentio. Sane quod parvitati meæ magnitudinem tuam offers, quodque affectum meum, qui quam efficax fuerit exitus arguet, sed haud dubie fidelis fuit ac fervidus, ad Priorem nostrum Sanctorum Apostolorum, et quod pro illo tentavi mixtum gloriæ tuæ dicis, puto nec falleris, inque hoc tuo more versaris commemoratione gratissima, facis non quod mihi debitum, sed quod tibi, ut ab omni scilicet parte perfectus sis. Proinde crebris atque magnificis oblationibus tuis, si res tulerit, utar ingenti fiducia. Ille autem, de quo loquimur, ut tecum de te sileam, non est in quem possim quasi in alterum pius dici: nempe pars mei est, atque unus ex paucis, qui mihi in hoc rapi-



dissimæ vitæ cursu, moribus et ingenio probati, meis alte præcordiis insederunt. Restat ut te precer, ne mihi anxio statum tuum sinas incognitum, et an morte regis tecum aliquid fortuna patraverit: quem utinam ut ad regnum sic ad regias virtutes attollere potuisses: in quo vereor, ne multam ego operam scribendo perdidderim, tu loquendo. Optimum verbum viri pessimi, *virtutem verba non addere*, quod ita demum recte dicitur si nulla usquam audientis in animo sit scintilla quam suscites. Oh! si se ille tuis monitis docilem præbuisset (da veniam, urget animum ac calamum dolor), profecto diutius vixisset, felicius obiisset, nomen clarius reliquisset. Vale, meum decus ac patriæ.

Patavii, VI. Idus Iunii.

### EPISTOLA XIX.

FRANCISCUS PETRARCA IOHANNI DE CERTALDO S. P. D.

De quodam adolescente Ravennate in suam familiaritatem recens accepto. De imitatione, et plagio litterario.

Anno exacto post discessum tuum generosæ indolis adolescens mihi contigit, quem tibi ignotum doleo, etsi ille probe te noverit, quem sæpe Venetiis in domo tua, quam inhabito, et apud Donatum nostrum vidit, utque est mos ætatis illius, observavit attentius. Ut vero et tu illum noris qua datur eminus, et in litteris illum meis videas, ortus est Adriæ in litore ea ferme ætate, nisi fallor, qua tu ibi agebas cum antiquo plagæ illius domino eius avo, qui nunc

præsidet. Adolescenti origo ac fortuna humilis. Verum abstinentia et gravitas vel in sene laudabilis, acre ingenium ac facile, rapax memoria et capax, quodque est optimum, tenax. Bucolicum meum carmen, duodecim ut scis distinctum eglogis, undecim continuis diebus didicit, memoriterque servavit ita, ut singulis diebus ad vesperam unam mihi eglogam, novissimeque duas tam constanter, nilque hæsitans recitaverit quasi sub oculis liber esset. Est sibi præterea, quod raro nostra habet ætas, inventionis magna vis ac nobilis impetus, et amicum Musis pectus, iamque, ut ait Maro, et ipse facit nova carmina, et si vixerit atque, ut spero, cum tempore creverit, quod de Ambrosio vaticinatus est pater, aliquid magni erit. Multa de illo iam nunc dici possunt: pauca de multis. Audivisti unum. Nunc etiam audi et virtutis et scientiæ fundamentum optimum. Non vulgus tam pecunias amat atque expetit, quam hic odit ac respuit. Nummos illi ingerere irritus labor est. Victui necessaria vix admittit. Solitudinis studio ieiunioque et vigiliis mecum certat; sæpe ille superior. Quid multa? Iis me moribus sic promeruit, ut non minus mihi quam filius quem genuissem carus sit, et fortassis eo carior, quod filius, ut mos est adolescentium nostrorum, imperare vellet, hic parere studet, nec suis voluptatibus sed meis vacat obsequiis, et hoc quidem nulla cupidine seu spe præmii, sed solo amore tractus, et fortasse sperans nostro fieri melior convictu. Iam ante biennium ad me venit, venissetque utinam maturius; sed per ætatem non multo ante potuisset. Familiares epistolas meas soluto sermone editas, quæ ut multæ numero, sic et multi utinam

pretii essent, inter confusionem exemplarium, et occupationes meas pene iam desperatas, et quatuor ab amicis opem mihi pollicitis tentatas, et ab omnibus calle medio desertas, iste unus ad exitum perduxit, non quidem omnes, sed eas quæ uno non enormi nimium volumine capi possent, quæ, si hanc illis inseruero, numerum trecentarum et quinquaginta complebunt, quas tu olim illius manu scriptas, præstante Deo, aspicias, non vaga quidem ac luxurianti littera (qualis est scriptorum seu verius pictorum nostri temporis longe oculos mulcens, prope autem afficiens ac fatigans, quasi ad aliud quam ad legendum sit inventa, et non, ut grammaticorum princeps ait, littera quasi legitera dicta sit), sed alia quadam castigata et clara seque ultro oculis ingerente, in qua nihil orthographicum, nihil omnino grammaticæ artis omissum dicas. Et de his hactenus. Ut vero in his ultimum sit litteris quod primum in animo meo fuit, est hic quidem in primis ad poeticam pronus, in qua si pergit usque adeo ut cum tempore animum firmet, ad certum aliquid et mirari te coget et gaudere. Adhuc tamen per imbecillitatem ætatis vagus est, nec dum satis quod dicere velit instituit, sed quidquid dicere vult, alte admodum dicit atque ornate. Itaque sæpe illi carmen excidit non sonorum modo, sed grave et lepidum maturumque, et quod poetæ senis putes, nisi noscas auctorem. Firmabit, ut spero, animum ac stilum, et ex multis unum suum ac proprium conflabit, et imitationem non dicam fugiet, sed celabit, sic ut nulli similis adpareat, sed ex veteribus novum quoddam Latio intulisse videatur. Nunc usque autem imitationibus gaudet, quod suum habet

ætas illa, et interdum alieni dulcedine raptus ingenii, contra poeticam disciplinam sic in altum desilit, ut operis lege vetitus, referre pedem, nisi visus et cognitus, non possit. In primis sane Virgilium miratur. Mire id quidem; cum enim multi vatum e numero nostrorum laudabiles, unus ille mirabilis est. Huius hic amore et illecebris captus, sæpe carminum particulas suis inserit. Ego autem qui illum mihi succrescentem lætus video, quique eum talem fieri qualem me esse cupio, familiariter ipsum ac paterne moneo videat quid agit. Curandum imitatori, ut quod scribit simile non idem sit, eamque similitudinem talem esse oportere, non qualis est imaginis ad eum cuius imago est, quæ quo similior eo maior laus artificis; sed qualis filii ad patrem, in quibus cum magna sæpe diversitas sit membrorum, umbra quædam et quem pictores nostri aerem vocant, qui in vultu inque oculis maxime cernitur, similitudinem illam facit, quæ statim viso filio, patris in memoriam nos reducat, cum tamen si res ad mensuram redeat, omnia sint diversa; sed est ibi nescio quid occultum quod hanc habeat vim. Sic et nobis providendum, ut cum simile aliquid sit, multa sint dissimilia, et idipsum simile lateat, nec deprehendi possit, nisi tacita mentis indagine, ut intelligi simile queat potius quam dici. Utendum igitur ingenio alieno, utendumque coloribus, abstinendum verbis. Illa enim similitudo latet, hæc eminet. Illa poetas facit, hæc simias. Standum denique Senecæ consilio, quod ante Senecam Flacci erat, ut scribamus scilicet sicut apes mellificant, non servatis floribus, sed in favos versis, ut ex multis et variis unum fiat, idque aliud et melius. Hæc dum

sæpe secum agerem, et ille semper intentus ceu patrios monitus audiret, incidit ut nuper ex more illum admonenti tale responsum daret. « Intelligo enim, inquit, et » fateor ita esse ut dicis. Sed alienis uti, paucis quidem » et id raro, multorum atque ante alios vestri permiserim ab exemplo. » Hic ego admirans: « Si quid unquam, fili, tale meis in carminibus invenis, scito id » non iudicii mei esse, sed erroris. Etsi enim mille » passim talia in poetis sint, ubi scilicet alter alterius » verbis usus est, mihi tamen nihil operosius in scribendo nihilque difficilius se offert, quam et mei » ipsius et multo maxime præcedentium vitare vestigia. Sed ubi nam, quæso, est unde hanc tibi licentiam ex me sumis? » Sexta, inquit, tui bucolici carminis egloga est, ubi, haud procul a fine, versus » unus ita desinit, *atque intonat ore.* » Obstupui: sensi enim, illo loquente, quod me scribente non senseram, finem esse Virgiliani versus sexto divini operis, idque tibi nunciare disposui, non quod ullus correctioni amplius locus sit, carmine illo late iam cognito ac vulgato, sed ut te ipsum arguas, qui mihi errorem meum hunc indicari prius ab alio passus sis, vel si id forsan ignotum tibi hactenus fuit, notum esse incipiat, simulque illud occurrat, non solum mei studiosi licet hominis, multa tamen litterarum et ingenii penuria laborantis, sed nec ullius cuiuslibet, docti viri studium sic paribus, quin multum semper humanis desit inventionibus, perfectionem sibi reservante illo, a quo est modicum hoc quod scimus aut possumus. Postremo et mecum ipse Virgilium ores det veniam, nec moleste ferat si, cum ipse Homero, Ennio, Lucretio multisque aliis

multa sæpe rapuerit, ego sibi non rapui, sed modicum inadvertens tuli. Vale.

Ticini, V. Kalendas Novembres.

## EPISTOLA XX.

FRANCISCUS PETRARCA FRANCISCO BRUNO FLORENTINO S. P. D.

Ignoto ex alterius voluntate scribit, et se profert amicum.

Sat magnum, vir egregie, iam hinc tuæ virtutis argumentum habeo illius magnanimi viri verbum, cui omnia crederem, qui nuper nobis redditus magnoque mihi pro munere novi nomen afferens amici, inter multa de te, quem valde diligit et quem cupide nominat, hoc etiam dixit, optare te amicitiam meam: quin et au aliquando me videris quærentibus, respondere solitum et vidisse et mei notitiam habere, atque hoc urbanissimo mendacio sæpe hactenus pudori tuo consuluisse: quasi te pudeat me non nosse coætaneum et concivem tuum, quem et nonnullius pretii facias, et ames incognitum. Gratulor affectui tuo, et ingenuo gratulor errori. Non est turpis error et pulchra oriens radice. Natura mitis atque ad amandum prona mens, multos fecit in iudicio rerum labi. Satius est autem amare multos immeritos, quam unum benemeritum non amare. Institit sane ille vir, ut tibi tali viro, et erga me sic affecto, quique nescio cur primus mihi scribere verearis, familiare aliquid scriberem. Negavi vel scribendi materiam adesse, vel solere me ignotos verbis aggredi: itaque ferme quidquid epistolariter

scripsi unquam, vel ex responsionibus constare, vel ad eos esse, quibus me familiaritas arcta coniungeret: neque vero me aliis audaciorem, neque mihi hanc scribendi novitatem minus suspectam esse quam tibi. Ille autem quid putas egerit? Quievit forte, et oratione repressus est mea? imo vero ad dominum civitatis adiit, magnum etiam amicum tuum, eumque manu duxit ad meam domum hoc ingenio, ut tanto sub teste, dicam verius, praeceptore (nam et ipse precaturus aderat et sunt praecepta preces principum), negare nil penitus auderem. Me quidem omnino quæ molirentur ignaro, soli nostros inter concedimus libellos. Ibi multa de multis, ultimum de te fuit. Cum vero certatim et urgeret qui coeperat, et a transverso improvisus alter erumperet, agnosco insidias. Sed quid agerem contra tales duos unus? Tanti blanditias amici dominicæque frontis pondus ferre non valui. Cessi igitur, atque illis hac ipsa hora pariter hinc digressis, promissi memor, calamum arripio scripturus quidquid occurreret. At cum rebus obsessus et curarum plenus cogitare novi aliquid nunc non possem, et idipsum scribere satis habui, et reliqua hæc quo gesta sunt ordine, quibus hic erit finis. Amicitiam tu meam, ut intelligo, parvam valde rem, cupis; sed quo modestius votum, eo inhonestior est repulsa. Precibus ergo tuis obviam eo; accipe plenis manibus quod petisti, meque fidenter in amicis numera, et si quis mei usus est, utere: si nullus est alius, at saltem novos inter amicos me, interque ævi viridioris epistolas hunc pene ultimum possidebis locum. In senescentem namque, si nescis, et amicum et calamum incidisti. Si quid nunc etiam vitæ restat, est

minus utique tacitum quo loquacior est senectus, ut Catoni seni optimo videtur. Haud dubie crebrior illic eris. Interea tuam sortem fer æquanimis, non mediatori tuo, qui tibi strenue vereque militariter morem gessit, non mihi, qui sibi quamvis hæsitanter parui, sed tibi dumtaxat imputaturus, si quid minus inveneris quam sperabas, tam facile utinam compos semper omnium votorum, sed in electione felicior. Vale.

Patavii, VI. Idus Septembris, hora nona.

---

### EPISTOLA XXI.

FRANCISCUS PETRARCA CAROLO IV IMP. AUG. S. P. D.

Rursus hortatur ad Romani Imperii gloriam restituendam.

Fessus præteriti nec futuri fidens, Cæsar, calamum tuis in exhortationibus pene attritum recusantemque seposueram. Alit inter difficultates refovetque animum spes successus, qua sublata, quis est amens adeo, ut non infructuoso labori requiem anteponat? Ut ad stilum redeam Sacer Amor cogit, sive miles hic tuus huius nominis, sive ille sacer animi calor, qui mihi a parentibus relictus atque erga tuam semper ex quo mihi primum notus es, erga vero Romani Imperii maiestatem ab infantia nutritus, in præcordiis meis vivit, et in dies crescit, sive quod est verius, uterque. Nam neque meus amor, tot iam clamoribus totque conatibus perditis, ultro ad laborem inutilem rediisset; neque hic miles, quamvis amicus et facundus et sapiens me movisset, nisi intus in anima vivas adhuc



favillas priscae fidei, quas admoto magnae spei fomite levi folle suavissimae orationis accenderet, invenisset multis et validis argumentis excusans tarditatem tuam, multis et magnis indiciis generosas animi tui curas, vereque Caesareos apparatus cupidis et libenter felicitatis ac gloriae tuae credulis auribus insusurrans, quibus de praeterito conceptum diffidentiae gelu novae spei fervore dissolveret. Eia igitur, Caesar, duce Deo, qui non frustra suum tibi commisit imperium, surge et dilatum munus honestissimum dum potes, imple fortiter, imple feliciter. Gloriosus finis lentum principium excusabit. Omnes te alto consilio distulisse consentient, quod nondum messis Hesperia plene maturuisset, in quam utiliter falx Caesarea mitteretur : quamvis nostra fames morae omnis impatiens murmuraret. Nihil intempestivum bene, nihil bonum sero agi, verumque illud Augusti Caesaris : satis celeriter fieri quicquid fiat satis bene. Arripe, Caesar, hanc occasionem dum adhuc potes. Neque enim semper poteris. Age, oro te, Caesar, nondum enim tuum nomen invocare, tuumque te decus poscere atque orare dedidici. Etsi ego quoque unus impatientium, parumper invisam mihi rerum dilatione tepuerim, ecce iterum recalesco. Noli meam et multorum spem pulcherrimam rursus extinguere. Saepe spes oppressa vix attollitur. Si qua nomini tuo nubes hactenus incubuit; si quid infamiae ex primordii obscuritate contractum est, totum, crede mihi, non modo consummationis splendore purgabitur, sed, ut dixi, in gloriam convertetur, dum seu error ille, seu consilium fuerit, opinione hominum consilium et non error fuisse videbitur. Saepe honestus finis segne principium hone-

stavit, nunquam finis obscurior claro principio illustratus est. Denique si cœperis ut dolumus, dum sic finias ut optamus, Fabii Maximi nomen promereberis. Cunctator fueris, sed sapiens, sed salutis publicæ studiosior quam vulgaris famæ. Ut libet se tibi prætulerit ventosa loquacitate Minutius, dum re edoctus mox se imparem fateatur, dicent de te hostes impii quod de illo dixit Hannibal: semper credidimus nubem illam magno tonitru e montibus erupturam. At si, quod divina pietas omen auferat, finis quoque languidus fuerit, quis te unquam vel præsentium vel sequentium excusare poterit? Audi me, oro, Cæsar, parvum hominem sed tui amantem, de te sollicitum ac sperantem. Naturæ debitor non aliter es quam ego, quam quicumque unus e populo. Tempus fugax et non rediens, fortuna instabilis, vita brevis, hora mortis incerta, unum hic remedii genus, tempori parcere, fortunæ non fidere, vitam rebus extendere, morti paratum semper corpus atque animum habere: quod non potest qui suum principale negotium non implevit. Vitæ finis quamvis incertus sit, illud tamen est certum, quod longe esse non potest. Is cum venerit, e cunctis opibus tuis atque imperii nil tibi supererit, nisi quantum ad æternam animæ vitam et nominis immortalem gloriam bene vivendo quæsieris. Bene autem vivere non potest qui id, ad quod unum et summum et maximum natus est, negligit. Tu quod olim dixi, ad imperium natus es, amplum excelsumque opus: illud age fideliter, bene si vixisse vis videri: alioquin quid iuvat illas tuas ultimas mundi horas composuisse magnifice? Hoc et sine imperio potuisses, et fortasse facilius. Minus

fuiſſet invidiæ ac laborum tibi. Aliud infinite maius reſtat : illud aggredere. Nec te rei terreat magnitudo. Nihil eſt quod imperii maietas ac providentia atque iuſtitia, et his viribus armata, non poſſit. Quod ſi forſan negatus tibi cœlitus rerum finis ; tamen glorioſo in actu, quam in quiete languida mori, multo melius multoque felicius opinor. Et hoc eſt quod divæ memoriæ avum tuum omnibus ſæculis glorioſum fecit. Ecce, Cæſar, et nunc et ſæpe olim, non blanditus ſed vero ſtudent, neque verborum cultui ſed expreſſioni ſenſuum intentus, dixi anxie quod in animo meo fuit, quod ne fruſtra dixerim Deum precor et te. Vale, decus et gaudium et ſpes noſtra.

Patavii, III. Idus Decembris.



FRANCISCI PETRARCÆ  
 DE REBUS FAMILIARIBUS  
 LIBER VICESIMUSQUARTUS.

---

EPISTOLA I.

FRANCISCUS PETRARCA PHILIPPO EPISCOPO CAVALLICENSI  
 S. P. D.

De brevitate vitæ.

Ante hos triginta annos, ut ætas furtim labitur, qui mihi in tergum verso dum cuncta simul intueor, vix dies vixque horæ totidem, at dum singula metior et meorum cumulos laborum explicare incipio, totidem sæcula videri solent; scripsi ad venerabilem et egregium illum senem Raymundum Superantium, qui verum Iurisconsulti nomen habuit, quod ut vides, multi falso occupant, iureque sapientis et aspectum et affectum præstitit, quique liberrima contumacia ad extremum usus, pro veritate et iustitia adversus Romanum quoque Pontificem stetit alto animo atque invicto, propter quod, multis longe imparibus evectis, unus ille gloriosissime non ascendit, sed multa cum laude propriaque non adventitia maiestate, suum semper tenuit locum, nec promoveri appetens nec promotus. Ad hunc ergo talem senem, qui ætatulam, quique ingeniolum meum et amare et fovere atque

omni opere consilioque et verbōrum stimulis attollere cœperat, familiariter, ut solebam, scribens in epistola quadam, quæ pro ratione temporis in prima acie stans, procul hanc præit, ingenue professus sum cœpisse me iam tunc orientis vitæ fugam cursumque cognoscere. Nunc autem miror quidem; sed fateor, verum scripsi. Quod si illa ætate verum fuit, quid nunc putas, quando quod præsagiebam accidit? Erat in oculis mihi ætas florentissima lumenque iuventæ purpureum, ut ait Maro. Sed legebam apud Flaccum:

Inesperata tuæ cum veniet pluma superbiæ,  
Et, quæ nunc humeris involitant, deciderint comæ,  
Nunc et qui color est punicæ flore prior rosæ  
Mutatus, Ligurinum in faciem verterit hispidam:  
Dices: heu (quotiens te in speculo videris alterum)  
Quæ mens est hodie, cur eadem non puero fuit?  
Vel cur his animis incolumes non redeunt genæ?

Legebam apud alium Satyricum:

Festinat enim decurrere velox  
Flosculus angustæ miseræque brevissima vitæ  
Portio; dum bibimus, dum sorta, unguenta, puellas  
Poscimus, obrepit non intellecta senectus.

Hæc et his similia legebam, non ut mos ætatis est illius soli inhians grammaticæ et verborum artificio, sed nescio quid aliud illic abditum intelligens, quod non modo condiscipuli, sed nec magister attenderet, primitiarum licet artium doctus vir. Audiebam divino clamantem ore Virgilium:

Optima quæque dies miseris mortalibus ævi  
Prima fugit, subeunt morbi, tristisque senectus,  
Et labor, et duræ rapit inclementia mortis.

Et alibi :

Breve et irreparabile tempus  
Omnibus est vitæ:

Et iterum :

Sed fugit interea, fugit irreparabile tempus.

Vix satis fugam temporis exprimere posse videbatur irreparabilemque iacturam, nisi sæpius repetendo. Audiebam Ovidium, cuius quo lascivior Musa, eo mihi severior graviorque confessio, et incorruptius testimonium veri erat. Dicebat ille autem :

Labitur occulte, fallitque volatilis ætas  
Et nihil est annis velocius.

Et alio loco :

Tempora labuntur, tacitisque senescimus annis;  
Et fugiunt fræno non remorante dies.

Ipsam quem dixi Flaccum audiebam :

. . . . . Currit enim ferox ætas,

dum de adolescentia loqueretur : et iterum de omni ætate :

Eheu ! fugaces, Posthume, Posthume,  
Labuntur anni, nec pietas moram  
Rugis et instanti senectæ  
Afferet, indomitæque morti.

Et iterum :

Vitæ summa brevis spem nos vetat inchoare longam.

Et rursus :

spatio brevi  
Spem longam reseces : dum loquimur fugerit invida  
Ætas :

Et præterea :

fugit retro  
Levis iuventus, et decor, arida  
Pellente lascivos amores  
Canitie, facilemque somnum.

Et ne quando redituram cum semel fugisset expectarem  
audiebam,

Nec Coæ referunt iam tibi purpuræ,  
Nec clari lapides, tempora quæ semel  
Notis condita fastis  
Inclusit volucris dies.

Nimis apud Flaccum moror. Audiebam Senecam :  
*Corpora nostra rapiuntur fluminum more. Quidquid  
vides, currit cum tempore. Nihil ex his quæ videmus  
manet. Ego ipse dum loquor mutari ista, mutatus sum.*  
Audiebam Ciceronem : *volat enim, inquit, ætas. Et ite-  
rum : quis est tam stultus, quamvis sit adolescens, cui sit  
exploratum se ad vesperam esse victurum? Nec multo  
post : moriendum enim certe est : et id incertum an hoc  
ipso die. Et rursus idem alibi : an id exploratum cui-  
quam potest esse quomodo sese habiturum sit corpus non  
dico ad annum sed ad vesperam?* Mitto alios : operosum  
est enim singulos et singula prosequi, et puerile potius  
quam senile studium flosculos decerpere. Verum hæc  
et his mille similia sæpe ex me, sæpe mecum in his  
ipsis quorum erant auctorum pratis, ex commodo de-  
cerpsisti. Ego autem adolescens quanto his intelligendis  
ardore flagraverim aliquot per annos, quando nec dum  
aliud scriptorum genus tam familiariter noram, libelli  
indican, qui mihi illius temporis supersunt, et signa  
meæ manus talibus præsertim affixa sententiis, ex

quibus eliciebam et supra ætatem ruminabam præsentem futurumque illico statum meum. Notabam certa fide non verborum phaleras sed res ipsas, miseræ scilicet vitæ huius angustias, brevitatem, velocitatem, festinationem, lapsum, cursum, volatum, occultasque fallacias, tempus irreparabile, caducum et mutabilem vitæ florem, rosei oris fluxum decus, irredituræ iuventutis effrænam fugam, et tacitæ obrepentis insidias senectutis, ad extremum rugas et morbos et tristitiam et laborem et indomitæ mortis inclementiam implacabilemque duritiem. Quæ cum scholæ atque ævi comitibus quædam quasi somnia viderentur, mihi iam tunc, omnia videntem testor Deum, et vera et pene præsentia videbantur. Et seu ille oris verus decor, seu error esset ætatis (ferme enim omnes adolescentes sibi formosissimi videntur, etsi deformes sint), mihi non alteri dictum rebar, quotiens pastorium illud vel legerem vel audirem :

O formose puer, nimium ne crede colori.

Scio ego me verum loqui. Scit et ille melius, quem testem feci: quo magis id reputans miror me tales inter curas iuvenilibus tamen amoribus et erroribus potuisse raptari. Sentio: fumus rerum hebetavit visum, et ætas impetuosior prævium illud animi lumen extinxit.<sup>1</sup> Sed bene habet, si vel nunc videre aliquid incipio: felicissimus quidem est quem nullus error

<sup>1</sup> Primam hanc libri XXIV. epistolam unus edidit Crispinus (*Lugduni*, 1601, p. 469), sed illam verbis: *lumen extinxerit*, subiuncto *Vale*, terminavit. Omnia quæ sequuntur ibique penitus desiderantur, ex codice Passioneiano Bibliothecæ Urbanæ Angelicæ (V. 1. 17) fideliter decerpsimus.



avertit. Sed quoniam rara est sine exceptione felicitas, ille est abunde felix, cui inter fuscas errorum nubes coelestis tandem lux affulserit. Quid nunc igitur reris? Ecce quæ tunc videbantur, præsentia iam sunt. Video nunc tantam et tam rapidam vitæ fugam, ut vix illam animo metiri possim: et cum incomparabilis sit animi velocitas, prope velocior vita est. Sentio singulos dies horasque et momenta me ad ultimum urgere: quotidie ad mortem eo: imo ædepol, quod iam tunc, dumadolescere videbar, inceperam, quotidie morior: et parum abest quin iam mihi præterito sit utendum. Magna enim ex parte actum est quod agendum erat. At quod superest, minimum id quidem, ut auguror, nunc dum tecum loquor agitur: vetus sententia mea est. Fallunt aut falluntur procul dubio qui nescio quam ætatem consistentem dicunt. O vos qui huic corpusculo tam multa promittitis, ut libet in reliquis: unum hoc nolite promittere, stabilem rei statum. Curate fideliter, solícite, prudenter, præstate quod in vobis est, pellite morbos e vestigio reversuros, differte senium, quod auferri nisi mortis ope non potest: obstate morti mox venturæ, frænate viridem ætatem, sed fræna morsuram interque manus frænantium abituram; at cavete quin stare illam extimetis. Si enim vita brevis est, quæ prima vestræ professionis est vox, quomodo vitæ partes longæ sunt? Essent longæ autem si consisterent. Fugit ac rapitur ætas omnis, nulla consistit. Omnis itaque ætas fugit æquis passibus, sed non æque perpenditur, quia adscendentium descendentiumque conspectior motus est. Ego hæc quæ olim opinabar scio et video, et vos, si non obstruitis oculos, videtis. Quis enim non

videat vitæ cursum, præsertim ex quo viæ medium transivit? Certe ego tunc (memini) ante dumtaxat intendebam oculos, nimiumque retro erat: quod restabat plusculum, ut res docuit, sed incertum et expositum infinitis casibus, inter quos, fessis itinere ac dimissis medio calle comitibus, sæpe me solum circumspectans, non sine gemitibus ad hunc diem veni. Hoc intra me et coæquevos meos, quin etiam senes nostros intererat: quod idipsum illis certum et immensum erat, mihi exiguum atque ambiguum videbatur: deque hoc crebri sermones et iuvenilis altercatio, in qua senum præponderabat auctoritas, et ego prope iam amentiae suspectus eram. Nam nec quod in animo erat exprimere noveram, et si nossem, nova ætas, nova opinio parum fidei merebantur. Itaque fando victus in arcem silentii confugiebam. Tacitis tamen ex actibus quænam essent utrorumque sententiæ apparebat. Illis enim non pueris modo, sed senibus longæ spes, onerosa coniugia, laboriosa militia, anceps navigatio, avara studia instituebantur; mihi, rursus in testimonium Christum voco, iam ab illa ætate nulla ferme spes, iam tunc teneros cogitatus fallere incipiente fortuna. Itaque quidquid fortunatius accidit, quod Deo præstante multum est, non speranti accidit: si quid interdum animosius speravi, credo ut sperare dediscerem, non accidit. Et sane dedidici usque adeo, ut licet in dies auctus fortunæ muneribus, et illa grato animo percipiam, et nihil ideo plus sperem quam si nihil percipissem: atque hæc mihi cum amicis una lis maneat, qui morituro longas spes obiiciunt, quas, ut dixi, vivere incipiens respuebam. Hæc me seu debilitas, seu

bonitas naturæ, a coniugio in primis atque ab aliis vitæ difficultatibus, in quas me parentum amor et amicorum consilia urgebant, liberum et immunem tenuit. Ne tamen ad unum cuncta parentibus negarem, de sperante nihil multa sperantibus, uno me passus fui civilis studii fasce curvari, unde maiores provectus, præter me solum, ab omnibus sperabantur. Ego in ea facultate quid possem et quid vellem sentiebam, neque ingenio diffidebam, sed ægre ferebam lucrum ex ingenio meo quæri. Quamobrem ut primum mihi relictus sum, fessus invitæ sarcinæ subduxi humeros, meoque more sine solitudine, sine spe iter inceptum agere institui, multa demum supra spem consequutus, multa passus. Neve forsitan ab ignaris hoc sermone desperationis arguar, de his tantum loquor, quæ fortunæ res dicuntur, in aliis ut peccator multum spero. Hæc mihi cum illo qui ab initio me novit, dulce fuit recordari. Neque vero ab re ipsa longe digredi visus eram, quia mihi totum hoc intellecta iam inde vitæ brevitatis consilium dabat. In quo ipso, nisi fallor, aliquantulum vivendo provectus sum : tantumque inter hanc et illam ætatem refert, quod tunc doctis viris, ut præfatus eram, nunc et illis et mihi et experientiæ fidem do : tunc ante prospiciebam in limine dubitans incertusque animi : nunc ante retroque respiciens quod legebam video, quod suspicabar experior. Video me ad finem tanto impetu propinquare, quanto ne dici quidem possit, nec facile captari. Non mihi poetæ, nec philosophi quidem munus ad hanc rem : ipse mihi testis, ipse auctor idoneus. Brevi mutatus oris, nec minus animi habitus, mutati mores, mutatæ curæ, mutata studia : nil est

mihi quale tunc fuerat, non dico dum epistolam illam scripsi, sed dum hanc scribere incepti. Nunc eo, et sicut calamus hic movetur, sic ego moveor, sed multo velocius: hic enim pigre dictanti animo obsequitur: ego dum naturæ legem sequor, propero, curro, rapior ad extrema, iamque oculis metam cerno. Quidquid placuit displicet, quidquid displicuit placet. Ego ipse mihi placui, me dilexi: nunc, quid dicam? odi. Sed mentior: nemo unquam carnem suam odio habuit. Dicam non me diligo? Id quoque quam vere sim dicturus nescio. Illud intrepide dixerim: non diligo peccatum meum, neque mores meos diligo, nisi qua mutati in melius correctique sunt. Imo, quid hæsitent? et peccatum, et mores malos, et me ipsum talem odi. Ab Augustino enim didici neminem fieri posse qualis cupit, nisi se odit qualis est.

Ecce ad hunc locum epistolæ perveneram deliberansque quid dicerem amplius seu quid non dicerem, hæc inter, ut assolet, papyrus vacuum inverso calamo feriebam. Res ipsa materiam obtulit cogitanti inter demersionis morulas tempus labi, meque interim colabi, abire, deficere et, ut proprie dicam, mori. Continue morimur, ego dum hæc scribo, tu dum leges, alii dum audient dumque non audient. Ego quoque, dum hæc leges, moriar, tu moreris dum hæc scribo, ambo morimur, omnes morimur, semper morimur. Nunquam vivimus dum hic sumus, quamdiu virtuosum aliquid agentes sternimus iter nobis ad veram vitam, ubi contra nemo moritur, vivunt omnes, ubi quod semel placuit semper placet, cuius ineffabilis et inexhaustæ dulcedinis nec modus animo capitur, nec mu-

tatio sentitur, nec timetur finis. Memorata mihi sæpius et laudata naturalis historia repetenda est. Hypanis septentrionalis fluvius æqui dexter (*sic*) Tanais fertur in pontum : ibi bestiolas quasdam nasci scribit Aristoteles, quæ nonnisi diem unum vivunt. Et quanto nobis, oro te, longior vita est? Quædam mane obeunt, hæ quidem iuvenes; quædam vero sub meridiem, hæ iuventæ medio; aliæ inclinata iam ad occasum die, hæ iam perfectiores; aliæ occidente sole, hæ demum decrepitæ moriuntur, eoque magis si forte solstitium sit æstivum. Confer nostram longissimam ætatem cum omni æternitate, ut ait Cicero: in eadem propemodum brevitate qua illæ bestiolæ reperiemur. Sic est hercle! nec quidquam ad contemplandam vitæ brevitate die reor efficacius. Distinguamus ut libet; multiplicemus annorum numeros: fingamus ætatum nomina. Tota vita hominis dies unus est, nec æstivus quidem, sed hibernus dies, in quo mane alius, alius die medio, alius tardiuscule, alius autem sero moritur: hic tener ac floridus, hic durus, hic iam aridus atque consumptus. *Mane*, inquit Psalmista, *sicut herba transeat, mane floreat et transeat, vespere decidat, induret et arescat*. Multi moriuntur senes, et si sapientibus credimus, nemo non senex non moritur, quia sua cuique fit senectus vitæ finis. Maturi autem pauci: qui diu vixerit nullus; nisi cui persuasum sit inter brevissimum atque longissimum, sed finitum tempus, nihil interesse. Qua in re meo veteri iudicio nihil additum est, nisi quod, ut dixi, quidem doctis viris ante crederam, mihi iam credo, et quod opinabar scio: nam nec illi aliter quam videndo et observando didicerunt

quod velut malæ fidei pontem in transitu cavendum sequentibus proclamarent. Certe ego epistolam illam meam nunquam hodie nisi admirans lego, et attendens mecum dico: generosæ sementis aliquid habebat iste animus, si eum in tempore diligentius coluisses.

Hæc tibi ideo, prudentissime virorum, scribenda credidi, non ut novi aliquid afferrem; si enim per te ipsum ista non nosses, vix mihi ut crederes impetarem; sed ut tuam meamque memoriam situ obsitam et implicitam rebus excuterem: ut quod tacito me facere te et fecisse non dubito, mecum ad contemptum vitæ brevis, et inevitabilis fati tolerantiam accingaris: et sic animum formemus, ut quidquid supervacuum has inter angustias inclusis, et ad alta nitentibus ultro licet obtulerit fortuna, quod, Deo gratias, sæpe iam fecimus, magnifice contemnamus. Vale.

## EPISTOLA II.

FRANCISCUS PETRARCA PULICI VICENTINO S. P. D.

Narrat se in contentionem adductum cum aliquo qui Ciceronem nullo modo reprehendi non patiebatur.

In suburbano Vicentino per noctem hospitatus novam scribendi materiam inveni. Ita enim accidit ut sub meridiem Patavio digressus, patriæ tuæ limen attingerem, vergente iam ad occasum sole. Ibi ne igitur pernoctandum an ulterius procedendum (quod et festinabam et longissimæ lucis pars bona supererat), deliberaturus hærebam: dum ecce (quis se celet

amantibus?) tuus, et magnorum aliquot virorum, quos abunde parva illa civitas tulit, gratissimus interventus dubium omne dimovit. Ita enim fluctuantem animum alligastis varii et iucundi fune sermonis, ut ire cogitans staret, et non prius labi diem quam noctem adesse perpenderet. Et illo die et sæpe alias expertus sum, nulla re alia magis tempus non sentientibus eripi, quam colloquiis amicorum. Magni fures temporis sunt amici, etsi nullum tempus minus ereptum, minus perditum videri debeat, quam quod post Deum amicis impenditur. Illic ergo, ne infinita recenseam, meministi ut forte Ciceronis mentio nobis oborta est, quæ crebra admodum doctis hominibus esse solet. Ille tandem vario colloquio finem fecit: in unum versi omnes: nihil inde aliud quam de Cicerone tractatum est. Symbolum confecimus, et palinodiam sibi, seu panegyricum dici placet, alternando cecinimus. Sed quoniam in rebus mortalium nihil constat esse perfectum, nullusque hominum est, in quo non aliquid, quod merito carpi queat, modestus etiam reprehensor inveniat, contigit, ut dum in Cicerone, velut in homine mihi super omnes amicissimo et colendissimo, prope omnia placerent, dumque auream illam eloquentiam et cœleste ingenium admirarer, morum levitatem, multisque mihi deprehensam indiciis incostantiam non laudarem. Ubi cum omnes qui aderant, sed ante alios senem illum, cuius mihi nomen excidit, non imago, conterraneum tuum, annis verendum litterisque, attonitos viderem novitate sententiæ; res poscere visa est ut codex epistolarum mearum ex arcula promeretur. Pro-latus in medium addidit alimenta sermonibus: inter

multas enim ad coætanos meos scriptas, paucae ibi, varietatis studio et amœno quodam laborum diverticulo, antiquis illustrioribus inscribuntur, quæ lectorem non præmonitum in stuporem ducant; dum tam clara et tam vetusta nomina novis permixta compererit. Harum duæ ad ipsum Ciceronem sunt: altera mores notat, altera laudat ingenium. Has tu intentis omnibus cum legisses, mox amica lis verbis incaluit, quibusdam scripta nostra laudantibus, et iure reprehensum fatentibus Ciceronem, uno autem illo sene obstinatius obluctante, qui et claritate nominis et amore captus auctoris, erranti quoque plaudere, et amici vitia cum virtutibus amplecti mallet, quam discernere, nequid omnino damnare videretur hominis tam laudati. Itaque nihil aliud vel mihi vel aliis quod responderet habebat, nisi ut adversus omne quod diceretur, splendorem nominis obiectaret, et rationis locum teneret auctoritas. Succlamabat identidem protenta manu: « par-  
» cius, oro, parcius de Cicerone meo: » dumque ab eo quæreretur an errasse unquam ulla in re Ciceronem opinari posset, claudebat oculos, et quasi verbo percussus, avertebat frontem ingeminans: « heu! mihi,  
» ergo Cicero meus arguitur? » quasi non de homine, sed de Deo quodam ageretur. Quæsivi igitur: an Deum fuisse Tullium opinaretur, an hominem: incunctanter « Deum » ille respondit, et quid dixisset intelligens, « Deum, inquit, eloquii. » Recte, inquam!  
» nam si Deus est, errasse non potuit. Illum tamen  
» Deum dici nondum audieram. Sed si Platonem Ci-  
» cero suum Deum vocat, cur non ut Deum tuum  
» Ciceronem voces, nisi quia deos pro arbitrio sibi



» fingere non est nostræ religionis. » Ludo, inquit  
» ille: hominem, sed divino ingenio fuisse Tullium  
» scio. « Hoc, inquam, utique rectius. Nam cœlestem  
» Quintilianus dicendo, verum dixit. Sed si homo fuit,  
» et errasse profecto potuit et erravit. » Hæc dum  
dicerem, cohorrebat, et quasi non in famam alterius,  
sed in suum caput diceretur, aversabatur. Ego vero  
quid dicerem, Ciceroniani nominis et ipse mirator  
maximus? Senili ardori et tanto studio gratulabar  
quiddam scilicet Pythagoreum redolenti: tantam unius in-  
genii reverentiam esse, tantam religionem, ut humanæ  
imbecillitatis in eo aliquid suspicari sacrilegio proxi-  
mum haberetur gaudebam, mirabarque invenisse  
hominem, qui plus me illum diligeret, quem ego  
semper præ omnibus dilexissem, quique quam mihi  
puero fuisse memineram, eam de illo senex opinionem  
gereret altissime radicatam; nec cogitare quidem posset  
ea ætate, homo si fuit Cicero, consequens esse ut in  
quibusdam, ne dicam multis, erraverit: quod ego certe  
iam partim cogito, partim scio, etsi adhuc nullius  
æque delecter eloquio; nec ipse, de quo loquimur,  
Tullius ignorat, sæpe de propriis graviter questus er-  
roribus, quem nisi sic de se sensisse fateamur, lau-  
dandi libidine, et notitiam sui ipsius, et magnam illi  
partem philosophicæ laudis eripimus, modestiam. Cæ-  
terum nos die illo, post longum sermonem, hora demum  
interpellante, surreximus, atque inde integra lite di-  
scessum est: sed exegisti ultimum, ut quod tunc bre-  
vitas temporis non sinebat, ubi primum constitissem,  
exemplum tibi epistolæ utriusque transmitterem, quo  
re acrius excussa, vel sequester pacis inter partes,

vel si quo modo posses, Tullianæ constantiæ propugnator fieres. Laudo animum, ac postulata transmittō, dictu mirabile vincere metuens, vinci volens. At unum noveris: si vincis, plus tibi negotii superesse quam putas: pari etenim duello Annæus Seneca te poscit athletam, quem proxima scilicet carpit epistola. Lusi ego cum his magnis ingeniis, temerarie forsitan, sed amanter, sed dolenter, sed ut reor vere, aliquanto, inquam, verius quam vellem. Multa me in illis delectabant, pauca turbabant. De his fuit impetus ut scriberem, qui hodie forte non esset. Quamvis enim hæc propter dissimilitudinem materiæ ad extrema reiecerim, ante longum tamen tempus excuderam: adhuc quidem virorum talium fortunam doleo, sed non minus culpam. Nec te prætereant non me Senecæ vitam, aut Ciceronis erga Rempublicam damnare propositum. Neve duas lites misceas. De Cicerone nunc agitur, quem vigilantissimum atque optimum et salutarem consulem ac semper amantissimum patriæ civem novi. Quid ergo? Varium in amicitis animum, et ex levibus causis alienationes gravissimas atque pestiferas sibi, et nulli rei utiles, in discernendo insuper suo ac publico statu iudicium reliquo illi suo impar acumini: ad postremum sine fructu iuvenile altercandi studium in sene philosopho non laudo, quorum scito, neque te, neque alium quemlibet æquum iudicem fieri posse, nisi omnibus Ciceronis epistolis, unde ea lis oritur, non a transcurrente perlectis. Vale.

III. Idus Maias. Ex itinero.

---

## EPISTOLA III.

FRANCISCUS PETRARCA M. TULLIO CICERONI S. P. D.

Reprehendit naturam eius incostantem et contentiosam.

Epistolas tuas diu multumque perquisitas, atque ubi minime rebar inventas, avidissime perlegi : audivi multa te dicentem, multa deplorantem, multa variantem, Marce Tulli, et qui iampridem qualis præceptor aliis fuisses noveram, nunc tandem quis tu tibi esses agnovi. Unum hoc vicissim a vera caritate profectum non iam consilium sed lamentum audi, ubicunque es, quod unus posterorum tui nominis amantissimus non sine lacrimis fundit. O inquiete semper et anxie, vel ut verba tua recognoscas, o præceps et calamitose senex, quid tibi tot contentionibus et prorsum nihil profuturis simultatibus voluisti? Ubi et ætati et professioni et fortunæ tuæ conveniens otium reliquisti? Quis te falsus gloriæ splendor senem adolescentium bellis implicuit, et per omnes iactatum casus ad indignam philosopho mortem rapuit? Heu! et fraterni consilii immemor, et tuorum tot salubrium præceptorum, ceu nocturnus viator lumen in tenebris gestans, ostendisti secuturis callem, in quo ipse satis miserabiliter lapsus es. Omitto Dionysium, omitto fratrem tuum ac nepotem, omitto, si placet, ipsum etiam Dolabellam, quos nunc laudibus ad cælum effers, nunc repentinis maledictis laceras. Fuerint hæc tolerabilia fortassis. Iulium quoque Cæsarem prætervehor, cuius spectata clementia ipsum lacescentibus portus erat. Magnum

præterea Pompeium sileo, cum quo iure quodam familiaritatis quidlibet posse videbare. Sed quis te furor in Antonium impegit? Amor credo Reipublicæ, quam funditus iam corruisse fatebaris. Quod si pura fides, si libertas te trahebat (quod quidem de tanto viro licet opinari), quid tibi tam familiare cum Augusto? Quid enim Bruto tuo responsurus es? Si quidem (inquit) Octavius tibi placet non Dominum fugisse sed amiciorem dominum quæsisse videberis. Hoc restabat infelix, et hoc erat extremum Cicero, ut huic ipsi tam laudato malediceres, quòd tibi non dicam malefaceret, sed malefacientibus non obstaret. Doleo vicem tuam amice, et errorum pudet ac miseret tantorum: iamque cum eodem Bruto iis artibus nihil tribuo, quibus te instructissimum fuisse scio. Nimirum quid iuvat alios docere, quid ornatissimis verbis semper de virtutibus loqui prodest, si te interim ipse non audias? Ah! quanto satius fuerat philosopho præsertim in tranquillo rure senuisse, de perpetua illa, ut ipse quodam loco ais, non de hac iam exigua vita cogitantem, nullos habuisse fasces, nullis triumphis inhiasse, nullos inflasse tibi animum Catilinas. Sed de hoc quidem frustra. Æternum vale, mi Cicero. Apud superos, ad dexteram Athesis ripam, in civitate Transpadanæ Italiæ Verona. XVI Kalendas Quintiles, anno ab ortu Dei illius quem tu non noveras MCCCXLV.

---

## EPISTOLA IV.

FRANCISCUS PETRARCA M. TULLIO CICERONI S. P. D.

Ingenium eius laudibus effert: Virgilio eum comparat: opera eius enumerat: deflet cœcitatem ætatis suæ eorum incuriosæ.

Si te superior offendit epistola (verum enim, ut ipse soles dicere, quod ait familiaris tuus in Andria: *Obsequium amicos, veritas odium parit*), accipe quod offensum animum ex parte mulceat, nec semper odiosa sit veritas; quoniam veris reprehensionibus irascimur, veris laudibus delectamur. Tu quidem, Cicero, quod pace tua dixerim, ut homo vixisti, ut orator dixisti, ut philosophus scripsisti. Vitam ego tuam carpsi, non ingenium aut linguam, ut qui illud mirer, hanc stupeam. Neque tamen in vita tua quidquam præter constantiam requiro, et professioni philosophicæ debitum quietis studium, et a civilibus bellis fugam, extincta libertate, ac sepulta iam et complorata Republica. Vide ut aliter tecum ago, ac tu cum Epicuro multis in locis, sed expressius in libro de Finibus agebas. Eius enim ubilibet vitam probas, rides ingenium. Ego nihil in te rideo, vitæ tamen compatior, ut dixi, ingenio gratulor eloquiove. O Romani eloquii summe parens, nec solus ego, sed omnes tibi gratias agimus, quicumque latinæ linguæ floribus ornatur; tuis enim prata de fontibus irrigamus, tuo ductu directos, tuis suffragiis adiutos, tuo nos lumine illustratos ingenue confitemur: tuis denique, ut ita dicam, auspiciis ad hanc, quantulacumque est, scribendi facultatem ac propositum perve-

nisse. Accessit et alter poeticæ viæ dux : ita enim necessitas poscebat, ut esset et quem solutis et quem frænatiss gressibus præeuntem sequeremur, quem loquentem, quem canentem miraremur, quoniam cum bona venia amborum, neuter ad utrumque satis erat, ille tuis æquoribus, tu illius impar angustiis. Non ego primus hoc dicerem fortasse, quamvis plane sentirem: dixit hoc ante me, seu ab aliis scriptum dixit magnus quidem vir Annæus Seneca Cordubensis, cui te, ut idem ipse conqueritur, non ætas quidem sed bellorum civilium furor eripuit. Videre te potuit, sed non vidit, magnus tamen operum tuorum atque illius alterius laudator. Apud hunc ergo quisque suis eloquentiæ finibus circumscriptus collegæ suo cedere iubetur in reliquis. Verum expectatione te torqueo; quisnam dux ille sit quæris? nosti hominem, si modo nominis meministi: Publius Virgilius Maro est, Mantuanus civis, de quo egregie vaticinatus es. Cum enim, ut scriptum legimus, iuvenile quoddam eius opusculum miratus, quæsisvisses auctorem, eumque iuvenem iam senior vidisses, delectatus es, et de inexhausto eloquentiæ tuæ fonte, cum propria quidem laude permixtum, verum tamen præclarumque ac magnificum illi testimonium reddidisti. Dixisti enim :

Magna spes altera Romæ.

Quod dictum ex ore tuo auditum, adeo sibi placuit inseditque memoriæ, ut illud post annos viginti, te pridem rebus humanis exempto, divino operi suo eisdem penitus verbis insereret, quod opus si videre licuisset, lætatus esses, de primo flore tam certum te

venturi fructus præsagium concepisse. Nec non et latinis gratulatus Musis, quod insolentibus Graiis vel reliquissent ambiguam, vel certam victoriam abstulissent: utriusque enim sententiæ auctores sunt: te, si ex libris animum tuum novi, quem noscere mihi non aliter quam si tecum vixissem videor, ultimæ assertorem futurum, utque in oratoria dedisti, sic in poetica palmam Latio daturum, atque ut Æneidi cederet Ilias iussurum fuisse non dubito, quod iam ab initio Virgiliani laboris Propertius asseverare non timuit. Ubi enim Pierii operis fundamenta contemplatus est, quid de illis sentiret, et quid speraret aperte pronunciavit his versibus:

Cedite Romani scriptores, cedite Graii;  
Nescio quid maius nascitur Iliade.

Hæc de altero latinæ duce facundiæ, magnæque Romæ spe altera. Nunc ad te revertor. Quid de vita, quid de ingenio tuo sentiam audisti. Expectas audire de libris tuis quænam illos exceperit fortuna, quam seu vulgo seu doctioribus probentur? Extant equidem præclara volumina, quæ ne dicam perlegere, sed nec enumerare sufficimus. Fama rerum tuarum celeberrima atque ingens et sonorum nomen: perrari autem studiosi, seu temporum adversitas, seu ingeniorum hebetudo et segnities, seu quod magis arbitror, alio cogens animos cupiditas causa est. Itaque librorum aliqui (nescio an irreparabiliter) nobiscum, qui nunc vivimus, nisi fallor, procul dubio periire: magnus dolor meus, magnus sæculi nostri pudor, magna posteritatis iniuria. Neque enim satis infame visum est ingenia nostra negli-

gere ne quid inde fructuosum perciperet sequens ætas, nisi laboris etiam vestri fructum crudeli prorsus et intoleranda corrupissemus incuria. Namque quod in tuis conqueror et in multis virorum illustrium libris accidit: tuorum sane, quia de iis mihi nunc sermo erat, quorum insignior iactura est, hæc sunt nomina: Reipublicæ, Rei familiaris, Rei militaris, de Laude philosophiæ, de Consolatione, de Gloria, quamvis de hoc ultimo magis mihi spes dubia, quam desperatio certa sit. Quin et superstitum librorum magnas partes amisimus, ita ut, veluti ingenti prælio oblivione et ignavia superatis, duces nostros non extinctos modo sed truncos quoque vel perditos necesse sit lugere. Hoc enim et in aliis multis, sed in tuis maxime Oratoris, atque Academicorum, et Legum libris patimur, qui ita truncati fœdatique evaserunt, ut proprie melius fuerit periisse. Reliquum est ut urbis Romæ ac Romanæ Reipublicæ statum audire velis, quæ patriæ facies, quæ civium concordia, ad quos rerum summa pervenerit, quibus manibus quantoque consilio fræna tractentur imperii? Ister ne et Ganges, Iberus, Nilus et Tanais limites nostri sint? An vero quisquam surrexerit

Imperium Oceano famam qui terminet astris,  
aut

super et Garamantas et Indos  
Proferat imperium,

ut amicus ille tuus Mantuanus ait. Hæc et his similia cupidissime auditurum te auguror; id enim pietas tua suggerit, et amor erga patriam usque in tuam perniciem notissimus. Verum enim tacere melius fuerit.



Crede enim mihi, Cicero, si quo in statu res nostræ sunt audieris, excident tibi lacrimæ, quamlibet vel cœli vel erebi partem teneas. Æternum vale. Apud superos, ad sinistram Rhodani ripam in Transalpina Gallia eodem anno, XIV. Kalendas Ianuarii.

---

## EPISTOLA V.

FRANCISCUS PETRARCA ANNÆO SENECAE S. P. D.

Laudat eius de moribus doctrinam: obiurgat quod in aula Neronis Augusti constiterit, eiusque familiaritatem in pretio habuerit.

Petitam a tanto viro impetratamque veniam velim, si quid asperius dixero quam aut professionis tuæ reverentiam deceat, aut quieti sit debitum sepulchri. Qui enim me Marco Ciceroni, quem latinæ eloquentiæ lumen ac fontem, teste te, dixerim, non pepercisse legerit, si te et reliquis itidem vera loquens non pepercero, indignationis iustæ materiam non habebit. Iuvat vobiscum colloqui, Viri illustres, qualium omnis ætas penuriam passa est, nostra vero ignorantiam et eximium patitur defectum. Certe ego quotidie vos loquentes attentius quam credi possit audio, forte non inepte ut ipse a vobis semel audiar optaverim. Inter omnes quidem, qui clara nomina habuerunt tuum nomen adnumerandum esse non sum uescius, idque si aliunde nescirem, magno quodam et externo teste cognovi. Plutarchus siquidem Græcus homo et Traiani principis magister, suos claros viros nostris conferens cum Platoni et Aristoteli (quorum primum divinum, secundum dæmo-

nium Græci vocant) Marcum Varronem, Homero autem Virgilium, Demostheni Marcum Tullium obiecisset, ausus est ad postremum et ducum controversiam movere, nec eum tanti saltem discipuli veneratio continuit: in uno sane suorum ingenia prorsus imparia non erubuit confiteri, quod quem tibi ex æquo in moralibus præceptis obiiceret non haberet. Laus ingens ex ore præsertim hominis animosi, et qui nostro Iulio Cæsari suum Alexandrum Macedonem comparasset. Sed nescio quomodo sicut corporum sic animorum egregias formas, aliqua sæpe gravis iniuria naturæ variantis insequitur, sive quod omnium parens perfectionem mortalibus invidet (eoque magis, quo ad illam propius videntur accedere), sive quod inter multa decora deformitas omnis apparet, et quod in obscura facie facilis nævus, in præclara cicatrix fœda est; tanta lux in rebus ambiguï ex contrariorum vicinitate suboritur. Tu vero, venerande vir et morum, si Plutarcho credimus, incomparabilis præceptor, errorem vitæ tuæ, si non molestum est, mecum recognosce. In omnium sæculorum crudelissimum principem incidisti, et tranquillus nauta pretiosis mercibus onustam navim ad infamem et procellosum scopulum appulisti. Cur autem illic hæsisisti quæso te? An ut in tempestate aspera magisterium approbares? Sed hoc nemo nisi amens eligit; neque enim ut fortis perpeti, sic prudentis est optare periculum: quin etiam si libera prudentiæ relinquatur electio, otiosa semper erit fortitudo: nihil enim incidet, adversus quod illius auxilium implorandum sit. Modesta potius suis utens partibus et lætitiæ frænabit et votiva moderabitur. Sed quoniam innumerabiles casus eveniunt, et multa fert vita

hominum quibus consilia nostra vincuntur, idcirco virtus invicta furenti opponitur fortunæ, non quidem secundum electionem, ut dixi, sed secundum necessitatis inevitabiles ac ferreas leges. At ego numquid sanus satis videar si diutius cum magistro virtutum de virtute disputem, et probare nitar, id cuius contrarii probatio impossibilis sit, utile vel te iudice vel quolibet, qui inter vitæ huius fluctus mediocriter navigare didicerit, non fuisse consilium Syrtibus inhærere? Quod si laudem ex difficultate captabas, hoc ipsum summæ laudis erat, emergere, et in portum aliquem salva puppi confugere. Impendentem iugiter cervicibus tuis gladium videbas, nec timebas, nec tam ancipitis rei exitum providebas, præsertim quando, quod moriendi miserrimum genus est, intelligere poteras mortem tuam et fructu quolibet et gloria carituram. Veneras, o miserabilis senex, in hominis manus, qui quidquid vellet posset, nil nisi pessimum velle posset. Somnio iam a prima illius familiaritate deterritus, vigilans deinde multiplicibus argumentis fidem turbidæ quietis acceperas. Quid igitur tibi cum his laribus tam diu? Quid cum inhumano cruentoque discipulo? Quid cum dissimillimo comitatu? Respondebis: effugere volui, sed nequivi, et illum Cleantis versiculum prætendens, quo in latinum verso uti soles:

Ducunt volentem, fata nolentem trahunt.

Illud insuper proclamabis voluisse te opibus tuis renunciare, vel ut sic laqueum ubertatis abrumperes, teque in tutum ex tanto naufragio vel nudus eriperes. Res et veteribus historicis nota est, et mihi ipsi illorum ve-

stigiis incedenti haudquaquam silentio prætermissa. Verum si tibi palam loquens secretiora conticui, nunc autem quando ad te mihi sermo est, putasne silebo quod indignatio veritasque suggesserint? Adeas modo, et accede propius, ne qua externa auris interveniat sentiens non nobis ætatem rerum tuarum notitiam abstulisse. Testem nempe certissimum habemus, et qui de summis viris agens nec metu flectitur nec gratia, Svetonium Tranquillum. Is igitur quid ait? Avertisse te Neronem a cognitione veterum oratorum, quo scilicet in tui illum admiratione diutius detineres. Illi igitur pectori carus esse studuisti, cui ut fieres vilis et irrisione dignus habereris, vel simulato certe vel inaccersito linguæ vitio curare debueras? Prima est miseriarum tuarum radix ab animi levitate ne dicam vilitate profecta. Inanem studiorum gloriam, dure senex, nimis molliter, ne rursus dicam pueriliter, concupisti. Ipsum quod ad immitis viri magisterium accesseras, fuerit vel alieni iudicii, vel erroris, vel fati cuiuspiam, quando excusationem errorum studiosius aucupamur, et culpas nostras in fata reflectimus. Hoc votum hoc utique iudicii tui fuit; non potes accusare fortunam; quod optaveras invenisti. Sed quo pergis? Ah miser! postquam in admirationem tui vesanum iuvenem eo usque perduxeras ut nulla libertatis aut commeatus occasio superesset, numquid æquanimius saltem pati poteras iugum quod sponte subieras, et hoc saltem præstare ne domini tui nomen immortalibus maculis insignires? Non equidem ignorabas Tragoediam omne genus scripti gravitate vincere, ut ait Naso? Hanc tu quam mordaciter, quam venenose, quam acriter in illum

scripseris notum est. Ut est animus veri impatiens eo iniuriosius plectitur quo verius. Nisi forsan opinio vera est quæ tragoëdiarum non te illarum, sed tui nominis alterum vult auctorem. Nam et duos Senecas Cordubam habuisse Hispani testes sunt, et Octaviæ..... tragædiæ illi esse nomen. Locus aliquis hanc suspicionem recipit, quam si sequimur, quod ad te attinet, expers tu culpæ huius. Quod ad stilum nihil ille te inferior, quisquis est, ævo licet secundus ac nomine. Ita quantum morum demitur infamiæ, tantumdem ingenii famæ detrahitur. Omnis alioquin excusatio, nisi fallor, famosi carminis nulla est. Non quod ego sim nescius nullam vel ingenii vel sermonis acrimoniam nefandis actibus æquari posse hominis.... illius, si modo hominis nomine dignus est. Vide tamen num te deceret id scribere, de imperatore subiectum, de domino familiarem, de discipulo præceptorem : postremo de illo cui tam multa blandiri ne dicam blandiendo mentiri solitus eras. Relege libros quos ad eum ipsum de Clementia: revolve quem ad Polybium de consolatione dictasti : cætera denique tuarum vigiliarum monumenta percurre, si modo vel libros vel librorum memoriam Lethæi gurgitis unda non obruit. Pudebit credo laudati discipuli. Qua enim fronte de tali talia scripsisse potueris ignoro certe : ego illa sine pudore non relego. Sed hic rursus occurres, et adolescentiam principis, atque indolem multum spei melioris præferentem obiiciens, errorem tuum repentina morum eius mutatione tutabere: quasi vero hæc nobis ignota sint. Verum ipse considera quam sit inexcusabile, pau- cula personati principis opuscula, vel simulatæ pietatis voculas, obliquasse animum ac iudicium tibi tali viro,

tali ætate, tanta rerum experientia ac doctrina. Quid enim oro, tibi placuit ex illius actis, quæ ab historicis (ut eorum verbis utar) partim nulla reprehensione, partim non mediocri laude memorantur, prius scilicet quam se totum in probra et scelera demergeret? An aurigandi potius, an citharizandi studium? Quibus tam curiose deditum accepimus, ut secretius primum coram servis ac plebe sordida, deinde etiam in publico, universo populo spectante, princeps auriga decurreret, et quasi numen aliquod oblatam sibi citharam adoraret egregius citharista; quibus tandem successibus evectus et velut Italicis non contentus ingeniis Achaïam petiit, et Græcorum Musicorum adulationibus inflatus solos Græcos studiis suis dignos asseruit? Ridiculum monstrum, ferox bellua. An illud omen certum magni simul et religiosi principis habuisti, quod barbæ primitias et illas inhumani oris exuvias in capitolio consecravit? Ii certe sunt actus Neronis tui, Seneca: ea ætate qua historici adhuc eum inter homines numerant, tu eum inter deos, nec laudante nec laudato dignis præconiis conaris inserere, et, cuius an te pudeat nescio, sed me pudet, optimo principum divo Augusto præferre non dubitas: nisi forte illud maiori gloria dignum putas, quod Christianos, genus hominum revera sanctum et innocuum, verum ut sibi videbatur et Svetonio referenti, superstitionis novæ ac maleficæ, suppliciis affecit, omnis pietatis persecutor atque hostis crudelissimus. Ego quidem de te ista non suspicor, eoque magis propositum animi miror: nam et superiora illa frivola nimis et vana sunt, ultimum hoc nefarium etiam et immane. Et ita tibi visum: una quidem epistolarum tuarum ad

Apostolum Paulum non modo innuit sed fatetur. Neque tibi videri potuisse aliter certus sum illis tam sanctis ac cœlestibus monitis aurem non neganti, oblatamque divinitus amicitiam complexo; quam utinam arctius tenuisses ne divellereris in finem, ut cum illo præcone veritatis pro veritate ipsa et pro æterni præmi promissione, tantique promissoris pro nomine morereris. Sed progressus sum longius dicendi impetu, et intelligo me ad hæc exaranda serius processisse, quam ut ulla tempestivæ frugis spes appareat. Æternum vale. Apud superos in Gallia Cisalpina inter sinistram rapacis Entiæ et dextram pontifragi Parmæ ripam. Kalendis Sextilis anno ab ortu eius quem an tu rite noveris incertum habeo. MCCCXLVIII.

---

EPISTOLA VI.

FRANCISCUS PETRARCA M. VARRONI S. P. D.

Ingens laus eius, et de amissis operibus lamentatio.

Ut te amem ac venerer tua singularis virtus et industria, tuum me clarissimum nomen cogit. Sunt quidem quos licet extinctos, superstitibus tamen beneficiis ac meritis amamus; qui scilicet cæteris conspectu et odore graviter offendentibus ipsi doctrinis instruunt exemplisque delectant, quique licet hinc abierint in communem locum, ut ait Plautus in Cassina, tamen absentes prosunt præsentibus. Tu nihil aut modicum prodes, non tua quidem, sed omnia corrumpentis ævi culpa. Ætas nostra libros tuos perdidit. Quid ni autem unius nummorum custodiæ studiosa? Quis usquam invisæ rei

custos bonus fuit? Tu cognitioni rerum supra fidem et sine exemplo deditus, non ideo tamen actuosæ vitæ semitam declinasti, utroque calle conspicuus, et illis summis viris Magno Pompeio ac Iulio Cæsari merito tuo carus. Itaque sub altero militasti: ad alterum scripsisti libros mirabiles omnisque disciplinæ refertissimos, inter bellorum et publicorum munerum diversissimas curas. Magna est laus non ingenii modo sed propositi in actu perpetuo corpus simul atque animum habere, et posse et velle non ætati tuæ tantum sed omnibus sæculis prodesse. Ii equidem tanto studio elaborati libri digni non sunt habiti, qui per manus nostras ad posteros pervenirent: ardorem tuum nostra vicit ignavia. Nemo tam parcus pater unquam fuit, cuius non longævam parsimoniam brevi tempore luxuriosus filius posset evertere. Quid nunc libros perditos enumerem? quot librorum tuorum nomina totidem famæ nostræ sunt vulnera. Præstat igitur siluisse: nam et contrectatione recrudescit vulnus, et sopitus dolor damni memoria excitatur. Sed oh incredibilis famæ vis! vivit nomen sepultis operibus, et cum de Varrone prope nihil appareat, doctorum tamen omnium consensu, doctissimus Varro est, quod sine ulla dubitatione amicus tuus Marcus Cicero in iis ipsis libris in quibus nihil affirmandum disputat, affirmare non timuit, ut quodammodo luce tui nominis perstringente oculos, videatur interim dum de te loquitur suum principale propositum non vidisse. Quod Ciceronis testimonium quidam latinitatis angustiis circumscribunt, apud quos Romanorum doctissimi nomen habes, alii ad Græcorum metas extendunt, præcipueque Lactantius vir ex nostris eloquentia



et religione clarissimus, qui nullum Varrone doctiorem, ne apud Græcos quidem vixisse non dubitat. Sed inter innumerabiles præcones tuos famosissimi duo sunt: primus est ille cuius supra mentionem feci, coætaneus et concivis et condiscipulus tuus Cicero, qui multa tibi, et cui tu multa servata ex Catonis præcepto ratione otii scripsisti, cuiusque ut vivaciora sint opera, stili forsan dulcedo præstitit. Secundus vir quidam sanctissimus et divino ingenio Augustinus origine Afer, eloquio Romanus, cum quo utinam de libris divina tractantibus deliberare potuisses: summus nempe theologus futurus, qui eam quam poteras theologiam tam scrupulose tam anxie divisisti. Ut vero rerum tuarum nihil ignores, quamvis de te ita scriptum sit, legisse te tam multa ut aliquid tibi scribere vacasse miremur, tam multa scripsisse quam multa vix quemquam legere potuisse credamus, nullæ tamen extant vel admodum laceræ tuorum operum reliquiæ, e quibus aliqua pridem vidi, et recordatione torqueor summis, ut aiunt, labiis gustatæ dulcedinis. Et eos ipsos præcipue divinarum et humanarum rerum libros, qui nomen tibi sonantius peperere adhuc alicubi forsitan latitare suspicor; eaque multos iam per annos me fatigat cura, quoniam longa quidem ac sollicita spe nihil est importunius aut laboriosius in vita. Hæc hactenus. Tu vero solare animum, et laboris egregii fructum ex conscientia percipiens mortalia periisse non doleas. Sciebas peritura dum scriberes: mortali enim ingenio nihil efficitur immortale. Quid autem refert an statim, an post centum annorum millia pereat quod aliquando perire necesse est? Est quidem illustris simili studio flagrantium cohors haudquaquam fortunatior la-

borum; quibus exemplis, quamvis nemo tibi par fuerit, tamen utcumque sortem tuam æquanimius ferre debes; ex qua nunc aliquos numerare delectat, quoniam clarorum nominum vel sola commemoratio dulcis est. Sunt igitur hi: Marcus Cato Censorius, Publius Nigidius Antonius Gnipho, Iulius Hyginus, Ateius Capito, Caius Bassus, Veratius Pontificalis, Octavianus Herennius, Cornelius Balbus, Masurius Sabinus, Servius Sulpitius, Cloacius Verus, Caius Flaccus, Pompeius Festus, Cassius Hemina, Fabius Pictor, Statius Tullianus, multique alii quos enumerare longum est, olim clari viri nunc cinis ambiguus; et præter primos duos vix cognita nomina, quos omnes meis verbis tuo ore salutatos velim. Iulium et Augustum Cæsares et aliquot alios ex illo ordine quamquam studiosissimos atque doctissimos, teque nonnullis horum familiarissimum sciam, æquius tamen fuerit, nostris imperatoribus salutandos linquere, si tamen hos non illorum pudet, quorum studio ac virtute fundatum imperium everterunt. Æternum vale, vir clarissime. Apud superos in capite orbis Roma, quæ tua fuit, mea patria facta est. Kalendis Novembris anno ab ortu eius, quem utinam novisses, MCCCL.

---

### EPISTOLA VII.

FRANCISCUS PETRARCA QUINTILIANO S. P. D.

De illius institutionibus oratoriis quas libris rhetoricis M. T. Ciceronis ut sermonis elegantia sequiores, sic doctrinæ diligentia potiores habendos affirmat.

Olim tuum nomen audieram, et de tuo aliquid legeram, et mirabar unde tibi nomen acuminis. Sero in-

genium tuum novi. Oratoriarum institutionum liber heu! discerptus et lacer venit ad manus meas. Agnovi ætatem vastatricem omnium et dixi mecum: Facis ut solita es: nil bona fide custodis, nisi quod perdere lucrum erat. Ætas segnis et insolens tales mihi remittis insignes viros cum ignavissimos colas. Oh! sterilis et fœda pars temporum, tot rebus ediscendis ac scribendis dedita quæ melius nescirentur, opus hoc habere integrum neglexisti? Cœterum hic mihi de te veram liber opinionem attulit. Diu tuis in rebus erraveram: errori finem advenisse gratulor. Vidi formosi corporis artus effusos: admiratio animum dolorque concussit. Et fortasse nunc apud aliquem totus es,<sup>1</sup> et apud talem forsitan qui suum hospitem habet incognitum. Quisquis in te reperiendo fortunatior fuit, sciat se rem magni pretii possidere, quamque si noverit primas inter divitias locet. Tu quidem in his libris, qui quot sint nescio, sed haud dubie multi sunt, rem a Cicerone iam sene summo studio tractatam refricare ausus, quod factu impossibile iudicabam, post tanti viri vestigia novam non imitationis sed doctrinæ propriæ præclarique operis gloriam invenisti; adeo diligenter ab illo instructus orator a te comptus ornatusque est, ut multa ab illo vel neglecta vel non animadversa videantur. Atque ita singulatim omnia colligis duci tuo elapsa, ut quantum vinci eloquio, tantum diligentia vincere recto ni fallor iudicio dici possis. Ille enim suum oratorem per ardua causarum ac summos eloquentiæ vertices agit, et iudicialibus bellis ad victoriam format. Tu longius repetens oratorem tuum per

<sup>1</sup> Ad hæc verba in Codice Passioneiano legitur. « *Hoc verum fuit quia Costantiæ repertus est lotus.* »

omnes longæ viæ flexus ac latebras ab ipsis incunabulis ad supremam eloquii arcem ducis. Placet, delectat et mirari cogit, eo namque aspirantibus nihil utilius, Ciceroniana claritas: provectos illuminat, et celsum validis iter signat. Tua sedulitas ipsos quoque fovet invalidos, et optima nutrix ingeniorum lacte humili teneram pascit infantiam. Sed ne tibi veritas blanda suspecta sit, mutandus est stilus. In te igitur re apparuit verum esse quod Cicero idem ait in rhetoricis oratori minimum de arte loqui, multo maximum ex arte dicere. Non tamen ut ille Hermagoræ de quo agebat, sic ego tibi horum alterum eripio: utrumque concesserim: sed hoc mediocriter, illud eximie, atque adeo excellenter ut vix quidquam adiici iam humano posse videatur ingenio. Equidem quantum hoc tuo magnifico opere collato cum eo libro quem de causis edidisti (qui idcirco non periit ut constaret ætatem nostram optimarum rerum præcipue negligentem mediocrium non ita) satis intelligentibus patet, multo te melius cotis officio functum esse, quam gladii, et oratorem formare potentius quam præstare. Id ne ad iniuriam trahas velim: sed intelligas in te ipso in que aliis nunquam sic ingenium unum par ad omnia, ut non aliqua in parte se vincat. Magnus fateor vir fuisti, sed instituendis formandisque magnis viris maximus: et qui si materiam idoneam nactus esses, te maiorem ex te facile gigneret; doctus nobilium cultor ingeniorum. Fuit autem tibi æmulatio non levis magni cuiusdam alterius viri, Annæum Senecam dico. Quos ætas, quos professio, quos natio iunxerat, seiunxit parium pestis livor. Qua in re nescio an tu modestior videare; siquidem nec tu illum

pleno ore laudare potes, et ille de te contemptissime loquitur. Ego si tantas inter partes iudex sim, quamquam indicari a parvis magne verear, meum iudicium dicam tamen. Ille uberior, tu acutior, ille altior, tu cautior: et tu quidem ingenium eius et studium et doctrinam laudas, electionem ac iudicium non laudas: stilum vero corruptum et omnibus vitiis fractum dicis. Ille autem te inter eos numerat quorum cum ipsis fama sepulta est, cum nec dum tua fama sepulta sit, nec tu illo scribente aut sepultus esses aut mortuus. Ille etenim sub Nerone abiit, tu post illius et Neronis abitum sub Galba Romam ex Hispania venisti, multosque ibi post annos sororis Domitiani principis nepotum curam ipso mandante suscipiens morum studiorumque iuveniliū censor factus, utriusque rei eximia spe, quod in te fuit, credo, fidem implevisti; tamen, ut statim post Plutarchus ad Traianum scribit, tuorum adolescentium temeritas in te refunditur. Nihil modo quod scriberem aliud fuit. Opto te incolumem videre, et sicubi totus es, oro ne diutius me lateas. Vale. Apud superos, inter dexterum Apennini latus et dexteram Arni ripam, intra ipsos patriæ meæ muros, ubi primum mihi cœptus es nosci, <sup>1</sup> eoque ipso tempore VII. Idus Decembris. Anno eius quem Dominus tuus persequi maluit quam nosse MCCCL.

<sup>1</sup> In Cod. X Plut. XXVI Bibl. Laurent. manu Iacobi seu Lapi de Castiglionchio legitur ad hæc verba « *Verum dicis, quia ego illum tibi donavi dum Romam peteres, quem ante, ut dixisti, nunquam videras.* »

## EPISTOLA VIII.

FRANCISCUS PETRARCA TITO LIVIO S. P. D.

Ingenium eius exaltat, librosque deperditos lamentatur.

Optarem, si ex alto datum esset, vel me in tuam vel te in nostram ætatem incidisse ut ætas ipsa, vel ego per te melior, et visitorum ex numero tuorum unus forem, profecto non Romam modo te videndi gratia, sed Indiam ex Galliis aut Hispania petiturus. Nunc vero quæ datur te in libris tuis video, non equidem totum, sed quatenus nondum sæculi nostri desidia periisti. Centum quadraginta duos rerum Romanarum libros edidisse te novimus: heu quanto studio, quantis laboribus! Vix triginta ex omnibus supersunt. Oh! mos pessimus nos metipsos de industria fallendi. Triginta dixi quia omnes vulgo id dicunt. Ego autem deesse unum iis ipsis invenio; novem et viginti sunt: plane tres decades, prima, tertia et quarta cui librorum numerus non constat. In his tam parvis tuis reliquiis exerceor quoties hæc loca, hæc tempora vel hos mores oblivisci volo, et sæpe acri cum indignatione animi adversus mores hominum nostrorum, quibus nihil in pretio est nisi aurum et argentum, atque obscœna corporum voluptas, quæ si in bonis habenda sunt, multo cumulatius multoque perfectius non tantum mutæ pecudis sed immobilis et insensibilis elementi, quam rationalis hominis bonum erit. Sed de hoc alias. Nunc tibi potius tempus est ut gratias agam tum pro multis tum pro eo nominatim quod oblitum sæpe præsentium malorum sæculis me felicioribus inseris, ut inter legendum saltem cum Corneliis, Scipioni-

bus Africanis, Læliis, Fabiis Maximis, Metellis, Brutis, Deciis, Catonibus, Regulis, Cursoribus, Torquatis, Valeriis, Corvinis, Salinatoribus, Claudiis, Marcellis, Neronibus, Æmiliis, Fulviis, Flaminiis, Attiliis, Quintiis, Curiis, Fabriciis, ac Camillis, et non cum his extremis furibus, inter quos adverso sidere natus sum, mihi videar ætatem agere. Et oh! si totus mihi contingeres, quibus aliis quantisque nominibus et vitæ solatium et iniqui temporis oblivio quæreretur. Quæ quoniam simul apud te nequeo, apud alios sparsim lego: profecto et eo in libro ubi te totum sed in angustias sic coactum video ut librorum numero nihil, rebus ipsis infinitum desit. Tu velim de antiquioribus Polybium, et Quintum Claudium, et Valerium Antiatem, reliquosque quorum gloriæ splendor tuus officit: de novis vero Plinium secundum Veronensem, vicinum tuum atque æmulum quondam tuum Crispum Sallustium salutes, quibus nuncia nihilo feliciores eorum vigilias fuisse quam tuas. Æternum vale rerum gestarum memoriæ consultor optime. Apud superos, in ea parte Italiæ, et in ea urbe, in qua et ego nunc habito, et tu olim natus ac sepultus es, in vestibulo Iustinæ virginis, et ante ipsum sepulcri tui lapidem VIII. Kalendas Martias: Anno ab ortu eius, quem, si paulo vixisses diutius, cernere vel natum audire potuisses, MCCCL.

---

## EPISTOLA IX.

FRANCISCUS PETRARCA ASINIO POLLIONI S. P. D.

Amplissima eius doctrinæ et rerum belli domique gestarum laus.  
Obiurgatio invidiæ qua laboravit in Ciceronem.

Dum venisset in animum ut familiaribus epistolis aliquot procul absentes eloquii duces, et rara quædam linguæ Italæ ornamenta complecterer, silentio tuum nomen obruere nolim, quod magnorum testimonio supremis quoque nominibus par videbam: sed quoniam pene nuda rerum ad nos tuarum fama pervenerat, magisque aliorum scriptis adiuta quam tuis, quod ipsum merito inter ævi nostri pudores ac damna quis numeret, breve fuerit quod tecum loqui habui. Tibi quidem consulari pariter ac triumphali viro, cum pro summi ingenii floridæque facundiæ laudibus proque aliis multis corporis atque animi fortunæque dotibus, tum pro eo expressim gratulor, quod sub optimo et studiorum ac virtutum amantissimo principe vixisti, æstimatorem rerum nactus idoneum. Oh! felix qui adhuc incolumi Augusto iustam vivendi mensuram assecutus, octuagesimo ætatis anno in Tusculano rure præclaram vitam tranquillo claudens exitu, evasisti cruentas Tiberii manus, in quas Asinius Gallus orator incidit, infausta progenies tua, quem diris ab illo suppliciis enecatum legimus. Bene quod in tantas miserias vergenti iam fato peropportuna mors adfuit, quæ oculos tuos saltem tam tristi spectaculo liberaret. Paucis expectandum annis erat, ut mæstissimus nati comes aut spectator fieres. Cuius eventu (si, ut quibusdam sapientibus visum est, extin-



ctos tangit fortuna superstitum) non parva felicitati tuæ portio subtrahitur. Unum tacita dissimulatione transire fidelis amicitiae lex vetat, qua clarorum omnis ævi hominum cineri ac famæ non aliter ac præsentium obstringor. Illud ergo tuum mihi displicuit quod Marco Tullio, cuius nomen tuo in primis præconio celebrari par fuerit et attolli, censor acerrimus, ne dicam repræhensor, asperrimus esse volueris. Quod si tibi iudicii libertas præstitit, ut iudicium non probo, sic ipsam tibi non invideo libertatem: sed ea certe parcius utendum fuisse denuncio, sero licet: etsi eadem adversus ipsum mundi Dominum sæpe usus ab aliis veniam facile merearis. Et sane in tanta fortunæ indulgentia frænare animum ac linguam subdifficile est: sed ex te ut exacta omnia requiram, ætatis et doctrinæ tuæ gravitas facit, utque te liberius hac in re quam vel filium ipsum tuum qui patrem secutus idem sensit, vel Calvum cæterosque participes eiusdem iudicii reprehendam. Neque vero tam mei ipsius oblitus sum, ut tibi in coetaneo tuo negem viso et cognito, quod ego mihi post tot sæcula in homine tam antiquo tantique nominis usurparim. Nullus hominum est cui non aliquid desit. Quis te talem virum vetet in vicini tui moribus notandum aliquid advertere, cum ego de longinquo in scriptis eius invenerim quæ notarem? At quod illius eloquentiæ famam tentas, facundiæque principatum vis eripere coelitus illi datum, et totius pene nostri orbis consensu sine litigio permissum, vide ne aperta nimis iniuria sit. Vide, tecumque Calvus videat, ne cum illo viro non æqua bella sumpseritis de eloquentiæ principatu, quæ nobis spectantibus vestra certamina facillimum est

videre. Itaque pridem coronæ iudicio victi estis. Vos tamen frustra nitimini et obstat, nec verum cernere interni luminis tumor sinit: magni fateor viri si maiorem pati possetis. At humana superbia, dum supra id quod est opinionibus falsis attollitur, infra id quod esse poterat vero iudicio deiecta redigitur. Plerique mortaliū alienæ gloriæ appetitu propriam amisere. Quod si vos huc forte livor impulit, quamvis utrobique et tumoris et livoris multi sint comites, eo tamen id ægrius in te fero quo in Calvo aliquam certe nec exiguam non livoris sed odii, in te nullam odii causam scio, et aliquanto mihi quidem indignius videtur in tam altum ingenium humi serpere solitam invidiam adscendisse. Aeternum vale, et ex Graiis Isocratem, Demosthenem et Aeschinem, ex nostris oratoribus Crassum et Antonium salvere iube, Corvinum quoque Messalam, et Hortensium, si modo illi memoria quam biennio antequam hinc migraret amiserat, carnis fasce deposito, restituta, huic alteri non erepta est. Mediolani in suburbio, Kalendis Sextilibus anno ætatis ultimæ, millesimo tercentesimo quinquagesimo tertio.

---

### EPISTOLA X.

FRANCISCUS PETRARCA HORATIO FLACCO S. P. D.

Se captum admiratione carminum eius quorum ex industria poeticam veluti syllogen contexit.

Regem te Lyrici carminis Italus  
 Orbis quem memorat, plectraque lesbia  
 Nervis cui tribuit Musa sonantibus,

Tyrrhenum Adriaco, Tuscus et Appulo,  
Quem sumpsit proprium Tiberis ab Aufido,  
Nec fuscam atque humilem spreuit originem;  
Te nunc dulce sequi saltibus abditis,  
Umbras et scatebras cernere vallium,  
Colles purpureos, prata virentia,  
Argentesque lacus antraque roscida.  
Seu Faunum gregibus concilias vagis,  
Seu pergis Bromium visere fervidum,  
Fulvam pampineo sive Deam Deo  
Affinem tacitis concelebras sacris,  
Amborum Venerem seu canis indigam,  
Seu Nymphas querulas et Satyros leves  
Et nudas roseo corpore Gratias,  
Seu famam et titulos Herculis improbi,  
Incestique aliam progeniem Iovis  
Martem sub galea, Palladis Ægida  
Late Gorgoneis crinibus horridam:  
Ledæos iuvenes mitia sidera  
Tutelam ratium fluctibus obrutos,  
Argutum citharæ Mercurium patrem:  
Verbis auricomum pectis Apollinem,  
Et Xanto nitidam cæsariem lavis.  
Germanam pharetra conspicuam, et feris  
Infestam, aut choreas Pieridum sacras:  
Sculpas, seu rigido marmore durius  
Heroas veteres; sique faves, novis  
Æternam meritis et memorem notam  
Affigis calamo, ne qua premat dies:  
Sic vatum studiis sola faventibus  
Virtus perpetuas linquit imagines,

Quarum præsidio semideos duces  
Drusum, et Scipiadas vivere cernimus,  
Nec non et reliquos inclyta gentibus  
Per quos edomitis Roma iugum dedit,  
In queis præradians lumine vivido  
Ut sol emicuit Cæsareum genus.  
Hæc dum tu modulans me cupidum præis,  
Duc aut velivolo si libet æquore;  
Duc aut aërio vertice montium;  
Duc et per liquidi Tiberis alveos  
Qua ripis Anio rura secans ruit,  
Olim grata tibi, dum superos colis,  
Unde hæc te meditans nunc tibi texui  
Nostrum, Flacce, decus; duc per inhospitas  
Silvarum latebras, et gelidum Algidum,  
Baianique sinus ~~stagna~~ tepentia,  
Sabinumque lacus, ruraque florea  
Soractisque iugum dum nivibus riget;  
Duc me Brundusium tramite devio;  
Lassabor minime et vatibus obviis  
Congressus placidos excipiam libens.  
Non me proposito temporis aut loci  
Deflectet facies. Ibo pari impetu  
Vel dum fæta uterum magna parens tumet,  
Vel dum ros nimiis solibus aruit,  
Vel dum pomifero fasce tremunt trabes,  
Vel dum terra gelu segnis inhorruit.  
Visurus veniam littora Cycladum,  
Visurus Thracii murmura Bosphori,  
Visurus Lybies avia torridæ,  
Nimbosique procul frigora Caucasii.

Quo te cumque moves, quicquid agis iuvat:  
Seu fidos comites sedulus excitas  
Virtutem meritis laudibus efferens,  
Seu dignis vitium morsibus impetis,  
Ridens stultitiam dente vafer levi;  
Seu tu blandiloquens carmen amoribus  
Dum complex teneris; sive acie stili  
Obiectas vetulæ luxuriem gravi;  
Sive urbem et populum dum scelerum reos  
Culpas, et gladios et rabiem trucem;  
Mæcenasque tibi dum canitur tuus  
Per partes operum primus et ultimus;  
Dum calcas veteres, et studium recens  
Natum magnanimi Cæsaris auribus  
Infers; dumque Floro carminis hispidi  
Limum seu tumidi carmine conficis;  
Fusum ruris opes et mala turbidæ  
Urbis, curve homini servit equus ferox,  
Crispum divitiis quis color edoces;  
Longis Virgilium luctibus abstrahis  
Atque ad lætitiā ver ubi panditur  
Hortaris placide et stultitiā brevem;  
Hirpinum profugi temporis admones,  
Torquatum et parili carmine Postumum  
Dum noctes celeres et volucres dies,  
Obrepens tacito dum senium gradu,  
Aut vitæ brevitās ad calamum redit,  
Aut mors præcipiti quæ celerat pede.  
Quis non præterea dulciter audiat  
Dum tu siderea sede superstitem  
Augustum statuis? Dum tunicam suis

Marti, nec satis est texere ferream,  
Acceditque adamas? Dum cuneos Ducum  
Vinclis implicitos curribus aureis  
Per clivum atque sacram victor agis viam?  
Quam pompam mulier dum cavet insolens  
Haud quaquam rigidas horruit aspidas?  
Ius fractum hospitii dum memoras dolis  
Pastoris Phrygii, nil Nerei minis  
Pacatum Paridi vaticinantibus?  
Dum Danae pluvia fallitur aurea?  
Dum virgo egregiis regia fletibus  
Tergo cornigeri fertur adulteri?  
Lætus sollicitus, denique mœstior  
Iratusque places; dum dubium premis  
Rivalem variis suspicionibus;  
Aut dum vipereas iure veneficas  
Execraris anus, vulgus et improbum;  
Dum cantas Lalagem nudus et asperum  
Tu solus tacita fronte fugas lupum;  
Infaustamque humeris effugis arborem;  
Fluctusque Æolio turbine concitos.  
Pronum te viridi cespite, fontium  
Captantem strepitus et volucrum modos,  
Carpentem riguo gramine flosculos,  
Nectentem facili vimine palmites,  
Tendentem tenui pollice barbiton,  
Miscentem numeros pectine candido,  
Mulcentem vario carmine sidera  
Ut vidi, invidiam mens vaga nobilem  
Concepit subito, nec peperit prius  
Quam te per pelagi stagna reciproci,

Perque omnes scopulos, monstraque fluctuum  
 Terrarum sequer. Limite ab Indico  
 Vidi solis equos surgere nitidos,  
 Et serum Oceano mergier ultimo;  
 Tecum trans Boream transque Notum vagor;  
 Iam seu fortuitas ducis ad Insulas,  
 Seu me fluctisonum retrahis Antium,  
 Seu me Romuleis arcibus invehis  
 Totis ingenii gressibus insequor.  
 Sic me grata lyræ fila trahunt tuæ,  
 Sic mulcet calami dulcis acerbitas.

---

## EPISTOLA XI.

FRANCISCUS PETRARCA PUB. VIRGILIO MARONI S. P. D.

Quærit de statu eius: quid Mantuæ, quid Neapoli agatur aperit: de  
 Roma tacet, eumque de pretio tribus maximis eius operibus  
 universorum iudicio addito certiore reddit.

Eloquii splendor, Latiae spes altera linguæ,  
 Clare Maro, tanta quem felix Mantua prole  
 Romanum genuisse decus per sæcula gaudet,  
 Quis te terrarum tractus, quotus arcet Averni  
 Circulus? An raucam citharam tibi fuscus Apollo  
 Percutit, et nigræ contexunt verba sorores?  
 An pius Elysiam permulces carmine silvam  
 Tartareumque Heliconæ colis, pulcherrime vatum,  
 Et simul unanimis tecum spatietur Homerus?  
 Solivagique canunt Phœbum per prata poetæ,  
 Orpheus ac reliqui, nisi quos violenta relegat  
 Mors propria conscita manu, sævique ministri

Obsequio, qualis Lucanum in fata volentem  
Impulit : arterias medico dedit ille cruento  
Supplicii graviore metu mortisque pudendæ :  
Sic sua Lucretium mors abstulit ac ferus ardor  
Longe aliis, ut fama, locis habitare coegit.  
Qui tibi nunc igitur comites, quæ vita, libenter  
Audierim, quantum vero tua somnia distent,  
Et vagus Æneas portaque emissus eburna:  
An potius cæli regio tranquilla beatos  
Excipit, ingeniisque arrident astra serenis  
Post Stygios raptus spoliataque Tartara, summi  
Regis ad adventum, magno certamine victor  
Impia qui pressit stigmatis limina plantis,  
Stigmatisque potens æterna repagula palmis  
Fregit, et horrissono convulsit cardine valvas?  
Hæc ego nosse velim. Tu, mundo si qua silenti  
Umbra recens nostra veniet tibi fors an ab ora,  
Quis tria cara tibi loca nunc, totidemque libellos  
Exitus excipiat nostris simul accipe verbis.  
Parthenope infelix rapto gemit orba Roberto,  
Multorumque dies annorum sustulit unus  
Prospera; nunc dubiis pendet plebs anxia fati,  
Innocuamque premunt paucorum crimina turbam.  
Optima finitimo quatitur sine fine tumultu  
Mantua, magnanimis ducibus sed fulta, recusat  
Invicta cervice iugum, civilibus usa  
Illa quidem dominis, externi nescia regni.  
Hinc tibi composui quæ perlegis, otia nactus  
Ruris amica tui. Quonam vagus avia calle  
Fusca sequi, quibus in pratis errare soleres  
Assidue mecum volvens, quam fluminis oram,



Quæ curvi secreta lacus , quas arboris umbras,  
Quas nemorum latebras, collisque sedilia parvi  
Ambieris , cuius fessus seu cespitis herbam  
Presseris accubitu, seu ripam fontis amœni,  
Atque ea præsentem mihi te spectacula reddunt.  
Quæ patriæ fortuna tuæ, pax quanta sepulchri  
Audisti. Quid Roma parens, hoc quærere noli :  
Hoc melius nescire puta ; melioribus aurem  
Ergo adhibe, et rerum successus disce tuarum.  
Tityrus ut tenuem senior iam perflat avenam,  
Quadrifido cultu tuus ut resplendet agellus,  
Ut tuus Æeneas vivit totumque per orbem  
Et placet et canitur, tanto quem ad sidera nisu  
Tollere conanti mors obstitit invida magnis  
Principiis: miserum Æneam iam summa premebant  
Fata manu, iamque ore tuo damnatus abibat,  
Arsurumque iterum pietas Augusta secundis  
Eripuit flammis, quem non morientis amici  
Deiecti movere animi, meritoque supremas  
Contempsisse preces ævo laudabitur omni.  
Æeternum, dilecte, vale, nostrosque rogatus  
Mæonium Ascræumque senes salvere iubeto.

---

## EPISTOLA XII.

FRANCISCUS HOMERO GRAIÆ MUSÆ PRINCIPI SALUTEM.

Respondet litteris eius nomine sibi missis: multa de eius operibus cura et impensa sua latine redditis. De suo græcarum litterarum studio, deque iis qui per Italiam tunc temporis eas colebant. Excusat Virgilium quod nullam eius in Æneide mentionem fecerit, eumque super cæteris de quibus scripsit, bono animo esse iubet.

Dudum te scripto alloqui mens fuerat, et fecissem, nisi quia linguæ commercium non erat. Nam nec ego græcis litteris discendis satis felix, et tu latinas, quibus olim per scriptores nostros adiutus uti solebas, sequentium negligentia dedidicisse videbare. Utrunque exclusus conticueram: unus vir nostro te latinum sæclo revehit. Non hercle avidius neque diutius Ulyxem tuum sua Penelope expectavit quam ego te. Iamque mihi sensim spes abibat: præter enim aliquot tuorum principia librorum, in quibus velut exoptati amici supercilium procul ambiguum et raptim vibrans, seu fluctuantis comæ apicem intuebar, latini nihil obtigerat, nihil denique sperabatur ubi te cominus contemplarer. Nam libellus ille vulgo qui tuus fertur, etsi cuius sit non constet, tibi excerptus tibi que inscriptus tuus utique non est. Vir iste si vixerit, totum te nobis reddet: et iam cœpit, ut non modo divinorum fructu operum eximio, sed tuarum quoque confabulationum illecebris perfruamur. Quarum unius ad me nuper latinis vasis græcus sapor allatus est. In quo plane sensi validum et velox ingenium posse omnia. Itaque Ciceronem licet eloquentia sua in carminibus destitutum, et Virgilium

oratione soluta illa felicitate ingenii derelictum scribat Annæus Seneca, quorum alter in multis interpret, alter in pluribus imitator tuus fuit, ambo autem latini duces eloquii sunt, utrumque tamen sic accipio ut quisque secum non cum alio collatus, ipse sibi impar seque inferior habeatur: alioquin et Ciceronis versiculos non ineptos, et Virgilii epistolas oratione libera non inamœnas legi. Quod in te quoque nunc experior, cuius etsi carmen proprium atque præcipuum opus sit, etsi Hieronymum quemdam ex nostris linguarum peritia insignem virum secutus aliquando scripserim, te non modo ad verbum in nostram linguam versum sed in tuam ipsam resolutum, videri de poeta eloquentissimo vix loquentem, nunc tamen, quod mirari compulit, et solutus places et latinus. Quidquid idcirco præfatus sim ne quem forte moveat, quod qui ligatis Virgilium, te solutis verbis alloquar: illum enim compellabam: tibi vero respondeo, atque ideo illic communem ipsius, hic non tuum illum veterem, sed epistolæ ad me missæ novum quemdam, et mihi quotidianum, tibi, ut reor, insolitum stilum sequor. Quamquam quid me utrique vestrum loqui dixerim? Strepere est quidquid ab ullo vobis dicitur: nimis excellitis, supraque hominem estis et toto vertice itis in nubila. Sed dulce mihi velut infanti est cum disertissimis nutritoribus balbutire. Et de stilo quidem hactenus: ad rem venio. Quereris de quibusdam, cum de omnibus prope iure optimo queri possis. Nam quid in rebus, quæso, hominum est quod querimoniis iustis vacet, nisi quod querelæ, ubi inefficaces esse cœperint, quodam modo iustæ esse desinunt? Carent enim non causa quidem iustitiæ, sed effectum, qui

est ut damnando præterita præsentibus consulant, futurisque provideant. Quia tamen interdum luctuosam animam exonerant, non usquequaque semper supervacuæ videri debent. His tu nunc, summe vir, affluïs, ex quibus longam licet epistolam texueris, ut longior tamen esset optavi : ita nihil animo longum sentias, nisi tædio adiuncto. Sed ut iam singula qua visum erit expediam, supra modum supraque fidem delectavit animum sciendi discendique avidum quod scripsisti de præceptoribus tuis olim mihi ignotis fateor, at deinceps tanti merito discipuli verendis : de poeticæ ortu quam longissime repetito, deque vetustissimis musarum cultoribus in quibus, præter notos Heliconis accolas, Cadmum, Agenoridem, et Herculem quemdam nescio an Alcidem locas : de patria demum tua, cuius apud nos opinionum nubes multa erat, nec ut video apud vos multa serenitas : de peregrinationibus insuper studiosis in Phœniciam atque Aegyptum ubi post te aliquot sæculis peregrinati sunt philosophi illustres et Pythagoras et Plato et Atheniensium legifer, idemque Pieridum serus cultor ille doctissimus senex Solon, qui tibi, quem vivens mirabatur, puto post obitum familiarissimus factus sit : denique de tuorum numero librorum quorum magna pars Italæ ipsis, vicinis ac proximis tuis, inaudita est. Nam hi barbari quibus utrinque contingimur, et a quibus non Alpe tantum aërea, sed toto utinam quoadusquam est pelago disiuncti essemus, vix non dicam libros sed nomen audiverunt tuum : ut intelligas quantula est hæc fama mortalium ad quam tanto anhelitu suspiramus. In iis sane tot dulcibus amarissimum illud de ipsorum librorum interitu miscuisti. Heu mihi ter et

amplius! Quam multa pereunt, imo quam nihil manet omnium quæ sub sole versabili cæca texit industria. Oh labores curasque hominum! Oh tempus breve sed perditum! Oh vanitatem superbiamque de nihilo quod sumus, quod agimus, quod speramus! Quis vero nunc lumini fidat ambiguo? Summus eloquii Sol eclipsim patitur: quis quæri audeat perire sibi aliquid, aut quis omnino mansurum sibi quidquam spondeat ex omnibus studiis suis? Non parva ex parte Homericæ vigiliæ perierunt, non tam nobis, nemo enim perdidit quod non habuit, quam Graiis, qui ne qua nobis in re cederent, ignaviam quoque nostram in litteris supergressi, Homeri libros multos quasi totidem alterius suorum luminum radios amisere: indigni qui hac tanta cœcitate fulgur illud habuisse gloriantur. Movit præterea suspenditque animum legentis quod de tuo fine memorasti. Quamvis enim etiam apud nostros illa mortis fama vulgata sit, atque ipse ego alibi famam sequens idem scripserim, sed nota ambiguitatis adhibita; iuvabat tamen, et, si sinis, iuvat de te simul ac Sophocle melius opinari, quam ut turbulentissimæ passionis animi mœror et gaudium tantum in tam cœlestibus potuisse videantur ingeniis. Nam de Philemonis exitu, si famæ credimus, ridiculo, graviora tandem et opinabiliora didicimus, non risu illum ut dicere solebant, sed vi quadam contemplationis altissimæ consopitum expirasse. Sed ad te unum sortemque tuam redeo, quam copiose admodum et graviter deplorasti. Solare autem quæso animum, faciesque, certus sum, si discussis passionibus ad te redis. Multa de imitatoribus, multa de indoctis insultatoribus questus es: iuste quidem in

omnibus, si solus hæc patereris, neque humana, quin et trita inter homines essent quæ te premunt: unde fit ut conquiescere debeas, summus in hoc numero, fateor, sed non unus. Iam vero de imitatione quid dicam? Debuisti præ sagire, dum tam alte alis animi te sublatum cerneres, nunquam tibi defuturos imitatores. Gaudendum vero talem te cui multi similes fieri velint, sed non multi possint. Quid ni autem gaudeas tu primi semper certus loci, cum ego ultimus hominum gaudeam, nec gaudere sat est, glorier quoque, tanti me nunc fieri, ut sit aliquis, si tamen est aliquis, qui imitari optet ac fingere, illud magis gavisurus tales imitatores fore qui me superent? atque illum non Apollinem tuum, sed meum verum ingenii Deum precor, ut si quis me imitatione dignum duxerit, nisu facili quem sequitur consequatur ac transeat. Ego mecum bene gloriose feliciterque agi credam, si ex amicis (nemo enim nisi amet imitabitur) multos mihi pares, aliquantoque felicius si superiores aspexero, quique ex imitatoribus sint victores. Si enim genitor, carnis filium se maiorem cupit, quid optare debeat pater ingenii? Tu qui maiorem victoremque non metuis, imitatores æquanimis fer. Quamquam et de victoria inter te et eum de quo multa quereris Virgilium, in libris Saturnalium magna lis pendeat, et quidam propterea nostrorum inter vos dubiam palmam velint, alii certam illi tribuant victoriam; quod non tam ut cuiusquam sententiæ faveam aut adverser, quam ut noris quid de te posteritas, et quam varie sensit, apposui. Ex his autem admoneor ut ante quam longius abeam Virgilium ipsum, cuius anima, ut Flaccus ait, non candidiorem aliam terra tulit, tibi,

optime dux noster, excusem. Profecto equidem quæ de illius imitatione dixisti, non vera modo sed vulgo etiam nota sunt, et multa alia quæ, verecundia dicam an modestia, siluisti, quæ tamen ex ordine ipsis in Saturnalibus scripta sunt, quamvis hoc loco ille suus iocus innotuerit, cui cum obiiceretur ab æmulis quod versus tibi tuos eriperet, magnarum virium esse respondit auferre clavam Herculi: nec sim dubius quin latentem salem ioci huius intelligas. Ne vero, quod multi faciunt, quem excusaturum me profiteor accusem, fateor plane quæ dicis omnia, neque ideo querelam tuam totis auribus accipio: quod scilicet nulla usquam tui nominis mentio apud illum sit exuviis onustum et ornatum tuis, cum Lucanus, ut vere memoras, Smyrnæi vatis honoris grata narratione meminerit. Adiuvere querimoniam tuam libet: et Flaccus sæpe tui meminit semperque magnifice; nam et quodam loco te philosophis ipsis præfert, et alio primam tibi inter poetas sedem tribuit. Meminit tui Naso et Iuvenalis et Statius. Sed quid memores memorem? Nemo fere nostrum tui immemor fuit. Quid ergo, inquires, unum illum tam ingratum patior quem omnibus gratiorem merui? Ante quam tibi respondeam, addam etiam nunc querelæ. Nequis enim ingratum æque forsitan in omnes putet, et Musæi et Lini et Orphei non semel ille quod meminerit, quodque humilior fuit, et Hesiodi Ascræi et Theocriti Syracusii poetæ: postremo, quod nunquam si quis in illo esset livor sineret, nec Varum, Gallumque, neque alios coætaneos suos tacet. Quid vero? Num satis auxisse iam videor querelam quam vel minuere vel auferre decreveram? Utique si nil amplius dixero. Sed attendenda

rerum ratio, et, quidquid agas, in consilium evocanda, præsertimque si iudices. Nempe ille Theocritum in Bucolicis ducem nactus, in Georgicis Hesiodum quemque suis locis inseruit. Et cur, inquires, tertium in heroico carmine ducem habens, nulla eius operis in parte me posuit? Posuisset, mihi crede, mitissimus verecundissimusque mortalium, quodque de illo scriptum scimus omni probatus vita, nisi mors impia vetuisset. Licet autem alios, ubi occurrit atque ubi commodum fuit, adnotasset, tibi uni cui multo amplius debebat, non fortuitum sed certum certoque consilio destinatum reservabat locum. Et quem reris, nisi eminentiorem cunctis atque conspectiorem? Finem ergo præclarissimi operis expectabat, ibi te suum ducem tuumque nomen altisonis versibus laturus ad sidera. Ubi enim, quæso, dignius quam in fine viæ dux laudandus? Multum habes igitur quod de morte festina nimis merito queri possis, habet et Italus orbis tecum : de amico nihil. Quod sic esse, vicino et simili coniicies ab exemplo. Nam ut te ille, sic illum imitatus est Statius Papinius, cuius supra mentio incidit, vir præter ingenii laudem insigni morum urbanitate conspicuus. Nec tantum ingenii ducem sui nisi in fine poetici itineris recognovit. Licet enim alio quodam loco se stilo inferiorem secretius designasset, illic tamen bona fide totum grati animi debitum bene-meritæ persolvit *Æneidi*. Si et hunc mors igitur prævenisset, ut te Virgilius, sic iste Virgilium siluisset. Hæc ita esse ut dico tibi persuadeas velim. Certe enim, ni fallor augurio, ita est, et si forte aliter sit, in dubiis tamen opinio est anteponenda benignior. Et hæc quidem pro excusatione maiorum Virgilii operum dicta sint.



Nam si ad eos quos iuveniles ludos vocant, primos scilicet adolescentiæ suæ libellos oculum deflectis, scriptum ibi tuum nomen invenies. Reliquum est ut sparsa per totum epistolæ tuæ corpus querelarum tuarum fragmenta perstringam. Discerptum te ab imitatoribus tuis doles. Sic oportuit. Nemo in totum tanti ingenii capax erat. Indignaris illos tuis indutos spoliis insultare. Sic est usus: non potest valde ingratus esse nisi qui magno beneficio præventus est. Luges nomen tuum apud priscos iurisconsultos ac medicos gloriosum, successoribus esse contemptui, nec advertis quantum hi quidem omnes dissimillimi sunt illorum: nam si similes essent, similia colerent atque amarent. Cesset indignatio, cesset dolor, optima spes assurgat. Sunt primitiæ virtutis et ingenii displicuisse malis et indoctis. Tam clara frons ingenii tui est ut eam lippæ acies ferre non valeant. Idemque tibi accidit quod Soli, cuius non infamia sed excellens laus est quod infirmi oculi, et nocturnæ illum fugiunt aves. Apud antiquos quidem et modernos, si qui sunt in quibus scintilla vel tenuis priscae indolis adhuc vivat, non modo philosophus sacer ut ipse ais, sed, ut dixi, philosopho maior atque sublimior haberis: ut qui pulcherrimam philosophiam ornatissimo ac tenuissimo tegas velo. Quisnam apud hæc portenta hominum habere tua non interest: imo vero quam plurimum optandum ne placeas, quibus displicere primus ad gloriam gradus est, proximus non agnosci. Pone, iam precor, solitudinem ac mœrorem, et ad campos Elysios pristinam illam tuam tibi que debitam sedem redi, unde te talibus ineptiis pulsum dicis. Non decet animum sapientis stultorum contumeliis frangi: alioquin

quid fiet aut quis erit huius mali modus, cum verissime dicat hebræus Sapiens quod *stulorum infinitus est numerus*, et nihil verius dici posse, vici, atria plateæque omnes consonent? Illud sane iocosum penitusque festivum in auribus meis fuit, quod tamen acerrime querebaris (adeo quidem palato, stomacho amaro, dulcia etiam amarescunt), flens unde ridere par fuerat, quod communis amicus quem tu Thessalum facis, ego Byzantinum rebar, te intra florentes patriæ meæ muros peregrinari, sive ita mavis, exulare coegerit, quod illum summa fide, summoque tui amore et fecisse et facere certum habe, unde omnibus amicis tui nominis, qui perrari licet adhuc aliqui supersunt, ob hanc præcipue causam cœpit esse carissimus. Vide ergo iure ne succenseas cui nos omnes tui amantes tuo simul ac nostro nomine gratias agimus, quod te nobis ac Musis Ausoniis ereptum, si qua fors cœpto faverit, restituet. Quod autem Fesulana vallis et Arni ripæ non nisi tres tibi amicos tulerint mirari desine: satis est, multum es, plus est quam sperabam in patria lucro dedita tres Pierios spiritus invenisse. Et tamen ne diffidas: magna frequensque est civitas: quartum si quæris, invenies. Quintum his adderem et meretur, Peneia seu Alpheia redimitus lauro; sed nescio qualiter transalpina Babylon illum nobis eripuit. Parum ne tibi videtur tales quinque viros uno tempore atque in una urbe concurrere? Quære alias. Tua illa Bononia quam suspiras, studiorum licet hospes amplissima, funditus ut excutias, unum habet. Verona duos, Sulmo unum, atque unum Mantua, nisi illum cœlum terris abduceret: tuis namque desertis ad Ptolomæi signa transfugit. Ipsa rerum

caput Roma, mirum quod pene ad unum talibus incolis sit exhausta. Perusia unum tulit, futurum aliquid nisi se ipse negligeret; sed ille non Parnaso tantum, verum Apennino etiam atque Alpibus relictis, lucrosamque calamo papyrus sulcans, nunc senior Hispanias pervagatur. Tuleruntque alios urbes aliæ, sed omnes quos ego noveram, in communem illam et æternam urbem ex hoc mortali domicilio commigrarunt. Proinde quod velim vides, ne scilicet de amico pergās queri, quod te in terram duxit, etsi paucis, pluribus certe quam ulla hodie amicis ac miratoribus habitatam tuis. An nescis quanta etiam apud nos huius generis raritas semper fuit? Nostra enim ætate, nisi fallor, amicus hic noster iam tota in Græcia solus est. Erat alter modo præceptor meus, qui cum iucundissimam me in spem erexisset, in ipso studiorum lacte destituit moriens; quamvis iam ante destituisset ad episcopalem curam, me qui deserebar adiuvante, plusquam illum quam me ipsum cogitante, promotus. Quibus ita se habentibus raritatem hanc patere tuorum, et ignosce sæculo senescenti quod florenti etiam ignovisses. Pauci olim, nunc paucissimi, mox, ut auguror, nulli erunt, quibus in pretio sint honesta studia. Cum his ipsis licet avide versari, neque tibi in mentem veniat nostrum amnem maiore alveo permutare. Non tu nauta, nec piscator quidem: quin imo, si quam falsam cupio, vera est fama non sat faustum ea tibi cum gente colloquium fuit. Parva tibi Castalia placuit, humilisque Helicon. Noster tibi Arnus nostrique colles placeant, ubi et nobiles ingeniorum scaturigines erumpunt, et dulces nidificant philomenæ; paucae ille quidem fateor: sed, si, ut dictum est, vicina

pariter ac longinqua circumspicis, multæ sunt; extra quas quid te in populo reperturum speras nisi fullones, textoresque et fabros, ut sileam impostores, publicanos, fures diversorum generum, et mille fraudum species, et quæ fraudibus nunquam carent popularia studia, et avaritiæ anxium atque inane negotium, totasque olidas mechanicarum fœces artium, ubi te quasi aquilam noctuis aut leonem simiis irrisum alto animo ferre debes, et dicere quod tanto inferior Ennius dixit: *Nam volito vivus docta per ora virum*. Ora indocta suam ignorantiam insulsosque sermunculos ruminant; quod ad te tuasque res, vel nesciant vel illudant, quorum laus honoratum infamiæ genus est. Verum ut ingenio et ætate novissimus in extremo sedeam, ad me redeat oratio. In hac quidem tua fortuna meum poscis auxilium. Oh sors dura et immitis! et oh! utinam opis aliquid in me esset, quo tanto succursum viro ante omnes partos aut speratos titulos perpetuo gloriarer. Nam (Christum tibi incognitum Deum testor) præter piam commiserationem ac fidele consilium, nihil penitus est quo tibi subveniam. Quid enim præstare potest alteri qui sibi nihil potest? An forte non audisti et sequaces tuos tecum sola tui nominis invidia lacerari, haberique pro insanis in consiliis insanorum? Quod si tua ætate studiosissima Athenarum in urbe tibi accidit, quid voluptuosis in urbibus nunc aliis eventurum arbitraris? Horum ego unus, miror et nescio quamobrem, vulgo videor inscio, veræ utinam, sed nihil ad rem quam vera sit, invidiæ causa, si invidia vera est. Refugium meo petis in gremio? Oh! fati vertigo insolens cui nulla usquam regia satis ampla satisve sit fulgida, si quales fortuna

gradus affert, tales honores ambiat ingenii altitudo. Sed non ita est: illa turres et aulas spernit indoctas, et deserto tugurio delectatur. Quod ad me attinet, etsi tanto hospite non me digner, tamen te vel græcum, vel qua licuit, latinum domi habeo, brevi, ut spero, totum habiturus, si Thessalus tuus cœpta peregerit. Et ut secretiore aditu te locandum scias, animæ medio receptaculum tibi avidissime prorsus ac reverentissime præparavi: ad summam amor ad te meus sole clarior ferventiorque est, æstimatio ingens ut nullius maior. Hæc tibi, dux paterque, quia potui et præstiti: liberare te vulgari ludibrio, præter quam quod tuæ singularis atque unicæ laudis imminutio futura sit, non meum certe nec alterius est: nisi qui possit vulgi furoribus finem dare: quod quamquam possibile Deo sit, nec fecit tamen hactenus, puto nec faciet. Multa dixi quasi ad præsentem; sed iam ab illa vehementissima imaginatione rediens, quam longe absis intelligo, vereorque ne tam multa in tenebris ægre legas, nisi quia multa mihi etiam scripsisse te video. Æternum vale, Orphea-que et Linum et Euripidem ac reliquos comiter, cum in tuam sedem veneris, salvere iube. Apud superos: medio amnium clarissimorum Padi, Ticini, Abduæ aliorumque unde quidam Mediolanum dici volunt. VII Idus Octobris anno ætatis ultimæ millesimo trecentesimo sexagesimo.

---

## EPISTOLA XIII.

FRANCISCUS PETRARCA SOCRATI SUO S. P. D.

Epistolas hasce de rebus familiaribus, de quarum ordine quædam enarrat, illi rursus inscribit.

A te principium, in te finis. Habes ergo, mi Socrates, quod optasti. Librum e meis nugis multa rerum ac verborum imparitate contextum, haud immerito delicatas aures offensurum opus: quamvis, ut est animus mortalium vagus et varius, et velle suum cuique est, quibusdam fortasse, quibus qualitas rerum non placebit, ipsa hæc sit placitura varietas. Ignoscent vero alii si meminerint huc me non mea sponte sed amicis tractum precibus descendisse, parendique cupidine, nec aliena iudicia nec occupationes meas atque irreparabilem huius exigui et incerti temporis pertimuisse iacturam. Nam tu, si quid offenderit, non mihi, sed tibi veniam dabis, et dices: hoc volui: negare ille nil potuit tanto mei amantior quanto negligentior sui. Sed quidem nullus plaris est amicus, quam cui famæ propriæ constat impendio. Multis, et præsertim bonis, vita atque operibus carior fama est, quam qui pro amico spreverit, haud dubie viliora contemnet, si res exigat. Et hoc quidem opus adolescens cœpi, senex perago: imo vero cœptum prosequor. Unum est enim hoc ex omnibus, cui supremam sola mors imponet manum. Quomodo ego alium amici colloqui quam vitæ finem sperem? Aut quænam dies me spirantem inter eos tacitum efficiet, cum quibus ore gelido sepultusque loqui cogito? Hinc sane non

rerum, sed temporum rationem habui. Præter has enim ultimas veteribus inscriptas illustribus viris, quas propter similitudinem novitatis sciens unum simul in locum contuli, ac præter primam, quæ dictata serius prævenit comites et locum præfationis obtinuit, cætera pene omnia quo inciderant scripta sunt ordine. Ita enim et progressus mei seriem (si ea forte cura fuerit), vitæque cursum lector intelliget. In quibus fateor, ne semel dicta repeterem, bisque vel sæpius idem ponerem, quod incipiens promiseram ad plenum præstare non potui. Volui quidem, sed multitudo rerum obstitit, varietasque ipsa, et occupati interim intentique aliis animi violenta distractio. Nunc quoniam et hinc calamum multa circumsonant atque in diversum vocant, et quantum vitæ restet incertum habeo, et hic liber satis crevit, nec nisi iusti voluminis meta transcenditur, plurimum capax est; quæ huius quidem generis scripta iam supererant, his avulsa extra ordinem alio quodam digessi volumine. Quæ scribenda autem, si quid tale nunc etiam sum scripturus, ab ætate iam nomen habitura, rursus alio venient claudenda volumine, quando et vos eo estis animo, sodales, ut meum aliquid vobis subtrahi nolitis: et ego ita sum ut vota vestra semper anteponenda meis arbitrer. Illud vobis in medio precum fervore providendum erat, ne dum sine delectu mea omnia probatis, dum nil penitus mihi vultis effluere, dum quæ privatis rebus meis vix respondent laudandi studio effertis in publicum, invitus in illorum manus cogerer, qui aliena omnia stomachantes sibi plaudunt, sua sola suspiciunt ac mirantur, felices æstimatione domestica. Horum me iudiciis imparatum et inermem obiicitis, ami-

ci. Non possum de affectibus vestris queri, nempe quibus carius nil habeo. Sed est, ut cæterarum rerum, sic amandi modus, ne scilicet dum prodesse vis, noceas. Nimis mihi faciles, nimis in me proni estis, nimis tribuitis, nimis urgetis, nimis amando me premitis. Te in finem, lector candidissime, quisquis es, obtestor atque obsecro per communis studii amorem, per si qua tibi famæ propriæ cura est, ne aut varietate rerum, aut verborum humilitate movearis, memor quid de hoc ipso prima operis huius in parte præfatus sim. Vale.

EXPLICIT LIBER XXIV. IDEMQUE  
ULTIMUS DE REBUS FAMILIARIBUS.





FRANCISCI PETRARCÆ  
EPISTOLÆ VARIÆ.

LIBER UNICUS



EPISTOLA I.

FRANCISCUS PETRARCA LUDOVICO GONZAGÆ DUCI MANTUANO  
S. P. D.

Est littera apocrypha a Possevino edita qua Franciscus a Ludovico Mantuam fuisse accersitus, eidemque gratias egisse dicitur.

Accepi litteras tuas, et coram respondere quam absens volueram; sed senescens, ut vides, inter ludos atque præstigia Fortunæ multa mihi promittentis obtemperare non possum. Pecuniam cum Petro de Crema familiari tuo remitto, quod animi desiderio inservire nequeam, non contemptu. Ætas hæc profundo decurrentis ævi rotatu ad finem properat non laborum, atque eo minus longi itineris patiens. Neque Avinione avelli integro spiritu possum infelici amoris ictu et ætate fatigatus. Si accederem, oneri non solatio essem. Nam frequentes morbi et mœror assiduus fomenta potius requirunt, quam obsequium permittunt. In futurum ver, si Columnensis annuerit, hospitem me forsan habiturus es. Cave beneficio et gratia meritum, atque adeo

desiderium meum superare. Quod enim imprudentia peccatur munificentia non excusatur. Vale.

Avenione 1369, XII Kal. Aprilis.

NOTA. Quum in Archivio Ducum Mantuanorum repertam hanc epistolam ediderit Antonius Possevinus e Soc. Iesu, eamque operi suo (*il Petrarca redivivo*) inseruerit Tomasinus, nos etiam aliis accensendam duximus: quamvis indubiis ineluctabilibusque argumentis apocrypham esse in cap. 1, § 13. Lib. 1, Hist. Litter. iamdiu demonstraverit Tiraboschius.

## EPISTOLA II.

FRANCISCUS PETRARCA ZENOBIO DE STRADA FLORENTINO

S. P. D.

Homericum fragmentum, et suæ cuiusdam Epistolæ particulam se missurum promittit.

Ad ea quæ scribis brevi responso, ni fallor, opus est. In primis suspicari nullo modo debueras ad amicos, quos in patria mihi carissimos ac prædulces illorum virtus et meritum fecit, familiares epistolas dictanti, tuum nomen excidere potuisse. Necdum enim aut tanta segnitie incessit, aut pectus hoc de tam fluxa memoria amicorum sibi fingit imagines. Amice igitur fecisti, et ut res decuit vere, quod omnem culpam in nuntium reflexisti.

Homericum illud, ne dubites, mittam cum primum facultas adfuerit. Cæterum ex eo tempore Parmense domicilium, et quam ille nunc incolit bibliothecam nostram non revisi. Scito brevissimum opus esse, quoque facilius ad scribendum, eo laboriosius ad quærendum (sed hanc tibi libens divinam operam dictabo,

neque *quod parvo admodum fragmento timere*), <sup>1</sup> et minus metuendum est ne ille divini vir ingenii, audito quo mittendus est, fugiat et profundioribus caput abdat: illud potius spero ut ubicumque fuerit, ad tuum nomen exsiliat. Postremo parum abfuit quin *modo pro moderamine stili tui ut me omnino deinceps singulariter ad loquendum crederes* <sup>2</sup> cum sim unus; et oh! utinam integer, nec in multa passionum ac cupiditatum mearum frustra discerptus. Epistolæ cuiusdam meæ ad Tribunum quondam urbis Romæ, qui spem publicam, ut vidisti, tam claro principio fefellit, tibi mitterem particulam, misissemque, sed laborem timui. Tu vale, et me illi viro optimo tuis litteris quam familiariorum potes efficito. Patavii, VIII Idus Aprilis. FRANCISCUS tuus.

## EPISTOLA III.

FRANCISCUS PETRARCA URBANO V. PONT. MAX. S. P. D.

Enixe hortatur ut Romæ consistat, nec Sedem Apostolicam reducat in Gallias.

Ad motum sponsi astra moventur, spondent pluvias, ventus incitant, turbant maria, æra lugubria reddunt, ingurgitant gramina campi, emolliuntur et madent undique aspera terræ. Nec mirum si omnia lugent, quia a principe monarchiæ loco universalis monarchia recedit, deserens urbem caput orbis, dere-

<sup>1</sup> et <sup>2</sup> Locum utrumque erroribus implexum quisque videt: fideliter tamen ex Codice Marciano descriptus est. Germanam lectionem a nobis frustra quaesitam acutioribus ingenio restituendam relinquimus.

linquens Italiam provinciam principem tyrannorum faucibus verisimiliter lacerandam. Et ut secundum Apostolum reverenter adloquar, luctuose sed forsitan fructuose tuam obsecro sanctitatem, Pater Urbane. Memento quæso, quod Paraclitus te præposuit, quin imo et præposuit Filius, qui manus Patris dicitur, per quem omnia facta sunt, et per fratres tuos vel suos dignissimos digitos te cunctorum scripsit in patrem; auctorizavitque quoque Pater quod de te dictavit Filius, et Spiritus Sanctus spiravit. Tota Trinitas, cuius opera separabilia sunt, operata est in tui assumptione miraculum. Quod si fas esset in hoc amplius immorari, quæ in te et de te mirabilia gesta sunt, clarius explicarem. Sed illi loquor qui hoc novit apertius, nec nunc sermone opus est blando. Ingemiscens tua inquit Italia: « Quum ul-  
» ceribus essem sauciata mortiferis, ad me et mea  
» curare vulnera descendisti, et cum Petro dixisti:  
» ego sum Apostolus Christi, nihil in me filia mea ve-  
» rere: et incipiens vinum et oleum infundere, plagis  
» meis nondum circumligatis et medicamine fotis, re-  
» cedis a me. Tentasti putrida recidere ferro, et dum  
» illud profundius impressisses, invenisti forsitan quæ  
» tibi incurabilia visa sunt. Et ob hoc fortasse me de-  
» seris desperantis more medici, qui expectare mor-  
» tem erubescit ægroti. Sed quis scit si tecum super  
» me apponet suam ille manum, qui ab omnibus lan-  
» guoribus curabat infirmos? Quis novit si ille tecum  
» erit, cuius verbum membra sanabat ægrotis? Illius  
» vicem geris, istius successor existis; claves habes  
» regni cœlorum. Sub te est utrumque imperium: ter-  
» renorum utriusque principatus ad te pervenit in me,

» vel verius ad Principes meos. Et ne evagantes in  
» latius transgrediamur, incepta ad recessum tuum  
» mihi flebilia et tibi obstacula parare videntur. Incipiunt  
» genua debilitari fidelium, fortium colla flecti, seu  
» inolescere rabies tyrannorum. Angustiae sunt un-  
» dique, mihi utinam, et non tibi. In silvis milites, in  
» campis praedones, in viis latrones: insidiantur hi,  
» tibi que tuum recessum ut ad illa pertingas me-  
» diis imbribus impediunt. Sic elementa turbantur  
» et pene in antiquum chaos universa vertuntur, quae  
» pericula etiam mihi exterminia comminantur. Et ut  
» patentiora non expectemus indicia, ostensa respi-  
» ciamus insignia. Hiantibus faucibus piratae circum  
» circa discurrunt; sed mira res, ad eorum remiga-  
» tionem freta mitescunt, ad tuam vero repatriationem  
» contra solitum intumescunt. Sed forsitan de his quos  
» peperit tuis est auribus intimatum: *Audaces sunt et*  
» *duplices animo, mendaces sunt et variabiles corde.*  
» *Fuge murmurationes Romanorum, versutias Tuscorum,*  
» *insolentias Lombardorum. Ad gentem quietam regre-*  
» *dere, populum simplicem et devotum in quo delecta-*  
» *batur anima tua, in pascuis uberibus, in multitudine*  
» *pacis.* Fateor ego Italia malos peperisse quamplures;  
» sed si infirmiores sunt caeteris, rogo, mihi serva  
» quod in Ecclesiaste saepe legisti: *quod perierat re-*  
» *quiram, quod abiectum reducam, quod confractum fue-*  
» *rat alligabo.* Aliter si ad compatriotas tuos, ut adse-  
» ritur, probos, quietos, simplices et devotos redire  
» delectet, quando servabis quod dixi tibi Magistro:  
» *non est opus benevalentibus medico?* Immorare igi-  
» tur mecum, beatissime Patrum, ut utriusque na-

» tos valeas percurare languentes: et si qua ferro vel  
 » usu curata non sunt, tuis orationibus cum Moyse  
 » leva manum ad cœlum pugnaturus precibus et non  
 » telis. Aaron et Iosue, fortitudo scilicet animi et di-  
 » lectionis caritas, te sedere faciant super petram,  
 » manusque sustentent tuas ut ad infima non decli-  
 » nent. Venenosum monstrum humanum sanguinem  
 » vorans Constantini, Silvester vicit et alligavit in  
 » eremis. Sic tu Silvester alter, si non recedis a me,  
 » istic alligabis aspidem virulentum, et cum Iosue  
 » gentes Amalechitas conculcabis. Expressum myste-  
 » rium sed latius alias exprimendum. Quod si meo  
 » non acquiescas hortatui, in viam tibi obviet qui re-  
 » spondit Petro recedenti: « Quo vadis domine? » Vado  
 » Romam iterum crucifigi. Deo gratias. Amen. »

---

#### EPISTOLA IV.

FRANCISCUS PETRARCA MODIO PARMENSI S. P. D.

De obitu Azonis de Corrigio. Queritur epistolas suas intercipi,  
 et nonnulla de scriptis suis mandat.

Amice, quibus oculis, quo animo litteras tuas do-  
 minæque nostræ ac iuvenum dominorum legerim, ut  
 sileam, nosti; quamvis infelicissimum rumorem diu  
 ante fama narrante cognoscerem, quo audito inter sin-  
 gultus et lacrimas scripsi nescio quid longiusculum,  
 quod non misi veritus eorum tædia, qui cum nil de-  
 gustent, omnia mortificant, et quæ non capiunt, cupiunt  
 ac rapiunt: bellatores Ligurum loquor, qui importuna

cupidine litterarum, sæpe mihi, credo itidem aliis, calamum excusserunt. Piget enim, nec immerito, illa scribere quæ quo velim non perveniant, et eo perveniant quo nolim. Illud equidem nunc usque mecum substitit hanc ob causam; atque hoc ipsum, quod nunc scribo, quando sim missurus nescio: expectabo idoneum latorem; malo differatur quam perdatur. Nil amplius de hac re, nam in aliis et olim ad te litteris, et nunc ad communem dominam atque adolescentes nostros, satis multa, et forsitan nimis multa scripsi. Delector enim materia lacrimarum, sic affectus ut malo meo pene mulcear, nunquamque mihi sit melius quam dum fleo, æstuantemque animum oculorum largifluus imber lenit. Sed ne rursus hoc impetu rapiar ultra quam destinavi, omissis aliis: Vale.

Venetiis, XV Kal. Decembris.

FRANCISCUS.

Reliquum est ut rogem reculas illas meas vobis, frater carissime, curæ esse, si vacat; saltem Vitam Solitariam, quæ si transcripta erit, ut spero; miniatur ligeturque solemniter per Magistrum Benedictum, et mittatur ad me exemplum, et exemplar, diligenter panno cereo obvoluta inter ballas Iohannolo de Como: et quidquid opus fuerit ad hæc solvet dominus Danielsolus, et Franciscolus meus diriget vos in his, qui prædictos amicos meos bene novit. Vale iterum, et pensate, oro, non importunitatem sed fiduciam meam. Pots hæc venit Bergaminus et loquutus est mecum multa, quem e vestigio remittam. Scriptum hoc IX Decembris. Aliud dominæ meumque vulnus, fratris eius,



qui et ipse dominus meus erat benignissimus, miserabilem casum non fui ausus in literis eius attingere. Heu! satis absque illa nunc accessione gemituum erat.

---

### EPISTOLA V.

FRANCISCUS PETRARCA NICOLOSIO BARTHOLOMÆI LUCENSI  
S. P. D.

Litterarum quas a Senatu populoque Florentino recepit,  
et responsionis suæ mittit exemplar.

Amicus noster communis, quo nihil fidelius, nihil potest esse sincerius, sæpe admonuit ut te meis litteris visitarem. Excusavi nunc occupationum variarum turbam adesse dictitans, nunc scribendi deesse materiam. Nunc autem occasionem nactus, omne mearum excusationum dimovit obstaculum, petens ut Florentini Senatus litteras humanitatis eximiæ, novo quodam et insolito et inaudito genere honoris, publicum erga me testantes affectum tibi mitterem, commoda et honores meos præcordialiter gavisuro. Digna res visa est, in qua sibi morem gererem. Mitto igitur et illorum exemplar epistolæ, et responsi mei, ut intelligas quanto adhuc esset in pretio vera virtus, si usquam appareret, quando falsum eius nomen non despicitur. Vale.

---

## EPISTOLA VI.

GALEACTIUS VICECOMES GUIDONI CARD. EP. PORTUENSI.

Galeatii Vicecomitis nomine Fr. Petrarca conqueritur casum regis  
Galliarum in Anglorum servitute una cum filio redacti.

Reverendissime pater et domine. Audito rumore  
flebili ac stupendo super casu miserabili et inaudito  
illustrissimi domini mei regis, tanto sum mœrore si-  
mul ac horrore concussus, ut vix aliquid loqui sciam.  
Quis enim sibi hanc vitam, ac incertam fortunæ aleam  
tutam speret, quando in summo ac unico Francorum  
rege tantum facinus ausa est: quem glorioso e solio  
ad terram, et usque ad manus hostium detrahare  
manu impia et temeraria non expavit? Lugere debet,  
nisi me fallit amor, totus terrarum orbis, atque omne  
genus hominum, maxime qui in altiori aliquo statu  
sunt. Singularis autem dolor et inconsolabilis est suo-  
rum, quorum ego me numero adscribere audeo, quin  
etiam teneor, recolens quam benigne quamque suavi-  
ter visus atque tractatus fui olim, tam per ipsum do-  
minum meum regem, quam per inclytæ memoriæ pa-  
trem eius, nec non etiam per hunc filium eius primo-  
gênitum, quem Deus omnipotens ad salutem regni et  
tranquillitatem fidelium reservavit: qui, quantum in  
illa tunc puerili ætate sua fieri potuit, tanto me favore  
complexus est, ut imaginem suam præcordiis meis  
affigeret perpetuo duraturam. Illi nunc igitur, ut dignum  
est, sincera fide compator. De ipsius tamen egregia  
indole atque virtute confido, quod divino fulta præsi-

dio et patrem liberet, et destituti regni gubernacula moderetur. Et tibi ergo devotionis ac fidei meæ testes litteras misi, et vobis, quos post ipsum solum moestos his rumoribus et turbatos scio, hoc quod inter luctum et occupationes meas licuit scripsi, quo me vestri doloris participem indicarem. Persuadere sibi dignemini, ut me suo in omnibus fiducialiter velit uti. Altissimus vos promoveat et conservet.

NOTA. Litteram hanc itemque alteram quam sub num. LXIV proferemus, in Codice quodam Biblioth. Collegii Romani repertas edidit primum Petrus Lazerus e Soc. Iesu (*Miscellaneor. Romæ 1754 ap. frat. Palearinos T. 1. p. 145.*), nec eas in hac nostra editione desiderari passi sumus, etsi non bene nobis persuasum sit illas reapse a Francisco Petrarca fuisse dictatas. Nulla enim extant documenta, ex quibus erui possit Galeactium aliosve Vicecomites opera illius in epistolis scribendis usos unquam fuisse, nec ea dictionis et stili ratio est, ex qua procul dubio earum auctor Petrarca dici debeat.

## EPISTOLA VII.

### FRANCISCUS PETRARCA AD IGNOTUM.

Narrat se Avenione redeuntem Iohannis Vicecomitis Archiepiscopi et dynastæ Mediolanensis precibus victum Mediolani constitisse.

Babylonicis tandem vinclis, et carcere vix explicitus Transalpino, lætus ac liber in patriam revertabar vobiscum ex voto vitæ reliquias acturus. Sed pervertit dulce propositum dominatrix rerum Fortuna mortalium. Qui me pontificibus romanis, qui Galliae Siciliaeque regibus aperta toties me fronte negaveram, huic Italico- rum maximo, satis humane postulanti, negare non potui. Subitis et inexpectatis precibus ac maiestate viri circumventus obstupui. Consilia hominum inania! Quod

impossibile amicorum arbitrabar, huius victus instantia cessi, et desueta iugo colla submisi. Tanti est libertatis et ocii nomen, quæ sub illius imperio promittuntur. quorum me ita cupidum norunt omnes, ut quisquis me capere decreverit, non voluptates, non divitias, non honores, sed hæc duo tantum velut escam laqueis adhibeat dulciorem. Tu vero tibi persuadeas me sive sub Austro, sive sub Arcto agam, tamdiu vobiscum animo futurum, quamdiu mecum fuero, nec unquam ab illius optimi viri fide atque obsequio discessurum, nisi a me prius ipse discessero.

---

## EPISTOLA VIII.

FRANCISCUS PETRARCA MODIO PARMENSI S. P. D.

Adolentem litteris instituendum eius curæ commendat.

Amice. Carmen egregium quod misistis responso, non inficior, dignum erat. Verum occupatus mirabiliter et distractus, tempus ad ista non habeo. Agite modo summo studio pueri insignis et divinæ indolis curam. Ego, si quid in me opis est, in tempore adero: et ut Apostoli verbo utar: *tu plantabis ego rigabo: Deus autem incrementum dabit*. Litteræ vestræ XV dierum spatium in itinere posuerunt: quod ideo dixerim, ne forsitan in admirationem aliquam responsi tarditas vos compellat. Valete feliciter. XVIII Septembris. Mediolani. FRANC. vester ser.

---

## EPISTOLA IX.

FRANCISCUS PETRARCA PANDULPHO MALATESTÆ S. P. D.

Dolet mortem uxoris et fratris eius. Excusat se quod vocatus illum non adeat, et mittit carmina quæ vulgari sermone dictaverat.

Colende ante alios et amande domine mi. Plenam solitæ humanitatis epistolam tuam non sine suspirio ne dicam lacrimis, legi. Renovavit enim mihi eam, quæ senescere in præcordiis meis nequit, memoriam tui, et ignotæ quidem facie, sed dilectæ mihi venerabilis et præclaræ atque in æternum memorandæ coniugis, simulque magnanimi et egregii fratris tui domini mei, et amici optimi non verbalis sed realis, qualium est hodie summa penuria. Et, Christum testor veri Deum, vix alii duo mori poterant, qui cor meum pari cuspidē vulnerarent. Sed non est, præter patientiam, remedii genus ullum: id tibi suadere non expedit prudentissimo atque expertissimo casuum humanorum. Accedit et illa consolatio, quod et benedicta uxor et frater amantissimus rectum iter ad superos tenuisse credendi sunt: ea fuit amborum vita, ea insignis matronæ pietas, fides et castitas, ea viri illustris excellentia. Cessat ergo altera dolendi causa: profecto enim illis, ut spero, nihil mali accidit: si quid mali fuit, nobis contigit, quod ipsum magnitudine animi superandum est. Et hæc quidem hactenus. De reliquo autem gratiam tibi habeo, et quas possum gratias ago, quod in omnium discrimine, inque omnium sive elementorum sive hominum bello, memoriam mei habes, et mihi quo nullum gra-

tius animo meo est, refugium tuum offers. Cæterum de adventu meo breviter sic habe. Libentissime venirem ut et tuo pio desiderio satisfacerem, et meo. Sed multa obstant: corpus ultra modum fragile, tempus forte nimis asperum, iter durum, intractabile, et super omnia pudor hoc in statu rerum abeundi. At si res istæ mitescerent, fieri posset, quod circa veris adventum te inviserem, quod in rebus nunc humanis unice cupio, neque est opus ut locorum amœnitate solliciter. Scio loca esse qualia in litteris tuis lego, et ipse aliqua puer vidi, et præterea locus omnis, ubi tu es, nunquam nisi amœnissimus ac iucundissimus animo meo videri posset. Iuvenis tuus et studio mihi iunctus et nomine, iampridem et propter tui reverentiam, et propter sui industriam mihi carus acceptusque esse coepit. Nolo tamen eum huc mittas ad nil aliud quam tædia et angores; nam nec ego sum cuius ex contubernio boni aliquid sit sperandum, et si quid unquam fuisset, nunc certe et temporum, et locorum, et innumera- bilium occupationum circumventus atque oppressus mole, prorsus in virum alterum evasi. Non sum qui fueram: mihi ipse gravis in dies ac molestus fio: de omnibus Deo gratias agens, annosque meos mecum ipse remetiens, et divinam magis ac magis in me misericordiam recognoscens. Nolo igitur veniat amicus meus unde libenter abscederem, ubi nec mihi, nec sibi usui sim futurus, ubi caros meos alios esse doleo. Accessit enim ad molestias quod familiola mea, quæ Papiæ mecum erat, hic est; unde angustissime habitamus, poenitetque nunc me eos huc vocasse. Sed minime ista præsagiebam, quamvis, ut audio, ibi quoque

turbidæ res sint, de quo valde et supra quam credi posset mœstus sum. Nugellas meas vulgares, quæ utinam tuis manibus, tuis oculis, tuoque iudicio dignæ essent, per hunc nuntium tuum ad te familiariter venientes videbis. Non patienter modo, sed læte, non dubito, atque aliqua vel extrema bibliothecæ tuæ parte dignabere. In quibus multa sunt excusationis egentia; sed benigni censoris iudicium subitura, veniam non desperant. In primis opusculi varietatem instabilis furor amantium de quo statim in principio agitur; ruditatem stili ætas excuset, nam quæ leges magna ex parte adolescens scripsi. Si excusatio ista non sufficit, excuset me tuæ petitionis auctoritas cui negare nil valeo. Non potes queri: habes quod petiisti:

Tu modo te iussisse, pater romane, memento,  
Inque meis culpis tu tibi da veniam,

ut ait Ausonius Magnus ad Theodosium Augustum. Plebeios apices, scriptorum raritas absolvat, qui huic fere studio nulli sunt: tarditatem scribentis inertia et bellorum fragor. Diu enim ante missurus hoc fueram, nisi Mars circumtonans vetuisset. Et nunc tandem per Pancaldum simplicissimum hominum mittebam, nisi tuus hic nuntius advenisset. In correctionem operis si qua erit, mea excuset occupatio, qua obsessus feci hæc per alios revideri, quamquam ego ipse vix demum semel raptim oculo trepidante perlegerim: denique habitus paupertatem mea excuset absentia; profecto enim si fuisset præsens, fibulas saltem argenteas habuisset. Multa nunc, domine, de tuorum casibus mihi pro virili parte flebilius latius dicenda, multa etiam de

tua gravi ægitudine, quæ me vehementer exterruit et afflixit, stilo sese offerunt; sed tam multa et tam magna sunt ut ea fessus calamus reformidet: ideoque prætereo, eoque maxime quod, si ingenium tuum novi quidquid de his essem dicturus, me tacente, cognoscas. Ad postremum de negociolo illo familiari, facies quod tibi occurret: quidquid tibi, placuerit et mihi. Vale feliciter fortiterque, Vir clarissime, mei memor. Padua III. Ianuarii argentibus digitis. Franciscus Petrarca recommendationem.

Sunt apud me huius generis vulgarium adhuc multa, et vetustissimis schedulis, et sic senio exesis ut vix legi queant. E quibus, si quando unus aut alter dies otiosus affulserit, nunc unum nunc aliud elicere soleo, pro quodam quasi diverticulo laborum; sed perraro, ideoque mandavi quod utriusque in fine bona spatia linquerentur: et si quidquam occurret, mittam tibi reclusum nihilominus in papyro.... Magnifico et prædicto domino meo domino Pandulpho de Malatestis.

## EPISTOLA X.

FRANCISCUS PETRARCA BENINTENDIO S. P. D.

Mittit epitaphium Andreæ Dandoli, sepulcro inscribendum, seque iamdiu a carminibus abstinere dicit.

Colende semper atque honorabilis amice. Litteris vestris primum acceptis, super epigrammate claræ e gloriosæ memoriæ domini ducis nostri (ut quid se-



gnitiem meam celem?) excusationem non Epitaphium meditabar, ut qui multumque alia curarum acie obsesus et occupationum mearum mole obrutus vobis, ut reor, animi saltem augurio non ignota, nec coëptis ipse sufficiam meis, et usque adeo ab huiusmodi iuvenilibus exercitiis sim distractus, ut non iam antiqua repetere videar, sed nova prorsus et insueta tentare, vitæque metiens brevitatem et fundamentorum amplitudinem quæ ieci sedulo mecum ipse remetiens, contremiscam. Ideoque iampridem semel mente firmaveram, nihil unquam vel ingenii exercitio, vel cuiusquam precibus, vel qualibet seu necessitate seu delectatione materiæ novi carminis aggredi, satis superque existimans si notive vota successerint. Quod præruptum animi decretum, neglecta interim ingenii asperioris infamia, contra fervidam amicorum instantiam inexorabilem sæpe me tenuit. Quid multa? Iam calamus erat in manibus, iamque excusatio texebatur, dum secundæ interventus epistolæ iniiciens manum diffidentiam abstulit, pudorem attulit, duritiem fregit: itaque calamum, quem ad negandum cœperam, ad parendum verti, quid, et per quem, et pro quo posceretur, quidve et huius amicitiae et illius memoriæ debeam, acriter mecum volvens. Eadem hora igitur eademque sessione quatuordecim elegos dictavi, qui si mei non videbuntur, nolite mirari; nam nec ego ut cuperem meus sum, nec sum ille qui fueram: ita me multa circumstrepunt: quamquam hoc ita velim accipi verum esse, ubi me vivum measque res intueor. Nam ubi alios et humanum genus omne contemplor, multa fateor occurrunt unde mei status cum alienæ sortis colla-

tione consoler, neque facile quisque me liberior aut magis suus appareat. Quod si forte versiculi plures sunt quam petiti erant, remedium præsto est: duos abiicite quos videbitur, et numeri ratio constabit. Sin omnino non placent, eo me magis vestrum credite, qui ut vobis obsequar mihi adversor, neve aliquid vobis aut natis inclyti Ducis negem, sciens ac volens inglorio labori, id ipsum, cuius mihi penuria ingens est, tempus impendo. Ascripsi autem in margine si quid est ubi vel dubitem, vel res eadem varie dici posse videatur, ut sic electio vestra sit. Mihi enim cum omnes ~~Musæ~~ hodie, tum præcipue illam abesse perpendi quam Graiam Graii vocant. Valete. Scripta rurali calamo in domo Carthusiæ Mediolanensis, ubi æstatem ago.

Kalendis Septembris ad vesperam. MCCCLVII.

En domus Andreæ Veneti Ducis ultima quanta est?

Alta: sed assurgens spiritus, astra tenet.

Publica lux iacet hic, et quartum sidus honorum

Stirpis Danduleæ, gloria prima ducum.

Hunc animi vigilem temeraria Græcia sensit,

Et levis antiquo reddita Creta iugo: •

Hunc, comes Albertus Tyrolis, nostra perurgens

Vastatis propriis, qui meruit veniam.

Hunc, Iustinopolis fervens et ladra rebellis,

Pertinuere trucem, percoluere pium.

Hic Genuam bello claram, pelagoque superban

Fregit ad Algerium, servitioque dedit.

Iustus, amans patriæ, magnos cui fecit amicos,

Ingenio præstans, eloquio omnipotens.

## EPISTOLA XI.

FRANCISCUS PETRARCA PETRO BONONIENSI S. P. D.

Adolentem litteris instituendum commendat.

Compater et amice optime. Lator præsentiū amici mei dilecti, virique boni filius et ob id mihi carus est: de cuius conditionibus Donatus noster latius tecum aget. Summa est: quod aliquandiu vagus ac discolus adolescens, alioquin non mali ingenii, ut perhibent, ad te quasi æger ad fidelem et expertum medicum mittitur. Impende illi curam quantam potes, obsecro, ut si qua via est patri reddas doctum et bene animo valentem. Denique dum spes profectus affulserit, persuade hunc tibi filium meum esse. Et vale: nihil enim hodie tibi aliud sum scripturus, nisi quod quum in principio ieiunii tecum esse decreverim, ero, Deo volente, in medio. Tu mitte hanc præsentem annexam litterulam sacerdoti meo domino Iohanni simulque vas tuum (vasculum dicere debui) ut accipias portionem, imo portiunculam vini illius, imo villi, voluptatis hostis modestiæ amici. Venetiis XVIII: Februarii properanter.

F. tuus.

## EPISTOLA XII.

FRANCISCUS PETRARCA MODIO PARMENSI S. P. D.

Narrat belli difficultatibus iter sibi in Germaniam interdictum:  
et quædam in libro suo De Vita Solitaria emendanda committit.

Amice. Deo duce incolumis huc perveni VI. die postquam a vobis discesseram, quo in hoc rerum statu vix volucris penetrasset. Hinc ulterius non est transitus, nisi aliud appareat; nam et bello clausum iter undique, atque his diebus capti mercatores alique: et præterea litteræ domini Imperatoris, quas hic invenire sperabam, non venerunt, neque hic dominus vult mihi *conductum*, ut vulgariter loquar, dare, imo non consulit, imo penitus non vult quod ulterius nunc procedam. Ad summam valde perplexus sum, et sæpe Terentianum illud in animum redit *nec quid agam scio*; expectatur tamen in dies domini nuntius quidam ab Imperatore venturus. Ille forte novi aliquid nuntiabit. In hoc dubio anxius essem nimis, nisi quia in animum induxi quidquid evenerit in meliorem partem accipere. Recommendate me, quæso, domino meo et dominæ et Ghiberto. Ludovicum vero benedicite. Francisculum meum salutate, dicentes sibi nova de me ista quae vobis scripsi. Si ulterius vixero, vel per famam, vel per meas literas audietis. Recommendo vobis reculas illas meas quas dimisi vobis, nominatim Solitariam Vitam. Libro I. ubi agitur de Paulo, ad finem Capituli illius posueram signum additurus aliquid. Mutavi consilium; amoveatis signum illud. Post illud, libro

eodem, est capitulum magnum valde de Petro Eremita, quod non memini quotum sit. Ibi non nimis a principio procul est ita: *tam nihil est animi nervorum*. Nolo usque adeo famam Cæsaris urgere; et ideo in utroque libro mutetis et ponatis sic: *quasi sub cœlo aliquid sit pulchrius*. Valete mei memores, et orate Deum pro me. X. Iunii.

Fr. Vr.

Item eodem libro post Tractatum de Benedicto est de quodam Eremita « *Marsici* montis accola etc. debet esse *Massici* » licet fere.... (*Desunt reliqua*).

### EPISTOLA XIII.

FRANCISCUS PETRARCA GULIELMO DE PASTRENGO S. P. D.

Absentiæ suæ ab urbe Avenione causam pandit amico.

Digne quidem admirans, quibus ego latebris delitescerem quærebas, aut quid novæ rei contigisset, propter quod tibi oris mei præsentia solito rarior occurreret: et nunc aliquanto dignius miraberis, quid hic præstigii sit, quod cum relicto rure, mihi hac præsertim anni parte gratissimo, faciem tuam visurus ad odiosam semper civitatem rediissem, te insalutato, sic repente discesserim. Utriusque ergo rationem accipe quam brevissimis verbis, digerendam forte latius apud te, mihi enim et nuncius hic et sol ad Oceanum properans breviloquium suadent. Subegerat me sibi pridem vita lautior ea quæ in urbibus agitur, et in ea urbe potissimum ubi tu nunc es. Illic multos per annos quas

miserias, quosve labores pertulerim infelix, non epistolæ brevis opus est: quibus tandem exagitata mente cernens nullam nisi in fuga libertatis spem relictam, retrahentibus quamquam his quibus me amando perditum ire mos fuerat, profugi et eripui meipsum periculis quacumque patuit via: atque omnes Fortunæ minas perpeti decrevi, dum mihi vel prope mortem aliquantisper viverem. Cœperat enim sensim quod optabam contingere, et animus ex diuturnis compedibus relaxari inenarrabili quadam dulcedine et cœlesti vitæ simillima. Sed quanta est duratæ consuetudinis vis! Sæpe adhuc infaustam mihi civitatem repeto, nec ullius unco necessitatis tractus, ultro in laqueum redeo, et ex portu totiens naufragium passus, relabor in pelagum, quibus urgentibus flatibus incertum est. Mox omne mei ius eripitur, mihi undique ventorum rabies, undique fluctus et scopuli, *cælum undique et undique pontus*, postremo mors undique, et peius morte vitæ præsentis tædium, et venturæ metus ante oculos. Quod itaque me his proximis diebus videre nequiveris, scito nullam causam fuisse aliam, nisi curæ veteres exedentes cor miserum, quæ confestim ut me in mœnibus suis invenerunt, tamquam fugitivo et contumaci servo iniecerunt manum, et iam mihi flagra nota cernebam, iam carcerem, iam catenas et verbera, cum velut expectus noctu, quia luce non poteram, evasi. Ignosces igitur si cum videre possem, te non viso abii, et adversus vulgum insanum causam meam ages, a quo dementiæ arguor, quod quietem ruris urbanis, ipso reclamante, prætulerim. Vale memor nostri.

---

## EPISTOLA XIV.

FRANCISCUS PETRARCA SOCRATI S. P. D.

Cavendum esse ne quis offensionis causam nostris e scriptis capiat.

Duos Solitariae Vitae libros scripsi olim ad Philippum Cavallicensem suae patriae et pontificem et virum optimum, nobis et hospitem et patrem. Hos cupienti et oranti mittere diu distuli, et iam iam causam dilationis intelliges. Ego enim et illos sibi non negare nec subtrahere amplius institui (quos idem ipse dum fierent ante multos annos ad Fontem Sorgiae legit, fecitque quod solitus est, mei enim semper amantissimus meorum operum amorem facile concipit), et te similiter horum participem facere in animo est: sed ea lege ut, vivo me, nemo alius particeps per vos fiat. Ut enim quadam in parte operis advertere erit, summos hic hominum stilo attingi. Quid ergo inquires? Adeo ne mihi solito timidior factus es? Ego vero nihil minus: imo equidem quo vicinior morti sum, eo et pavoris minus, et plus animi est. Non est necesse ut inter litterulae huius angustias tibi illos infarciam quos fecisse fertur intrepidus senectus; neque id mirum, cum omnem pene degenerem metum, omne humile delectumque consilium fuga mortis et vitae spes afferre soleant; quarum prima turpis in sene est, secunda etiam stulta ac ridicula. Non ego plaris facio quam soleo horum offensiones ac iudicia, qui et vero offenduntur, et falso iudicant. Sed cum innumerabilium plena discriminum sit haec quam agimus vitae via, praestat, etsi ad nil aliud, ad quietem

maxime optabilem sapienti, non irritare animos ut pigerrimos ad omne bonum, sic ad malum omne promptissimos. Satis odiorum nec minus invidiæ est. Enitatur quod superest in pace agere; quod neque iam multum, et certe pronum ac declive est; neque quod natura fecit expeditum et facile, accersitis ultro difficultatibus intricandum. Pax bona bonis omnibus, atque omnibus utilis, nobis et necessaria est. Vale.

## EPISTOLA XV.

FRANCISCUS PETRARCA FRANCISCO BRUNO S. P. D.

Opem aliquam ferri rebus suis domesticis a Pontifice Maximo desiderat, quin tamen ullam exposcere ab illo velit.

Epistolam tuam apostolicis litteris insertam non tantum lætus ut soleo, sed solito lætior vidi; gravibus enim me curis explicuit. Nam, ne quid te non actuum modo sed cogitatum meorum lateat, suspicari, fateor, nondum quidem plene cœperam, sed iam incipere meditabar, te mei oblitum, non quia id naturæ tuæ, seu moribus conveniret; sed Fortunæ prosperitas certe, quæ nunquam tanta tibi esse potest quantum cupio, oblivionem amicitiarum parere solita, parumper mihi esse incipiebat annuo iam suspecta silentio. Fecisti optime quod me hoc labore animi liberasti. Quievi illico lecta excusatione tua, quam prius ex ore amici prævenientis audieram, sed magna apud me est calamo tuo fides. Ad rem venio. Sanctissimus dominus noster mihi scribere dignatus est, et quod scribat nosti; litteras enim



tu dictasti, filius tuus qui et meus est filius, nisi fallor, scripsit. Litteris tanti patris reverenti metu, sed non sine quadam fiducia concepta, non de ullis meritis meis, sed de sola ipsius et olim et nunc maxime cognita mihi humanitate respondeo; quid non dico: tu qui suas dictasti, literas meas leges. Permissi mihi paulo liberius evagari, quam considerata ipsius magnitudine debuisssem; sed humanitatem solam et clementiam cogitavi: ne tamem nimium multiloquio importunus fierem, frænavi impetum, et in finem remisi eum ad has tuas litteras ut videbis. Summa autem hæc est. Ego, frater, si quid mihi ad vitam unius canonici deesse dicam, mentiar; sed si dixero, me plures habere notos et plura inde gravamina quam totum fere capitulum, cuius ego pars sum, forsitan non mentiar; quæ an declinare ulla arte valeam ignoro. Sæpe certe tentanti nunquam hactenus successit, unde mihi non exiguus vitæ labor, et quamvis forsitan gloriosa, tamen haud dubie tædiosa perplexitas. Si quæras, num quod restat, transire possim, ut nunc usque transivi; possum plane, sed haudquaquam facilius quam olim, immo vero difficilius, quod et sarcina in dies augetur, et vires minuuntur. Habeo hic præbendam, quæ mihi panem et vinum dat non solum ad utendum, sed etiam ad vendendum. Residentia mihi aliquid valeret, sed ego urbes, uti ergastula fugio, et magis eligo solitario in rure si oporteat esurire, quam in urbibus abundare: quamvis nulla fuga, nullæ me latebræ a concursu protegant. Habeo famulos, sine quibus utinam vivere possem aut scirem: habeo equos quando pauciores, duos saltem: et ut sileam quæ sunt historiæ longioris, soleo habere

scriptores quinque vel sex; habeo tres ad præsens, et ne plures habeam causa est, quia non inveniuntur scriptores: sed pictores utinam non inepti. Habeo unum presbyterum venerabilem virum qui dum in Ecclesia sum assiduus mecum est, cum quo sæpe ubi solus prandere disposui, ecce subito e transverso convivarum acies, vel cibo pascenda vel fabulis: vitari enim prorsus nequit, ne vel superbior appaream, vel avarior quam sum. Sic me Deus amet, ut nonnunquam spectare mihi videor illos Penelopæos Homericos Procos, nisi quod hostes illi fuerant, hi autem sunt amici. Exonero animum loquendo tecum, immo mecum, et ideo te tamdiu hoc inutili sermone occupo. Quando autem de me, frater, hæc crederes? Et totum hoc mihi facit lenitas mea, quæ me, natura licet vulgo abstractum, in commune restituit. Cupio præterea et dispono, Deo dante, non templum Marti quantum nusquam esset ut Iulius Cæsar, sed unum hic parvum oratorium Beatæ Virgini extruere; iamque opus aggredior: etsi deberem libellos meos pignurare vel vendere. Et si ad opusculum hoc explendum Christus mihi vitam et facultatem dederit, statim si venire ipse non possim, sicut non posse arbitror defectus viribus corporeis, famulum unum ad dominum meum Sabinensem et ad te mittam ad retentandum istic quod olim me frustra voluisse, et ipse scit et tu etiam non ignoras. Hæc, amice, curarum mearum pars millesima est. Si his ergo atque aliis, et quod mihi a prædecessore suo promissum erat, ut nosti, dominus noster quieti meæ consulere dignaretur, non teneretur, fateor, indigno et immerito, nisi ad imitationem forsan illius cuius vicem gerit, qui multa

bona quotidie confert immeritis et indignis. Et si quidem hoc velit, ut litteræ eius indicant, potest perfacile profecto uno verbo. Nullus enim dominorum, tam facile potest benefacere quibus vult, quam Romanus Pontifex, qui si forte mihi facere vellet secundum suam condecentiam, quod dixisse fertur Alexander Macedo, multum esset aut nimium; si vero secundum meam insufficientiam, nihil esset aut modicum. Temperet hæc igitur ut sibi videbitur. Sive enim multum faciat, sive nihil, sive modicum, contentabor. Quin tu potius, dicat aliquis, pete quod videtur, quando paratum habes animum largientis. Hoc, amice, non possum triplici ratione: primum nempe quid petam prorsus nescio, sicut ille qui raro si unquam, de talibus cogitavi: omnia fere vitia mihi obiici vel ab amico patiar, vel ab hoste, dum dolus malus dumque ambitio sequestrentur. Deinde, esto quod amicorum indagine aliquid quod peterem invenirem; ante tamen quam nuncius meus ad pedes Apostolicos perveniret, esset de facili idipsum petatum ab alio et concessum. Non est enim, ut opinor, dominus noster in illa duritie qua fuerunt aliqui in diebus nostris, negare omnia parati, dum nonnisi perfectis viris dare aliquid volunt; quod si fiat aut omnia beneficia vacabunt, aut paucissimis omnia conferentur; tam rara est humana perfectio. Postremo fieri posset ut aliquid peterem, quod eidem domino non placeret, sed propter incomparabilem benignitatem suam supplicationibus meis condescenderet, quando ego nullo modo vellem habere aliquid, quamvis magnificum, et mihi utile quod sibi non penitus gratum esset. Quid fiet igitur dicam tibi. Si voluntas domini est, qualis vide-

tur esse, ipse sit et benefactor et consultor, nec miretur id sibi dici quod felicitis recordationis domino Clementi patruo suo dixi. Cum enim sui gratia, officium quod tu nunc industrie geris, mihi obtulisset, quod, me nolente, tunc habuit magister Franciscus de Neapoli, et deinde me sæpe, licet indignum, Episcopum facere voluisset, et ego indignantibus dominis et amicis, continue recusassem, ultimo mihi dixit: *Pete quod vis et faciam tibi*: cui ego respondi; *si bene facere mihi vultis, non solum beneficentia sed electio, Pater sanctissime, vestra sit. Vos scitis optime quanti me facitis. Quando aliquid petente alio, vel quomodolibet ad notitiam vestram venit, quod me dignum videatur, mei si placet memoriam habetote*: quod ipse se facturum clementissime promisit, et fecisset, non dubito, nisi eum mors multis, et inter alios mihi damnosa, prævenisset. Ita ergo mihi expedit ut dominus noster faciat, si mihi aliquid vult facere. Nam si expectatur ut ego senex nunc sollicitus sim petitor, quod iuvenis nunquam fui, actum est, nil penitus unquam fiet. In hoc sane domini mei Sabinensis interventio, et tua sedulitas efficacissima erit, et neutram defuturam certe spero. Alios ibi non habeo; nam quos habui vel defuncti, vel alienati sunt. Solus ipse dominus Sabinensis tribus et triginta annis in eodem proposito erga me mansit, nec ulla unquam sive propter occupationes eius inextimabiles, sive propter silentium meum, sive propter abscessum suum facta mutatio est, nisi de bono semper in melius. Secum de his ergo delibera, et ipsum ad omnia fidenter require, animum eius ad me verbis, ut puto, tibi cognitum, factis animi testibus recognosces. Ego enim

sibi breviter scribam, et eum quoque ad has litteras remittam, ne minutias et fabellas meas sæpe repetam, de quibus scis quod nunquam tibi aliquid scripsi, neque nunc quidem fueram scripturus, nisi quia sic res poscere visa est. Et nunc, frater, habes totam hanc historiam necessariam potius quam iucundam, si unum addidero quod posset forsan in colloquium venire. Nam si roget in hunc modum: *quamvis nominatim nescias quid petendum sit, cuius generis tamen beneficia optares edicito*: dicam quod apud Ciceronem Cotta: *omnibus fere, inquit, in rebus quid non sit citius quam quid sit dixerim*. Prælaturam itaque nullam volo, nec volui quidem unquam; similiter nec beneficium curatum quodcunque, quamvis opulentissimum; satis est mihi unius animæ meæ cura: atque utinam illi uni sufficiam! De reliquo faciat dominus noster, ut sibi placuerit, ut unum sciat quod sive mihi provideat, sive non, servus suus sum, quamvis ad nihil utilis, at fidelis saltem, meque suis iussis obnoxium fateor, et suis olim alloquiis, et nunc suis litteris insigniter honoratum, ita ut sibi non iam sua liberalitate devotior, sed obligatior fieri possim. Illud quoque sibi persuadeas quod, si quid mihi contulerit, idipsum cito alteri conferre poterit. *Ego enim iam delibor, et, ut aestimo, tempus meæ resolutionis instat.....* Heu! mihi misero quia quæ sequuntur dicere non possum. Certe ego, frater, præter naturalem vitæ legem, quæ non est aliud quam cursus ad mortem brevis et lubricus, sentio me in dies ultra etiam ætatis exigentiam rapi, et vehementer imminui, atque umbræ in morem evanescere. De quo miror quidem, quia non ita vixi, nisi fallor, ut id adhuc mihi deberet

accidere. Sed, Deo teste, non doleo, et si pro peccatis meis accidit, valde etiam gaudeo: ita enim dudum me adeo poposcisse bis in devotiuncula quadam memini his verbis: *Fiat mihi thalamus meus purgatorium meum, et lectulus meus lacrimarum conscius mearum, et in corpore meo doleam priusquam præceps corruam in tartara: et iterum, sit mihi pars purgationis labor meus; quo hic per singulos dies exerceor: reliquum in hac vita et in his membris exige, priusquam veniat tempus egestatis.* Si quod bis petii semel assequor, bene habet. Tu vive feliciter mei memor, et vale. Arquadæ inter colles Euganeos: in vigilia Pentecostes.

## EPISTOLA XVI.

FRANCISCUS PETRARCA GIBERTO ET LUDOVICO DE CORRIGIA  
S. P. D.

Lamentatur mortem patris, seque eos constanter  
amaturum promittit.

Epistolam vestram, carissimi Domini dulcissimique filii mei, legi moestus et lacrimans, damni ac miseriæ meæ plenam. Super qua quoniam et præclarissimæ genetrici, et magistro vestro fidissimo magistro Modio fratri meo multa scripsi, agam brevius. Equidem immortalis memoriæ patris vestri domini mei obitus quanto cor meum dolore transfixerit, vobis in ætate tam tenera arbitror non ignotum. Perdidi propter quod præcipue me vivere delectabat. Verum quia nec vos, nec me ipsum consolari scio, ne loquendo amplius ir-

ritem lacrimas nobis inutiles et, ut reor, illi quem gemimus etiam odiosas, finem faciam hoc addito. Vos me quidem, ut literæ vestræ sonant, in patrem habere disponitis, et urgente calamum pietate, additis atque in dominum. Primum libens et gloriabundus amplector, etsi talibus filiis non sim dignus. Secundum, licet ab ingenti benevolentia prolatum, respuo. Habetote me, quæso, quod vere sum: ego enim non nunc noviter, sed ex quo primum vitæ limen in lucem editi contigistis, animo vos in filios ac dominos adoptavi. Non muto sententiam: sic filios memini ne dominos obliviscar. Quod domino meo fui, hoc et filiis eius ero dum vivam. Rogo autem atque hortor, vos udisque luminibus obtestor ita vivere, sic ad virtutem veramque gloriam niti, ut quod pridem mihi indoles vestra pollicita est, e flore conspecto fructum videam ante quam moriar; et tantus pater dignos se filios genuisse videatur, et ego patientius vulnus meum feram, pro uno duos illi similes mihi atque aliis qui memoriam eius amant intelligens remansisse. Quod ut maximum utque optimum, sic Deo duce, facillimum ac iucundissimum vobis erit, si prudentissimæ matris vestræ consiliis monitisque salubribus, ut debetis, prorsus in omnibus obedientes ac dociles animos præbeatis. Custos vobis directorque et erepti patris in locum sit ille omnium in se sperantium Pater Christus.

Venetiis XV. Kal. Decembris.

F. Vr.

## EPISTOLA XVII.

FRANCISCUS PETRARCA AD IGNOTUM.

Quod equum suum custodierit sanumque remiserit gratias agit:  
et patientiam in adversis suadet.

Equus meus stabulis tuis pastus ad me rediit solito vegetior atque lascivior: ita quem fessum atque ægrum recreandum sanandumque suscepas, uberiori indulgentia saginasti. Multa ille dicturus de te si loqui posset, nunc liberalitatem tuam fronte testatur, ac tacitus clamat optimum se et qualem semper optasset hospitem habuisse. Venit secum tua de successibus meis parva quidem sed vere gravis epistola, cuius est illa summa, qua præclarissimus ducum Africanus apud Livium usus, *omnia*, inquit, *quæ agimus subiecta esse mille casibus scio*. Sciebat ille rebus in maximis expertus: scimus et nos qui idipsum assidue rebus licet in levioribus experimur. Dicerem quod magni dixerunt viri: *Fatis agimur*, et iterum, *Fata regunt homines*: et illud Mantuani vatis: *inevitabile fatum*, nisi *Fati* nomen suspectum esset apud nostros: sed certe quod dixi satius dicitur *Fortunæ rotamur imperio*; quam licet apud Virgilium ipsum legam, omnipotentem dicere non audeo, cum in litteris sacris non nisi unus sit omnipotens; multipotentem dixisse non vereor: sæpe quidem infirma consiliorum nostrorum acies illius adamantina soliditate retunditur. Parendum rebus, obsequendum tempori, cedendum necessitati, patientia durandus armandusque animus meditatione continua, et sic insti-



tuendus ut ad quælibet aspera, licet etiam impedimenta, sese præparet. Iam vero, ut tanta futurorum caligine circumsepta immeditatum nihil possit accidere, hoc unum inter vitæ tenebras remedium noris: expectare omnia, scire nihil non evenire homini posse, nihil horum omnium consistere, nihilque ideo magnopere metuendum, nihil optandum; de his loquor quæ miserum genus humanum mulcendo fugiunt, fugiendo sollicitant. Quidquid undequaque contigerit immota fronte suscipere, et rerum suarum propriam portionem credere, et dicere: hoc me latebat; quid ad rem? non latebat illum, cui præsentia et clara sunt omnia: hoc equidem me manebat, hæc mihi sors, hic votorum exitus debebatur: placet, amplector, insuper et gratias ago. Deus sollicitus est mei; carior illi sum quam mihi; cæcum ille me regit ac dirigit, non in iucundiore forsitan calle sed tutiore: aliud optabam, sed inconsulte: non desiderio nunc consulitur sed saluti. Illud delectabat, hoc proderit: meliora largitus est qui in electione non fallitur: recipiam non tantum æquo sed læto gratoque animo, et in reliquum permittam ipsum expendere, iuxta Satyrici consilium, quod

Conveniens nobis rebusque sit utile nostris.

Longius ferebar: sed ut desinam hic brevior papyrus admonuit: et præterea sequi impetum temporis vetor angustiis. Hoc ipse die iter arripio, et hac ipsa hora, qui procellas perosus Parmensium simultatum, sedem otio Italico Mantuam Pataviumque delegeram, Mediolani mihi sedes est! ut appareat vera esse quæ loquimur, quamque nihil ex consilio succedat. Vale. F.

## EPISTOLA XVIII.

FRANCISCUS PETRARCA AD IGNOTOS.

Dolet mortem patris eorum, et ab eius epitaphio se excusat  
ob malam sui valetudinem.

Excellentiæ vestræ litteras, magnifici et carissimi domini mei, non sine suspirio legi. Quamvis enim pridem famæ testimonio didicissem transitum claræ memoriæ domini patris, aliter tamen ex ore tantorum filiorum tanti patris sonat obitus, quam cuiuscumque alterius ore sonuerit. Est, fateor, grave damnum quodque non soli vos et amici vestri, sed omnis Italia queratur et lugeat, nisi quod conditio nostra mortalis omnem luctum debet et potest efficaci ratione opprimere; dum occurrit id sibi accidisse, ut ait Seneca, quod omnes ante se passi, omnesque passuri, et præsertim ubi est iucunda recordatio gloriosæ vitæ felicisque exitus, qua se superstites consolentur. Quæ si de ullo nostræ ætatis clara fuit, de vestro utique genitore clarissima est. Ego unus ex multis tanti particeps sum doloris. Licet enim facie incognitus, sperabam sibi non vilis esse, quem talibus filiis carum sciret. Et idcirco si quid possem ad cumulum gloriæ suæ stabilius quoque solidiusque quam marmor, vere domini mei, rogandus non essem: ultro enim me non expectatis precibus obtulissem. Etsi enim occupatissimus, et a talium dudum consideratione distractus intentusque aliis, tamen et occupationes omnes reiecissem, atque huic uni cedere coegissem, et ad desuetum iter iniectus, ut sic

dicam, manibus ingenium retraxissem, gloriosum mihi aestimans et talibus tamquam familiaribus dominis meis obsequi, et tantæ virtuti testimonium perhibere. Sed in præsens aliud vere maius obstat impedimentum corporis grave et molestum. Quo coactus et Paduam veni prope balnea; et quotidie inter manus medicorum sum sic affectus, ut ipse mihi displiceam atque ipse me oderim, nec ulli rei alteri quam mœrori possim animum applicare; quod mihi non accideret, si morbus brevis esset ad mortem; sed vereor ne sit longus ad tædium. Sit tamen quidquid Deo placitum. Omnia ferrem æquo animo, si interim non a solito studio prohiberer: sed prohibeor. Et hoc etiam ferendum fortiter: laete dicerem, sed mentirer: et de hoc inter multa doleo, quod vestræ nunc parere non valeam iussioni; sic enim vocare debeo preces vestras. Parcat mihi quæso vestra nota benignitas, cogitans verum esse quod ait ille:

Carmina proveniunt animo deducta sereno.

Mihi et turbidum esse animum et corpus invalidum, atque ideo totum hoc morbo imputet, et non mihi, et utatur hac in re ingeniis aliorum, quæ multo altiora ac vivaciora sunt meo ingenio occupato nimium ac defesso: et præcipue ser *Cechi Meleti* de Forolivio viri admodum singularis et amici mei. Cuius epitaphium si habetis, consilium meum est ut aliud non quæeratis. Quidquid ille scribit ego approbo. Si quid forsitan auctoritatis in meo iudicio reponitis, ecce, domini mei carissimi, petitis auxilium, consilium do. Sed non possum amplius. Valete: Christus vos unanimes atque

incolumes in statu prospero custodiat ac soletur. Paduæ X. Octobris cum labore scripta. F. P. vester recommendationem.

---

## EPISTOLA XIX.

FRANCISCUS PETRARCA MODIO PARMENSI S. P. D.

Demortui Azonis de Corrigio memoriam sibi carissimam laudibus, lacrimis et desiderio prosequitur.

Heu mihi! Quid hoc mali accidit inopinum, subitum, repentinum? Quamvis nihil mali, nihil inopini, accidat sapienti: sed mihi accidit ut multis argumentis intelligo, ex plurimis adhuc uni quia, quod valde nolim, adhuc portio vulgi sim; cuius est mos bona sua sibi perpetua polliceri: et quidquid vehementer amaverit immortale. Hoc sæpe olim sed nunquam magis quam quando minus debuit me fefellit. Et heu! misero. Quis hic animi mei status, quæ confusio rerum, quæve perplexitas atque vertigo est, quando neque quo gaudeam quove me soler habeo, neque quid lugeam doloremque meum quibus promam verbis invenio? Si dicam quod bonum dominum amisi, amicus idem erat optimus. Dicam patrem perdidi? Frater erat: Dicam ornamento vitæ spoliis? Et præsidium fuit: Dicam familiaritate privor utili? Et delectabilis et honesta erat, omnibusque simul ex causis appetenda, quarum quæque per se magno sufficiens sit amori. Dicam rerum mearum summum culmen excidit; angularis quoque ruit lapis, et compago optima; iam mortis ariete

et hiantis ædificii bases tremunt, et tristis vitæ pondus fessa vix perferunt fundamenta. Dicam vero quod animæ meæ oculis ac lumine careo? Et cor meum fuit et virtus mea. Totum ergo illud mihi Davidicum iure meo vindico: *Cor meum conturbatum est, dereliquit me virtus mea, et lumen oculorum meorum et ipsum non est mecum*: et ad summam aut mearum calamitatum iniquissimus mentor sum, aut nemo unquam unius morte hominis plus habuit quod lugeret. Cæteri enim unum aliquid, ego in uno simul omnia perdidici. Quid infelix tam invidiose damnum meum queror? Quid tam graviter meum vulnus exagito? Immo vero quam vulgaris et pusilla miserorum omnium consolatio est? Non amisi ego illum sed præmisi. Secum enim divitias ac thesauros meos, vitæque huius bonum omne deposui, verum unde depositum meum carum ac dulce reposcere non meo arbitrio sit relictum, versoque meis in rebus iuris ordine, ego illi non ille mihi sit debitor, qui ea lege præcesserit, ut iam suos non tam corpore visitet, quam expectet. Quod nec ætas, nec insueta fragilitas, nec frequentes ut crederem suaserant morbi. Quo insperatius eo mœstius eoque flebilius me nunc ille deseruit, in quem ab adolescentia omnes spes curasque coniecram, quique ita me omnibus semper antetulit, ut neminem plus me amaverit nisi me, cui in dies inque horas fiebat amantior, utque omnium in multis inque amicitiiis præsertim, sic in mea maxime victor fuit, sæpe solitus iactare nullum se nosse mortaliū, cuius non dicto factove aliquo esset offensus, nisi me unum, per quem nil penitus unquam tædii, nilque sibi molestiæ esset invectum; demptum vero sæpe quam plu-

rimum; ut etsi non modo cum exteris sed cum clarissima etiam ac divina tori socia, cum filiis quoque suavissimis atque obsequentissimis pueris vereque nobilibus habuisset interdum leve aliquid vel coniugalium querimoniarum vel paternarum, mecum nihil omnino nisi quotidianum veri ac perpetui amoris augmentum. Nunquam illum totiens adii quin aliquid additum antiquæ benevolentiae lætus animadverterem et admirans. Nemo illum vidit aliter meis quam suis aut angustis incommodis, aut commodis gaudere, aut honoribus gloriari. Tam in consuetudinem atque artem versum scires, ut quisque gratiam eius ambiret, quæ diu necessaria atque utilis multis fuit, vix aliunde quam a laudibus meis inciperet; efficacissimum persuadendi genus; neque aliis præceptis oratoriis opus erat: artificiosa satis oratio censebatur quæ meis decoribus plena esset. Quicumque me laudare didicerat, alieni suffragii iam non egens, pro benedictis beneficia merebat. Contra nonnullos perpetuo fastidivit, non quod de me male locuti essent (ea enim acrioris odii causa erat), sed quod parcius me laudassent, aut omnino de me aliquid demutissent, unde se mecum, quem ipse sibi prorsus incomparabilem fingebat, vel tacito iudicio velle conqueri suspicionem vel tenuissimam concepisset. Hunc ego igitur non amem, hunc non meminerim, hunc non fleam, qui me amavit ut se, qui mei non aliter quam sui meminit, qui me ægrum flevit graviter ut scias qualiter fleturus esset extinctum? Mihi vero prius omnia quam memoria amorque viri huius exciderint: prius hunc spiritum fessa membra destituent, quam fletus iste, quo nutrior, quo delector: prius hoc

fragile mors iam non amara corpusculum, quam animum hunc invadat tantorum oblivio meritorum. Quid enim de me ille non meritus, aut quid mediocre meritus is contentus fuit? Quid plus, quæso, tribueret non amicus amico, sed vel frater fratri, vel patri filius, vel filio pater? Et profecto ille mihi auxilio dominus, non quicumque sed mitissimus omnium qui a sæculis visi sunt; consilio autem pater, obsequio filius, solatio amicus, caritate germanus prope par fuerat. Denique, quod de se omnibus ait Apostolus, vere ille mihi omnia factus erat. Ille me fortunarum omnium, ille otii, ille negotii, ille me viarum comitem sæpe longissimarum habuit. Cum illo prospera et adversa participavi, cum illo et urbanis sæpe deliciis et rusticis aliquando secessibus recreari contigit. Quocumque res posceret gloriosis laboribus exerceri, cum illo vitæ brevis longas partes egi, egissemque omnes utinam, nec me bustum a tam placido et tam fido contubernio separasset. Secum ego terras et maria circumivi, quidem cuncta cum gaudio et oblectatione mirabili. Nonnunquam vero periculis magnis ac gravibus quibus ille, dum mihi qui sibi eram comes comitem præbuit, ultro suum caput exposuit. Unum defuit, ut hunc ipsum totiens ad alias atque alias comitatus, saltem vivus ad ultimam comitarer domum. Mallem exanimis esse: sed vivacior sum quam vellem, parumque iam reliqui est, ut ille ego amicitiiis olim usque ad invidiam felix, earumdem modo inops solusque, et prope iam vulgo tantum facie notus sim; nisi quod mihi non virtus aut meritum, sed hoc qualecumque nudum nomen novas subinde parit amicitias, quibus utcumque mala cætera lenio. Nempe

hoc unum nullis lenitur artibus, nullo mitescit ingenio. Letale est enim, et nunc *alte vulnus adactum*, ut Maro ait. En qui alios solari soleo qualiter me ~~con~~solor, non veri inscius, sed dolori impar et angore obrutus ac mœrore. Scio, ut dixi, quod præmisi illum non amisi; vetus quidem neque minus verum verbum, et quo multi illustrium usi sunt. Præmisi, inquam, quem natura meliorem, fortuna fecit altiore, ~~amor~~ mihi penitus parem fecit; quod utinam mors fecisset, neque odiosa intervenisset exceptio, cuncta nobis fuisse communia præter mortem, quæ dilato me ad tempus, illum abstulit, in quo vitæ meæ suavitas ingens erat, ut posthac neque hanc vitam valde cupiam tanto lumine orbatam, neque mortem metuam tot meis ditatam atque ornatam spoliis, sæpe aliis quidem magnis ac maximis, hoc immenso: quodque unum si metiri voluerim, stupebitur ab invidis atque malevolis; nisi forsitan invidiam mors extinxit, quæ contra nullum hominem nostra ætate tantum, quod noverim, ausa est; ut qui virum optimum scirent (Deus bone quæ perversitas!), pessimum prædicarent, et quem imitari debuerant, infamarent. Sed iam seu saturatus morte livor sileat, seu sæviat, mihi sat est meum de immobili rerum veritate iudicium, neque meum modo, sed eorum omnium quibus veritas passionibus antiquior potiorque est: satis est, inquam, mihi et vivi illius invisam malis, et mortui immortalem nosse virtutem: quam non ideo minus amo, minus veneror, minus miror quod is cuius illa erat extinctus sit; extinguere enim ipsa non potest. Ille alias: hæc, quasi illo præsentem, præsens est: hac fruor igitur, illum opto cito quidem revisurus, ut spero; ta-



men hoc quantulumcunque divortium queror, et morti et fortunæ iratus meæ, illum interceptum invisibili sequor gressu, illum dum vixero desiderabit anima mea, illum mea vox loquetur, illum requirent flebuntque oculi mei semper. Et speciosius, fateor, et magnificentius loqui possem, sed non verius; nec me mihi, nec alium circumvenire propositum est. Itaque sic loquor ut cogito. Certe quo possum nisu fræno animum, sed me calcar fræno potentius præcipitat ad amaram quamdam dulcedinem lacrimarum. Nec facile dixerim quam dulce mihi fuerit flere dum scriberem, simulque præteriti temporis meminisse, tecum, o amoris et mœroris particeps amice, quando has saltem tanti viri reliquias nondum nobis nostra sors eripuit, ut pro dulci præsentia, pro alloquio, pro convictu, gelidum cinerem ac memoriam teneamus. Unum mihi dum vulnerat solamen dura mors attulit, ut iam nil durius pati possim. Vale. F.

---

## EPISTOLA XX.

FRANCISCUS PETRARCA AD IGNOTUM.

Quod nuncium suum comiter exceperit gratias agit: quod illum pecunia donaverit avaritiam eius reprehendit.

Illius viri optimi maximi tuasque simul litteras legi: nec non et illum Ciceronis hostem, quem ad te miseram audivi, viva, seu verius, mortua et exangui voce de omnibus blaterantem, deque illo in primis

quod in sinu eius tuos aureos conguessisti. Quibus ille procul dubio non egebat. Nisi quod quidquid mage supervacuum est homini necessarium fecit arens et inexpleta cupiditas. Quæ nescio quonam pacto, etsi latissime cum sororibus suis regnet, nusquam tamen omnino plus virium habet, quam ubi matrem omnium adiutricem stultitiam nacta est. Excusavit ille quidem artificiosa dementia, seque coactum dixit liberalitati tuæ nequivisse resistere: credo, ædepol, et te sibi vim amicam attulisse.

---

## EPISTOLA XXI.

FRANCISCUS PETRARCA DOMINO PARMENSI S. P. D.

Zelotypia laborantem hortatur ut omnem suspicionem animo deponat.

Inter curarum mearum turbulentissimas procellas gratissimæ mihi tranquillitatis portum obtulisse visa est prædulcis vestri melliflui oris epistola, quam nuper elegantissima colorum varietate distinctam, et incredibili verborum artificio perpolitam, bis terque perlectam cum occupationum variarum occupatus sarcina deponere cogitarem, ipse mihi lepos insitus ut decies blandiendo relegerem persuasit. In qua quidem illud expertus sum, quod de perfectis poematibus dici solet, ut ex crebriori scilicet lectione uberior delectatio perveniret. Nimirum fere omnia, quæ de ineffabili amoris imperio confusius apud clarissimos auctores magnis voluminibus explicantur, omnemque peripateticam materiam in qua poetæ quidam illustres tantum temporis ac

studii posuerunt, luculentissimo quodam compendio, intra paginae unius angustias redegistis. Mira vis ingenii, rara potestas eloquii! Animadverti sane totam narrationis seriem amantissimis quibusdam ac dulcissimis suspicionibus intertextam: itaque subridens tacitus mecum dixi. « Indignabor posthac parcius casum meum rudis et inexpertus homuncio: quoniam iste vir tantus, quamvis sapientia praeditus naturali, quamvis scientiarum omnium telis armatus, quamvis legum clypeo contectus, et casside decretorum, auratae tamen cuspidis lacrimosum vulnus evitare non valuit: quod profecto quam profunde in visceribus suis inderit zelus indicat lamentantis. » Sicut enim inter animi possessiones inflammatus amor, sic inter amoris pestes ardens zelus et sollicitus obtinere non ambigitur principatum. Hinc quoniam iubetis ut adversus vos partes suscipiam defensoris, etsi tanto quidem duello fragilem hunc calamum obiicere reformidem, huic haud dubie, nisi fallor, dilectae pariter ac reae, quam accusatio vestra persequitur, excusationis ingens praebetur occasio. Vulgata namque res est, quod quisquis amat non dubia tantum et formidolosa, sed etiam omnia tuta timet, sicut naturae conscius Virgilius noster ait, et apud alium poetam *credula res amor est*: et iterum:

Res est solliciti plena timoris amor,

denique unus etiam ex modernis:

Turbine perpetuo mentem timor angit amantis.

Profecto sic est: nusquam sine metu amor habitat, quamquam saepe sine amore sit metus. Nulli igitur

sanæ mentis mirabile videatur si amor in vobis servat vetustissimum morem suum, ut cessante licet omni criminum materia, inter flammæ sic affecti pectoris suspicionis fumus emergerit. Cordis equidem vestri dominæ, cuius merita per vestras litteras commendastis, etsi ei insultaveritis delatione gravissima, nequaquam tamen innocentiae patrocinium ademistis. Cæterum patronum pro qualitate negotii, proque contradicentis eloquio, nimis imparem deputastis. Ipsa, inquam, prorsus oculis meis ignota est: itaque novum pugnæ genus ingressus sum, quam nunquam viderim, cuius nec nomen audierim, defensurus. Feci tamen audentius, quia nec a vobis frustra commissum aliquid arbitrabar, nec tantum amicum iustitiæ amico suo præcepturum aliquid quod a iustitiæ terminis abhorreret. Ad hæc incertæ notitiæ locum opinio violenta successerat; quoniam non nisi verendam et prorsus egregiam matronam fore, quam alatus et pharetratus ille puer tanto amatore dignatus est, inexpugnabili mihi concluditur argumento. Sicut enim dissimilitudo morum ac naturæ est odii causativa, sic amorem constat ex similitudine procreari: quo fit ut quam ex tanto nobilium feminarum agmine maturo consilio prætulistis, necesse sit vobis esse simillimam. Quod cum ita sit, quid consequitur aliud nisi prudentem fore, castam, sobriam et modestam, suscepti beneficii memorem, piam, largam, præterea liberalem et in omni actione iustissimam, proinde contemptricem hominum reliquorum, unique duntaxat amoris vices, fide purissima-referentem? Nec me terruit ab adverso quod contra eam verbale bellum instituisset videremini. Sciebam enim quam dulces

sunt amantium querelæ, quam verba brevissima, quanta discordantibus verbis animorum soleat esse concordia. Memineramque Terentiani illius verbi : *Amantium ira integratio amoris est*. His atque aliis persuasionibus in opinione persisto, ut non facile crediderim quod mulier tantis circumfulta virtutibus, in tantam laberetur insaniam, ut quemque præponeret illi, cui morum integritate seu vitæ dulcedine nullum, quem ego quidem noverim nostri temporis, natura præposuit; quod illum parvi penderet, quo non sola civitas hæc, sed omnis Italia gloriatur: in cuius serenissimi oris adspectum inhians scholarium turba suspenditur, quem non segnius stupentes advocatorum Parmensium choricum veneratione suspiciunt, quam olim aut Roma Marcum Tullium Ciceronem, aut Demosthenem mirabantur Athenæ *moderantem pleni fræna theatri*. Sic enim de illo scriptum legimus. Ponite igitur metum, quæso, ni impossibile sit amanti: et si quid fortasse inter tot virtutum radios vidistis obscurius, cogitate id non tam ex illibata rerum veritate quam ex tenerrime zelantis delicatissimo iudicio processisse. Si quid sane sibi vel ætatis, vel consciæ formæ lascivire permittat, citra tamen famæ rubiginem et pudicitiae læsionem, quod et in Claudia clarissima femina severior excusavit antiquitas, et Cæsar Augustus tulit in filia, sic vobis iure proprio et si quid oculos vestros offenderit accusare, et mihi qui vel iudex communi partium consensu, vel spectator extra palæstram huius ludi sedeo, non interdicitur vel ex arbitrio meo loqui, vel æquam, si sic dici debet, proferre sententiam. Hactenus hæc prosaico sermone processerint. Ad carminis autem iugum

dispersas plurimisque iam diebus peregrinantes ab his laribus Musas, etsi sæpe receptui cecinerim, congregare non potui. Parcat igitur urbanitas vestra, cui qualiacumque de arboribus meis poma furtim lecta pro tempore, rusticanis vasculis offeruntur. Valere vos feliciter cupio.

---

## EPISTOLA XXII.

FRANCISCUS PETRARCA BARBATO SULMONENSI S. P. D.

Absentiæ dolorem scribendo leniri. Nimium ab illo se laudari, nimis plus æquo fieri scripta sua, quibus undique colligendis operam dabat.

Invidisse Fortunam nostræ amicitiae crediderim; ita nos distraxit ac dissuit, ut vix hoc ipsum commercium litterarum, extremum solamen absentiae, sit relictum. Ubi enim, ut sit ocium, ubi, inquam, nuncii? Ubi fides? Piget occupatos ac defessos hos digitos, tantum quotidie litterarum perdere. Tu mihi, nam memini, pontem nescio quem dudum traiciendis animi conceptibus struxisse videbare, et monstrasse iter, quo, si quid omnino familiarium nugarum haberem, ad te facile mitterem. Nempe pons ille illico, quo nam terræmotu seu quibus imbribus incertum, ita corruit ut ne vestigium extaret. Itaque iam desperare coeperam posse curas meas, nisi data opera missis ad te nunciis, pervenire. Eo nunc libentius et religiosum hunc virum et quam sinu extulit epistolam tuam vidi: restituit enim spem vetusti moris renovandi, quo sci-

licet absentiae dispendia leniremus. Quid autem, quaeso, felicius, quid dulcius, quam cum amicis totum si detur tempus agere vitae? Atqui tecum ero dum me leges, mecum eris dum te legam. Semper mihi fateor praesens es; utor enim privilegio amantium et absentem absens audio et video. Potest Apenninus corpora nostra dirimere, animos loca non dirimunt. Alpes ipsas intersere, et Caucasum et Atlanta et Olympum nubibus altiore, ipsum denique Oceanum interpone, congre- diemur tamen, confabulabimur, colloquemur, una eri- mus, simul deambulabimus, simul coenabimus, simul pernoctabimus, nec epistola ventis allata, qualem Ti- berianus hemisphaerii huius accolis ab Antipodibus missam fingit, sed praesentibus ac notis affectibus im- portunam vincemus absentiam. Et licet obstantibus elementis, convenienter cum quovis vultu (*sic*) assidue mecum sis, nec aliquando discesseris, ex quo primum meus esse voluisti, tamen in litteris recentior atque veracior facies tua est, ut inter legendum multis post diebus, praeter solitum, quasi vivas voces audierim frontemque quodammodo et ipsos amici oculos aspexe- rim. Ita mihi in paucis verbis eminebas totus, ut dice- rem: oh! femineum ingenium, oh! bona Carmentis, quae hoc inter absentes remedium meditata es! Fecerat idem apud Chaldaeos Abraham, apud Hebraeos Moyses, apud Graecos Cadmus: Aegyptiis et Latinis mulieres argu- tissimae providisti: Isis Aegyptiis, tu nobis. Hoc igitur mihi solatium restitutum gaudeo, teque longo velut postliminio redeuntem laetus amplector. Nunc ad episto- lae tuae sensum venio, ubi si brevior sum quam velis, veniam dabis. Nam et hospes mea tertia, et septem-

ber familiaris hostis meus sic in me nuper coniurati exarserunt, ut si paullo vel illa acrior, vel ille longior fuisset, oppressuri fuerint haud dubie: a primo enim ad extremum diem in grabatulo meo vinctum ac semianimem prope tenuere. Tempus adfuit, et aer blandior, et mensis amicier: sensim redeo unde raptim excidi, tamque nullarum adhuc virium sum, ut vix ad scribendum digitos explodam, vix papyrum explicem, vix calamum versem: ipsum iacet ingenium proprii carceris concussione deiectum. Sed assurget in dies, et si illud novi, fiet intermissione vegetius. Interea tamen has notulas quales excudere potuerunt ægra mens, frons pallida, manus imbecillis et tremula, æquo animo ut perlegas, eadem amicitiae vis compellet, quæ te adeo sollicitum ardentemque coacervandis opusculis meis fecit, quæ ut memoras, ab innumeris et mirum in modum patria, moribus ac professione distantibus mendicasti. Stupui audiens, sit licet benevolentiae antiquæ novus stupor; vetus hic mos tibi: mihi propter perseverantiam admiratio quotidie recens est, quod ita nihil affectui tuo detrahat cuncta consumens ætas. Quibus autem armis amor, aut quibus viribus vinceretur, quem seu vincere, seu vincere omnia, secretorum naturæ conscius Poeta confirmat? Quintusdecimus, nisi fallor, annus agitur, ex quo immortalem amicitiam, et vitæ nostræ finibus non contentam saluberrimam ad umbram pastore gregis, silvæque domino tunc Argo dextras iungente, contraximus. Ecce idem hodie mirator es rerum mearum, qui tunc fueras. Mirum et prorsus impossibile, si tamen me minus, aut te solito plus amares. Minus enim se ipsos



amantibus et sua cuncta mirantibus, alienum omne sordescit. Tibi animus idem atque uniformis est: semper itaque tua legens dixi: magna est Barbati mei humilitas, magnus amor; adamantinas opiniones et radicatos in silice sensus habet. En ut anxie, quasi magnas opes, nunc etiam ineptias meas quærit. Unde hoc? Nimirum non ingenii mei, sed illius indulgentiæ laus est; has illi curas amor, hoc studium, hos labores intulit: quiesceret nisi amaret. Haud nova quidem res. Inops iudicii omnis amans: lippos amicus oculos laudabit; obliquum nasum, nodosos digitos, moestam frontem, genas aridas, squalidam comam. Quid enim inter adulantem et amantem interest, nisi quod ille fallit, hic fallitur, ille persuadere vult aliis, hic iam persuasit sibi? Vidi ego, Barbate, virum optimum quem strumosæ humerus, quem claudicantis incessus, et quem blesæ confabulatio delectaret. Novissimum hoc et tibi accidit: quid enim flagitas? quid quæris? Facessat ad horam amor; non ames parcius, sed incorruptius iudices: videbis quoque balbutientis amici sermunculos tanto studio te optare, quanto, nisi amor esset, abiiceres. Sit tamen ita: errori enim tuo gratulor: nam et ex amore oritur radice pulcherrima, et plusculum forte quam suspiceris nomini tuo confertum integre iudices hæsitare. Quis scit an et interdum de rebus meis mutare sententiam cogat testimonium talis viri? Utcumque ita sit, profecto litterularum mearum, quæ tibi sine ullo discrimine placent omnes, partem exiguam tanta solitudine congregasti, cum tibi interim voti tui conscius multa paraverim. Tibi equidem quodcumque mihi est epistolare carmen inscripsi,

quod ne pridem acceperis non mea, sed scriptorum culpa est, quorum semper insidiis ac fraudibus patui, homo incautus intentusque aliis: studiorum meorum iactura non ultima. Ita sæpe numero meque measque res, reculas dicere debebam, negatis pactis auxiliis retardarunt, et ad proprios cuncta digitulos rede gere, quæ mihi vel non attingendorum, vel deserendorum plurimum causa fuit. Hactenus hæc. Nam operosioris vigiliæ labores nec promisisse tibi velim, nec negasse. Primum ideo quia sentio fidem meam hac in parte suspectam, eo quod dudum promissa distulerim: secundum quod nec viri boni, nec amici arbitror aliter quam in animo habeas loqui. Unum hoc dissimulasse noluerim, quoniam de stupendis amoris effectibus sermo susceptus est nobis, mirari me quid hic iterum rei est quod mihi tam facile poetarum regis titulum de inexhausto caritatis et indulgentiæ tuæ fonte largiris, cuius rei sanctum hunc atque devotum hominem testem dicis, qui id mihi cognomen, his in locis esse narraverit. Idque quam cupide ac scienter arripueris epistolæ tuæ superscriptio et finis indicant, quasi vero non cuilibet idem narranti pari facilitate crediturus fueris. Enimvero primum tibi, amice, quem passionibus expeditum in omni vero iudicio nulli secundum facio, meis in rebus quantum fidei sit, si ad te ipsum redis, intelliges; deinde hunc testem de re sibi incognita locutum scire debueras, et scires, nisi persuasor potentissimus amor obstreperet. Non equidem tantum prona, sed præceps ad delectationem est humana credulitas, cum ad contrarium pigra sit. Cernis ut amara fugitans quocumque eam dulcis aliquis rumor vocat, vento ve-

locior fertur. Sed oro te, nonne huius testimonium audienti primum illud occurrit, piscatorem de aquis interrogandum, de nemoribus venatorem, pastorem de gregibus, de ventis nautam, de bobus agricolam; sic et de armis militem, et de bellis ducem; sic religiosum denique de sacris, poetam de Musis, oratorem de causis, de naturis rerum et vitæ ratione philosophum? Extra suos hunc terminos eduxisti, dum coegisti ut de Poetica sententiam ferret. Sed dices; nihil est de proprio: vulgi iudicium referebat. Sentis ut pedetentim ad corruptissimi iudicis tribunal accessimus: iam mallem de proprio loqueretur. Cogita, Barbate, acriter quanto priscis vatibus nostris aut felicior aut certe facilior ætas fuit, prius dico quam Pierides ex Græcia in Italiam commigrarent, ea scilicet tempestate quando, ut Sulmonensis tuus ait:

Qui bene pugnabat Romanam noverat artem,  
Mittere qui poterat tela disertus erat.

Haud magni negotii tunc fuit esse poetarum regem. Ut sileam reliquos, quantus Lucilius est habitus, quem tum in aliquo reprehendisse prope sacrilegium videretur, cum in multis impune reprehendatur Maro? quantus aliis quantusque sibimet visus est Nævius, quantus Plautus? Et qui fuerint scimus. Ars exigua, mediocre ingenium, vivax fama, magnus populorum favor, rerum suarum æstimatio immensa. Lege epigrammata sepulchrorum ab his edita; satis superba fateberis, etsi ab alio dictata essent, etsi alter horum Homerus, alter Virgilius fuisset. Blanda, inquam, ætas et favorabilis poetis, quæ de tam parvis radicibus tam

magnificas opiniones eliceret. Nobis durior nostra est ætas, a quibus exactiora omnia requiruntur. Limationi sæculo successimus. Alta sapere non sinimur. Cultioribus ingeniis circumsepti sumus, quorum admiratio insolentiam nostram frænat. Cave igitur, ne me amando prægraves, obruasque non mei mole cognominis. Ingenue quidem regis poetarum appellationem respuo. Ubi enim regnum hoc exerceam quæso? Quos mihi statuis regni fines? Occupata utraque sedes est, cognomenque istud apud Graios senex ille Mæonius, apud nos Venetus pastor tenet. Ubi sedere, quove ire iubes, ut sim vatum rex, nisi forte in solitudinem meam transalpinam, atque ad fontem Sorgiæ me restringis? Illic (iocari enim tecum dulce est) nescio an iure, sed certe cum Nasone tuo gloriari solitus sum, forsitan audacter, ut ipse ait: sed sicut in suo poetico exilio Istrum ille, sic in meo peregrino ocio Sorgiam ego:

Ingenium nullum maius habere meo.

Ludo equidem, amice, ut vel sic intelligas omnibus me modis id agere ne titulo premar importabili, neve non mihi debitum regnum petens, læsæ reus inveniar maiestatis. Reliquum est, ut noris me in dies magis ac magis congressus veros atque complexus tuos optare, quod utinam vel semel mihi contingat antequam moriar. Et vale, Barbate fidissime, nostri memor. Mediolani III idus Octobris, postridie quam litteras tuas acceperam.

## EPISTOLA XXIII.

FRANCISCUS PETRARCA AD IGNOTUM S. P. D.

Littera, cancri in modum retrograda, eo artificio conscripta est ut a principio ad finem lecta laudes eius cui inscribitur complectatur: ordine verum inverso illum vituperio et malis imprecationibus insectetur.<sup>1</sup>

Iucunda ipsa felicitate lætisque iisdem successibus te prosperis potiturum, nunquam quælibet te passurum adversa probate revera fide et operibus, amice non fecte vir, intimis affectibus gestio ac iugiter Deum oro. Prolongentur dies tui, nec tibi sit vita brevis: divitiis affluas, neque careas ergo cunctis optatis: debita quæpiam hæc tuæ virtuti non vitiis. Versus ad com-

<sup>1</sup> Veterum qui F. Petrarcae opera ediderunt fidem sequutus inter eius epistolas hanc ipse quoque recensui, non sine quadam animi molestia cogitans in hoc laborioso et futili scriptionis genere vires ingenii sui doctissimum virum exercuisse. Cumque tot illam refertam mendis erroribusque reperiissem, ut nulla saepe verbis inconcinne compactis germana significatio responderet, iam adnotatione adiecta, lectorem monueram me in illa emendanda tempus terere noluisse, eamque prout in lucem semel iterumque prodierat, heic inseruisse, ut si quis forte ex huiusmodi verborum lysis voluptatem caperet, illam pro lubitu restitueret. Serius tamen, postquam scilicet epistolarum omnium sylloge mihi perfecta fuerat, animadverti in editione Veneta anni MDIII post argumentum huius litteræ legi — P. EPISCOPI EQUILEN. — quibus ex verbis compertum habui litteram hanc non Francisci Petrarcae sed P. (Petri) Episcopi (Equilensis seu Equilini) ludicrum opus esse: Petri scilicet de Natalibus quæ, teste Ughellio, Ecclesiam Equilinam in Marchia Tarvisina Patriarchæ Gadensi subiectam ab anno MCCCLXIX. ad annum MCD. obtinuit, nomenque suum quum omni virtutis laude, tum praesertim Coelitum Sanctorum historiis per singulos anni dies digestis commendatum posteris reliquit (*Ughell. It. Sacr. Tom. X. p. 87*). Non ideo tamen ex hac collectione illam expungendam duxi: tum quia auctoris nostri nomine vulgatam eam frustra quaeri in hoc libro a curiosis quibusque nolui, tum quia iam aliis accensita suoque inter Varias numero distincta extrudi nequibat quin aliarum iamdiu statutum ordinem præverteret. Sat igitur fuerit de hoc monuisse lectorem.

mendationem tui promere volui stilo sonante dispositus fidelitatis in tuæ laudes non iurgia, criminandum si quid fuerit tegens de tui rubore, pandens tua tamen egregia non infirma opera prædicanda. Cognovi te moribus perfectum in cunctis, quadruplici virtutum cardinalium radio absque vitiorum maculis aspersum sic iugiter extitisse, virtutum ipsarum ordinem servandum non iam præposterandum, ideo duxi singula ordinata in te facere quoniam semper novi. Probas te providum in futuris, caves semper pericula, neque prospera fortunæ nisu animi complecteris. Disposita in te præsentia solerti non segni studio certa in actibus tuis ostendis animum sic compositum nonque rudem effectibus monstras. Amplectenda sunt utique non aspernenda operum tuorum gesta probanda re ipsa: exemplorum veterum memorem non excordem namque te fuisse prorsus et esse, homines proclamant prompta non disgregata memoria. Tribus itaque temporibus tuus animus manet dispensantibus in singulis prudentia omni ac peritia rerum absque cordis ignorantia quorumcumque naturaliter insita tibi. Dilectam tibi iustitiam in iudicando foves: præmia bona non supplicia iustis, iniquis poenarum discrimina non coronas dudum tribuere didicisti. Veritati similis abdicatis tibi flagitiis reddis hominibus omnibus sua; non piger aut iniquissimus censor servans dubio procul misericordiam in severis et pietatem in rigoribus semper tuis, cedens ex animo clementi in adiectionibusque poenarum. Donator liberalis nemini parcus, largitor munificus, non avarus. Execraris vitia non virtutes, mores honestissimos insectaris et honestum: nilque penitus est iniquum quod

operaris: iustos et bonos sequeris per omne tempus, pius in consiliis, iustus in omnibus operibus tuis. Constantem in animo te certe noti ferunt: felici statu non exaltari adversis eventibus fortem non depressum te reddere: fortitudinem ac virtutem omnibus temporibus invictam sic servans agnosceris. Declamaris animo probo revera publica longaque fama intrepidus, non remissus, non vecors diceris apparere. Sancta modestia, pulsa gastrimargia, fungeris; castimonia, reiecta lascivia, delectaris. Temperatum in verbis et actibus, cibus et potibus te die ac nocte experti manifestius attestantur. Deo atque hominibus grata in omnibus opera tua patent. Meditaris nam iugiter quodque fas quodque nefas, et purgas animam mala fæce. Felicem in gradibus singulis dicere malim te probandum consona veritate regno dignissimum indignissimum rure.

---

#### EPISTOLA XXIV.

FRANCISCUS PETRARCA IOHANNI ARETINO S. P. D.

De hospitio sibi a domino eius liberaliter Mantuæ oblato  
maximas gratias agit.

Iucundum in stuporem tua me vertit epistola. Quis enim non miretur et gaudeat, ætate præsertim unde tam longe virtus exulat, ubi tam late regnat avaritia, potentis animum reperiri et libertatis amicum et principum modernorum moribus generosa contumacia rebellantem? Loquor de communi domino, cuius nunc et sæpe alias insignis munificentia cupientis licet animi

spem ac desiderium supergressa est usque adeo, ut dum pro reliquis gratias agam, unum in ea sit quod obstupeam potius quam amplectar. Quod enim meis usibus applicandum aliquid filio pater eripiat, absit ut patiar. Plaudenda quidem ista magis quam tolleranda benignitas. Sed hæc et alia propediem mutuo coram sermone tractabimus. Ad vos enim hinc nunquam deflexo tramite et me meus urget animus, et trahit eximia caritas tanti viri. Et quid scimus an ita datum sit ut, ubi Maro noster primitias, illic ego reliquias vitæ agam, et quæ illum in peregrinationes varias misit, ea me de tot peregrinationibus redeuntem ac prope iam fessum tranquilla demum statione refoveat; postremo quæ sibi tellus incunabulum, mihi præbeat sepulturam? Ignara fati proprii mens est: fieri potest ut quæ illi procul a patria, eadem et Mantuæ *me scio dulcem mihi fecit fortuna participem* (sic). Sane de his totoque rerum nostrarum statu Fortunæ dominus cœli regnator viderit. Volo enim ut intelligas me his præcipue diebus sacræ studiosissimum lectionis dixisse domino: *Domine Deus meus es tu, in manibus tuis sortes meæ*. Hæc hactenus. Cæterum nepos tuus speratæ similitudinis indolis, præceptique tui memor, semper insistit ut sibi de scripturis meis nescio quid liceret excerpere mittendum tibi. Negavi cum ne fervidus adolescens proprio studio distractus alienis in finibus vagaretur, tum ut id onus digitis tuis servaretur integrum, ac more venantium dulcius saperet, quod cum labore quæsis- ses, et sudor tuus nostrum condiret eloquium. Vale.

---



## EPISTOLA XXV.

FRANCISCUS PETRARCA IOHANNI DE CERTALDO S. P. D.

Cur Mediolani constiterit. De vulnere quod codex Ciceronis in suum crus cadens intulerat. De quibusdam magnis viris sui gratia honorabili exceptis hospitio. De Homeri poematis a Leontio latine reddendis.

Iucundum negotium tuæ mihi semper afferunt epistolæ : sed tum maxime dum solatii egens sum, quæ mihi egestas inter vitæ tædia frequens est. Non possum sane prætervehi primum illud ambiguum ubi ais : videre te satis e successu rerum mearum Mediolanensem me perpetuum fore ; de quo quod sentias siles, silentii causa expressa, quæ ipsa certe non silet, quod videlicet in sententiam meam nil audeas dicere. Ita dum nihil dicis, plura dicis, quam si multa dixisses. Sæpe hercle silentium artificiosæ eloquentiæ magna pars est. Video ego in his verbis tam paucis multiplicem et ingentem solitudinem ac prævidentiam tuam, nec tuam modo sed multorum. Amici enim ferme omnes, his exceptis qui hic sunt, quique mei abitus mentionem ceu infaustum aliquid exhorrent, omnes, inquam, alibi me terrarum mallent. In hoc enim absque ulla prorsus hæsitazione conveniunt. Sed ubinam ? Hic discordia multa est. Pars Patavium, pars trans Alpes, pars in patriam vocat. Hæ iustissimæ voces essent, ni difficultatem impossibilitati proximam res haberet. Alii autem alio : pro desiderio suo quisque mihi præstabit hunc vel illum habitandi locum. In quo ego non tam iudiciorum dissonantiam, quam amoris et piorum af-

fectum harmoniam miror: dumque acrius causas tantæ varietatis examino, ipsa fateor varietas me delectat, et gloriator ita me meis carum esse, ut alioquin præclara et peracuta iudicia perstringat atque hebetet amor mei. Ego quidem inter amicorum opiniones, si quid ipse de rebus meis sentiam interroger, ubi solitudo, ubi otium, ubi quies ac silentium sint, etsi magnæ opes, honores, potentia, voluptates absint, eo me suspirare respondeam. Sed ubi ea sint fateor me nescire. Solitudo illa enim mea, ubi interdum non solum vivere sed et mori optabam, non his modo quibus abundare solita est, sed securitate etiam caret. Testantur triginta vel eo amplius librorum volumina, quæ olim ibi reliqueram nihil usquam tutius credens, quæque non multo post prædonum manibus vix elapsa mihi ex insperato redita, pallere nunc etiam et tremere videntur, et turbidum loci statum unde evaserant fronte portendere: ita mihi diversorium illud amabile et ruris optatissimi spes aufertur. Oblatam tamen arripio manibus et tenere si possim nitor; et nescio an adhuc sperem an simulem quo me fallam et vana cupientem animam spe oblectem. Nondum illuc me aspirare desiisse cum diurnæ ac nocturnæ cum amicis fabulæ, quibus fere nil aliud loqui soleo, tum suspiria indicant, quæ in litteris ad locorum præsulem nuper inserui. Mirum certe, nec cur novi: sed sic mihi persuasum scito: non posse alicubi quam ubi cœptum fuit nostrum illud, etiam vulgi ore iactatum, opus perfici: quasi principio et fini fatalis ille sit locus. Nam quantum attinet ad reliqua, de loci electione, vitæque modo dubius, variante fortuna, multa cum multis varie, ante alios tecum, sed plura mecum

loquutus sum. Ubi, mihi crede, non tam prompta rerum definitio est quam verborum disputatio: propterea quod futurorum præsagium non modo difficile, sed incertum est. Itaque etsi successus felix esse possit, electio non fortuita esse non potest. Nam quid eligas ubi quidquid elegeris consilii lancibus excussum par vertigo Fortunæ rotatibus applicet? Unum est in cuius electione nemo fallitur, ut ubicumque nos vel necessitas locaverit, vel voluntas, illic æquo animo ac secundum virtutem vivere, non secundum Fortunam eligamus, haud ignari quidquid in longum modo nos sollicitat esse brevissimum. Transeo autem memor me de his tecum anno altero, dum nos hæc eadem urbs et domus haberet, multa disseruisse, nosque omnibus, quantum nostro consilio fieri potest, haud negligenter excussis, in hoc demum resedissem, ut, Italiæ atque Europæ rebus hoc in statu manentibus, non modo non alter Mediolano tutior rebusque meis aptior, sed nullus omnino usquam præter Mediolanum plene mihi conveniens locus esset. Unam excipiebamus urbem Patavii; ad quam postmodum profectus, ac de proximo profecturus sum, ut utriusque loci accolis desiderium meum, non dico tollam aut minuam, quod nolim, sed alternatione leniam. Quamobrem an tu sententiam mutaris, nescio: ego enim in proposito sum, ut huius magnæ urbis strepitum, hæc tædia aliis tædiis urbanis in totum permutare boni nihil, mali forte aliquid, et laboris haud dubie plurimum habeat. Sicubi vero solitudo tranquilla se ostenderet, quam ego, ut dixi, animo percurrens cuncta, non video, non ivisse sed volasse me audies. Hæc tam multa de nihilo, quoniam et tibi et

amicis de rebus meis omnibus, de quibus hæc præcipua, satisfactum cupio; quæ mihi cura frequentibus amicorum litteris excita suggerit ut quum singulis respondere difficile est, eoque magis quod in unam sententiam multi sæpe coincidunt, simul omnibus respondeam, et de ratione vitæ meæ integro volumine disputem, quod ante me, ut arbitror, fecit nemo. Sed quid vis? Nunc intelligo: magnus labor est vivere. Quod proximum in tuis litteris erat elegantissime cavillaris, quod a Cicerone scilicet, etsi non merear, propter coniunctionem tamen nimiam læsus sim: coniunctiores enim sæpe nos, ut ipse ais, infestant, rarumque est valde et insolitum ut Indus Hispanum lædat. Sic est utique; unde fit ut Atheniensium et Lacedæmonum bella dum legimus, et nostra cum proximis dum cernimus, non miremur, multoque minus bella civilia motusque domesticos, quos adeo non mirabiles usus fecit, ut sit potius concordia ipsa mirabilis. At dum Scythiæ regem Ægyptio regi concurrentem, dum Alexandrum Macedonem Indiæ ultima penetrantem legimus, stupor subit, quem in nostris historiis consuetudo notissima et spectata longinquis expeditionibus romana virtus extinxit. Hac tu igitur arte me solaris, quod ab ipso, quo cum percupide versor, Cicerone sim offensus quem nunquam Hippocrates, nunquam Albumasar offendet ut auguror. Sed ut omissis iocis rem ipsam plane noveris, vulnus illud Ciceronianum de quo ludere solebam, ludum mihi vertit in luctum. Parum deerat anni circulo dum in dies peius habens, inter tædia et angores, inter medicos et fomenta senescerem. Ad extremum, dum non modo fastidii, sed vitæ quoque pertæsum esset, statui sine

medicis quemcumque rei exitum opperiri, meque Deo ac naturæ potius committere, quam his unguentariis in meo malo suæ artis experimenta captantibus. Atque ita factum est. Illis exclusis, cœlestis ope medici, ac unius adolescentis qui mihi servit et in meo ulcere meaque, ut dicitur, impensa medicus evasit, fomentorum memor, quæ mihi ex omnibus salubriora notaveram, usus opera, et adiuta per abstinentiam natura, ad salutem ipsam, unde magnis passibus discesseram, pedetentim redeo. Habes rei summam, hoc addito, quod cum vita hæc laborum dolorumque sit palestra, in qua ego sæpe casibus miris exercitus sum (non in se inquam miris, sed in me quo nemo quietis appetentior, nemo fugacior est laborum talium), nunquam certe hactenus seu rei causam, seu animi dolorem, seu temporis spatium consideres, simile aliquid passus eram. Indelebilem memoriæ meæ notam et stigma perpetuum Cicero mihi meus affixit. Memineram sui, sed ne unquam oblivisci possim, intus et extra consultum est. Et hic iterum quid vis dicam? Nunc sentio: magnus dolor est vivere. Cætera transiens, ad id venio quod ad magnam mihi gloriam et gaudium cessit. Tales enim illos et tot viros certe Italiæ principum non ultimos, in extremo terrarum, nocte, hieme, imbre, bello, magnis rerum angustiis coarctatos, ad meum nomen et oppidi mœnibus exceptos et honorifice habitos, obstupui primum suspicatus errorem nominis. Inde vix in memoriam redii temporis illius, quo ibi adolescens fui secutus eum qui serenissimæ nutu frontis facile trans Indiam me duxisset. Ab ea tempestate tricesima, ab illius autem viri obitu ut acerbo

annis, sic maturo virtutibus, decima nona nunc æstas agitur. De tam longinquo igitur ad me reversus intelligere cœpi, quisnam hic, qui post tantum tempus tam bene mei memor esset, qui eius, ut verum fatear, pene iam prorsus oblitus eram. Sibi que per literas, ut vidisti, bene merito gratias egi, ut qui nullo unquam ingenio tantum me quantum in tantorum cultu atque honore hominum promereri poterat, et ipse quoque non minus sui memorem me mirari posset, nisi se mihi memoriam excitasse recenti merito meminisset.

Quod petis extremum est videlicet Homeri librum qui venalis erat Patavii, si, ut reris, emerim, tibi accommodem, quando, ut ais, alter ab olim mihi est, quem Leo noster tibi atque aliis studiosis conterraneis nostris e græco in latinum vertat. Illum ego librum vidi, sed neglexi, quod meo impar visus esset. Haberi autem facile poterit, illo agente qui mihi Leonis ipsius amicitiam procuravit, cuius apud illum efficaces erunt litteræ, et ego meas adiiciam. Si is forte nos frustratur liber, quod non suspicor, tunc meus præsto erit. Nam et ego eius translationis in primis, et græcarum omnium cupidissimus literarum semper fui, et nisi meis principiis invidisset Fortuna, et præceptoris eximii haudquaquam opportuna mors, hodie forte plus aliquid quam elementarius Graius essem. Et nunc cœptis vestris pro virili parte libens faveo, ut qui translationem illam veterem Ciceronis opus, quantum intelligere est, cuius principium Arti Poeticæ Flaccus inseruit, latinitati perditam, ut multa alia, et doleo et indignor, et in hac tanta solitudine rerum pessimarum, hanc tantam optimarum negligentiam ægre fero. Sed quid agam?

Ferre oportet; quod si externa industria nostræ forsā ignaviæ succurri potest, Musis faventibus, nostroque fiat Apolline. Nulla mihi vel Serum, vel Arabum Rubrique litoris merx gratior. Nec ignoro quod dixerim: scio hunc rectum in communi usu nostrorum grammaticorum hodie non esse; sed fuit apud veteres, non dico illos primos quorum ductus iampridem ignorantiam istam pudet, sed hos tempore proximos, doctrina atque ingenio longe primos, a quibus nondum est ausa divertere loquax et cæca superbia. Apud hos inquam, et quod nunc occurrit, apud Horatium, nominatim est hic ipse de quo loquor rectus: reducamus eum, oro, si possumus in medium, et nescio cur latinis finibus pulsum nomen ab indigno exilio revocare in linguam cui omne tempus impendimus, non etiam audeamus. Unum sane iam hinc præmonuisse velim ne post factum siluisse pœniteat; nam si ad verbum, ut dicis, soluta oratione res agenda est, de hoc ipso loquentem Hieronymum audite, in procæmio libri *De temporibus* quem ab Eusebio Cæsariensi editum in latinum transtulit. Verba enim ipsa posui viri ipsius utriusque linguæ aliarumque multarum peritissimi, et in ea præsertim facultate famosissimi. Si cui, inquit, *non videtur linguæ gratiam interpretatione mutari, Homerum ad verbum exprimat in latinum: plus aliquid dicam: eundem in sua lingua prosæ verbis interpretetur: videbit ordinem ridiculum, et poetam eloquentissimum vix loquentem.* Hæc dixi ut, dum tempus est, videas ne tantus labor irritus sit. Ego rem utcumque fieri cupio: tanta enim mihi litterarum nobilium fames est, ut valde esurientis in morem, qui coci artificium non requirit, fiendum ex

his qualemcumque cibum animæ magno cum desiderio expectem. Et profecto quoddam breve, ubi Homeri principium Leo idem solutis latinis verbis olim mihi quasi totius operis gustum obtulit, etsi Hieronymi sententiæ faveat, placet tamen; habet enim et suam delectationem abditam; ceu quædam epulæ, quas gelari oportuit, nec successit, in quibus etsi forma non hæreat, sapor tamen odorque non pereunt. Pergat ergo bene iuvantibus Diis, et Homerum nobis perditum restituat; quoad alios, pium propositum divinitus prosequetur. Nam quod Platonium volumen, quod ex illo transalpini ruris incendio, ereptum domi habeo, simul poscitis, vestrum mihi commendat ardorem et id ipsum paratum erit tempore. Nec omnino aliquid tantis cceptis per me deerit. Sed videndum vobis est, ne hos duos tantos principes Graiorum uno fasce convolvere iniuriosius sit, et mortales humeros prægravet divinorum pondus ingeniorum. Aggrediatur, Deo auspice, e duobus alterum, et illum primo quî multis sæculis prius scripsit. Vale.

Mediolani, XV. Kalendas Septembris.

---

## EPISTOLA XXVI.

FRANCISCUS PETRARCA TALARANDO CARD. EP. ALBANENSI  
S. P. D.

Gratulatur ob pacem eo procurante initam inter reges Galliarum  
et Angliæ.

Lex triumphalis Romæ fuit multis servata sæculis  
ne quis triumpharet, nisi quinque hostium millia saltem



una acie cecidisset: cuius legis causa fuit ne more ingenii humani ad gloriam sæpe non rectis tramitibus aspirantis, ob quælibet levia prælia immaturæ quemquam laureæ cupiditas ad triumphi spem præcipitanter attolleret, neve aliquando virtus exigua indigno donata præmio, et indignatione dignos accenderet, et Populum Romanum impensis impertinentibus prægravaret. Quid nunc dicam? Adulatio omnis fortibus viris invisæ est: sed reddendum vero testimonium. At non aliter, dicat aliquis, nisi dum alteri scribas; illum enim ipsum, quem alloqueris, laudare muliebri nimis ac tenerum, ipsique nonnunquam vel laudanti damnosum vel laudato. Credo si adulator laudet, aut si laudetur stultus. Inter doctos autem ac prudentes viros, vera laus veræ virtutis est stimulus. Inardescit qui laudat, accenditur qui laudatur: neque aliquando metuendum est ne in animos altissimos serenosque terrenarum nebula sordium possit obrepere. De quo alibi pluribus. Nunc ad te redeo. Si ergo belli victor fusor hostium et quinque millium interfector triumphum merebatur, quid non meretur centum millium e suis aut multo plurium conservator, conciliator hostium, pacis auctor, patriæ sospitator? Hæc pro te, pater optime, dixerim: nec insisto, ne forte solidæ laus incipiat nimium tractata mollescere. Id dixisse ausim, et siluisse noluerim: nullum armatum belli ducem, quantum te inermem pacis nuntium, patriæ contulisse. Quotiens inundassent campi cæsorū sanguine? Quotiens flumina rubuissent? Quotiens vester rubuisset Oceanus et lacerata cadavera litoribus reddidisset? Unus tu venturis malis ac prope iam præsentibus occurristi. Posses utinam et

præteritis succurrere! Sed irretractabile est quodcumque præteriit, et humanis consiliis exemptum quidquid a tergo est. Fecisti quod homini licebat: homini, inquam, non cuilibet sed unico, ad multorum hominum, imo ad innumerabilium populorum compescendas finendasque miserias cœlitus destinato. Iure igitur, quod nulli unquam accidisse scio, de multis magnisque confectis bellis miro prorsus honoris privilegio, sine curribus, sine armis, sine captivorum pompa, sine tumultu circumstrepentis exercitus, sed togatus ac tranquillus inter faventium Galliæ Britanniaëque voces, atque inter plausus multum gaudentis Ecclesiæ gloriosissime triumphabis. Heu cur nunc absum? Sed certe, quod mihi præripere Fortuna non poterit, animo præsens ero. In reliquis sane quæ me et statulum meum tangunt, oro te, dominorum optime patrumque mitissime, ut et Socrati meo credas, et libertati meæ faveas, ut spero. Vale, gloriosissime præsulum, decus nostrum.

Mediolani, VII Kalendas Iulii.

## EPISTOLA XXVII.

FRANCISCUS PETRARCA PETRO BONONIENSI S. P. D.

Se bene valere. De obitu Pandulphi Malatestæ et Iohannis Pepoli.  
De rebus suis familiaribus.

Litteræ tuæ, compater et amice optime, tertio mense postquam datæ erant ad me pervenerunt ita madefactæ et laceræ ut vix legi possent. Quod idcirco præfatus sum, ne de responsi stupeas tarditate. Perve-

nerunt ergo nudius tertius. Legi eas ut potui, et agnovi te bene de me opinari: quod scilicet feliciter satis heic degam, ut peccator dico, et profecto non in totum falleris. Omnia enim satis prospere ibant, nisi e duobus oculis meis alter abiisset, alter obiisset; Dominum Pandulphum loquor, et Dominum Iohannem De Pepolis, qui sub ipso adventu litterarum tuarum, devotissime susceptis Ecclesiæ sacramentis, ab hac luce subtractus est, et quanto nunquam alius, quem ego viderim, honore ultimo depositus in Ecclesia S. Augustini, hinc mox Bononiam transferendus. Damnum ingens et publicum et privatum. Deus eum in sua pace suscepit. De quæstione autem consanguinitatis intelligo nullam litteram meam habuisse, sed iam ab initio responsum erat, non quod aspernari eum mirum oblatam (*sic*): sed nolo in hoc statu domum prægravare. Habeo summam; sed hæc iam cuncta superfluunt. Saluta Nicolectum meum de Alexio, et per eum me domino recommendari peto, qui dominus si fortassis audierit me post obitum domini Iohannis in consilio domini substitutum, rideat, sed non credat. Nulla enim me ad hoc utilitas inclinaret; mallem eleemosynam mendicare; non quod nollem, si scirem, tali domino bene consulere; sed omnino sum ad talia ineptus, et posset esse causa maturandi reditum. Vale feliciter, et commatrem meam, et matrem eius salvere iube, et Masinum nostrum participem doloris. Raptim scripta die XXVIII. Aug. hora nona.

---

## EPISTOLA XXVIII.

FRANCISCUS PETRARCA AZONI DE CORRIGIO S. P. D.

Gratulatur quod in gratiam Vicecomitum dominorum Mediolanensium redierit.

Domine mi. Litteræ vestræ, cuncta videntem Deum testor, semper mihi consolationem et gaudium attulerunt: sed nullæ unquam magis quam quibus animum meum de statu vestro anxium atque sollicitum et multiplicibus affectum curis nuperrime recreastis. Ex quibus elicio, quod semper optavi et sæpe pro viribus procuravi, ut scilicet in magnifici domini mei gratia et benevolentia vos viderem, quod utrique vestrum in suo gradu utile, delectabile atque honorificum arbitrabar: pro quo bis anno isto, eodem domino permittente, famulum meum cum litteris ad vos misi. Frustra tamen. Nunc Deo favente, quod optabam video, aut certe de proximo sum visurus. Gratias Iesu Christo, qui cum sæpe alias, tum modo præcipue votivis me consolatur eventibus. Ipse quidem dominus meus, cuius rei ego sibi sum testis, nunquam a vobis animum penitus alienum habuit, nec unquam usque adeo præsentis inimicitias cogitavit, quin veteris amicitiae meminisset. Quod ideo dictum velim, ut vos quoque ad amandum colendumque talem dominum, quod fecisse vos semper scio, magis ac magis animum inducatis. Sane quod scribitis mei præsentiam summo desiderio vos optare, mihi quidem ut iucundum, sic minime novum venit. Idem enim semper, quod oblivisci nequeo, meritis meis nullis, sola generosi animi vestri mansuetudine concupistis. Ego autem quantum

cum Ludovico et Gerardo fratre hodie vel cras hospites habere, et sitientes ad rivum fontis mei, iam istic degenerantem, sed adhuc quidem originis suæ signa gestantem, inducere. Peponem optimum non comedi sed devoravi: nemine in partem admisso, præter Nympham, pictis iam tunc pedibus deorum convivia meditantem, et Neptuni nuptias aut Nerei aut Tritonum obsequia, et si quid vel aequorei vel fluminei numinis usquam est.

Discolor ut Nymphæ tetigit vestigia pellis,  
 Lector et cunctis nimis invidiosa puellis,  
 Nescit habere locum, refugit sub claustra reverti.  
 Et tibi purpurei decus addidit innuba serti,  
 Teque per arva canens varios legit undique flores,  
 Et timet humentes pedibus calcare sorores.

### EPISTOLA XXXI.

FRANCISCUS PETRARCA PANDULPHO MALATESTÆ S. P. D.

Excusat se quod valetudinis causa Pisaurum quo ab eo advocabatur, non adeat. Nunciat se in collibus Euganeis rusticari: et de morte uxoris eius aliquid innuit.

Littera vestra, qua nil suavius cogitari potest, ingentem mihi lætitiā in adversis attulit ac solamen, quamvis novum vere nihil attulerit. Scio enim ab olim cor erga me vestrum, et affectionem illam sincerissimam, non qualem ad subiectos domini, sed qualem filii ad parentes habent, vel, quod est vehementius, e converso. Venirem, fateor, libenter non propter aliquem metum mortis, sed propter intensum vos videndi desi-

derium, nisi quia status mei corporis non sinit. Grattissima tamen animo meo est haec vere nobilis caritas vestra mihi utique prorsus indebita: vobis autem magnificum nihil indebitum, sed suum ac proprium naturaque insitum videri debet. Illam de me curam, mi domine, fidenter deponite; quoniam non Venetiis nec Paduæ sum, sed inter colles Euganeos in loco admodum delectabili ac salubri: ad quem et locorum specie captus, et mei amore tractus magnificus Paduæ dominus sæpe venit per quam familiariter, et morulas trahit. Essem tamen aliquanto libentius quo me vocat vestra benignitas: sed venire hoc opus hic labor est. Hæc hactenus. Transitum felicitis memoriæ venerabilis ac dilectæ, licet facie incognitæ dominæ meæ et consortis vestræ, iampridem mœstus audieram..... Recomendo me magnifico patruo vestro: alter dominus meus frater vester, per ea quæ mihi significavit credo Alpes transierit. Valete.

Arquadæ, die prima Septembris.

## EPISTOLA XXXII.

FRANCISCUS PETRARCA NERIO MORANDO S. P. D.

Vituperat eam scribendi rationem qua unum plurali numero recentiores alloquuntur. Paulum Annibaldeschium pusilli animi accusat quod ob filii mortem dolore confectus et ipse obierit.

Mirari cogor in tantis occupationibus tuis, in his fluctibus rerum maximarum quos ab aquilone veniens novus Cæsar invexit Italiæ, et quorum te valde participem tua sors facit, hanc tantam meis in rebus dili-

gentiam tuam, ut videri possis nihil aliud quam me unum cogitare; ita dico videri possis ignaris industriæ ingeniique tui. Nam qui te noverunt non mirantur posse animum tuum ad multa et multum diversa sufficere, præsertim ubi illum suis stimulis urget amor, quem omnis difficultatis victorem, et regem novimus animorum. Hæc cur præfatus sim interroges? Quia dum te litteris prioribus fessum reor, ecce duæ simul aliæ a te mihi, vir optime, redduntur omnes impigerrimis digitis tuis scriptæ; ita (mirum) plus tibi vacat in negotio quam in otio. Mihi mirum, inquam, nisi celeritas quæ, ut Cicero noster ait, ingenii laus est, mirum esse discuteret. Sed venio ad rem, et illud transeo quod in primis quasi magni criminis te mihi purgas infamiam, et prope sacrilegii instar ducis, in tuis me litteris singulariter compellasse. Itaque stilum mutas, quasi vel ego blanditiarum egeam, quas primum Iulii Cæsaris fortuna mundo intulit, aut te vilior stilus robustiorque non deceat, quo usi veteres omnes quicumque calamus attigere: quem articulum quoniam alibi latius digessi, nunc suspenso pede prætervehor, et si quid auctoritatis apud te non quidem merui sed inveni, me quoque novissimum omnium habes auctorem, qui hoc stilo non tantum ad amicos, quos ex æquo alloquor, sed ad Reges atque Pontifices Cæsaremque ipsum uti soleo, quos reverentius affari ius æquumque est. Verum ego reverentiam veram in mendaciis non repono; mentiri autem dominis his vocibus, quibus nunc vulgo utimur, ætate ipsius Cæsaris inventum Lucanus asseruit. Sentio autem quid te movit, neque tu dissimulas: motum te litterulis meis, in quibus stilum hunc inter-

misisse videor, cuius rei, ne de cætero moveare, reddenda ratio est. Ego quidem, amice, stilo huic constanter inhæreo, quotiens grandiusculum aliquid adior; grandia enim nec huius angustissimi fugacissimique temporis, nec ingenii mei sunt, nec huius calami, quem agrestem rectius cum liceret, cœlestem urbanus dicere maluisti. At quotiens ad plebeias atque humiles curas, quas nec stilo dignas putem, aliqua rerum necessitas me attraxerit, plebeium quoque characterem non recuso, ne forte plus operæ verbis impendam quam sentiis debeatur, idque mihi non aliud causæ in illis literulis fuisse noveris. Et hæc quidem hactenus. Ex nunc autem, quidquid agam et stilo quolibet, illud saltem non admittam ut plurali numero utar amico et uni loquens: idque tum propter me ipsum sum facturus ne amicis mentiar, tum vel maxime ne exemplo tibi noceam, cuius apud te non leve pondus esse video. Tu igitur, si me amas, ad proprium stilum redi, et id agamus non ut auribus vulgi, sed ut decori nostro satisfecisse videamur.

Venio nunc ad acerrimum dolorem meum, quo in secunda parte litterarum tuarum quasi venenata cus-  
pide aures meas atque animum pupugisti. Oh! factum pessime de amico optimo, oh! infaustum negotium, oh! rem tristem calamitosam et miseram, oh! novum et inauditum sæculis infortunii genus! Assuefeceram oculos tristibus spectaculis, aures amaris rumoribus, pectus cunctis fortunæ vulneribus, et cogitabam assidue quid unquam mali, quid asperi, quid acerbi accidisset homini, ut quidem mihi et meis, quoniam homines sumus et non Dii, vel eventurum esse vel evenire posse certe scirem, utque adversus omnia iacula du-



ratum atque armatum animum haberem. Telum hoc, quia nunquam tale aliquid videram, nil simile prorsus audieram, aut legeram, cogitare et praevidere non potui: et ideo inermem improvidumque transfixit. Hei! mihi quid querar? unde ordiar? Quid dicam? Accusabo Fortunam? Surda est. Accusabo mollitiem amici, qui sibi mortem, mihi mortiferum dolorem attulit? Sera est accusatio erroris, irrevocabile damnum est, quod aucturae potius inutiles sint querelae. Et tamen: oh dulcedo effera! iuvat insistere, et fando alimenta miseriae praestare. Quid enim aptius possit animus tristis, quam in tristi materia versari? Habet et moeror voluptatem suam, duram quidem, sed sibi accomodatam. In Arte poetica scriptum est:

Tristia moestam

Vultum verba decent.

Utar consilio quod me decet. Sed quo pergo? ut illi nihil prosim, mihi noceam, forte aures atque oculos tuos laedam? Oh coeca mens hominum et non futuri modo, sed saepe praesentis etiam fati sui nescia! Ad Paulum Hannibalensem unum ex Romanis principibus, cui me familiarissimum virtus et humanitas fecerant, quibus illum mirabiliter natura dotaverat, mandata dederam tibi, ignarus illum iam rebus humanis exemptum, taliter quidem ut non mortem, quae natis omnibus aequa est, sed genus mortis unice miserum cogerer usque ad meam ipse mortem lamentari. Oh! cogitationes hominum vanas, oh! inanem spem, oh! lubricum statum, oh! instabilem fortunam, oh! ancipites vitae vias, oh! praecipites exitus, oh! prosperitates ambiguas, oh! inevitabiles aerumnas. Amisit filium Paulus: tritum et tolerabile

mali genus. Quis enim non aliquando filium perdidit, nisi qui nullum habuit? Rari sunt quibus fortuna prolem dederit, nec donum suum delibaverit. Rapinam dicimus; primitiæ sunt. Amisit Paulus noster filium. Rem non insolitam narras. Et alius Paulus filios amisit. Hannibalensis unum perdidit, Macedonicus duos. Alii plures, quidam omnes, unum iste perdidit. Priamus unus ex tanta natorum acie superfuit. Sed hic suum ferro amisit. Quid refert an ferro, an incendio, an naufragio, an febribus, an veneno? mors autem una est. Sed hæc iuvenem abstulit. Scio. Nam adhuc iuvenis pater erat. Quænam vero hinc tanti doloris causa fuit? An ignorabat doctus homo et prudens plures multo iuvenes mori solere, quam senes et ut vulgo dicitur, plures hædos perire quam capras? Humani generis incrementum terra non caperet, si omnes senescerent qui nascuntur. Quid igitur ploras, dicet aliquis, nihil adhuc novi audio. Adolescentem in prælio pugnantem in prælio cecidisse? Eveniunt ista quotidie, et fortium patrum innumerabilis multitudo est. Nam quod scribis, corpus exsanguie hostibus fuisse ludibrio, hostili sævitiae aliquid, sed superstitis existentisque miseriæ nil prorsus adiecerit: stultum enim cum mortem spreveris, cadaveris iniuriam formidare. Patres obitum filiorum forti tulere animo: laceros quidam artus siccis oculis collegere, multi autem suos cum lacrimis ad sepulcrum, ad inferos quidam versis in se gladiis persecuti sunt. Fletu immodico, quod meminerim, ante Paulum nostrum nemo: hic est novus et rarus et inconsolabilis dolor meus. Homo nobilissimus, et mea quondam opinione fortissimus, sic Fortunæ tergum præbuit,

sic laxavit fræna mœstitiæ, ut illa eum præcipitaret in mortem. Oh! lacrimas meas, oh! inexhaustos fletu oculos, oh! liventia lumina. Da veniam, Paule: fons ille aruit, qui cunctis amicorum miseriis ubertim lacrimas dabat. Siccare illum, vel una Romana domus debuit: dum Columnensium familiam fleo, flere alios posse desii: omnes lacrimarum mearum scatebras illa consumpsit; pumice siccior factus sum. Tu tamen, vir optime, sine lacrimis meis non eris, quas de profundissimis atque abditis animæ recessibus fando eruam, et quibus mœstum funus absens prosequar, immo vero inter tristia funera fletu madidus præsensque versabor. Quid, heu! mihi, fecisti? Vir in rebus aliis acer ac strenuus, quid fecisti? Non sat magna pietas est visa paternis lacrimis filii funus ornare, quod ipsum virtute animi melius, et spe ac solatio promissæ resurrectionis ornasses; sed parum piæ visæ sunt lacrimæ, nisi mortem morte accumulans, carissimo et insonti filio paternæ mortis invidiam post fata relinqueres, et reum atque odiosum posteris faceres quem amabas? Non præstabat quamvis præpostere filio superesse, et te sibi fratres, feliciores tibi natos quærere, virentissima enim ætas erat: vel quæ christianæ pietatis proprium fuit, pro illius salute animæ, cuius corporis præceps et festinata mors fuerat, preces atque suffragia ad coelum mittere? Vel si qua ea dulcedo est, recolligere animum atque firmare, et in extrema solatia patri viroque forti debitæ ultioni intendere? Postremo quidvis facere potius quam quæ potissimum elegisti? Quæ enim ista dementia est superbis hostibus, qui filii tui frigida membra calcaverant, quibusque suus luctus

et crudelitatis et insolentiæ supplicia debebantur, de te quoque duplex gaudium et geminam ultro victoriam concessisse? Oh! mortalia pectora in extremis semper cœca casibus! Audita primum morte filii conspectoque cadavere, quod humanitatis immemor hostilis ira discerpserat, cum et ferro posses ulcisci, et animi viribus gravem ferre fortunam, fato succumbere maluisti, et te exitialibus atque mortiferis ultus es lacrimis: cumque virorum exemplis illustrium, quæ probe noveras, revocareris ad vitam et ad spem, desperatam in mortem nescio qua ferali dulcedine raptus es. Nonne autem, quæso, luctus inconsolabiles paranti tibi occurrebat Anaxagoras, qui filii mortem nuncianti, *nihil*, inquit, *inopinum narras: cum enim ipse mortalis sim, sciebam ex me genitum esse mortalem?* Nonne Xenophon in animum venit, cui cum sacrificanti primogeniti mors filii nunciata esset, neque cœptum sacrificium intermisit, neque succubuit fortunæ, sed corpore atque animo mansit immobilis, corona dumtaxat quam capiti gestabat deposita, ne tantum vulnus non sensisse videretur: moxque cum gaudio reposita, ubi accepit fortiter dimicantem filium occubuisse, Deos testes faciens plus se virtute filii delectari, quam morte torqueri? Nonne unici filii dolorem immodicum castigare visus est Pericles, qui duobus simul rarissimæ indolis amissis filiis, neque coronam deposuit, neque concionibus abstinuit, neque ullum penitus aut in verbis, aut in vultu mutati animi signum dedit? Et si longinqua respicere mens lacrimosa non poterat, nonne sub oculis erant romanæ virtutis exempla rarissima? Nonne aderat Marcus Cato senex ille famosissimus, cuius cum

innumeræ laudes sint, tamen illa apud Ciceronem præcipua est, quod fortiter ac modeste optimi filii mortem tulit? Nonne Catonis collega Quintius Marcius, qui cum Consul eo ipso die quo Senatus secundum legem convocandus erat, unicum spectandæ indolis filium amisisset, et sepulturæ filii pius pater interfuit, et mox Senatum Consul egregius convocavit, unum diem inter diversissima privati mœroris et publicæ maiestatis partitus officia? Nonne Paulus Æmilius, cuius supra memineram, Paulo nostro par nomine, sed, quod nollem, virtute superior, qui duobus primum filiis in adoptionem datis, et mox duobus quos sibi servaverat (qui quales essent inde coniicies quod inter datos fuit Africanus iunior) intra septimum diem morte subtractis, orbitatem suam tam invicto animo pertulit, ut post triumphum Macedonicum, quem sibi virtus et fortuna de opulentissimo rege pepererant, et quem alterius filiorum mors præcesserat, alterius insecuta erat, Populum Romanum alloquens, quasi publici consolatoris officio fungeretur, et id sibi optato accidisse diceret, quod in tanto splendore successuum publicorum, metuens ne qua forsán gaudio, ut fit, mœstitiæ se nubes effunderet, Deos anxie precatus esset, ut si quid tacitum minaretur, totum a populi cervicibus in suam domum Fortuna converteret? Nonne Marcus Horatius Pulvillus, cui cum Capitolium dedicanti ab Æmilio mors filii nunciata esset, ab opere glorioso, quamvis equidem, ut falso, mœsto tamen rumore percussus absteret, nihil aut vultu aut animo motus est, cœptumque non amplius intermisit, quam ut cadaver iuberet auferri, templi continuo postem tenens? Quod si falsæ

tantum ille religioni, diisque mendacibus tribuit, quantum veræ religioni, vero Deo tribuendum erat? Quantoque studio providendum, ne tuo fletu, Paule, tu perires, Christus offenderetur? Quamquam quid exempla virilia colligo, cum Romanæ mulieres, pudorem tuum premere et lacrimas siccare debuerint, vir Romane? Nam ubi tunc, quæso, ubi erat Cornelii Africani filia, Gracchorum mater, cui præter maternæ pietatis affectum, quam cari filii essent, illud indicat quod Campanæ olim hospitæ, apud se muliebriter iactabundæ, et sua sibi ornamenta monstranti, filios e ludo litterarum revertentes ostendit, et hæc, inquit, *mea ornamenta sunt*. Hos illi filios et hæc ornamenta simul omnia, sæva mors rapuit: tantum tamen animi femineo fuit in pectore, ut ex morte illam complorantibus et miseram vocitantibus responderet: *Mæstam utique, sed miseram se non esse quæ tales filios genuisset*. Oh! non femineam sed virilem, et vere paterna gloria dignam vocem! Ubi erat Livia Augusta, cui cum e duobus filiis mors, ut ferme mos suus est, et pessimum reliquisset et optimum imperioque dignissimum abstulisset, ita casum suum flevit, ut ultro et modum et finem lacrimis imponeret, mediamque se inter piam matrem et principem feminam exhiberet, ne vel naturæ debitum negaret, vel tanti coniugis oculos spectaculo tristiore confunderet? Quanto autem exactius cavendum erat ne gemitu nimio læderetur Christus spectator ac iudex actuum nostrorum, cui mortalibus querelis iudicia æterna convelli haud dubie neque immerito permolestum est? Sed Romanas transeo quibus, ut muliebris est pudor, sic virilis animi robur atque constantia,

quasque nunc etiam fama vulgaris, etsi multa viris detrahat, iure tamen omnium gentium mulieribus anteponit, cum in hoc genere laudis sese offerat Graia muliercula, ut prole impar, sic par animo, quæ audita morte filii qui in acie ceciderat, *in hoc*, inquit, *illum genui ut esset qui mori pro patria non timeret*; digna vel hoc responso cui natus incolumis redderetur, quem tam fortiter amisisset. Verum quo progrediar? Quid ago? Consternatos et absque resurgendi spe deiectos animos fortia exempla non decent. Itaque quando nihil mæstius, nihil hoc tempore dulcius possum, libet nunc incepto hærere et omnibus sæculis flebiliora conquerere, ut ostendam Paulo meo nihil toto orbe miserabilius, nihil ulla ætate flebilius, qui ut patrem indueret, virum exuit, consecutusque est ut miserrimus pater potius quam vir modestus et sapiens videretur. Excutiantur poetæ, evolvantur historici, protrahantur in medium insignes gemitus, ut appareat quantum in hoc genere mali altior cunctis est Paulus, quantumque supereminet et toto vertice supra est, ut Maro ait. Flevit suum Pallanta miserabilis Evandrus, sed post fletum vixit, et vindictam præstolari maluit quam filium sequi. Lausum quoque Mezentius flevit, nec immerito; nam si credimus Virgilio, pietas patris filio causam mortis attulerat; sed multum hic filio supervixit, tentavitque vindictam, quæ cum parum succederet, non tam flendo mori voluit quam pugnando: et erant ambo senes, ita ut diutius vivere et animosius pugnare potuerit Paulus meus. Legimus Phocæum Argi patrem navali prælio, quod Massiliæ gestum est, cum traiectum iaculo et expirantem filium videret, violentius quidem indoluisse,

non tamen eatenus ut fletu solo, sed ut gladio proprio confossus, saltu etiam præceps in medios fluctus, gemina velut morte, procumberet: quod genus mortis, o Paule, utinam esses imitatus. Sic enim, nisi fallor, et parcius, et profecto virilius doluisses: nullus enim maior dolor quam qui non eget auxilio, nec circumspicit instrumenta, sed ad inferendam mortem solus sufficit. Ad hæc et honestius viro est, vulneribus quam lacrimis mori. Hunc dolorem et has lacrimas consumptrices apud Lucanum, ut rursum ad luctus femineos revertamur, Pompeiana uxor optabat ubi ait:

Turpe mori post te solo non posse dolore.

Ipsa tamen hæc dicens vixit, sicut Hecuba vixit et Andromache post coniugis et natorum mortes. Multum filios multæ fleverunt matres, sed plus omnibus Marcellum mater Octavia, Augusti soror, quæ talis tantæque spei filio amisso, qualem nullum Romæ puerum fuisse Virgilius æternæ memoriæ mandare non timuit, omni solatio reiecto, in tenebris perpetuisque gemitibus ævum egit: pertinaciter infelix omnis illi lætior habitus, omne minus triste verbum irritamentum doloris, omnis illi consolator hostis fuit. Postremo ita semper vixit, ut ait Seneca, talis per omnem vitam, qualis in funere. Multum flevit apud Virgilium mater Euryali, multum apud Statium nutrix flevit Achemori: illæ tamen filiis vixere superstites, hæc alumno. Sic fletum legimus Antigones et Argiæ: mortem non legimus: mirum superfuisse iuenculas dolori, cui vir fortis superesse nequiverit. Flevit Evadnes



Capaneum, flevit Brutum suum Portia, sed illa se in ardentem viri rogam intulit, hæc candentes hauriens carbones, præcluso spiritu, quod pridem animo destinarat, virum ad inferos prosecuta est. Et ut amores illicitos attingamus, qui ut turpiores sic nonnunquam iustis amoribus fortiores sunt, flevit Ero Leandrum, Phædra Hippolytum; neutra tamen gemitu, sed illa præcipitio periit, hæc laqueo. Apud Catullum Lesbia, meretricio amore saucia, passerem suum flevit extinctum, ita tamen ut oculorum aciem perderet, non ut animam exhalaret. Verum hoc dicet aliquis, hæ viros, aut fratres, aut amicos flebant, noster hic filium. Sed quid de superioribus dicemus, quæ fleverunt natos vel plurimos, vel unicos? Quid dicemus de illis matribus, quas Romana narrat historia, post insignem cladem quæ ad Trasimenum, ut Livius tradit, cui potius fidem do, et quem Valerius sequitur, vel Cannis, ut Plinio placet, est accepta, nunciatis filiorum mortibus, attonitas flevisse: utramque autem post aliquantulum temporis, alteram scilicet mœstam domi sedentem præter spem conspecto filio, dum in occursum eius assurgit, exanimem corruisse, alteram percunctandi studio anxiam, extraque muros urbis egressam porta Flaminia, qua fusæ redibant legiones, obvio repente filio, dum irruit in amplexus expirasse? Has nempe non mœror, sed quod multis accidit, gaudium interfecit. Fuisset ille utinam, o Paule, falsus etiam rumor tuus, ut te quoque non luctus sed gaudium peremisset! Nunc quocumque me verto, dolore simul ac pudore confundor. Legi ego permultos patrum amantissimorum, legi matrum gemitus ac sororum et coniugum utriusque

sexus. Siquidem duos Plautios, mirum dictu, ut eiusdem nominis sic paris amentiae, impatientia doloris in uxorum mortibus sese gladio transverberasse compertum est: quod apud Valerium Maximum non excusari tantum sed laudari, si de proprio loqui datur, nec excuso nec laudo. Legi mortem Indorum, apud quos cum mortuis viris vivae cremantur uxores: legi singulorum hominum, legi populorum atque exercituum luctus tam vehementes, ut quidam arma reliquumque ornatum, quidam etiam semetipsos ardentium ducum rogis iniecerint: legi quorundam fidem supervacuam amicorum, nulli utilem, et damnosam sibi, qui confodi gladiis iuxta dilecta cadavera maluerunt, quam dum liceret evadere. Ad summam multos invenio quibus causam mortis dolor attulit: cui vero mortem intulerit, nullum: nisi forte pro vero recipimus quod de Homero poeta quidam scripsere, remque tam stultam de tam docto viro, de tamque divino ingenio suspicari libet. Quod ipsum tamen etsi inter vera numerare voluerimus, nec de morte alterius dolor fuit, nec repentina vis doloris; sed ægritudo forte animi, et ægritudinis forte inedia ac spiritus in dies tristior, qui procul dubio vitam imminuit, et sicut scriptum est, *exsiccat ossa*, et quem multos paulatim seu consumpturum esse, seu consumpsisse non negem: in quibus nomen habet Macedoniae rex Philippus morbo animi ex crudelitatis propriae et iniustae tristi seraque poenitentia, Persei filii dolis et impietate contracto. Nam Paulus Rutilius, quem, nunciata fratris repulsa in consulatus petitione, illico expirasse scribit Plinius septimo Naturalis Historiae, ut ut verum sit, huic sententiae præiudicii nihil affert, quod

iam ante morbo impeditus describitur : itaque facile parva doloris accessio inclinatum animum stravit. At quod integrum quemquam subitus dolor de alterius morte susceptus mœroris impetu et lacrimarum diluvio oppresserit atque necaverit, hoc est quod apud auctores idoneos vel non legi, vel me legisse non memini, eoque insolabilior dolor est meus, quo inusitatiores amici miseria, qui sic mori voluit ac potuit, ut sine exemplo sit mors ipsa mortalibus. Cæterum ego quoque fortassis impetu animi evector sum longius quam debui. Da veniam, quæso : amara mihi dulcedo et dulcis fuit amaritudo, cum amico iam sepulto quasi responsuro ac præsentem contendere. Iam tandem detergis utcumque oculis ad te redeo, atque ita censeo idem omnibus agendum esse fortunæ sub imperio degentibus, quod solent qui sæva premuntur tyrannide : tergum patientia durandum : sic instruendos oculos ac aures, sic formandos animos ut quod vident non videant, quod audiunt non audiant, et quod sciunt nesciant ; multa dissimulanda, omnia toleranda, et ut Flaccus ait, amara lento risu temperanda. Horribile cogitatu est, quam nihil est mali quod non impendeat hanc vitam agentibus, cui, nisi fallor, optandus finis esset quem tantopere formidamus. Itaque sapiens omnia cogitat, omnia prævidet, omnia scit multo ante quam fiant, examinans non tantum quæ ventura sunt, sed quæ possunt evenire, tamquam quæ evenire possunt prorsus non evenire non possint, et adversus possibilia quælibet ceu necessaria atque inevitabilia sese armat, pervigilem intentumque in excubiis animum tenens. Et hæc quidem sapiens. Ego autem qui

tam procul inde absum, ut sapientem, si occurrat, ne nosse quidem venerarique digne queam, meis hactenus amicorumque fortunis possibilia, fateor, et verisimilia sed non inusitata prævidi. Videbam ergo nunc gladios, videbam morbos et venena, et incursus ferarum, et naufragia, et incendia, et laqueos, et ruinas; luctum repentinum mortiferum non videbam. Unde facie rerum insolita vehementer exterritus atque deiectus sum. Sensim animum attollere et sparsa arma colligere incipio. Discam cogitare et expectare omnia, et si possim, nihil valde metuere. Imparatum et inermem nostra Fortuna reperit: lorica defuerat ubi furtiva cuspis irrepsit. Quamobrem vulnus hoc sentio, et Paulum meum nunquam sine suspirio recordabor. Tu vale: nam de reliquis, et præsertim ad summam Reipublicæ quod ominer et quod sperem ne dici quidem opus est. Vale.

Mediolani, XII kalendas Martias.

---

## EPISTOLA XXXIII.

FRANCISCUS PETRARCA AD IGNOTUM.

Se culpa vacare quod aliquid in Ciceronis et Senecæ operibus reprehensione dignum censuerit.

Miratur ille vir doctus, sed docendus adhuc, quid est quod in epistola quadam nuper Senecam ac Tullium, quodque Christiano ingenio maius est, ipsum quoque Hieronymum notare non sim veritus. Ultimū nego: de reliquis rationem cum illo communicandam

accipe. Nemo fere est cuius aliqua non reprehendantur. Non tam subtile quam laboriosum fuerit rem exemplis asserere. Verte Philosophorum libros ac Sanctorum quorundam quorum celebrior fama est: multa passim apud illos vel ab ipsis vel ab aliis retractata, seu certe retractanda comperies. Notavi ego aliquot Senecæ sententias, sed ut arbitror, non iniuste; notavi aliquas: crede mihi, plures poteram; et tamen Senecam ipsum miror ac veneror. Notavi Ciceronis mei unicam. Verum id non sic accipi velim, ut quasi alienæ famæ delatoris titulo gloriabundus insultem, sed ut ex unius hominis duabus invicem contrariis sententiis præferrem verio-rem, idque non arroganter, ut qui me non modo non inferre maioribus, sed nec paribus conferre nec minori- bus præferre consueverim; nec iniuriose quidem ut cui, fateor, Cicerone ipso scriptorum nullus acceptior sit. Illam itaque sententiarum repugnantiam quamvis ab ineunte ætate perpenderem, tamen verecundius asserebam, donec civitatem Dei, Augustino duce, ingressus, animadverti opinionem meam illius auctoritate firmari. Leges illum Augustini locum: est autem magni operis Libro primo haud procul a fine. Videbis illic Catonis voluntariam mortem improbari, quam Seneca ante omnia viri illius egregia facta collaudat. Cicero autem excusat, et licet aliquanto modestius non negem excusare culpam quam laudare, tamen si Augustini rationes dicto conferas, intelliges nec metu imminentis mali, nec præsentis odio, nec spe vitæ melioris arcessendam mortem, nec iniussu eius a quo corpus istud accepimus, emigrandum, nec Catonis in morte, ne dicam laudem, sed excusationem ullam esse;

et quamvis pluriformiter utrinque suppresso Ciceronis nomine, coniciēs tamen Ciceronianam Catonis excusationem eiusdem Ciceronis sententia meliore damnari. De me autem sic habeto breviter. Mihi quidem nomina virorum illustrium, si dici fas est, totidem prope numinum loco sunt, et tamen in his ipsis cum multa delectent, veritas primæ reverentiæ causa est, quæ ubi cultoribus etiam suis neglecta videbitur (quis enim tantus amicus veri est qui non interdum a veritate deviet, seu illa segnities sit, seu rerum obscuritas, seu ingenii hebetudo), tum procul dubio rem solidam umbris inanibus et veritatem ipsam quantorumlibet nominum gloriæ anteponam, nec metuam hoc meo iudicio vel hostes vel amicos veritatis offendere, quod illos oderim, hos certe sciam mecum esse sensuros, atque illam semper propriæ sententiæ prælaturos. Denique sic animum institui ut cuius benedicta laudare ausim, eiusdem errores improbare non verear, quamvis illud volens faciam, hoc invitus. Si enim vere fit, utrumque permissum; alioquin est alterum honestius, utrobique par mendacium. Vale et iterum vale.

---

EPISTOLA XXXIV.

FRANCISCUS PETRARCA FRANCISCO BRUNO S. P. D.

Amicum iterum illi commendat.

Nisi valde fortibus humeris sis, tot mearum intercessionum sarcinas ferre non valeas. Scripsi sæpe et repeto notam adeo his in locis amicitiae nostræ famam,

ut si passim omnibus annuam litteras ad te meas optantibus, sat negotii unum hoc tibi allaturum sit. Parco autem labori tuo, parco et meo, et ad multa facillimus, hac in re difficilem immo inexorabilem me præbeo, nisi his solis quos mihi vel virtus vel singularis amicitia conciliat. Utroque vero latorem præsentium affluentem noveris N. virum scientificum atque honestum, et mihi has ob causas atque insignem morum suavitatem, qua delector, acceptissimum. Hunc tibi dudum commendasse memor sum, et ipse tuæ benignitatis ac virtutis præco ingens, mihi se, ne dicam tibi, tuum ob meritum perpetuo obligatum fert. Nunc forte aliis ex causis, sed ut reor, licet hoc taceat, quia unus est ex illorum acie, quorum virtus malis ac morum diversitas odiosum facit, studuit aliquantisper peregrinari a patria, et tentare si qua sibi sors alibi prosperior foret. Recommendo eum tibi iterum eo arctius quo sola olim fama nunc experientia notus insuper et dilectus, tunc amicus amicorum, nunc vero amicissimus mihi est, quod non esset, nisi talem scirem qualem dico. Si sibi ergo vel ope vel consilio prodesse potes, te hinc viro bono imo optimo profuturum, hinc mihi, cui semper places, eximie placiturum scito. De me si quid nosse volueris, ipse dicet. De aliis enim pridem latius scripsi, et responsum tuum expecto. Vale.

Paduæ, XXVI Novembris, mane.

---

## EPISTOLA XXXV.

FRANCISCUS PETRARCA GULIELMO DE PASTRENGO S. P. D.

Nunciat mortem Iohannis sui.

Nomen tuum, optime atque exoptatissime mihi vir, quo nihil dulcius audio, quodque hodie huius devoti tui ore auribus meis insonuit, non dicam me coegit ad calamum, qui nescio quo seu errore, seu fato, seu actuum humanorum odio, vix nisi somno vel necessitate alia excussus e manibus meis cadit, sed alio tendentem calamum huc convertit ut tibi scriberem, esse me Patavii corpore viciniorem tibi quam soleo: nam, omnia videntem Deum testor, semper animo præsens sum; sanum præterea et benevalentem, ac iucundissime senescentem, quod ad ætatem attinet; Fortunæ nempe vulneribus non aliis quam nimium crebris carorum mortibus impelli et concuti me fateor, non prosterni: de reliquo veteribus illis meis deditum curis, quas etsi taceam nosti, atque in primis tui memorem, tuique avidum, quod desiderium lenire propediem spero. Apertum est enim iter, quod, nisi fallor, immerito clausum erat; permisit namque mihi dominus beneficium illud pro quo totiens laborastis, et quod multo pluris facio, arrham mihi magnæ humanitatis exhibuit. Beneficium quidem ipsum simulque adolescentem cuius fuerat (oh res hominum!) mors abstulit, qui cum paucos dies lætos vidisset in vita, eo ipso die, mirum dictu, quo iuri suo restitutus videbatur, vitali destitutus est spiritu. Deo gratias, qui



me longo labore, sed non sine dolore liberavit. Tu vive feliciter nostri memor, et vale.

Patavii, X Augusti, sero.

---

### EPISTOLA XXXVI.

FRANCISCUS PETRARCA BENEDICTO COLUMNÆ EP. THEATINO  
S. P. D.

Gratulatur dignitatem illi collatam.

Non aliter litteras tuas legi quam frontem oculosque tuos spectare consueveram. Quid tibi vis dicam, pater? Conscientiam meam testor: semper ego tecum sum, et cupide tecum versor, quantum sinor interiecto tanto maris ac terrarum spatio. Cæterum illo die multisque sequentibus dum alternis epistolam tuam pono et positam resumo, dumque illam nunc lego nunc cogito, diu toto animo tecum fui. Tibi sane in præsens occupatior etiam fragiliorque quam soleo, quod et loci mutatio curas auxit et vires corporeas morbus imminuit, hoc unum pro responsione reddiderim. Gaudeo medius fidius te ad proprias sedes incolumem pervenisse, atque feliciter Tyrrhenum litus Adriatico permutasse. Gaudeo, atque utinam propediem locum hunc feliciore aliquo, ad extremum vero permutatione felicissima terram cœlestibus permutemus. Quid autem vetat augurari cito te Tyrrheni maris oram revisurum, ac prope Theanum tuum antiquum, vel Parthenopeio litori vel Casilinis collibus præfuturum? Romuleis mallem, idque magis vel origini tuo debitum, vel vir-

tuti. Sed tam alta spectare prohibet durior nunc Italis fortuna, haud equidem prorsus immerito; neque enim iniustum est ut eo diu careant, quo se ultro per insolentiam atque impatientiam spoliarunt. Quamquam quid nos meriti, quos nondum ad vitæ limen sors violenta proiecerat? Sed neque id novum est, paternæ culpæ supplicium insontem ferre progeniem. *Comédérunt acerbas uvas patres nostri et ecce filiorum dentes obstupescunt.* Et iterum: *Patres nostri peccaverunt et non sunt, et nos iniquitates eorum portavimus.* Itaque Tiberinos honores cuncta rodens Rhodanus vorat. Et quæ spectacula, bone Iesu! Sed ne congratulatoriam epistolam querelis impleam, ad te revertor. Gratulor quidem tibi, et spero dignitatis tuæ gradum hunc esse non terminum. Cæterum quocumque pedem moveris, animo consequar, et ubicumque fueris, tecum ero. Quod si imaginariæ præsentiae forsân vera successerit, te pater optime, Barbatumque meum eximie gavisuros, tacentibus licet vobis, certe scio: non opus erat huic rei asserendæ multum tempus impendere. Animos vestros novi. Verum id hac tempestate, verum fatear, occupationes meas circumspiciens, non tam spero quam cupio. Oh si quotiens vellem possem ut animum, sic corpus hoc in longinqua transmittere, quam sæpe me hospitem haberetis! Sed enim id non ante futurum credimus, quam corruptibile et mortale istud naturam induerit immortalem. Vale.

III nonas Octobris.

---

## EPISTOLA XXXVII.

FRANCISCUS PETRARCA MODIO PARMENSI S. P. D.

Epistolæ ab eo acceptæ breviter respondet.

Amice optime. Non cogitabam aliquid nunc scribere contentus latoris præsentis qualiquali facundia, et memoria multa me ante dies paucos scripsisse quæ ad vos pervenisse confido. Recepi tamen postea dominæ meæ vestrasque litterulas, in quibus nihil est aliud quam admiratio vestra super dilatione responsi mei : non immerito id quidem : sed et hoc ipsum illis in litteris meis satis, ut arbitror, est responsum. Nihil ad præsens vobis aliud sum scripturus : Bergaminus scit in hac parte cor meum. Dominæ autem nostræ nihil scribo, ne suos meosque luctus accumulem ; vix enim possum eam sine lacrimis cogitare. Recommendo autem me sibi et filiis suis dominis meis : opto vobis sanum corpus et tranquillum animum. Reculas illas habetote memoriæ. Vale.

Franciscus Vester.

Venetiis, XXX Decembris, propere.

## EPISTOLA XXXVIII.

FRANCISCUS PETRARCA NICOLAO LAURENTII TRIB. POP. ROM.

S. P. D.

Rebus cœptis perficiendis animos addit : litteras eius avidissime exquiri et in vulgus ferri, et earum stilum sibi maxime probari.

Non desinam quotidie tibi scribere magis ut quidquid de te parturit animus meus primus omnium scias,

et tui sollicitudinem apud te potissimum deponam sine ulla responsionis tuæ spe. Hanc enim, fateor, cupio potius quam expectem inter tantas et tam varias curas tuas. Hoc igitur primum scio te in altissima specula constitutum, nec italorum tantum, sed omnium omnino mortalium, neque eorum modo qui nunc sunt, sed eorum etiam qui omnibus sæculis nascentur, aspectui iudicioque ac sermonibus expositum : onus ingens, sed præclarum, et pulcherrimum, sed singularis et gloriosi negotii suscepisse. Nunquam te præsens ætas, ut reor, nunquam posteritas silebit. Cæterum sermones hominum pro uniuscuiusque libidine vani atque discordes sunt: propositum tuum nihil ipso quod inhabitas Capitolii saxo mobilius ventorum flatibus non mutatur. Unum sane an scias, an cogites, an ignores nescio ; litteras tuas quæ istine ad nos veniunt non æstimes apud eos quibus destinantur permanere, sed confestim ab omnibus tanta sedulitate transcribi, tantoque studio per aulas Pontificum circumferri, quasi non ab homine nostri generis, sed a superis vel antipodibus missæ sint, ad quarum litterarum tuarum suspicionem vulgus omne circumfunditur. Nunquam Delphici Apollinis oraculum in tot sententias tractum fuit, in quot intellectus verba trahuntur tua. Circumspectum igitur actum laudo, quod tam irreprehensibiliter hactenus stilum tuum temperare studuisti : utque in posterum magis magisque studeas, hortor ac deprecor. Sic enim in verbis tuis et magnanimitas scribentis, et Populi Romani maiestas elucescit, ut nec reverentia Romani Pontificis, nec honor debitus obscuretur. Hoc eloquentiam, hoc sapientiam tuam decet posse sic ea quæ

contraria videntur, sed non sunt, miscere, ut nunquam non suam teneant dignitatem. Nonnullos obstupescere legentes vidi ut sic in litteris tuis modestiæ certantem fiduciam viderent, ut ambigua victoria pares essent, nec in eam palestram aut degener metus, aut superbiæ tumor irrumperet. Vidi hæsitantes an res tuas, an verba potissime mirarentur, nec abnuentes quin libertatis beneficio Brutum, eloquio Ciceronem dicerent, ad quem Catullus Veronensis ait: *Disertissime etc.* Fac igitur ut coepisti: sic scribe tanquam omnes visuri sint, nec visuri tantum sed a cunctis litoribus impulsuri, et ad cunctas terras transmissuri. Iecisti fundamenta validissima veritatem, pacem, iustitiam, libertatem: super illis ædifica. Quidquid enim evexeris firmum erit, adversus quæ quisquis impegerit collide-tur. Qui contra veritatem venerit, mendax erit; qui contra pacem inquietus, qui contra iustitiam iniquus, qui contra libertatem arrogans et impudens. Laudo etiam quod apud te omnium epistolarum, quas ad quaslibet terrarum partes miseris exempla permaneant, ut et dictis dicenda conveniant, et si quando casus fuerit, conferre valeas aliena cum tuis. Id te facere data litterarum tuarum mihi indicio est. Quod enim magnificentissime subscribis *liberatæ reipublicæ anno primo*, reficiendorum annalium propositum sapit. Id verbum solatur, placet, et delectat. Et quoniam tu in agendo occuparis, donec ingenium rebus par inveneris, ego tibi, nisi Deus . . . ., in eam rem ingeniolum hoc et hunc calamum spondeo pro virili parte, ut ait Livius, principis terrarum populi memoriæ succursurus; nec cedere paululum indignabitur Africanus meus. Vale, vir clarissime.

---

## EPISTOLA XXXIX.

FRANCISCUS PETRARCA PETRO BONONIENSI S. P. D.

Nonnulla de Dyrachio urbe: et litteras amicis quibusdam  
reddendas mittit.

Non epistolas tuas tantum, sed quidquid omnino litterularum ex te venit, læte video: pone hanc curam. Ad id quod de Durachio seu Dyrachio quæсивisti, breve: morem meum nosti, non sum palliator inscitiae meae: quod nescio, sine dissimulatione confiteor: quod scio, sine æmulatione participo. Quæris multa de Durachio et plura etiam quæri possunt: quis auctor urbis illius: quæ vis nominis: an aliud nomen habuerit: quis illud mutaverit: et cur. Horum quinque prima duo profiteor me nescire: nec mirabere: magna est enim non modo de aliis minoribus, sed de ipsa quoque urbium regina apud scriptores ipsumque etiam Hyginum, atque indecisa discordia. De tertio dico quod prius Epidamne dicta est, cuius nominis et Lucanus meminit penultimo operis sui versu. De quarto: Romani nomen illud mutaverunt. Si causam quæris (id enim quintum erat), *propter inauspicatum nomen*, ut ait Plinius, quod expressius a Pomponio dictum est. *Epidamnum*, inquit, *ante erat; Romani nomen mutavere quia velut in damnum ituris omen id visum est*. Hæc ille: et revera ex Italia digressis prima Epidamne adverso erat in litore. Hæc sunt quæ de iis novi, nisi altius foderem. Miror autem et gaudeo aliquos tam otiosos istic, præsertim inter studia lucrativa, ut talia curent atque vestigent. Veniam ad negotia. Cedulæ

huius sociam unam ad Iohannem nostrum facies pervenire : alteram ad Nicolaum de Alexio ; et ut labori meo parcam dic, quæso, Donato meo de Florentia quod Fortuna non eum modo persequitur, sed omnes quoque de quibus aliquid sperat. Cancellarius quasi semper ex quo huc redii æger iacuit, necdum grabatulo se movet. Modicum licet sperare quia audio duritiem illorum : et cæterum doleo : plus non possum. Vale. Venetiis, XIII Martii: F. tuus. Si Muranum iero, quæram quem iubes.

---

### EPISTOLA XL.

FRANCISCUS PETRARCA NICOLAO LAURENTII TRIB. POP. ROM.  
S. P. D.

Allegorici somnii narratione cavere eum iubet  
inimicorum insidias.

Non facile dici potest, optime vir, de eventibus cœptorum tuorum quam sollicitus quamque suspensus sim. Sic me Deus diligat, ut quodammodo particeps mihi videor et periculi et laboris et gloriæ. Et revera nec volo dissimulare, nec possum ut contumaciter verbis disceptantium de rebus tuis quotiens Fortuna me præsentem fecit, tuas susceperim partes. Nota loquor, et mihi populus testis, quanto semper favore animi quantoque studio adversus oblatrantes de tribunatus tui iustitia et de intentione et sinceritate animi tui disserui, nec retro nec ante respiciens, nec attendens quos sermone pungerem quos mulcrem. Multos mihi quos conciliaveram convictu, verbis alienavi, nec miratus

sum. Sciebam enim verissimum Terentianum esse illud, *obsequium amicos, veritas odium parit*, nec multi facere quis me accuset, si absolvit conscientia. Hæc præfare libuit, ne forte frequentiam litterarum, et sedulitatem in me supervacuam mirareris: neque enim ut absens et de longinquo finem spectans, sed in acie media præsens sum, vel victurus ingenti prælio, vel vincendus, ideoque et dies curis, et quies turbatur in somnis, et dormiens et vigilans laboro, et quietem nulla pars mihi temporis largitur. In hoc statu unum mihi solatii genus est calamus; ut illum in manibus habeo tecum sum, loqui incipio non quod dictu pulchrius, sed quod prius occurrit, neque tam coloribus sermonum studeo, quam ut stilo quolibet in auribus tuis animi mei curas, et prægravatum pectus exonerem. Quæ cum ita sint, epistolas meas sic excipies, ut ab eis expectes potius familiare colloquium, quam dictamen elegans rerum tuarum. Curis anxius hoc per diem, hoc per noctem cogito, et quoniam memoria fugax atque volubilis est, ne confestim evanescat, litteris eam tenacibus illaqueo, et diurnos quidem cogitatus fero domum repetens, nocturnos mane consurgens scribo; neque si impetum sequerer, dies ulla sine litteris præteriret. Quid autem de te proxima nocte nescio an pervigil, an semisopitus cogitaverim, an viderim dicam. Videbar te videre in medio et altissimo mundi loco tam supremo prærupti montis vertice, ut prope cælum tangeres. Quidquid de nostris montibus videram, quidquid de peregrinis audieram seu legeram, planities deiecta videbatur; ipse cantatus utriusque linguæ vatibus Olympus humillimus collis erat; nubes



longe sub pedibus, sol non multo super verticem ferebatur. Caterva te virorum fortium stipabat, tu medius et cunctis sublimior sedebas radianti solio, tanto mortali specie augustior atque fulgentior, ut ipsi et Phoebos movisse videreris invidiam. Volvebar in circuitu, et ecce tantus populus sub oculis meis erat, ut eum nec metiri animo possem, et quasi præ stupore deficerem. Percunctabar attonitus unum ex iis qui proximi constiterant quidnam miri quidve præstigii viderem; neque enim reor unquam potuisse vigesimam illius populi partem terras incolere. Nec fallebaris; respondit ille; non enim hic præsentis tantum sed omnis venturi ævi populum convenisse noveris, illius imperio in cuius manu omnis mundi pars, omne genus hominum, omnis temporum cursus est. Et quid hic? Nunquam homines tam intenti fuerunt. Eventum, inquit, viri illius expectant (et ad te oculos erexit), de quo, ut vides, non terra solum sed cælum ipsum atque astra dissentiant. Et his addidit: audis ne murmur æthereum? Intendi aurem, et ecce velut adventante procella tonitruum raucum de nube longinqua. Mars, inquit, fulmen minatur, sed Iupiter est tranquillus. Et quid putas, inquam: quis huius tantæ expectationis exitus? Deus, inquit, solus novit. Sed quisquis erit latere non poterit nec sileri; omnis hic populus semper meminerit et loquetur. Quantum tamen humanis coniecturis prævidere licet, vivax et perennis erit huius viri gloria, modo ventos non timeat; nec timebit. Quid enim metuat cui fixum sit, si oporteat, pro virtute mori? Unum vereor, ne quorundam ex eis, qui secum in eiusdem cacumine montis sunt, fides titubet, oblique nimis aliena cernen-

tium, eorum scilicet qui ad præeminentiam non rectis tramitibus aspirant, et destructo illo, se solium eius invasuros putant. Sed falluntur. Si inde sibi caverit tutus erit. Heu! inquam, ulli ne hominum tam ferox inhumanitas sit, ut quo duce ad tantum gloriæ culmen ascenderit, de illius cogitet ruina? Quid, Deus bone, amentiae, quid furoris sospitatorem suum non ut se ipsum salvum cupere? Quid autem illi, si unus hic (quod Omnipotens avertat) rueret, quid agent? Quo duce consistent? Uno verbo: quo usque miseri nos, præcipites post ipsum ruent. Sic enim, inquit, livor, quo in orbem terrarum mors introiit, cæcus est, nec dum dolore impulsus alteri nocet, sua damna circumspicit. Melius tamen spero evasurum omnes Fortunæ laqueos, quia cum illo Deus est. Post hoc audiendi avidum linquebat. Ego autem manu præhendens quo, inquam, properas? Nocte, inquit, fugiente festino.... Et ego: hoc saltem mihi ne subtrahas: quis hominem hunc tam alte labor extulit, quod studium, quæ Fortuna? At ille Virgiliano versiculo elegantissimo fretus in tempore: ex paucis, inquit, est

quos æquus amavit  
Iupiter aut ardens evexit ad æthera virtus.

Hoc dicens, aurora iam rutilante, disparuit. Et ego vel ad me reversus vel experrectus sum. Vale, vindex libertatis unice.

Magistro Iohanni excellentiæ tuæ nuncio testis ego sum, testis Curia, testis est veritas tanta cum fide in tuis et reipublicæ negotiis se gessisse, ut princi-

pali laude, et honore, nisi fallor, et gratia dignus sit. Quod, etsi me tacente noveris, tamen credidi non tacendum.

---

## EPISTOLA XLI.

FRANCISCUS PETRARCA PHILIPPO CARD. EPISCOPO SABINENSI  
S. P. D.

Commendat ei Iohannem Aretinum.

Non sum oblitus, reverendissime pater et domine mi, dum novissime pro duobus paternitati vestræ scriberem, quod vobiscum pepigi, ut vos de pluribus non gravarem; et nunc, domine mi, quamvis ser Iohannes de Arectio præsentium lator sit mihi carissimus, et suæ virtutis intuitu et respectu originis quæ illi communis est mecum, propter omnes communiter cives urbis illius quos valde diligo, meorum civium gratia qui me antequam nascerer exceperunt, non tamen auderem pro ipso vobis scribere, ne fœdifragus dici possem, nisi ad scribendum me non minus vestri quam ipsius respectus induceret. Ipse enim, nisi me amor fallit, iuvenis bonus est, et bonus scriptor, et dictator non solum bonus, sed super communem modum, si quid de talibus novi. Qui sæpe iam litteras misit elegantes dominus Cardinalis novus de Ursinis requisivit eum instanter ut secum iret ad Curiam non parva sub spe, sed iste qui non libenter novo cum domino de Italia exhibat, recusavit. Ego autem qui sufficientiam eius et mores nosse mihi videor, audito desiderio eius ad vos veniendi, ad quod eum clara fama vestræ vir-

tutis illexit, et cogitans quod si vobis placeat ipsum experiri, erit homo pro vobis, et talis quod eum ubi nosse cœperitis non libenter abire permetteretis, non consensi tantummodo, sed suasi ut ad vestræ dominationis præsentiam se conferret, supplicans reverenter ut eum probare dignemini: et, si talis est qualem dico, quod vobis visum fuerit facietis. Multa, mi domine, potestis et multa habetis facere, et multorum fidei opera indigetis, et ad tanta negotia pauci reperiuntur idonei. Hæc hactenus. De me autem nil aliud dico, nisi quod inter summa et extrema animi mei desideria est, ut vos revideam antequam moriar. Christus vos promoveat et conservet in gratia sua.

Paduæ, IX Februarii.

---

## EPISTOLA XLII.

FRANCISCUS PETRARCA NICOLAO LAURENTII TRIB. POP. ROM.  
S. P. D.

Vallis Clausæ amœnitatem describit. Eglogam de rebus ab eo gestis a se compositam mittit, et arcanam eiusdem significationem pandit.

Nuper ex procellis huius Curiae, quæ Romana dicitur, inter quas ægre iam senior nauta, sed adhuc rudis et inexpertus navigo, in solitudinis assuetæ portum fugiens de Avenione Vallem clausam ex re nuncupatam petii. Locus est XV passuum millibus ab hac turbulentissima civitate et sinistra Rhodani ripa semotus, adeo tamen hoc tam parvo spatio dissimilis, ut ab ultimo occidente in extremos solis ortus transiisse

videar, quotiens hinc digrediens illuc pergo. Nihil simile præter cœlum: alter hominum, alter aquarum, alter terrarum habitus surgit. Hic Sorgia inter clarissimos atque pergelidos fluvios numerandus et crystallinis undis et smaragdeo alvei nitore spectabilis, et sine exemplo vicissitudine modo tumentis, modo silentis fontis insignitus, quem miror a Plinio Secundo positum inter memorabilia provinciæ Narbonensis: in Arelatensi enim est. Rus hic est ubi me extra Italiæ fines adamantinæ necessitatis laquei morantur, studiis meis aptissimum, matutinis simul et vespertinis umbris collium, et apricis vallium recessibus ac late tranquilla solitudine, in qua plura ferarum videas, quam hominum vestigia, magno præterea perpetuoque silentio, nisi quatenus fugientis aquæ murmur, aut pascentium in ripis mugitus boum, et cantus volucrum audiuntur, de quo plura dicerem, nisi quod locus ille propter raras naturæ suæ dotes iampridem longe lateque meis carminibus notus est. Illuc igitur cum avide fugissem tum ut aliquantisper animum et aures fessas urbanis tumultibus recrearem, tum ut aliquibus cœptis meis, quibus premor ac prægravor, supremam imponerem manum, ipsa silvarum facies hortata est ut silvestre aliquid et incultum canerem. Igitur ad carmen bucolicum quod æstate altera eadem valle cecineram, unum capitulum, sive, ut in re poetica non nisi poeticis utar verbis, eglogam unam addidi, et quoniam illius lege carminis silvas exire prohibeor, duos pastores eosdem germanos fratres colloquentes feci, quod tibi, vir studiosissime, multiplicum curarum tuarum solatio transmisi. Sed quia natura huius generis scriptorum hæc est ut, nisi illo ipso qui edidit expo-

nente, divinari possit sensus eorum forsitan, sed omnino non possit intelligi, ne te summis Reipublicæ factis intentum, cogam unius pastoris scilicet verbis intendere, ac ne in nugis meis vel momento temporis divinum illud occupetur ingenium, paucis tibi patefaciam propositi mei summam. Duo quidam pastores duo sunt civium genera in eadem urbe habitantium, sed de eadem Republica longe discordantium; alter est Martius, hoc est bellicosus et inquietus, seu a Marte, quem conditoris nostri parentem finxit antiquitas, nominatus, erga genitricem pius et sibi compatiens. Genitrix autem Roma est. Alter frater eius est Apicius, quem magistrum coquinæ novimus, per quem voluptatibus et inertiae deditos licet intelligere. Inter hos ibi de pietate vetustæ matri debita magna contentio est super restituenda præsertim domo eius antiqua, quæ domus Capitolium est, et ponte, quo rus suum petere solebat, qui pons Milvius est, super rivum, hoc est Tiberim ex alto Apennini vertice descendentem. Iter illud ad veteres hortos et ad Saturni domos, hoc est ad Hortanam civitatem veterem, ac Sutrium ducit, et ad umbrosa Tempe; hoc est ad Umbriam, in qua est Narnia et Tudertum et aliæ multæ, et ulterius in Tusciam, cuius populos a Lydorum gente profectos esse non ignoras. Pastor autem, de quo illo loco fit mentio, qui fures in ponte reperit et occidit, Marcus Tullius Cicero est, qui ut nosti, super pontem Milvium coniurationem reperit Catilinæ. Bene pastor, quod Consul: bene argutus propter eloquentiæ principatum. Silva quidem cui pontis ruina damnosa est, et grex parva, est Populus Romanus. Coniuges et filii, quibus neglecta

matre studet Apicius, terræ et eorum vassalli sunt. Antra autem quæ nominantur, arces sunt potentium, quarum fiducia calamitatibus publicis insultabant. Vult autem Apicius non refici Capitolium, sed Romam lacerari, et in duas partes discerpi, ut alterne nunc apud hos, nunc apud illos summa rerum sit. Alter ad unitatem nititur, et in eo quod ad refectionem Capitolii maternas etiam divitias commemorat, vult intelligere Romam adhuc potentem, si filios habeat unanimes, quæ scilicet et oves et iuvenços pascit, plebem scilicet humilem et populum fortiozem. Inter cæteras autem fortunæ prioris reliquias et salis occulti meminit, per quem licet simpliciter publicos ex sale redditus, qui ut audio magni sunt, possimus accipere; melius tamen accipe sapientiam Romanorum diutius metu tyrannidis occultatam. Qua de re sic altercantibus, volucer supervenit, hoc est Fama *malum quo non aliud velocius ullum*, ut ait Maro. Is volucer curas eorum vanas arguit et iurgia superflua, nuncians ipsos a matre abdicatos, iuniorem fratrem matris consensu domos erigere, silvas regere, eisque silentium indicere, gregibus animalium canentem dulciter, hoc est leges iustissimas ferentem et nociva repellentem. In quibus sub ferarum vocabulo quorundam ex tyrannis vel nomina, vel naturas, vel armorum signa recondidi. Frater iste iunior hactenus es tu. Cætera clara sunt. Vale mei memor, vir illustris.

---

## EPISTOLA XLIII.

FRANCISCUS PETRARCA BENINTENDIO S. P. D.

Rogat ut Senatum Reipublicæ Venetæ suadeat bibliothecæ suæ  
donum accepto habere.

Omnis, ut arbitror, inter nos gratiarum actio deinceps supervacua est. Eo enim amicitiae progressi sumus, ut quod mihi facis tibi facias. Egisse te meis in rebus, quæ sunt tuæ, quod in propriis ageres scio, et fortassis eo amplius quo generosa mens ad amicitiae nomen altius expergisci et stimulis ardentioribus agi solet. De eventu viderit non Fortuna, sed Fortunæ Dominus qui mihi hunc tibiue illum dedit animum, ut et hoc ego velle inciperem, et tu pium hoc propositum adiuvares; quod si optato successerit, erit ni fallor, tibi ac posteris tuæque reipublicæ, non audeo dicere gloriosum, sed secure dixerim ad gloriam via. Multæ enim, magnæ et præclaræ res ex non maioribus initiis prodire. Mihi equidem bonæ voluntatis candida et illimis conscientia satis est, quæ se utinam tempestivius obtulisset, dum scilicet anima illa sanctissima summæ rerum præerat, quæ quantum hinc gavisura fuerit ipse qui eam plane noras aestima. Certe ego illam nunc de cælo gaudere super his quæ inter nos aguntur, et rei exitum expectare (quid loquor?), imo vero iam præsentem spectare non sum dubius non tam æquo sed læto animo ferentem, quod cum sibi omnes virtutis et gloriæ titulos in cœlum auferre contigerit, quantum nescio an ulli unquam Venetorum Ducum,



bibliothecæ decus publicæ successori suo quarto, et viro et duci optimo atque fortissimo communisque status amantissimo reservatum sit; quamvis, ut mihi apparet, admiratione non careat quod res talis altius quam illius tempore non inciderit. Sed sic est ut quæque cogitaris aggredi liceat, cogitare autem nihil queas antequam cogites; sic in rebus hominum cogitatio prima est. Præit illa ferme omnia quæ agimus, illam nihil: et quærentibus cur non hoc aut illud ante cogitaveris, ipsa eadem interrogatione responsum est. Si prius fuisset, prius, fateor, his te curis involvissem. Sed nunc etiam tempus adest, ni respuitur. Verbum est summum imperatoris sæpe mihi usurpatum: *satis cito fieri quidquid satis bene fit*. Restat illud Comicum: *ne quid nimis*. Nolo nimium labores. Nolo defatigeris, exercere te velim, non afficere. Profecto autem qui in re qualibet omne quod potest facit, lassitudini proximus sit oportet. Fac ergo quod satis est, et quæ modestiam nostram decent. Non petimus propter quod importunitatis aut tædii suffragio opus sit: nisi nos amor urgeret, rogandi essemus. Perinde sine rem sibi, nec tibi nec alteri sis molestus. Senum nostrorum est proverbium; magnas res per se ipsas fieri. Sæpe longum iter egit melius qui lentius. Nosti mores populorum, et quid velim vides. Vale virum optime.

Patavii, V kalendas Septembris.

---

## EPISTOLA XLIV.

FRANCISCUS PETRARCA FRANCISCO PRIORI SS. APOSTOLORUM  
S. P. D.

Blateronis importuni faceta descriptio.

Onerabo te litteris, obruam te papyro, non sinam te aliud legere quam nugas meas, nullum respirandi spatium dabo. Comminatus sive pollicitus eram tibi breviores deinceps epistolas meas fore, quod occupationi nostræ debitum erat, ne dicam fastidio eorum; quibus omnia sunt prolixa, nisi quæ hebes atque insolens eloquentiæ suæ forceps absciderit. Nunc, ut video, multiplicant et crescunt: nil amicitia loquacius: amicorum colloquio nulla enim brevis nox, nullus non angustus dies fuit; cupidum dum convenerit amicorum par, improvise fugiunt horæ; non loquentibus tempus, non ambulantibus rura sufficiunt; non gelu non æstus non fames non lassitudo sentitur:

Omnia vincit amor.

Duo sunt bene instituti animi solatia: litterarum otium, et fidelis amicitia. Duo tædia: occupatio et turba; ultimum in urbibus, primum illud optime in solitudine et in Helicone nostro semper experior; sive mane solus in silvas ierim, sive dulcis intervenerit amicus, nullus est finis, non prius obire solem quam abiisse perpendo: sin vespertina congressio est, non axem flecti, non stellas labi sentio, denique non fugam noctis intelligo, nisi solis adventu. Ego quidem perlibenter sum tecum: non unquam præsentior es mihi quam dum

vel te alloquor vel loquentem audio. Hinc et epistolarum tuarum ista cupiditas, et prolixitas mearum. Invitus enim avellor; alloquor te dum scribo, audio te dum epistolas tuas lego; utrobique te audio, tecum sum. Hodie sane quia serium nihil erat, et intermissiones occupatis animis non minus quam exhaustis agris utiles esse solent, aures magnis rebus parumper ablatas non inamœno ridiculo præstabis. Neophytus quidem ille, quem hactenus nesciebam, eo quod literas tuas illum loquentes de manibus non suis acceperam, eo ipso die dum forte huius sociam scriberem ad me venit, cum vestibulum prius atque atrium totamque domum verbis implesset. Nihil motus (ab assuetis enim non fit passio) excipio hominem vultu quam animo lætiore, non quod aut me etiam intermissio non delectet, aut hospitem non amem, sed quia tempore minus idoneo obambulans, et nescio unde rediens, melioribus curis non satis opportunus incessisse videretur. Quid multa? Concedimus. Incipit ille de inexhausto fonte verborum, immo vero continuat, iam enim antequam limen attigisset inceperat.

Demitto auriculas ut iniquæ mentis asellus,  
Cum gravius dorso subit onus.

Ille mox urgebat, instare, linguæ fustibus ad pistri-  
num agere: ego autem nihil, nisi quod dum ille mihi  
linguam suam, ego sibi aures meas accomodo. Ita  
illinc loquendo hinc tacendo impari pugna conseritur.  
Dum in hoc statu res essent, hortari illum incipio  
subducat equum, seque familiari prandio, cuius iam  
tempus instaret, æquum præbeat. Ille autem ad hæc

surdus, sed non mutus ad propria cœpti sêrmonis torrente profluebat. Multa de te in primis : quam mihi, quam illi itidem amicus. Mirari cœpi quisnam iste Dionysius qui nobis quoque tertius accessisset, Damonis aut Pitiaë moribus simile nihil habens, nec satis intelligere unde ille te nosceret. De me enim non miror. Ab extrema infantia nescio quo sidere hæc me lingua persequitur, nec mutasse climata et effugisse patriam me iuvat. In te nostra omnis admiratio, ut nobis non animus modo, sed fatum idem, ut euntibus via sacra, Bolanus idem semper obuius ; quibus enim ad te ille tramitibus penetrasset incertus eram, nec memineram me illi aditum præbuisse. Cum enim ante aliquot menses ille mihi sub ardentissimo sole pulverulento et arcto quodam loco occurrisset, meque confestim ex more verbis aggressus esset, nec spes opis superesset aut fugæ, sed hinc sol, hinc pulvis, hinc cicadæ, hinc Bolanus iste certaret, quid facerem? Iubebat ille aliquid sibi committi in patriam ad amicos ; negabam ego commisso opus esse ; ille transverso quadrupede, occupatis angustiis obstabat. Cœpi consilium ex tempore, utique te meis verbis saluaret imposui : ita contentus ille ministerio cessit, et ego e manibus amici hostis evasi, ratus id verbum quod mihi elapsum esset, nequaquam tanto studio colligendum servandumque. Sed verborum impiger agricola loquendi semen oblatum non tam sterilibus sulcis mandat, quin tamen centesimum fructum ferat : sic sementis exiguæ copiosissimam messem referens capax horreum patulæ auris impleverat,

Multa super Priamo cumulans super Hectore multa ;

super te autem ante alios quæ stilo quolibet ad me perlata mulcebant; cætera vero rancidiora de se ipso, de amicis, de cognatis, de affinibus, de vernaculis, de clientulis, omnique sodalitia, de universa familia: quid germana, quid neptis, quid vicinæ omnes agerent; postremo de canibus ac lupis, de leone patrio, de tota Republica, de præside provinciæ, de primoribus populi, de sterilitate annua, et de innumerabilibus aliis quæ memoriam vincunt, ut non minus ego quam apud Milonem suum Apuleius posset, si nox esset, non modo somnolentus balbutire sed stertere, cœnatusque solis fabulis cubitum ire; dum ecce cocus increpitans horam prandii transire denunciat. Nihil ille lentescere, sed enixe quemdam excusare quod litteras ad me tuas quas afferre debuerat promississet, nuncii celeritate fortuiti, festinationi tuæ consulueris. Nec dum talia dicente illo (oh! segne cerebellum), subibat animûm quid præsagii esset; ita mihi persuaseram illum in somnio fabulare. Inde cum miris modis obtunderet, ut iam in labiis esset illud Horatii:

Confice, namque instat mihi fatum triste,

subito expergiscor, tacitusque respicio ut noti nova forma viri, ut religio sine litteris, ut cætera omnia quæ epistolæ convenirent tuæ, simulque ad me ipsum redeo, et mecum: posset ne is esse Neophytus quem mihi pridie meus ille sapidissimo sale describe-  
rat? Ille est haud dubie. En rudis et nova religio, en illa verborum largitas: singula conveniunt; ille est. Talia cogitantem tantus risus arripuit, ut nec rationis fræno, nec commorsicatis digitis, nec ulla medi-

tatione dolendarum rerum cohibere potui : tum liquido expertus sum esse, ut aiunt, affecti animi motus indomitos. Ut vero ridentem ille me vidit, quæsivit, quid rei esset admirans : ingenio impigro erat opus ; nec enim consultandi quid loquerer spatium inopina res dabat : ex improvise respondendum erat : verum enim vero ex hominis habitu materiam responsionis arripio, et heus, inquam, quis non stupens rideat qui te meminert armorum gloria paulo ante clarissimum, eundemque nunc videat tanta gratia religionis insignem utramque vitæ viam multum diversis studiis brevis spatio temporis honestasse ? Lætari præconio visus est, et rauco plausu titulum bellicæ laudis amplecti seque protinus in talos attollere, quo grandiusculi formam bellatoris indueret. Hæc inter discubuimus, ille plenus lætitia cibo feriari contentus, bibere et loqui, ego autem satis habui audire et silere, et vicissim erumpenti cachinno fræna substringere, cum totus non nisi de re militari sermo esset, qualiter arma movenda, qualiter feriendus hostis, qualiter declinandus. Phormionem illum diceres, nisi quod ego Hannibal non eram : cæterum nostri quoque seniculi mirus fervor, et inexhausta copia peregrinæ materiæ. Singula nutu quidem approbabam, nam nec loqui poteram, nec si possem, ille permetteret : sic totus ille transiisset dies, nisi publicum horologium, quo ultimo invento per omnes fere iam Cisalpinæ Galliæ civitates metimur tempora, prælium diremisset ; admonitus enim diem ire, surrexit. Ego illum ad limen cum pueris prosecutus sum, et egregium bellatorem vix omnes sustulimus in tergum equi, cui ad capellæ squallentis

effigiem præter cornua nihil desit, cum interea nil nisi rei militaris epilogum loqueretur. Quid te in verbis teneo? Vix tandem inde divulsus est. Nescio historiæ finem: nutantes ruinamque minitantes abierunt, neque compertum habeo in quam foveam equus sessor<sup>um</sup>que ceciderint. Quod extremum petiit fuit ut per me tibi, per te familiæ eius innotesceret eum hūc corpore quidem, ut ipse ait, ut ego testificor, lingua, incolumem pervenisse. Vale.

---

## EPISTOLA XLV.

FRANCISCUS PETRARCA IACOBO FLORENTINO S. P. D.

Mittit Orationem M. Tullii Ciceronis pro Archia poeta, tresque alias petit ab eo, cui Philippicas iamdiu acceptas quamprimum se redditurum spondet.

Orationem Tullianam pro Licinio Archia, quam pollicitus sum tibi, præsentem mitto refertam miris poetarum laudibus. Iuvabit puto fide digno teste cognoscere, quod studiis quibus delectamur præco ingens et præclarissimus Orator accesserit, cuius rei admonuisse te velim, ut rem licet parvam in pretio habeas. Neve pro una tres eiusdem oratoris remisisse te pigeat, quas fateor ipse mecum detulissem, et sicut uno, sic duobus te libris uno tempore spoliasset per fiduciam, nisi propere Philippicas dimissem, neque id eo proposito ut eis perpetuo careres, sed ut accuratius et litteræ floridiore transcriptas ad te quamprimum remitterem. Ego enim usque adeo vetustati

oculos assuefeci ut novam scripturam qualemcumque fastidiam. Super hoc nihil amplius. Tuus sum et Lappum meum lappis tenacissimis amoris obsitum fuisse nunc sentio, a quo divelli nequeo. Sic te semel complexus animo inhæreo. Feliciter vale.

Franciscus Petracch. tuus.

Parmæ, octavo Idus Ianuarii festinanter valde.

---

EPISTOLA XLVI.

FRANCISCUS PETRARCA MODIO PARMENSI. S. P. D.

Gratulatur adventum eius, et de villa sua quam Linterni nomine designat, itemque de altera inter colles Euganeos nonnulla innuit.

Amantissime Modi. Perfudisti me stupore et gaudio dum audivi te tam prope esse, quem longe absentem æstimabam. Et quid tibi vis dicam? Mille res haberem scribere : tempus vetat et spes te de proximo videndi. Si enim dominus venit, ut fama est, sequar eum statim aliquot dies, si dabitur, tranquillos rure acturus, cuius etymologiam tibi committo. Ego quidem Linternum dicere soleo, paratus tamen in hoc te ut in multis sequi. Utinam vero tibi possem ostendere Helicon alterum, quem tibi et Musis Euganeo in colle congeSSI! nunquam credo inde velles abscedere. Non sum nunc aliud dicturus, nisi ut si forte me non viso abires, recommends me dominæ meæ carissimæ, quæ non dubito de me queritur ; sed Christum testor, segnities et tarditas quædam naturalis, et annis aucta me detinet, non mutatio affectus. Vale felix nostri memor.

Franciscus tuus.

Papiæ, 20 Iunii ad vesperam raptim.



## EPISTOLA XLVII.

FRANCISCU<sup>s</sup> PETRARCA FRANCISCO BRUNO S. P. D.

Commendat ei presbyterum ad Pontificem euntem.

Prædilecte frater, casus fuit ut cum satis multa per alterius manus ad te ventura scripsissem, iterum mihi in manus calamum necessitas honesta reponeret. Siquidem lator præsentium presbyter N. plebanus etc. et domini capitanei cappellanus cum præfato domino suo ad domum nostrum venit. Est autem vir, ut mihi dicitur, bonus et in suo genere singularis, propter quod inter tam multos ad tantum officium præelectus est, quibusdam quoque mihi venerabilibus ac dilectis carus admodum et acceptus; quibus cum notum esset, quod hic paucis bonis est incognitum, quanta scilicet inter nos sit identitas animorum, optarunt ut ad te commendatorias litteras meas ferret, ad quas non difficilis fui, quia et amicis talibus nil negare didici, et apud bonum pro bonis intercessionem favorabilem reor. Fave illi, quæso, qua potes: rem mihi feceris gratissimam. Vale.

---

## EPISTOLA XLVIII.

FRANCISCUS PETRARCA NICOLAO LAURENTII  
ET POPULO ROMANO.

Hæc est, quam vocant *hortatoriam*, epistola ad libertatem  
Romanæ Reipublicæ tuendam.

Primum ne tibi, Vir magnanime, pro tantarum  
rerum gloria, an liberatæ patriæ civibus pro tuis erga

illos meritis et felicissimo successu libertatis gratuler incertus sum. Utrisque pariter gratulor, utrosque simul alloquar, neque quos tam coniunctos rebus ipsis video sermone disiungam. Sed quibus interim verbis utar in tam repentino tamque inopinato gaudio? Quibus votiſ exultantis animi motus explicem? Usitata sordeſcunt, inusitata non audeo. Furabor me tantisper occupationibus meis, et Homérico stilo dignissimos cogitatus, quod penuria temporis hortatur, tumultuaria complectar oratione. Libertas in medio vestrum est, qua nihil dulcius, nihil optabilius nunquam certius quam perdendo cognoscitur. Hoc tamen grandi bono et experimento tot annorum cognito læte, sobrie, modeste tranquilleque fruamini, gratias agentes talium munerum largitori Deo, qui nondum sacrosanctissimæ suæ Urbis oblitus est, et eam servam diutius spectare non potuit, apud quam terrarum orbis imperium collocarat. Itaque, viri fortes, et virorum fortium successores, si cum libertate sana mens rediit, non prius hanc quam vitam deserendam sibi quisque pro se cogitet, sine qua vita ludibrium est. Præteritam servitutem ante oculos assidue revocate; sic etenim, nisi fallor, erit præsens aliquanto etiam quam vita carior libertas, ut si alterutro carendum sit, reperiri valeat nemo, cui modo supersit quidquam Romani sanguinis, qui non malit in libertate mori, quam in servitute vivere. Elapsus hamo piscis quidquid in undis internatat metuit; excussa faucibus luporum ovis glaucos eminus horret canes: explicita visco volucris tuta etiam, arbusta formidat. Et vos, mihi credite, inescati hami falsæ spei blanditiis, et vos pestiferæ consuetudinis

viscum, et vos famelici luporum greges obsident. Circumspicite vigilantibus animis, et videte ut quidquid omnino cogitatis quidquid agitis libertatem sapiat. Ad hanc unam curæ vigiliæque vestræ, ad hanc omnes omnium pertineant actiones; quidquid præter hanc agitur vel irreparabilem iacturam temporis, vel insidias æstimate. Amor immeritus quem ad tyrannos vestros longo usu forsitan concepistis, et affectionis indignæ memoria omnis ex pectoribus vestris excidat. Et servus superbum dominum ad tempus colit, et clausa possessori suo avis alludit, et ille si liceat catenas excutiet, et hæc si detur exitus, cupido fugiet volatu. Servistis, clarissimi cives, quibus omnes nationes servire consueverant, et quorum sub pedibus reges erant sub paucorum tyrannide iacuistis; quodque ad doloris accedit et pudoris cumulum, adventitios et alienigenas dominos habuistis. Decoris vestri fortunarumque raptores, libertatis eversores dinumerate, singulorum origines recensete. Hunc vallis Spoletana, illum Rhenus aut Rhodanus aut aliquis ignobilis terrarum angulus misit; ille vinctis post tergum manibus ductus in triumpho repente de captivo factus est civis, immo vero non civis sed tyrannus, ut minime mirandum sit, si talibus urbs Roma, si gloria, si libertas, denique si sanguis vester invisus est, dum antiquam patriam, dum propriæ servitutis ignominiam, dum campis effusum sanguinem recordantur. Illud potius miror unde vel vobis tam longa patientia viris Romanis et armatis, vel illis tam intolleranda superbia? Quid enim præcipuum cur tantopere sibi placeant habent? Quibus inflantur et efferuntur flatibus virtu-

tibusve, quarum nullum genus hominum pauperius usquam est? An ex superabundantibus divitiis, quæ sine furtis ac rapinis sedare famem nequeunt? An ingenti potentia, quæ mox ut vos viri esse cœperitis, nulla erit? An claritate nominis vel sanguinis et furtivo forsitan aut præcario domicilio gloriari possunt? Quid est autem cur Romana prosapia glorientur? Impudentissime tamen id faciunt, et quia diu se Romanos esse mentiti sunt, ceu mendacio præscripserint, iam Romani sibi videntur, quodve utrum risu an lachrimis prosequendum sit nescio (nam Romanorum civium viluit nomen), non Romani cives, sed Romani principes appellantur. Sed minus indignor dum eos etiam humanitatis oblitos video. Non enim iampridem eo vesaniæ perventum est, ut non homines sed dominos dici velint. Proh nefas! In qua urbe divus Cæsar Augustus, mundi rector ac regnorum omnium moderator edicto vetuit se dominum dici, in ea nunc mendici fures gravi se iniuria affectos putant, nisi domini vocentur. Oh miserabilem fortunæ vertiginem, oh mutationem temporis inauditam! Discutiantur umbræ, pellantur errores, perveniatur ad verum. Utrum homines ii sint totius rationis expertes viderint qui definitionibus rerum student: utrum domini, vos, quorum res agitur, videritis, dum memineritis in eadem urbe illos simul dominos et vos liberos esse non posse. Quod unum definire meum est, certe Romani homines non sunt. Horum omnium, quos inani nobilitatis titulo tam fastidiosos videbatis, undecumque venerint, quolibet infelici vento delati sint, quæcumque illos miserit barbaries, quamvis foro vestro obversarentur, quamvis

stipati satellitum turbis in Capitolium ascenderent, quamvis superbo gressu Romanorum illustrium cineribus insultarent, nemo non peregrinus erat, et ut ait Satyricus :

Nuper in hanc urbem pedibus qui venerat albis :

verificatumque est illud alterius poetæ :

Solatia tanti

Perdit Roma mali, nullos admittere reges,  
Sed civi servire suo.

Vobis vel illud utinam solamen miseriæ contigisset, ut uni saltem seu civi seu regi, et non pluribus simul externis prædonibus serviretis. Sed verum est quod dixisse traditur ille famosissimus olim Romani generis hostis Hannibal, præterita magis reprehendi posse quam corrigi ; ideoque ne amplius urgeam, neu transacta vobis exprobrem, quin potius ut aliquid pudori vestro velamentum præbeam, fuerunt et maiores vestri sub regibus, iisque non semper Romanæ, sed nunc Sabinæ nunc Corinthiæ, (*sic*) quibusdam et, si credere libeat, servilis originis. Verum ut prospera sic adversa fortuna suum finem habet, et illorum et vestræ libertati defensor insperatus adfuit, et suum Brutum utraque tulit ætas. Tres iam hinc ex ordine celebrantur Bruti : primus qui Superbum regem expulit : secundus qui Iulium Cæsarem interfecit : tertius qui nostri temporis tyrannos et exilio et morte persequitur : in hoc ambobus similis, quod geminæ laudis materiam, quam inter se alii duo unitam dividunt, iste totam occupet ; priori tamen quadam morum ac propositi occultatione similior ; iuvenis uterque, longe

alius ingenio, quam cuius simulationem induerat, ut sub hoc obtentu liberator ille Populi Romani animo latens aperiretur tempore suo. Et illius quidem veteris Livius princeps historiæ, huius autem vestri experientia testis est. Ille regibus, hic tyrannis contemptus primum, postea formidabilis; illum legitis, hunc, vidistis despectum ab hominibus, quibus æquo iure vivere cum civibus extrema servitus, quibus nihil nisi iniustum atque insolens videtur esse posse magnificum: illi humilitatem viri huius contemnebant atque calcabant, sub qua tamen magnus animus interim tegebatur. Testis ego sibi sum semper eum, hoc quod tandem peperit, sub præcordiis habuisse: sed tempus idoneum expectabat, quod ubi adfuit, nihilo segnius primo arripuit. Eductum corde Lucretiæ cultum tenens nihilo utilius ille concivibus tunc suis libertatem reddidit quam iste nunc vobis. Hoc interfuit, quod illorum patientia unius indignitate sceleris, vestra innumerabilibus flagitiis atque intollerabilibus iniuriis victa est. Pro quibus sanguinem vestrum totiens fudistis, quos vestris patrimoniis aluistis, quos publica inopia ad privatas copias extulistis, ii neque vos libertate dignos iudicarunt, et laceratas Reipublicæ reliquias, carptim in speluncis et infandis latrocinii sui penetralibus congesserunt; nec pudor apud gentes vulgandi facinoris, aut infelicis patriæ miseratio pietasque continuit, quo minus post impie spoliata Dei templa, occupatas arces, opes publicas, regiones urbis, atque honores magistratum inter se divisos, qua una in re turbulenti ac seditiosi homines et totius reliquæ vitæ consiliis ac ratione discordes inhumani fœderis

stupenda societate convenerant, in pontes et moenia, atque immeritos lapides desævirent. Denique post vi vel senio collapsa palatia, quæ quondam ingentes tenuerunt viri, post diruptos arcus triumphales, unde maiores horum forsitan corruerunt, de ipsius vetustatis ac propriæ impietatis fragminibus vilem quæstum turpi mercimonio captare non puduit. Itaque nunc heu dolor! heu scelus indignum! de vestris marmoreis columnis, de liminibus templorum, ad quæ nuper ex toto orbe concursus devotissimus fiebat, de imaginibus sepulcrorum, sub quibus patrum vestrorum venerabilis cinis erat, ut reliqua sileam, desidiosa Neapolis adornatur. Sic paulatim ruinæ ipsæ deficiunt, ingens testimonium magnitudinis antiquorum. Et vos tot millia virorum fortium coram paucis latrunculis non aliter quam in capta urbe crassantibus, ceu totidem non tam servi quam pecora, cum publicæ matris membra discerperent, siluistis: nimirum enim super vos sortes fecerant, quis huic, quis illi cederet in prædam; et quod imbelli civitati Athenarum miramur et indignamur obtigisse, cum legimus eam ornamentis suis omnibus et luminibus orbatam ad triginta tyrannorum arbitrium pervenisse, hoc in urbe Roma domitrice urbium ac terrarum domina, sublimis adhuc Imperii et summi Pontificatus titulis illustrata, potuisse contingere, ut non multo plurium, forte etiam paucorum tyrannorum libidinibus subiaceret, nemo quidem usque ad hoc tempus qui satis indignaretur inventus est. Quis illorum, precor, unquam a vobis servili aliquo, nisi eodem sordido contentus obsequio fuit? Servis paulo altioribus, ipsisque iumentis parcitur, etsi non

eorum caritate, at saltem damni metu: vobis quis perpercit unquam? Quis non unumquemque hieme et nocte media, dum ubertim pluit aut fulminat, caræ gremio coniugis avulsum, vel in periculum mortis misit, vel nivosis montibus et limosis paludibus ceu vile mancipium circumduxit? Experrecti tandem ex tam gravi sopore videmini, ideoque si præteritarum feritatum pudet ac pœnitet, aciem mentis acriter adversus omnes casus exacuite, ne quis forte luporum rapacium, quos a vestris ovilibus expulistis, et qui etiam nunc assidue septa vestra circumstrepunt, ululatu ficto aut spe aliqua blanditiori, unde violenter exierunt, fraudolenter irrumpat: nisi enim hoc provideritis (quod omen venti auferant, et quod nedum cernere sed excogitare etiam abhorret animus), nolite credere eamdem illos quam pertulerunt famem recreaturos, sed multo rabidiorem et magis magisque tractu temporis efferatam. Æque gregis sanguinem sitiunt et pastoris, et libertatem vestram et liberatoris vestri gloriam miseriam atque ignominiam suam ducunt. Adversus hos hostes fidenter insurgite: pauci et contemptibiles erunt si vos unum eritis. Sed multum timeo quia multum diligo, eademque ratione multum audeo; amor enim et pavidos facit esse securos. Scio quidem in illa tempestate Reipublicæ, cuius supra memini, fuisse qui paucorum tyrannidi adversus libertatem omnium faverent, idque non ab obscuris sed a præclarissimis adolescentibus atque ipsius liberatoris filiis admissum, quibus et mixti sanguinis nexus, et consuetudo longior, et familiarior convictus, oblivionem sui ipsius obvexerant; eos ille tamen orbitate



forsan infelix, sed virtute animi felicissimus pater morte mulctavit, sanctius aestimans sibi filios eripi quam patriæ libertatem. Idemque prorsus in hac tempestate permetuo, eoque magis quo fragiliora nunc et volubilia sunt pectora. Permultos arbitramur futuros quibus vel mixto sanguine cum tyrannis, vel miserima consuetudine serviendi persuasum sit dulciorem esse servilem crapulam, quam sobriam libertatem, qui se grande aliquid assecuturos putant, si salutentur in publico, accersantur, fatigentur obscœnis imperiis, tandem infames et sordidi parasiti, iniquis mensis assideant tyrannorum, atque aliquid de reliquiis gulæ tam capacis absorbeant. Hæc enim profecto non alia miserorum solatia, hæc tantorum discriminum et laborum præmia. Tu vero, vir fortissime, qui tantam lagentis Reipublicæ molem piis humeris subiisti, nihilo segnius adversus tales cives quam adversus crudelissimos hostes armatus invigila. Iunior Brute, senioris imaginem ante oculos semper habe: ille consul erat: tu Tribunus. Si conferimus dignitates, multa quidem a consulibus adversus plebem Romanam, animose dicam, multa etiam atrocia facta sunt, cuius Tribunos constantissimos defensores semper accepimus. Quod si Consul ille studio libertatis filios interemit, quid Tribuno tibi agendum sit in cæteris vide. Si fidele consilium non respuis, nil sanguini tribues vel amor. Quem libertatis inimicum senseris, scias hunc non amicum tibi esse posse magis quam sibi, dum utrique quod præstantissimum habet tendit eripere. De urbe Roma loquebatur Sallustius ubi ait: *in tam magna civitate multa et varia ingenia sunt; quot autem in eadem*

modo sunt qui exiguo pretio facile se ipsos et universam Rempublicam atque omne divinum humanumque ius proderent? Bene nobiscum agitur divinitus, si maior populi pars unum sentit, si torporem quo premebatur excussit. Magnum et formidatum nomen est quamvis afflicti Populi Romani. Magnæ opes, magna præsidia si consilio gubernentur: abunde per se ipsum potest, modo velle unum incipiat. Incepit autem, iamque vult: qui enim contra sentiunt, non de populi sed de hostium numero sunt habendi, quibus velut pravis humoribus exoneratum Reipublicæ corpus, quo tenuius eo expeditius validiusque remanebit. Adsit providentia nec animus desit, robur quippe non deerit, non modo ad libertatem tuendam, sed etiam ad imperium repetendum. Quantum vero confert recordatio vetustatis et mundo dilecti nominis maiestas? Quis non Romæ ius suum prosequenti prosperos optet eventus? Tam iustæ causæ patrocinium Deus hominesque suscipiunt. Italia, quæ cum capite ægrotante languebat, sese iam nunc erexit in cubitum. Si perstiteritis incepto, et lætus rumor invaluerit, mox sic spes etiam iucunda consurget; boni omnes qui poterunt, auxilium ferent: quibus posse negabitur, votis saltem et precibus adiuvabunt: contra autem proditores patriæ et hic gladio ultore ferientur, et apud inferos meritas pœnas luent, quas eis non novi tantum doctores, sed etiam veteres comminantur. Hi sunt enim quos in acerrimo suppliciorum circulo Maro conclusit:

Vendidit hic auro patriam, dominumque potentem  
Imposuit, fixit leges pretio atque refixit.

In hoc igitur genere hominum, seu potius belluarum, dicam quid sentio, omnis severitas pia, misericordia omnis inhumana est. Tu quidem tibi, vir egregie, ad immortalitatem nominis aperuisti aditum. Perseverandum est, si cupis ad terminum pervenire; alioquin scito quod quanto clarius principium, tanto obscurior finis erit. Hoc autem calle gradienti multa periculosa, multa perplexa, multa aspera se ostendunt; sed virtus arduis, patientia difficilibus delectatur. Ad laborem gloriosum nascimur: quid ad quietem inertissimam suspiramus? Adde quod multa difficilia primum agredientibus visa sunt, quæ longius progressis apparere facillima. Quamquam quid ego de qualitate rerum disputo, cum multa quidem amicis, plura parentibus, omnia patriæ debeamus? Itaque etsi infestis cuspidibus cum sceleratis hostibus concurrendum fuerit, concurre tu prorsus imperterritus, Bruti ipsius exemplo, qui oblatum in acie Superbi regis filium occidit, mutuis ipse vulneribus occumbens: ita quem Urbe depulerat in tartarum usque persecutus est. Tu vero victor incolumis, illis pereuntibus consistes, et si utique cadendum sit, reddendaque patriæ vita, illis ad inferna properantibus cœlum petes, quo tibi virtus et tuorum caritas viam stravit, æternæ famæ vestigium hic relinquens. Quid aliud sperare licet? Romulus urbem condidit: hic, quem sæpe nomino, Brutus libertatem, Camillus utramque restituit. Quid ergo inter hos tecum, clarissime vir, intererit, nisi quod Romulus urbem exiguum fragili vallo circumdedit: tu omnium quæ sunt et quæ fuerunt permaximam civitatem validissimis muris cingis? Brutus ab uno, tu a

multis tyrannis usurpatam libertatem vindicas? Camillus ex novis et adhuc fumantibus, tu ex iam pridem desperatis ac veteribus ruinis eversam restituis? Salve, noster Camille, noster Brute, noster Romule, seu quolibet alio nomine dici mavis, salve, Romanæ libertatis, Romanæ pacis, Romanæ tranquillitatis auctor. Tibi debet præsens ætas quod in libertate morietur, tibi posteritas quod nascetur. Duo quidem cito dictu lævia sed effectu saluberrima, nominatim petere, vir illustris, institueram; tu me in altero sponte præveniens efficis ut alterum petiisse satis sit. Sic enim fama de te loquitur: solitum per singulos dies ex quo ad Reipublicæ regimen ascendisti, luce prima, antequam publici privatique negotii quidquam agas, venerandum Dominici Corporis sacramentum, cum multa devotione et exactissima tuæ mentis discussione suscipere. Hoc nimirum sapientis fragilitatem corporum, et vitæ brevitatem reputantis, et impendentes undique casus varios circumspectantis viri opus est. Servasset, ut auguror, hunc morem si ad hæc tempora pervenisset; servavit quoddam simile, quantum obducta tenebris et æthereæ lucis egens permisit ætas, ille Romanorum ducum longe clarissimus. Reliquum est igitur ut quotiens seu discumbens forte, seu insomnis iacens, seu quid aliud corpori tribuens, aliquid otiosi temporis nactus eris, animo etiam sui generis alimenta ne subtrahas. Lege dum vacat: quando id ex commodo non potes, legentes ausculta. Habes in huiusmodi rei ducem imitatione dignissimum Augustum, de quo ita scriptum est, quod in lectulum transgressus non amplius quam septem horas dormiebat, ac ne eas qui-

dem continuas, sed cum in illo temporis spatio ter aut quater expergisceretur, si interruptum somnum recuperare, ut evenit, non posset, lectoribus vel fabulatoribus accersitis uteretur. De eodem legitur quod tam parcus temporis dispensator fuerit ut inter comedendum bibendumque legeret aut scriberet. Tibi autem in hoc præcipue rerum statu quid legendum audiendumve sit potius quam maiorum tuorum res gestæ, et quorum nulla abundatior urbs est? Omnis virtutis exempla habes domestica. Et sane in libro illius Censorii Catonis senis legimus solitos canere ad tubicen de clarorum hominum virtutibus. Id non exigo (quamvis et hoc interdum scintillare animos et ad imitanda exardescere faciat): mihi autem satis erit, si coram te crebro Romani annales et historiæ relegantur. Et tecum quidem hactenus.

Vos vero nunc primum veri cives, hunc virum cœlitus vobis missum credite, hunc ut rarum Dei munus colite, pro salute eius animas vestras exponite. Licuit et sibi cum reliquis in servitio degere, et, quod tam magnus populus sponte subierat, iugum pati: licuit, si id molestum videretur, procul a conspectu miserrimæ urbis efugere, et, quod quosdam summos viros fecisse novimus, spontaneo exilio suum caput contumeliis eripere. Retraxit eum solus amor patriæ, quam cum in eo statu deserere sacrilegium putaret, in hac sibi vivendum esse, pro hac moriendum statuit fortunas vestras miseratus. In quem præcipitem locum venerit, videtis: opem ferte ne corruat: cogitate, quæso, quotiens vos periculo mortis pro tyrannis superbissimis et ingrattissimis obtulistis, dum ferro decerneretis non uti res

vestræ sed illorum sint : hoc est quis potissimum regnet, quis licentius rapiat, spoliet, laniet, spargat, occidat. Ausos pro indignis dominis et pro obscoena servitute tam grandia, audere aliquid pro vobis et pro libertate dignum est, pro qua inventus est et qui urbe reges et qui vita Cæsares spoliaret. Dicite mihi : si Romanorum regum et imperatorum licentiam non tulistis, alienigenarum prædonum tamdiu cruentam rabiem et inexplendam avaritiam perferetis? Non ita Deum a piorum consiliis aversum reor. Vivere sub illis tristius quam sine illis mori. Audendum præterea aliquid pro filiis vestris, pro coniugibus, pro parentum canitie, pro avorum tumulis, postremo nihil non audendum pro Republica, cuius caritas Decios coegit ut devotis corporibus ad mortem irent; Marcum Curtium ut se in horribilem illam terræ voraginem eques armatus immergeret; Horatium Coclitum ut armis onustum corpus, quod muri loco legionibus Hetruscis obiecerat, in Tyberini amnis vortices effracto ponte dimitteret; Caium Mutium Scævola ut erranti dexteræ inferret mirandum ipsis hostibus formidandumque supplicium; Attilium Regulum, cum manere domi posset, ut ad irati carnificis tormenta remearet; duos Scipiones ut in Hispania morientes iter Carthaginensium, quando aliter non poterant, corporibus suis et morte præcluderent, horumque alterius natum, ut inops et inglorius mori mallet, quam libertatem populi ulla ex parte concutere : alterius ut privatus Tiberii Gracchi turbidos motus morte comprimeret; multos item alios ut adversus tumultuosos cives eodem remedio uterentur; Marcum denique recentiore Cato

nem, qui agnomen a morte sortitus est, ut sibi ipse manus ingereret, potius quam tyranni eiusdem, licet singularis et unici viri, vultum et servientem patriam videret. Singulos enumerare curiosum est, apud illos præsertim quorum de sanguine non viri tantum, sed eiusdem unanimis et iuncti propositi illustres etiam familiæ surrexerunt; cuius rei testis est Cremera, sexque et trecentorum Fabiorum clarus simul et miserabilis casus: nec familiæ modo sed legiones, sed exercitus, quibus ruere in mortem pro patria dulce fuit. Ad hoc cupio in eo ipso Capitolio, ut auguror, ista relegenda sint, de cuius olim vertice vir acerrimus Manlius, qui eius paulo ante custos fuerat (ob id solum quia libertati cui faverat insidiari, et egregio cœpto dissimiles exitus spectare videbatur), præceps impulsus est, idemque saxum habuit et eximiæ laudis et supplicii monumentum exemplarque reliquit perpetuum similia non audendi. Nec sibi vero quisquam falso persuadeat eos qui pro libertate excubant, quique hactenus desertæ Reipublicæ partes suscipiunt, alienum agere negotium. Suum agunt: in hoc enim uno reposita sibi omnia norint omnes, securitatem mercator, gloriam miles, utilitatem agricola, postremo in eodem religiosi cærimonias, otium studiosi, requiem senes, rudimenta disciplinarum pueri, nuptias puellæ, pudicitiam matronæ, gaudium omnes invenient. In hoc enim tam publicæ quam privatæ salutis negotium omni publica et privata ope Romani cives intendite: huic uni reliquæ cedant curæ; si hanc omittitis, in quantalibet occupatione nihil agitis: si huic incumbitis, etsi nihil agere videmini, cumulate tamen et civium et virorum

implevistis officia. Deleatur, oro, de medio vestrum civilis furoris omne vestigium: incendium, quod in nobis tyrannorum flatibus exarserat, liberatoris vestri monitis et munita benevolentia restinguatur. Unum ex omnibus certamen assumite, non uter potentior, sed uter melior, uter patientior, uter patriæ amantior civis sit, uter vicinis humilior, uter tyrannis infestior. Certate vicissim cum Tribuno an ille ad honesta imperia prudentior, an vos ad obedientiam promptiores; et si fortassis amor, quo nihil solet esse validius ad conjunctionem animorum, non satis virium habet; habeat communis utilitas, et sic vinculo nexi hærete invicem tenaciter, atque pacifice, et tradita vobis a patribus vestris non nisi in hostes publicos arma convertite. Horum exilio, egestate, suppliciis illorum cineri pulcherrimas inferias date. Qui hæc si dum aguntur exultabunt, si ante prævidissent æquanimius expirassent. Sed iam vereor ne plus æquo vos in verbis detineam, hoc præsertim tempore, quo factis potius opus est; quæ quoniam neque professioni, neque fortunæ meæ suppetunt, quod unum auxilii genus habeo, verba transmittito. Et primo quidem clarissimis rumoribus excitatus invidi, fateor, honori vestro, fortunamque meam multiplicibus querelis oneravi, quod me præsentis tanti gaudii fecisset exsortem. Sed ne exsortem faceret, venit ad me per terras et maria mea virilis portio lætitiæ. Itaque calamum festinabundus arripui, ut in tanto tam celebri libertatis populi consensu, vox mea de longinquo saltem audiretur, vel sic Romani civis officio fungerer. Cæterum quod soluta oratione nunc attingi, attingam fortasse propediem, alio dicendi



genere, modo mihi, quod spero quidem et cupio, gloriosi principii perseverantiam non negetis. Apollinea fronte redimitus disertum atque altum Heliconam penetrabo: illic Castalium ad fontem, Musis ab exilio revocatis, ad mansuram gloriæ vestræ memoriam sonantius aliquid canam quod longius audietur. Vale, Vir fortissime, Valet, Viri optimi, Vale, gloriosissima Septicollis.

---

### EPISTOLA XLIX.

FRANCISCUS PETRARCA BARBATO SULMONENSI S. P. D.

Commendat ei Lælium, et mittit secundam ex Eglogis suis cuius arcanam aperit significationem.

Pro hoc tam mihi carissimo coniunctissimoque Lælio, quem Lellum Petri Stephani vulgo dicunt, modernæ quidem sed generosæ romanæ originis, ac pervetustæ vereque romanæ indolis viro, apud te, frater, preces meas fundo: perque amicitiae fidem obsecro, ut in iis quæ dominus Tranensis Archiepiscopus super negotiis eius tibi dixerit, talem te exhibeas qualem in meis promovendis commodis atque honoribus exhiberes. Et quod tibi scribo Iupiter noster egregius sibi demum ut accipiat quæso, cui suum Mercurium recommenda, nihil paterni sui ac dominici imperii recusantem. Vale, mi frater.

Hic me Lælius, quamvis segnitie quadam ex fastidio rerum curialium suborta, et occupationum gravi sarcina recusantem compulit, ut bucolici carminis, quod in solitudine mea apud Vallem Clausam mihi nuper in

mentem venit, particulam saltem unam dedicatam æternæ memoriæ sacratissimi domini nostri regis, vel sic defessis digitis exararem, volens, ut verbis eius utar, hoc pretium, parvum quidem, sed sicut ipse existimat, animis vestris gratum, vobis duobus, nec non et magistro N. de Aliphia præmittere, quorum consiliis ac favoribus negotia sua ad votivum exitum perventura confidit. In quo, ne spes eius, si possibile est, ulla ex parte frustrentur, iterum atque iterum precor. Cæterum ut eglogæ huius facilior sensus sit, noveris per argumentum, de quo hic mentio est, pastorem oculatum, circumspectissimum dominum regem, qui et ipse populorum suorum totus oculus pastor fuerat, importari: per Idæum Iovem nostrum, qui in Ida Cretensi altus est: per Pythiam Barbatum meum, propter insignem amicitiae gloriam, quam cum mihi non arrogem, non Damon elegi esse sed Silvius, et propter insitum silvarum amorem, et quia hoc poetandi genus, ut dixi, in solitudine mihi et in silvis occurrerat. Cætera clara sunt. Iterum vale.

Data in inferno viventium, XVIII Januarii.

Egloga sequitur I. *Aureus occasum etc.*

*Bartholomæus Fontius, qui Sæc. XV. Rhetoricam Florentiæ docuit, cuiusque opera edita fuere Francofurti, anno 1621, ex hac Francisci epistola depromptum asserit sequens de Lælio epigramma.*

*(Barth. Font. Collectanea sive memorabilia Mss. Bibl. Riccard. n. 3. 4. 16. fol. 181. — De Sade T. 2. Picc. Iustif. n. V).*

Lælius antiquis celebratum nomen amicis  
Durat adhuc faustum nomen amicitiiis.  
Hic magno dilectus avo : placet ille nepoti,  
Scipiadum genus perpetuusque decor.  
Tertius alter ego est : sed mentior : unus et idem,  
Dimidiumque animi vir tenet ille mei.  
Dimidium dixi, totum dixisse decebat.  
Faveris ergo mihi, si sibi, care, faves.

---

## EPISTOLA L.

FRANCISCUS PETRARCA IOHANNI PARMENSI S. P. D.

Virtutem allegorice describit, eamque sectandam amico suo proponit.

Quæris ex me, seu per te quærit amicus maior, imo quidem, ut intelligi datur, ambo quæritis quid remedii norim adversus Nemæi rabiem Leonis toto nunc impetu Phœbi crines ac faciem accendentis. An invidetis forsitan amico, quem aer haud dubie blandior, et Alpini flatus iugisque nivium prospectus in medio solis fervore refrigerant, quodque non nunc noviter dixerim, cum reliquum corpus æstatem sentiat, præstant ut perpetua saltem in oculis hiems sit? Vos vero cedriferis non nivosis collibus abditi, et ad Austrum penitus versi, tepentis brumæ delicias æstivis ardoribus compensatis. At si ingenia vestra novi, aliud hic nescio quod remedii genus poscitis, quam quo vulgus contra hanc anni partem uti solet. Accipite breviter quidquid id est. Arbor est rara quidem et paucis nota, sed eo clarior nobiliorque quo rarior: arbor quidem procera et recta multum lauro qualibet

aut oliva, multum cupressu et cedro, multum pinu palmaque et abiete virentior : nunquam gelu nimio, nunquam calore peruritur, nunquam frondibus caret. Umbram habet saluberrimam, fructum succumque mirificum. Locis arduis ac repositis habitat. Aditus modo difficilis : cætera iucundissima sunt atque dulcissima. Quam ut nosse possitis, neu similitudine aliqua forte fallamini, signis hanc describam suis. Quatuor tantum hæc olim ramos habuit, dum illam fessi operum pastores avidius frequentarent. Venit incognitus cœlestis agricola, et sarculo cultam pio, serotinique roris suavitate conspersam ramis auxit ac frondibus nimium. Hodie septem habet, quorum inferiores quatuor tellurem, tres altissimi cœlum spectant : ramuli autem plures sunt de quibus nunc loquendi non est locus. Illic assidue felices auræ circumsibilant, canoræ simul et candidæ volucres nidificant, poma prædulcia divites ramos premunt. Mite solum, herbæ variæ et purpurei flores tegunt : in quibus levis accubitus, odor suavissimus, et ad se oculos trahens color. Fons ad umbram nitidus amœnitate lympharum scatebrisque perennibus manat, cuius in circuitu roscidis cespitibus ripisque recentibus cursum frænantibus, undarum late gratissimum murmur strepit. Hæc igitur summa consilii mei set. Arborem hanc quærite omni studio ut facitis : inventam cupidis ulnis arripite, et tenete, et colite, et amate ; amari enim ante alias digna est, sacra comam, ut ait Maro, et cunctis humanorum æstuum vaporibus inaccessa. Hærete certatim trunco illius usque ad vesperam, nemo vos inde divellet. Nusquam melius mansuri estis, ibi enim, mihi credite, nec Cancrum

timebitis, nec Leonem. Vale amice, et clarissimum illum virum percunctationis tuæ responsique mei participem, quem, teste animo, profunde diligo, tuo ore meis verbis iterum atque iterum salvere iube. Mediolani.

---

## EPISTOLA LI.

FRANCISCUS PETRARCA GOMETIO ALBORNOZIO S. P. D.

Commendat ei Donatum Aretinum.

Quamdiu placitum Deo fuit, magnifice et carissime mi domine, mihi conservare reverendissimum patrem et dominum meum dominum Sabinensem, omnes molestias meas ipse portabat, nec necesse erat vos aut alios dominos vel amicos prægravare. Nunc postquam, Deo volente, dictum dominum amisi, seu verius præmisi, cogor ad alios recurrere et sarcinas meas inter dominos partiri. Quoniam ergo de vobis, quamvis nihil merear, multum spero, magna fiducia de vestra nobilitate ac virtute concepta, latorem præsentium Donatum de Aretio amicum meum fidelissimum vestræ magnificentiae recomendo, quem ipsi domino Cardinali recommendaveram : et iam inceperat sibi benefacere, ei si diutius vixisset, magna sibi promiserat se facturum. Et vos, domine, huic eidem ut ipse mihi retulit, mei amore litteras recommendatorias dedistis ad dominum Castelli, pro quo vobis tota mente regratior (*sic*) : et rogo si cum honore vestro et beneplacito fieri potest, quod faciatis ei de aliquo officio provideri secundum decentiam status sui. Spero

enim quod erga personam vestram fidelis invenietur, et in commisso sibi officio circumspectus : et ego, qui vester sum, vobis ex hoc obnoxius obligabor. Si autem ego vice versa possem forte aliquid vobis gratum, Deum testor, semper animo sum paratus. Christus omnipotens vos conservet in statu prospero et tranquillo.

Devotus vester Franciscus Petrarca se, si quid est.

Arquadæ, XIII Novembris.

---

## EPISTOLA LII.

FRANCISCUS PETRARCA STEPHANO COLUMNÆ PRÆPOSITO  
S. ADEMARI S. P. D.

Solitudinem laudat, doletque se eius visendi spe cecidisse.

Quid delectationis et quid gaudii tuis ex litteris capiam non facile dixerim : ita, præter quod per se faciles ac iucundæ, ardentibus etiam ad virtutem stimulis plenæ ad me veniunt, et illum mihi præterea repræsentant, quem quanti faciam honestius apud quemquam alium sim dicturus. Non exequar quam penetrabiliter in cor meum descenderit illa pars epistolæ ubi fortunæ iniuria præreptum nobis otium defles : quamvis, quod ad me attinet, et Dei munere et studio atque arte quadam non omnibus facili, quando aliud non possum, in mediis urbibus ipse mihi solitudinem atque otium conflare didicerim ; contraque rerum atque hominum fastidia aures atque oculos et proinde animum obstruere. Quod nunc maxime facio : alioquin plane perditus et consumptus essem. Veram

tamen interea solitudinem verumque otium suspiro semper et cogito. In quam rem, ut mihi tuæ opis pollicitatio grata sit, plus est quam quod hoc calamo et hoc momento temporis possit absolvi. Atque utinam tibi, ut generosa mens, sic et facilitas actionis data esset: quam negatam esse satis apud me indicii est, quoniam in eo statu res humanæ sint quando boni nihil, omnia mali possunt. Verum ista prætervehar, ne præter indignitatem rerum doloremque meum, me querelarum inutilium et pondus premat et pungat aculeus. Reliquum est quod ego te hac reversurum, ut Lælii nostri scriptis acceperam, aliquandiu animo suspensus atque avidus expectavi: non quod aut tali honore dignus ego, aut domus mea tanti hospitis capax esset: sed memineram non modo Alcidem Evandri inopem atque horrentem regiam, sed vimineam Amiclæ casulam Iulium Cæsarem, quodque omnia superat, Zachæi domum Christum Dominum subiisse. Sed oh! spes mortalium. Dum mihi talia fingerem, tu iam calle alio nimbosæ Alpīs iuga transcenderas, iam (pro quo, magna licet spe deiectus, Deo gratias tecum ago) tuæ domus limen incolumis tenebas. Vale.

Mediolani, III Kal. Augusti.

---

EPISTOLA LIII.<sup>1</sup>

FRANCISCUS PETRARCA PRIORIBUS ARTIUM, VEXILLIFERO IUSTITIÆ  
POPULOQUE FLORENTINO S. P. D.

Ut amicos a latronibus cæsos ulsciscantur enixe rogat.

Sæpe mihi propositum fuit, egregii cives, pro varietate rerum ac temporum aliquid ad vos scribere, et vicissim nunc frænum animis, nunc calcar incutere, nunc indignari perdita, nunc recuperata libertate gratulari, nonnunquam flere vobiscum multiplices et varias reipublicæ tempestates, et impendentis naufragii fideliter admonere, ut ita me vobis, quoniam aliter non dabatur, verbis saltem animi testibus, etsi non habitatorem, certe amatorem patriæ comprobarem. Sed dum cogitare mecum cœpi, quantum ab altitudine curarum vestrarum distaret meorum humilitas studiorum, subito semper mihi e manibus calamus lapsus est. Nunc autem cogor ut scribam, nec reluctari valeo. Urget enim animum dolor ingens, et extorquet mihi verba cum lacrimis. Ecce etenim, quod ignorabam hactenus atque utinam perpetuo ignorassem, suavissimus et merito carissimus civis vester et amicus meus intimus Mainardus Accursii forte dum e romana curia Florentiam redit, molestias atque pericula tam longi itineris transgressus, et iam dilectæ patriæ vicinus, in

<sup>1</sup> Ut in volumine II inter ADDENDA ET CORRIGENDA adnotavimus, epistola hæc in codicibus A. B. C. *octava est libri octavi* DE REBUS FAMILIARIBUS, cuius loco nos veterum editorum vestigia haud satis prudenter sequuti, illam dedimus ad Lombardum de Serico, quæ inter Seniles (II. X.) erat amandanda. Da, quæso, veniam, lector, et litteras hasce ad Florentinos in locum quem Francisco ipso ordinante fuerant sortitæ, restituendas memineris.



ipso pene portarum limine, et in vestro, ut ita dicam, gremio, crudeliter interfectus est. Heu! vir infelix quantos ætate viridi pertuleras labores? Quotiens ignota terrarum circumiveras ut tranquillam in patria tua tandem et honoratam ageres senectutem? Quo pergis ah! miser fatigue tui nescie, et ubique tutior quam in patria future? Quo pergis? Quo ruis? Quo miserande festinas? Tibi canitur poeticum illud:

Fallit te incautum pietas tua.

Quæ cum sit magna in parentibus et in propinquis, ut ait Cicero, tamen in patria maxima est. Illa te procul dubio trahehat soli natalis amantissimum: illuc iam senior redibas unde puer excesseras, et illi terræ, quæ te infantem paverat, fatigatæ vitæ reliquias referebas, cupiens ubi ortus eras, mori, et ubi reptaveras sepeliri. Sed oh! scelus, oh! inhumana feritas. Truculentissimi homines, immo vero cruentæ et immanes belluæ, te improvidum et inermem calle medio expectabant: horrendum et ignotum orbi italico prædonum genus, qui non saturati auro quiescerent, quæ summa votorum raptoribus esse solet, nisi sitienter tuum sanguinem haurirent, et exoptatum ingressum patriæ tibi præriperent ac sepulchrum. Oh! sitim sanguinis inauditam. Quid amplius quæritis, sævissimi canes? Quid quæritis in corpore spoliato? Odium quidem ignoti et innocentis hominis nec ullum erat certe, nec fingi poterat. Si auri fames vera sceleris causa est, redite iam nefarii voti compotes ad prædam, et graves speluncas criminum officinas, et qui illic avide vos expectant hospites vestros invisite. Sinite nudum peditem

abire ; satis est, nihil ulterius poscitur ne in latronum manus inciderit, sed hominum. Nil inde vobis metuendum est : tam munitis habitatis arcibus ut impune et cœlum et Florentiam contemnatis. Homunculum solum fessum et attonitum timetis habentes receptacula tam vicina tam valida? Nolite igitur avaritiæ sævitiam cumulare. Quidquid populabile manu erat, quodque in vestros usus verti poterat abstulistis: animam sibi et amicis et vobis nulli usui futuram linquite. Quid torvum intuemini? Quid cogitatis? Quid molimini? Quæ ista rabies est? Quid micantes volunt gladii? Quid petunt? Oh! voluptas effera : nullo odio, nulla spe proposita et nullo metu, sacrosanctum et Deo simillimum animal hominem trucidare, ferre rabidas manus in viscera, et quod ne generosæ quidem feræ facerent, lacerato cadaveri incumbere et spumanti sanguine delectari. Pudet ac miseret, o clarissimi cives, nec de parvo dolore scaturiunt tot lamenta, neque magis talis amici talem casum lugeo, quam tantum tam gloriosæ Reipublicæ pudorem. Quid enim dicetur apud gentes? Quid posteritas loquetur? Innoxium hominem, qui inter feras, ut Lucanus ait, Rhodani gentes, qui per deserta provinciæ, qua nulla usque hodie dissolutior, nulla desolatio terra est, ac per Alpes medias non nivibus tantum aut vagis excursoribus, sed armatis hoc tempore exercitibus cæsas non modo per diem, sed sub tempesta etiam nocte incesserit, in finibus Florentinis, luce media procubuisse, velut ovem impiæ victimæ destinatam? Et oh! æternum ætatis nostræ deducus: inventos esse qui audeant e conspectu quodammodo urbis vestræ, et illius olim formidati pa-

latii, in quo celeberrima iustitiæ sedes erat, laniare pro libito cives vestros. Oh! tempora, oh! mores! libet enim exclamare cum Tullio. Ego quidem puer audiebam maiores natu narrare solitos populi illius virtutes omnimodas eximiamque iustitiam, non in contradictionibus modo placitisque conventis, sed in his duobus maxime quibus solum sapientissimus legislator ait Rempublicam contineri, præmio scilicet et pœna; quorum profecto si desit alterum, necesse est velut altero pede claudicantem efficiat civitatem; sin utrumque, enervatam prorsus et languidam, frigescente hinc bonorum virtute illinc malorum inardescente nequitia. In utramque partem magnifice providerant patres nostri, quibus artibus Romanæ originis quam fama vulgaverat certissimam fidem dabant. Itaque ut olim genitor ille vester Populus Romanus toto polluit (*sic*) orbe terrarum, sic illos acceperam, quantum cœlitus datum erat, eisdem vestigiis gradientes et singularem in primis quamdam laudem apud omne genus hominum meruisse, et inter Tuscorum populos longis temporibus tenuisse voluntarium quodammodo principatum, titulo quidem Imperii abstinentes, et quo superbiæ invidiæque minus, eo laudis et gloriæ plus erat in nomine; non ergo dominium dicebant sed auxilium ac profugium vicinorum, ut non immerito censeretur floridum illud nomen sortitam Florentiam, in qua flos virtutum omnium et gloriosorum actuum abundaret. Erat omnium finitimarum gentium ad tam bene moratum populum amore et reverentia mixtus timor, neque solum in propriis sed in extremis quoque Tusciæ finibus timebatur civitas magistra iustitiæ. Quid enim aliud causæ fuit

quod inter lapidosos et asperos colles, in solo arido, nec maritimo portu, nec navali flumine adiuto tam brevi temporis spatio, fere enim omnium Italiæ civitatum recentissima civitas vestra est, in eam succreverit magnitudinem ut vicinas omnes amplissimas quidem urbes prope incredibiliter supergressa, non solum fama nominis aut pretiosis mercibus, quod ipsum miraculi instar erat, sed et ipsa etiam felix prole virum, et in hoc quoque matri similis, et tantæ sobolis iam non capax, disseminatis toto orbe civibûs, omne mundi latus impleverat? Quænam, quæso, tot præsertim adversantibus huius tantæ et tam repentinæ magnitudinis causa fuit? Dixerit aliquis, fortasse aerem causam esse, et quod virtuti est proprium tribuet fortunæ. Alter impigerrimæ gentis industriam versatilesque animos et applicabile ad omnes artes ingenium inter causas numerabit; non inepte quidem, dum meminerit tamdiu primam et maximam huius rei causam sileri donec iustitiæ studium sileatur. Illa, inquam, incrementi vestri vera et præcipua causa est, sine qua ne dum civitas, sed nec domus exigua, non dicam crescere, sed nec stare quidem poterit. Fundamentum civitatum omnium iustitia est, super quod, si verum quæritur, vestri maiores ædificatam vobis florentissimam atque firmissimam Rempublicam reliquerunt. Id si modo per ignaviam labi permittitis, quid sperari licet aliud quam ruina? Surrexerunt ecce sicarii infames, et quod unum ad excitandum omnes irarum aculeos satis erat, civem vestrum optimum virum, cui, ut creditur, ab eo die quo sinistrum pedem domo extulit insidias tetenderunt, nusquam nisi in sinu vestro mactare ausi sunt, quod-

que avorum temporibus cogitare etiam in cubilibus timuissent, id sub oculis vestris et in via publica crudeli atque intolleranda prorsus andacia peregerunt. Quod scelus si inultum linquitis, actum est de statu publico, actum de iustitia, actum denique de salute, de libertate, de gloria. Corruit fundamentum illud super quo usque ad sidera creveratis. Et Deus bone! quorum manibus eversum? Magna pars doloris est vilis auctor iniuriæ. Furciferi, carnifices, silvicolæ ferino victu assueti, sed ferino magis pectore et ferinis moribus vix carcere, vix catenis, aut funibus vestris digni passim in iugulos vestros ruunt, et ad satietatem suam pascentur cædibus et sanguine miserorum: profecto nunquam hoc ausuri, nisi vel in vestra segnitie, vel in suis latibulis spem haberent, quæ spes, si vos ut soletis viri estis, ab omni eos parte deluserit. Exercuit vos, fateor, et impulit his temporibus fortuna, sed non stravivit neque debilitavit usque adeo, ut paucos in circuito sævientes latrunculos perferatis. Solet vera virtus et clarior ex adversitate consurgere: et si bene mores vestros novi, nec me longa de vobis fallit opinio, vos a Populo Romano unum hoc inter multa præcipuum et velut hereditarium possidetis, ne scilicet Fortunæ vos deiiciat aut frangat iniuria, sed attollat, et quod maxime virorum est, inter difficultates crescant animi. Hinc mihi spes non parva suboritur. Audio enim vos accensos atrocitate flagitii et generosa indignatione flammantes ad solita arma iustitiæ converti: quod si verum est, nullus unquam locus, ut spero, nulla ars, nullus sceleratorum favor hominum ab infandis cervicibus meritum iracundiæ vestræ ful-

men avertet. Verum ego prædulcis amici lacrimabili iactura, supra quam dici posset amarissime cruciatus, multa vobiscum viri illustres, familiariter locutus sum. Heu! frustra, heu! sero; sentio enim damnum meum non posse restitui. Non si mille linguis adamantinis in sempiternum loquar, aut Orpheo dulcius flebilibus ad lyram querimoniis saxa permulceam, unquam mihi redibit amicus meus. Irremeabile iter ingressus est. Neque nunc id agitur ut ille resurgat, sed ne cum illo corruat decus vestrum, quorum alterum impossibile, alterum vero perfacile et in vestra positum manu est. Illud quidem admonere non est necesse, quod scelerum iudices non præterita sed futura respiciunt. Quid enim prodest ad ea quæ retractari nequeunt studium adhibere? Similibus tamen malis occurritur, et exemplo terribili humana temeritas coercetur. Hinc illa nimirum doctissimorum hominum laudata sententia est: *non quia peccatum est, sed ne peccetur inventa supplicia:* quæ quamquam sint pro huius sceleris immanitate dignissima, quamquam tacitus expectare non prohibear, expetere tamen renuo. Universa igitur hæc sic intelligar dixisse, ut apud benevolas aures doloris mei sensum loquendo deponerem, ac gravi molestia tumidum cor levarem, potius quam ut animos vestros ad vindictam sanguinis inflammarem. Id enim nec professioni, nec statui meo convenit: itaque testor quod ad illam, quidquid dicturus sim aut dixerim, non aspiro: idque quod honestius possum flagito, quatenus antiquæ gloriæ vestræ iustitiæque memores qua singulariter florulistis, eam vestris perire temporibus non sinatis, idque obnoxius precor ut viæ publicæ, per

quas et ad vestra et ad ipsa parentis moenia, semper quidem, sed nunc præcipue, instante ut nostis Iubilæo, fidelium ex omni regione concursus erit, purgatæ latronibus pateant peregrinis, ne iusto metu territi vel pium opus omittere, vel rectum iter flectere compellantur; quod nisi acriter provideritis (sed spero utique provisuros), æternæ vobis infamiæ maculam irrogabit. In primis autem expeditum esse decet Apennini transitum, unde numerosior populus expectatur, ad quod utinam tempestivius in animum venisset vestram magnificentiam exhortari, fuisset provisum fortasse maturius, nec aliis cavendi circumspiciendique materiam infelicis amici mei miserabile spectaculum præbuisset. At quid suspecti erat? Id ætas nostra non viderat, sed sic a senioribus acceperat esse quidem Apennini iugum nativa asperitate difficile, cæterum nil viatori tutius, vel hospitalius. Quid autem erit, si de custodibus fures, de canibus lupi fiant? Ubi ad suum silvosi montis horrorem nequissimorum hominum terror accesserit? Brevi nempe totus ille terrarum tractus ab hominibus deseretur, inhospitalior Atlante vel Caucaso. Huic ignominiae et huic pesti, viri fortes, occurrite. Videbitis saxa nondum sicco civis vestri cruore rorantia, inde discetis cæterorum saluti quonam remedio providendum sit. Qui amputare vult arborem, a radicibus incipiat, qui siccare vult rivulos, fontem siccet. Qui extinguere vult latrones, insistat receptatoribus extirpandis. Ite celeriter, ite feliciter quo cœpistis, et bene iuvantibus superis, fœda scelerum claustra confringite, simul ac notam ab oculis nostris abstergite, relinquentes posteris iustitiæ famam, quam a patribus ac-

cepistis. Illud nominatim precibus istis addiderim, ut dominum Lucam cognomento Christianum, virum sanguine ac virtutibus clarum, qui eidem Mainardo infaustæ viæ comes fuerat, et de quo dubie fama loquitur, pro honore vestro iubeatis inquiri, an impiorum manibus evaserit, quod quidam narrant, an parili feritate consumptus sit, quod potius timeo, et timere non desinam donec aliud scivero. Parcite autem multiloquio. Tulit me longius forte quam decuit hinc humanitatis vestræ fiducia, illinc doloris mei impetus et amicorum pietas, de quibus ante modo (*sic*) scripsi, ut eos per dies singulos præstolabar. Ita enim concorditer de Avinione discesserant ut me visuri, nulla alia causa suadente, per hoc iter longius venirent, et cum Parmæ non invenissent, in domo mea per noctem et diem non integrum morati, discesserunt mœsti, litteris ibi dimissis, quarum summa erat se huc ad me e vestigio reversuros. Cumque ego rediens et multis diebus expectans longiorem promisso moram inciperem admirari, famulum unum cum litteris misi qui eos tarditatis argueret, per quem didici hoc eos caritatis et amicitiae pretium percepisse. Quamobrem si loquacior fecit dolor, ignoscite. Licet enim rerum nescius et absens tunc fuerim, quia tamen mei solus amor videndique desiderium eos huc traxerat, solus ego, ut mihi videor, totius infortunii causa fui. Omnipotens Deus vos tantis mundi malis incolumes conservet in statu felicissimo. Parmæ, II. Iunii, concusso animo graviterque prostrato : festinanter.

---



## EPISTOLA LIV.

FRANCISCUS PETRARCA BARTHOLOMÆO DE PACE S. P. D.

Addit animos ad scribendum, et præcepta tradit. Mortem plurium amicorum suorum lamentatur.

Sensi olim nobilem tuum pectoris impetum cum verecundia nobiliori luctari, teque mihi scribendi avidum sic hære, quasi penitus me non nosses, utque Cæsaris verbo utar, quasi stipem porrigeres elephanto. In eo certamine feci quod soleo, partem imbecilliores iuvi hortatus ut scriberes. Paruisti tandem, sero licet. Itaque tametsi, quod nolim, tuum nomen inter meas familiares epistolas nusquam hactenus lectum sit, si tamen vita longior fuerit, inter seniles, sic nempe quæ restant voco, forte sæpius legetur. Vicit ecce amor verecundiam, et illa iam studiosis animis indigna glacies fracta est. Non frustra manus ad calamum venerit; scribes spero, eoque, ni fallor, avidius quo serius incepisti, properans longæva silentia crebris instaurare colloquiis. Quod ut facias, neve aliquis torpor sub obtentu modestiæ iterum congelascat, brevem de te sententiam eius a quo minime falli times accipe, nec suspecta videbitur. Multa quidem requiruntur ad scribendum bene. Ingenium, disciplina ac notitia multarum atque memorabilium rerum: impetus quodammodo sive ardor animi, qui maxime poetantibus necessarius iudicatur. Ad hæc et valetudo corporis prospera, et fortunæ modus ac mediocritas quidem, nec divitiæ, nec paupertas, vitæ tranquillitas, bona mens cogitationum plena nobilium, solitudo, otium ac libertas, et quæ sunt his similia;

quorum alia in nobis, alia extra nos sunt. Horum sane ita censeo, nisi ardor desit, nil tuo otio deesse, quo ne dicam mihi, sed Ciceroni etiam scribere possis intrepide. Noli ergo diffidentiae succumbere, quæ multis sæpe damnosior fuit. Diffidentia enim aut nihil aggreditur, aut tam pavide ut processu frigeat ac desistat. At res arduas æquo ferventius aggressa temeritas sæpe difficultatibus temperatur, et cum illa nihil, hæc interdum impetuosii principii maturos dedit exitus. Denique sic sentio nihil peius diffidentia his qui grande aliquid moliuntur, in quibus plerumque verum fit Virgilianum illud *possunt quia posse videntur*. Hinc iam ad epistolam revertor tuam in qua nil responsi egens, præter unum video. Scripsi equidem me curis pluribus circumventum et miseriozem quam esse me noscerem. Scripsi fateor; tu miraris quonam modo id possibile sit, in hoc tanto tamque incomparabili decore urbis amplissimæ, inque hac tam honorifica ducis ac procerum familiaritate, qui me, ut verissime opinaris, non quasi hominem omnis egenum atque inopem virtutis, sed ut cœlo missum angelum Dei vident. Hanc animi ægritudinem atque hanc, quæcumque est, curarum sarcinam ut tecum partiar precaris. Novi, amice, tuos humeros, tuæque fidei nervos novi; omnia fert caritas, nec tamen participat sed libenter ac cupide quidquid est oneris in se transfert. Mihi vero, pone hanc solitudinem, nihil novi accidit, nisi illud quod iam non ut novum aúdis. Cunctis enim ferme veteribus, ac diu probatis amicitiiis hoc tempore, quod utinam non vidissem, me mors invida spoliavit. In qua quum..... non levabar, unum remedium genus ipse mihi conflavi atque usu efficax reperi:

flere largiter et queri. Cæterum etsi nihil externæ calamitatis accessit, parum ne miser ille est, qui se suis malis miseriorem non agnoscit? Vale.

Venetiis, XI. Kalendas Aprilis.

---

### EPISTOLA LV.

FRANCISCUS PETRARCA PHILIPPO EPISC. CAVALLICENSI S. P. D.

Rogat ut a Pontifice Max. opem sibi ferri salva tamen libertate sua curet.

Si quidquid mea mens cogitando concipit scribendo parturiat, ingens digitis meis oculisque tuis opus exoritur. Quod etsi valde aggredi cupiam, pater amabilis, tempus vetat: ita distrahor incertis affectibus, et dum necessitati pareo, desiderio obluctor. Sed bene habet; quidquid scripturus fueram, tacito me, luculenter intelliges. Nosti animum, ubi cogitationum actuumque nostrorum radix fixa est, unde fit ut quæ ex illo prodeunt ignorare non possis. Familiariter olim tibi, nisi fallor, studiorum finis et votorum meorum intellecta modestia est: utor enim fidenter hoc nomine, non superbe, conscius suæ humilioris originis; quod unde modicum inde et modestia dicitur, et a modo nomen utrumque descendit. Quæ cum ita sint cogita, pater indulgentissime, quid velim. Nullis hariolis, nullo opus interprete, ne ipso quidem vel meæ vel alienæ vocis oraculo: intus ad aurem cordis tui clamat animus meus: et noster nihilominus Socrates non tacebit. Quam improbem concupiscentiam etsi probe noveris, certius tamen nunc ex amici colloquio pensabis. Tu autem,

pater, apud communem dominum in quo spei ancora, et quod proprie titulo suo convenit, rerum nostrarum cardo consistit, preces meas si favorem merentur adiuva, sin minus excusa. Ut enim magister amorum ait:

Quid deceat non videt ullus amans.

Amo ego vos, ita me ille amet in cuius amore summa felicitas est sita: amo, inquam, et veneror, vestramque præsentiā eximiis præcordiis concupisco. Itaque dum voto meo obsequor, vestra forsā fastidia non adverto. Si quid importunius agitur, hoc me, precor, absolvat: intensi enim affectus regi nesciunt, frænum mordent. Epistolam illi inscriptam quamvis longiusculam, plura tamen volentis dicere animi nunciam, efficacissima vocis tuæ auctoritate confirma, interpretare, iustifica. Paucis enim versiculis summam tibi meæ mentis aperio. Præsta te mihi ne frustra præoptaverim quod hominum magna pars metuit, silentium, solitudinem, paupertatem. Mirum: solus ego ex omnibus mortalibus dives fiam, cum pauperum, qui frustra divites fieri volunt, passim tot millia videamus? Occurrite omnes qui me diligitis huic monstro: non cogar unus, unde tam multi se exclusos dolent, et unde tam cupide omnes fugiunt non excludar. Divitias alii, ego paupertatem appeto, sed non omnem profecto, non sordidam, non tristem, neque sollicitam, sed tranquillam, sed pacificam, sed honestam. Hanc mihi nisi ab illo dari posse despero, et, si verum loqui iubes, indignor atque ab alio dari nolim. Apud eundem igitur intercede, pulsa, urge, insta, opportune quidem, vel si res exigit, importune. Facilem pro me aditum invenient

preces tuæ. Non solet tuas ille despicere: proinde ne videar precando diffidere, age non ut mereor, sed ut spero.

Mediolani, Idibus Martiis.

---

EPISTOLA LVI.

FRANCISCUS PETRARCA FRANCISCO PRIORI SS. APOSTOLOR.

S. P. D.

De Legati nomine. Se gravi periculo Deo adiuvante incolumen evasisse, eumque Cardinali Legato enixe commendasse.

Solebant Romani Consules legatos consulares ad exercitum ducere, quibus in bello cooperatoribus et consultoribus uterentur. Horum crebra romanis in annalibus est mentio. Legatorum clarissimus Africanus est meus ille superior, qui Lucio Scipioni Asiatico fratri suo legatus in Græciam atque Asiam profectus, ut fraternæ pietatis præclarissimum exemplum, sic ingens magnæ victoriæ causa fuit. Regum quoque gentiumque nuncios solemnes Legatos dici solitos scimus; horum plena est omnis historia quum reges aut populi, sive hostes, sive fœderati, sive bello domiti legatos vel auxilii poscendi, vel res ablatas reposcendi, vel misericordiæ implorandæ gratia Romam miserint Romaque transmissos acceperint, sive harum aliqua, sive aliis causis. Clarissimæ quidem hoc in genere habentur et Fabii Maximi legatio ad bellum Carthaginensibus indicendum, et Sulpitii ac Vili ad bellum scythiacum compscendum, et Titî Flaminii in Bithyniam ad Hannibalem deposcendum. Externorum vero legatio insignis

fuit Asdrubalis senis cognomento Hædii, qui missus a Carthagine ad misericordiam excitandam poscendamque a Romanis pacem, animos solo flexit aspectu; nec minus illustris Africani iunioris quolibet in genere numeranda Legatio, qui, ut ait Cicero, obiit Legatus Ægyptum, Syriam, Asiam, Græciam, atque absens ad bellum maximum conficiendum conscidendamque Numantiam consul iterum est directus. Philosophorum quoque legatio præclara ad impetrandum mulctæ remissionem ab Atheniensibus Romam missa, in qua et Academicus Carneades, et Stoicus Diogenes fuerunt, et Peripateticus Critolaus, quorum quænam in publicis ac celeberrimis Romæ locis ingenii atque eloquentiæ ostentatio, quænam Catonis censorii et quam severa sententia, de illis dico dimittendis, et tibi notum est, et locus iste non exigit. Quorsum enim hæc? Nempe non nisi ut advertas hoc Legati nomen apud maiores tritum atque vulgatum, nec omnibus ereptum (longa quid non mutat dies?), Romanam Ecclesiam sibi proprium vindicasse, ne dicam usurpasse. Itaque iam Legatos exercituum suis quoque nominibus vocat: at quibus mandata regum aut urbium committuntur Nuncios dicunt, sive aliter, aut vulgo alius atque alius sermo est. Soli igitur sunt Legati, quos, ut aiunt, Romanus Pontifex ad aliquas provincias destinavit, e quibus quidam Legati tantum, quidam vero de latere Legati nuncupantur, quos videlicet missos e Collegio, quod sacrum vocant, Romulei Cardinis fulgor illustrat. Ita mihi fando videor audiisse, neque enim res est cui ediscendæ multum temporis impendisse velim. Sit autem ita: quid enim ad nos? Et ferendum est æquo animo ut qui rerum potiuntur sum-

ma, nomina rebus vel auferant vel imponant: quando etiam senes nostros modestissimos hominum, tamen propter potentiam atque opes, quibus, teste Livio, ante ipsum romanum imperium floruerunt, geminis æquoribus quibus Italiæ magna pars cingitur, nomina quæ adhuc durant, tot circum litoreis gentibus nihil obluclantibus, imposuisse meminimus. His ante propositum decursis, ad rem venio. Legatus iste de latere, qui iam solus mundo patiente nomen hoc habet, XVIII. Kalendas Octobris Mediolanum obvio domino et magna celebritate populi faventis ingressus est; cui ego nescio qua recti confusione iudicii, ut me urbanum ostenderem, quod non sum, nec esse velim, neque si velim natura permittet mea, prægressus alios, Ticinensi porta ad secundum forte lapidem occurrens, didici, si non antea didicissem, quam sit rerum naturalium fragilis ac lubricus status. Cum enim ingentes pulveris globi, rotarum atque quadrupedum agitatione commoti fusca nube cælum solemque texissent, conspectu mutuo erepto, contra morem meum, ita me malus abstulit error, inferor in mediam cohortem. At vix data et reddita salute, sic pulvis omnium fauces et ora compleverat, aridumque præcluserat vocis iter, ut dum me recolligerem quo et aliis parcerem et mihi, equus quo vehebar et ipse oculis captus, postremisque pedibus in præaltam iuxta viam foveam dilapsus, omnes qui aderant metu et horrore complevit, præter me unum, qui quid mecum ageretur nesciebam: tanta caligo pulvereæ noctis incesserat, eo mihi molestior quod a luce venientes oculi sunt in tenebris pigriores. At vero ille magnanimus adolescens, quem nisi cœptam successio-

num telam fata præciderint, Mediolani Liguriæque dives expectat hæreditas, et quo, nisi iudicium amor fallit, inter iuvenes fortunatos nullus est melior, nullus humanior, ante alios me nomine inclamans ut caverem admonebat. Ego ignarus, et plus fateor clamore omnium quam periculo meo motus, non prius intellexi quid rei esset, quam solas equi auriculas extantes, meque densis vepribus oppressum vidi. Profuit ad salutem proprium non nosse discrimen. Quosdam iuvit ignorantia, et dum nil metuunt nil nocuit: sic contra multos ægros morbi fecit opinio, ut aliquando essent quod diu esse crediderant: neque enim de nihilo dictum est, imaginatio facit casum. Cui pari ratione illud obiecerim, imaginatio casum tollit. Ita cum multa scire sit optimum, quædam melius nesciuntur. Certe cum discrimen ipse meum nescio, dumque nil mali suspicor, nil incommodi passus sum: neque enim periculum nisi post periculum agnovi, magisque, cum iam timendum nihil esset, timui, et nunc, ut ait Maro, horresco referens. Tunc ut eram in pedes subito desilui, supremumque ripæ marginem illæsus, plusquam meo saltu, tenui invisibili subnixus auxilio. Substiterat equidem adolescens ille mitissimus, iussisque famulis descendere, ipse non modo vocis obsequium mihi præbuerat, sed dexteræ: dum interim equus meus magno nisu sibi consulens primisque (dictu mirum) ungulis dependens, attritus genua vix tandem emergebat, qui si ut natura rei poscebat, repente postquam labi cœperat in tergum cecidisset, actum erat, et absolutus eram omnibus curis. Adfuit hominum succursus, adfuit equi vigor, dicet aliquis. Ingratum mendacium, mendax in-



gratitudo: vana manus hominis, fallax equus ad salutem ipse suam; ut alias, supposuit manum præsenti-que me solus exitio Christus eripuit. Quod idcirco tibi notum volui, ut sicut apud Flaccum caducæ arboris ruina, sic apud me instabilis equi lapsus propriæ nos conditionis admoneat, inanem esse providentiam humanam, ineluctabilem fati vim, innumerabiles mortalium casus, inæstimabilem cœcitatem. Itaque dum huic occurrimus in illud currimus, et dum maxime circumspicimus ac multa providemus, tum maxime unde nil metuebamus opprimimur, fitque quod ait ille verissimum :

. . . . . improvisa leti  
Vis rapuit rapietque gentes.

Nequidquam æstuamus atque angimur, sola potens est occurrere cunctis divina clementia. Ea tunc Flacco adfuit, nunc mihi, sæpe aliis: alioquin nec ille suum, nec ego meum, nec multi bellorum casus in pace, pelagique pericula in litore renarrarent. Hic semper scrupulus premit, quod dum difficultatem unam evanuisse credimus, superest altera. Tota nostri nostrarumque rerum custodia committenda Deo est, et de propriis viribus aut consiliis nil sperandum. Sed iam de moribus satis est dictum: ad familiaria convertamur. Legatus ergo hic, de quo ambigue tibi scripseram, spem meam liberalitate vicit sua, ut prope me diffidisse pœniteat, quamvis semper minus sperare sit tutius. Nil omnium quæ petieram negavit: ultro etiam ut pro me ipso grande aliquid peterem, hortatus est. Ego autem pro me nihil. Fallor: immo vero pro me omnia: quid enim verius meum quam quod amicorum est? Cæterum ego iampridem

mihi modum statui, et fines posui, quos ne transeat sicuticulosa cupiditas, vallum ac foveam circumduxi, coeque animum stare. Neve illum testimonio suo privem, neque renuentem iusta imperia, neque recusantem frænos, neque suadentem ferocia, si obstrepere pestilens consuetudo desierit, rebellantem patior: sic sementem qui dedit adiuvet, ut mihi frugalitas grata est, ut læta et otiosa paupertas amicioi quam tristes occupatæque divitiæ. Si quid secus ac loquor facio, prærapido rerum humanarum torrente raptatus, indignans tamen facio et in diversum nitens. Mitto autem hæc: sic enim glorior, sic quæror, sic omnia tecum loquor ut mecum. Idem animus, eadem patria est, idem studium, idem nomen, par voluntas affectusque persimiles. Tu pietate prior, tu religione præstantior, et familiarior Deo: sed et hæc sileo. Verum ut intelligas quod mallem clariori aliquo scire posses indicio, quanto pluris ego faciam preces tuas quam tu ipse qui eas tam verecunde porrexerās, ut inter poscendum omnem mihi negandi viam ostendere videreris, scito quod etsi pro his amor, pro his sanguis, pro his miseratio, pro quibusdam familiaritas meritumque certarent, prima tamen omnium petitio tua fuit, quam tuis scriptam ut misisti Legatique signatam digitis accipies huic epistolæ interclusam. Litteras hinc fieri, non illud modo quod pro quibus executionibus (*sic*) uti velles eram nescius, sed extremæ temporis angustiae vetuerunt. Petitione enim mihi sero tradita, ille mane discessit. Ita tamen res acta est ut amantissimus pater Egitaviensis Episcopus cancellarius suus, litteras ipsas expediri iubebit, ubi tu eum vel pro parte mea, vel nostra alter adierit. Ibis ergo vel mittes aliquem ex

tuis Pisas aut Senas qua ille iter acturus est, Episcopumque convenies, et viva voce de negotio instructum et litteris ad eum meis, quæ cum istis veniunt, excitandum. Pro aliis vero unum ex meis sequi illum iubebo: nullas enim his litteras scribi temporis sivit inopia. Doleo quod tibi laboris aliquid aut negotii reliqui: sed necessarium fuit.

Nil sine magno  
Labore vita dedit mortalibus.

I ergo, et laborem tibi certum imaginaria condias voluptate. Iucundum si tibi finxeris, efficies. Æstima te ocio non negotio trahi. Semper sedes, nunquam patrium limen transis: in hoc nempe differimus, ad cætera pene gemelli. Et hic quoque meum morem indue, tuum exue. Habet et motus suam dulcedinem, et sæpe quiete gratior fuit labor; ut nihil aliud, quietem ipsam efficit gratiorem. Incipe, surge, age, move te loco; reversus saltem melius sedebis. Qui semper alienas facis, aliquando res tua facito. Fallere te, et si possim, nolo, et si velim, nequeo. Artificium meum vide. Facio quod consolatores solent: fando quod oportet ut delectet nitor. Cuperem Legatum ipsum Florentiam invisere, quod et optare illum arbitror: sed puto non poterit, magnis et gravibus Ecclesiæ negotiis recto Romam calle festinans. Ipse vero quantum obliquo atque udo calle festinaverim, frustra tamen ut huc ante crepusculum pervenirem, claudicantes lineæ et fesso simillima viatori, vel sola frons indicat litterarum. Vale.

---

## EPISTOLA LVII.

FRANCISCUS PETRARCA IOHANNI BARILIO S. P. D.

Mittit ad eum epistolam poeticam.

Solitis et inexplicabilibus curarum mihi laqueis circumsepto nullum affluxisse poterat gratius solamen, quam quod secum attulit magnificentiae vestrae dulcis et eximiae dilectionis testis epistola, cui confestim priusquam aut ipsa manibus elaberetur, aut quem ipsius lepos excitaverat impetus animi deferberet, centum forte versiculos reddidi, lima quidem in tempus aliud dilata; quum ecce die proximo nuncius vester, de quo nil audiveram aut cogitaveram, repente adfuit responsum flagitans. Substiti quid agerem incertus. Ad postremum omnem iudicii vestri censuram subeundam potius existimavi, quam committendum ut frustra mihi tantus vir scripsisse videretur, praecipue quia hunc ipsum incultioris carminis horrorem amoris indicem fore, Virgilio admonente, didiceram. Mitto igitur quales erant: mittam vel feram ipse libentius maiora cum potero. Vester sum: obsecro me recommendari ad pedes humiliter domini mei regis, ad quos reverti quanto desiderio mens aestuet testis est Christus: sed catena multiplicis obligationis, qua domino Azoni sum constrictus, me hucusque detinuit. Ex parte dicti domini Azonis vos saluto, nec non et Sennuccium meum, cui multum invideo, quia est, ut ipse idem testatur, multa cum dilectione vobiscum, quibus ego me tertium fieri pro grandi munere cuperem, nisi et fortuna mea certe et indignitas

prohiberet. Valere feliciter vos opto, et mei memores. Recommendo vobis Barbatum amicum meum. Datum propere ult. Ianuarii.

*Sequitur Carmen quod est Lib. II, Ep. I. Quid mea fata mihi toto speciosius ævo.*

---

### EPISTOLA LVIII.

FRANCISCUS PETRARCA GASPARO VERONESI S. P. D.

Dolorem lacrimis leniri: Amicorum mortem deflet.

Sunt quidam sic affecti sic obruti mœrore, ut sicut in corporibus, nisi purgatus humor noxius fuerit, extrinsecus admota remedia frustra sint, sic animis quoque illorum, ni concretus dolor in querelas aut lacrimas effundatur, nequaquam illis verborum consolationibus medeare. Id olim meditans, Stephanum de Columna seniore virum omnium quos noverim contra hostiles motus nostra ætate fortissimum atque invictum, sed amantem adeo suorum ut pene totus ex illorum anima penderet, post illam miserabilem ac festinam familiæ suæ stragem sic per epistolam sum alloquutus, non ut lacrimas comprimerem, quod si facerem extincturus illum fuero, sed elicerem ac funditus exhaurirem, atque ita dolore nimio plenam animam expurgarem: et successit. Epistolam enim illam, ut mihi qui eam tulit retulit, tot cum lacrimis legit tantisque suspiriis, ut timeret ille ne periculo sibi esset; insultantibus amicis quia nescio quod nocivum ac funereum attulissem: ea vero perlecta, tersit oculos, iuravitque nil se amplius fletu-

rum, non si simul orbis totus succumberet: flesse enim ad satietatem et quidquid esset in animo gemituum perfluxisse. Hoc remedii genere ipse mecum, cogente impia Fortuna, sæpe postea usus sum. Cuius rei epistola superiore brevis est mentio. Et heu! fata hominum, sive quo alio opportuniore vocabulo lubricus status vitæ mortalis exprimitur! Idem ille, cui hoc scripsi, vir verecundissimus atque optimus vereque pacificus, quod cognomen spondet, cui ego non ut suis Maro sempiternam famam quam non habeo, sed nomen in epistolis meis, posthac crebrum promisi, repente post moriens hac me quam libentius implessem promissione liberavit, effecitque ut de illo multa quidem loqui possem, illi vero iam scribere nil amplius; utque eo remedio, quo sibi me in aliis usum dixi, mox in eodem ipso uterer, cuius morte et nos amico optimo, et Patavina urbs cive egregio spoliata est. Quo nescio an et moribus clarior et fide conspectior sui ordinis alter patriæ supersit. Grave hoc: gravius multo quod sequitur; amicum paulo ante perdideram, qualem nostro sæculo, nisi me fallit æstimatio, nemo habuit, in quo tu quoque non modicum perdidisti. In hoc ergo largius quam in alio fere unquam, illo meo tristi remedio usus eram. Flevi obitum; non pudeat fateri, quod fecisse non puduit; et quoniam delectabat ac proderat exonerare animum fletu, feci omnia quibus quam necessario flendum esset, semel flerem, et non sæpius, quod fieri non poterat nisi abundantissime semel flessem. Quamobrem inter cætera fletus incitamenta, ad familiarem viri illius epistolam scripsi, ut artificio vacuum, sic refertam vivis affectibus, quam et scribens et relegens flevi, quantum de-

siderio leniendo, levandoque gemitui visum esset expediens; et valuit, ut post sæpe suspirans nunquam fleverim, nunquamque deinceps, ut auguror et ipse tale aliquod fleturus exhausisse fontem mihi video lacrimarum. Hanc ergo licet utilem mihi, tum quia non tam virilibus quam flebilibus sententiis plena erat ocului, neque hac ætate mihi elapsam sciri, neque hac in parte operis legi illam meo nom<sup>o</sup>ine dignum ratus. Tu qui tuo iure nostra omnia familiariter noscis, quique his otii nostri curis transcribendis, primus animum ac digitum applicasti, nulla, ut puto, alia re illectus, quam varietate ac novitate, tu e latebris in publicum illam trahis, quam quum tuæ instantiæ non negandam decrevissem, ac te prius quam illam scripturus es, et alios qui lecturi commonendos existimavi, ut sciretis id ipsum consolationis in ea esse quod consolatorium mihi esset; sic eram enim ut delectarer eo cuius omnes contrario delectantur: malis meis quodammodo demulcebar. Nec mihi unquam melius erat, quam dum flebam, atque animam æstuantem oculorum imber largifluus leniebat. Hoc in statu eram dum illam scripsi, et adhuc forte essem ni scripsissem: scribendo et flendo perveni quo ratiocinando non poteram. Hæc tibi amice, tecumque aliis si quos ea res tangeret pro lamenti illius excusatione dixerim, simulque ut tu qui tot tam varia nomina usque nunc scripseris, amicorum nominibus aliquando tuum ipse nomen adscriberes, neve, licet sero mihi cognitus, in hac amicitiarum acie præteritus viderere. Vale.

---

## EPISTOLA LIX.

GALEATIUS VICECOMES MARQUARDO UT DICITUR  
EPISCOPO AUGUSTENSI.

Ob litteras superbiæ et iactantiæ plenas ab eo sibi missas Galeatius Vicecomes Episcopum indignanter alloquitur, et minis insequitur.

Superbiæ imo vero insaniæ tuæ litteras, quas iniuriis plenas exudantesque conviciis in nos diceris effuisse, ad manus nostras non pervenisse noveris, sed dumtaxat continentiam in effectu quorundam nobis fidelium nostrorum sedulitate transmissam, quodque ipsas eas qua decuit fronte percepimus, nunquam procul dubio credituri tale aliquid sani hominis processisse. Sed ut omnia de te credamus suadet notissimus et importabilis furor tuus. Solet enim sermo hominis vitæ moribusque simillimus esse, et clarum animi testimonium oratio perhibere. Tu quidem, quantum intelligi datur, credens forte tibi rem esse cum pueris, multipliciter visus es ut nos ventoso tonitru et verborum inanium fragoribus deterres.

Nos qui, quantum in hac vita brevi et iuvenili ætate permissum est, multa vidimus, plura etiam audivimus memoriæque mandavimus, et insolentiæ tuæ minas ac dicta contemnimus, omnino muscularum murmur, ac vanus strepitus non horremus. Tu tamen ut animum tuum tui merito contemptorem præclarissimi nominis lux præstringat Vicarium te romani iactas imperii! Cuius nos et fideles fatemur et Vicarios profitemur; et omnes a quibus originem traximus maiores nostros devotissimos semper ac fidelissimos extitisse certum



atque adeo clarum est, ut, præter te virum omnis boni nescium, nulli hominum incognitum arbitremur. Contra autem te non Vicarium imperii credimus, sed nostrorum hostium, et quod multo tibi fœdus est, prædonum quoque reipublicæ stipendiarium scimus. Quis enim tam grossus ingenio est ut credat romanum imperatorem decus ac culmen principum orbis terræ, ætate illa sua florida, illo cum robore, illa prudentia consilioque subnixum, illis tot bellicis illustrem virtutibus, illa denique prævalentum ducum ac procerum comitiva ad compescendos motus Italicos, quibus vix ipsa hodie vel Iulii Cæsaris, vel Scipionis Africani præsentia, sed nec utriusque sufficeret, senescentem, et, si verum æquo animo pati potes, furiosum atque inutilem presbyterum direxisse? Nunquam profecto milvum aquila, nunquam leo leporem misit in prædam. Solent enim qui mittuntur similes esse mittentibus. Tibi quid, quaesumus, cum Imperatore domino sancto nostro similis est? Animus, ætas, genus, an virtus, an professio? Nulla nisi dissimilitudo rerum par: nunquam tam nulla proportio. Si quo te igitur Imperii Vicarium possemus inditio suspicari, quanquam non immerito de mittentis iudicio miraremur, quia propositum est nobis nil velle quod nolit, et nil nolle quod velit, parati essemus, etsi non parvi periculi rem sciamus, ad irati et rabidi iudicis tribunal accedere, et nos ante ipsum iracundiæ tuæ fulmen vivis et veris vocibus excusare, quibus vel tuam placaremus insaniam, vel quia, ut credimus, illa nisi ferri acie frangi nequit, coram Deo saltem et hominibus nostram innocentiam probaremus. Sed quoniam te non Imperii Vicarium, sed stipendiarium furum, ut

diximus, ac satellitem reputamus, omisso ad præsens illo longo processu et confictorum criminum acervo, ubi multa et varia in nostrum seu verius in tuum caput mendacia conguessisti, omissis nugis et tumentibus verbis tuis, hoc solum præsentium tenore rescribimus. Nos infra terminum quem nobis ad hoc diceris præfixisse, ne laborare te oporteat veniendo super Mediolanense, Placentinum, seu Parmense territorium, ut minaris, in ipsis tuis aut tuorum finibus, quia te non tanti facimus ut ad nutum tuum personaliter moveamur, tibi per procuratores nostros idoneos, ut speramus, legitime et magnifice responsuros. Unum hoc præmissis adnectimus, ne tibi forte, ut vanissima spes stultorum, de conscientia vesani capitis blandiaris; et quoniam vocaris episcopus, cum vir sanguinum sis, impune furere et insultare posse urbibus ac populis qua impetus tulerit, honorum fines, statum et patrimonia lacerare, postremo passim quidquid est libitum licitum speres, nos si cum nefaria latronum manu ad populandos exterrendosque pacificos fines nostros attigeris, si te in manus nostras Fortuna iustitiæ ministra perduxerit, non alio quam quo meritus es famosi latronis ac incendiarii supplicio puni-turos. Vale.

Data Mediolani, die VIII. Octobris.

NOTA. — Littera hæc Galeatii Vicecomitis nomine ad Marquardum Episcopum Augustensem missa in duobus Codicibus Florentinis Franciscum Petrarcam auctorem habuisse dicitur. Multa tamen rationum momenta contrarium suadent, quæ in adnotationibus quarto in volumine vulgandis lector inveniet. Hisce non obstantibus, litteram ex hoc libro expungendam haud duximus, ne sententiæ nostræ in re dubia nimis confidere videremur, neve ulla ex iis quæ vulgo auctori nostro tribuuntur, hac in sylloge desideretur.

---

## EPISTOLA LX.

FRANCISCUS PETRARCA MODIO PARMENSI S. P. D.

Duo illi opuscula mittit de quibus iudicium suum exquirat.

Tua brevis ac dulcis epistola mihi graves inter curas, quasi densa inter nubila, suavissimus hiberni radius solis affulsit; in qua cum grata sint omnia, nihil est novum. Semper erga me talem fuisse te memini: gratiam habeo, atque utinam ut animo iuncti sumus sic simul vivere licuisset. Meliore autem nostri parte, quoniam utraque vetitum, simul erimus, ea scilicet quæ, ubi se virtuti subiicit, Fortunæ imperio exempta est. Quod est reliquum: videbis, amice, dum ex commodo licebit duo illa opuscula ingenioli mei, quæ varie affectus, alterum nimis ardenti animo dictavi, alterum nimis leni, et ab omni ferme rerum humanarum participatione semoto, quodque in utroque tibi displicuerit, mihi seorsum indicabis. Si quid vero placuerit, generosæ atque agilis tuæ manus ministerio, ut soles, quosdam velut stellarum radios adhibebis, quibus non aliis tantum, sed mihi etiam res ipsa sit gratior. In quo vide, oro, diligenter ne te amor fallat qui doctissimos iam fefellit. Vulgi vetus est verbum: cum placet histrio gestus placent. Cave ergo ne nimis multa signando æmulis nostris argumentum præbeas tibi tali viro mediocria placuisse. Demum illis modo signum imprime quæ vel ab ignoto, vel ab hoste etiam dicta laudares: quæ pauca ibi esse non dubito. Illud itidem precor certiore me ut facias quid agit communis domina, illustris mulier et virtu-

tis amior quam Fortunæ, quisve suarum rerum status, et quæ spes, cuius venerabilem conspectum toto iam triennio exoptatum mea mihi pridie sors invidit. Vale nostri memor.

F. tuus.

Ticini, Kalendis Septembris.

Magistrum Fortianolum nostrum meis verbis ore tuo salutatum velim.

### EPISTOLA LXI.

FRANCISCUS PETBARCA IOHANNI PARMENSI S. P. D.

Explicat allegoriam quæ littera superiori n. L relata continetur.

Uberem messem parvo de semine messui. Arborem quam stilo descripseram coloribus designasti; ac memorem Horatianæ sententiæ ubi ait :

Segnius irritant animos demissa per aures  
Quam quæ sunt oculis subiecta fidelibus,

quod auribus ingesseram oculis subiecisti, non contentus nisi et eius oppositum insuper, et huius vitæ arenam habitatam mortalibus addidisses: ubi ad tempus utrumque permixtum, et heu! non æquis portionibus confusa sunt omnia, discernenda novissime, et supremi flabro iudicii ventilanda. Ostendisti realiter, amice, arborem tibi notissimam, quam, ut de singulis dubitans philosophico consilio videare, verbo dicis incognitam. Est ergo (quoniam hæsitatio tua interpretem me videtur exposcere), est, inquam, arbor illa quam putas, nec

te fallit opinio. Quomodo enim, ut de te sileam, amicum illum magnum, quem tuæ dubitationis tuæque consortem narras indaginis, falleret arboris notitia, cuius sub ramis, nec me fallit amor, ab adolescentia sua sedit? Unde tunc flores vernos, nunc maturos et tempori debitos fructus legit? Est igitur est utique virtus ipsa quod visum dicis ambobus: virtus olim quadrifidos habens ramos, propter quadripartitam honestatis speciem, solo nomine late notam: quos ideo spectare terram dixi, quia quatuor morales, pro ea præsertim parte quam politicam vocant, civiles actus ac terram respiciunt. Has sane, quod invitus fateor, maioribus nostris constat aliquanto magis fuisse cultas quam nobis, præcipueque principibus; quos pastorum appellatione notavi, qui usque adeo iam ærei facti sunt, ut amare homines et curare terrestria vile ducant, ac præiudicium maiestatis, cum tamen omnes iisdem ex seminibus nati simus. Tres altiores rami theologicæ sunt virtutes. Hæ ante Christi adventum, quem cœlestem agricolam non inepte videor nuncupasse, mundo incognitæ habebantur, quas cœlum spectare non ambigitur. Christi sarculus Christi doctrina est, qua fidelium mentes colit. Ros serotinus sanguis est proprius et gratiæ cœlestis infusio, quæ sero, hoc est sub finem sæculorum, in mundum sterilem, Deo res hominum miserante, delapsa est. Ramuli sunt harum subdistinctiones innumerabiles virtutum: felices auræ sunt cogitatus pii et sanctæ inspirationes: volucres sunt animæ quæ alis cogitationum talium alte conscendunt, candidæ propter innocentiam, canoræ propter id quod scriptum est: *cantabo Domino qui bona tribuit mihi*; et iterum: *cantabo Domino in vita*

*mea, psallam Deo meo quamdiu fuero; et rursus: benedicam Domino in omni tempore, semper laus eius in ore meo.* Poma sunt virtutum fructus, quibus omnino nihil dulcius esse fatebitur quisquis inde gustaverit. Quinam vero fructus hi sunt, nisi et hic gaudium de virtute, et illic in patria finem non habitura felicitas? Mite solum est vita mansuetorum, qui licet altius aspirent, adhuc tamen terram inhabitant: hanc exornantes herbæ variæ quid nisi varietas sibi convenientium actionum? Flores purpurei quid nisi morum fuerint ornamenta? Lenis accubitus quid nisi bene compositi animi status et felicitis conscientiae quies est? Odoris suavitas famam bonam: oculos mulcens color quid aliud quam decorum illud importat, quod elucet in virtute, de quo præclare in officiis suis agit Cicero? Fons sub hac arbore scaturiens quid nisi actuum bonorum ex virtutis radice nascentium inhexausta series est, quæ hinc illinc difficultatibus obiectis excita, clarior fit atque sonantior? Siquidem ex colluctatione laudabili et meritorum præconiorum murmur elicitur, et lautius exauditur. Gaudet enim virtus difficilibus, et vix facile aliquid magna dignum laude reperies: propter quod arborem hanc locis arduis radicatam dixi: repositis autem ideo quia cum difficilis, tum secreta est ad virtutem via. Nec illud puto mentitus sim difficilem aditum, cætera planiora: quod et experti omnes norunt, et te expertis annumerare non dubitem. Postremo Cancer retrogradum, Leo autem ardentissimum sidus est. Quorum ille relapsum adscendentis animi et ad infima reditum significat: hic ardores cupiditatum atque libidinum et irarum passionumque omnium quibus humana mens æstuat. Hæren-

dum vobis huic arbori usque ad vesperam, hoc est usque ad huius vitæ terminum admonui: addens de quo nemo dubitat, nunquam melius esse mansuros: malefida enim voluptatis statio, ad quam velut ad portum mundus iners confluit, ut blandos introitus sic mœstos habet ac præcipites egressus; quod si unquam dubitatum esset, heu! clare nimis ac terrifice non sine meis et multorum lacrimis nuper apparuit. En, amice, parabolam tibi meam ipse reseravi. Superest ut et amico illi optimo et tibi gratias agam, qui pro brevi papyro non eam modo de qua loquebar arborem, sed totum mihi terrarum orbem in membranis descriptum insigni quidem artificio remisistis: utque ambobus et arboris ostensæ refrigerium, et mentium corporumque valetudinem inconcussam ac perpetuam precer. Vale. Mediolani: ille tuus.

---

## EPISTOLA LXII.

FRANCISCUS PETRARCA AD IGNOTUM.

Gratulatur victoriam.

Virtuti tuæ congratulor, adolescens, quando tu sic unus adversum millia, sic solus adversum agmina clavam de manibus Herculis extorsisti. Redemisti, sicut audio, iugera tua certamine magno: quod eo lætius intellexi quo certius reor ob hoc ulla te iactantia non extolli. Iam verbis non eget tempus: tempus est, fateor, iam sulcis telluri semina credere: quæ suum sperato fœnore non deceptura cultorem, stridentia plaustra vocent, cumulentque felices areas ad trituram. Vale.

---

## EPISTOLA LXIII.

GALEATIUS VICECOMES CAROLO DELPHINO GALLIARUM.

De eadem re, quæ litteræ superiori n. VI relatæ argumentum  
constituit.

Urget hinc animum dolor, serenissime principum, et in lamenta præcipitat; hinc silentium iubet et attonitum facit stupor, dum durum Fortunæ iugum cogito, cui conditio est subiecta mortalium. Quid homini tutum? Aut quis omnino Fortunæ imperio sit exemptus, quoniam summus hominum illustrissimus pater vester ac dominus meus rex, ex altissimo solio tam repente, rotæ volubilis deiectus impulsu, quod sine lacrimis meminisse non possum, in manus hostium dicitur pervenisse? Et quod non parva doloris accessio est, secum una minor filius amantissimus frater vester, ut irrecuperabiles sileam iacturas, strages procerum quos quasi totidem regni lumina una tristis, præceps et calamitosa dies obruit et extinxit: mœsta, inquam, et flebilis et obscurior qualibet nocte dies: quæ utinam pereat, ut illius sancti senis utar verbo, et *vertatur in tenebras, non requirat eam Deus desuper, et non illustret eam lumine: obscurent eam tenebræ et umbræ mortis: occupet eam caligo, et involvatur amaritudine: non computetur in diebus anni, nec connumeretur in mensibus.* Vere enim caliginosa dies et infelix et de numero temporum abradenda, quæ clarissimum regni solem ac stellas tam fusca nube circumdedit, et quam tanti doloris vespera tantorumque fletuum vox consecuta est. Huius ego tam insoliti et tam magni mœroris particeps sum,



inclyte princeps: Deum et conscientiam meam testor! et ad me quamvis a longe positum pars pervenit lacrimarum. Nam præter communem et publicum dolorem, qui ad tantæ ruinæ sonitum haud dubie omnium, et in primis regum ac magnatum corda tenuerit, cogitantium nihil in suum caput non ausuram sævam illam memorabilemque Fortunam, quæ verita non sit manu sacrilega sacrum Franciæ diadema contingere, est mihi privati gemitus ac doloris causa iustissima. Nolo enim vestra maiestas existimet me illius forsan humanitatis immemorem quam in me olim invictissimus avus vester exhibuit, quam idem vester genitor multis et variis benevolentiae regiæ auxit indiciis: quam vestra quoque iam tunc venerabilis pueritia et præclara indoles fronte lætissima et suavissimis cumulavit affatibus. Hæc singula equidem sic in animo sedent atque imis penitus sunt affixa præcordiis, ut eorum lucidam radicatamque memoriam nulla unquam ullius ingratitude nubis tegat vel convellat oblivio. Quin imo cum avitæ, vel paternæ, vel vestræ benignitatis insignia, quibus me certatim omnes, hominem vix nomine vobis cognitum, honestastis, multa et magna tunc merito iudicarem: deinde certe renovata atque aucta sunt tempore, meoque tantum crevere iudicio, ut quæ tunc magna visa sunt, nunc maxima videantur, et prorsus omne meritum meum vincant. Quæ quodam tempore mecum reputans una cum reliquis fidelibus et amicis vestris, queror et lugeo tanti domini mei casum. Veruntamen cogitans statum vestrum et iuvenilibus humeris regni pondus impositum, postremo cuncta circumspiciens, quoniam dolori meo ægre impero, vestrum cupio tem-

perare et lugentium unus e numero consolatoris partes, fide valida cogente, suscipio. Dedit adolescentiæ vestræ Deus quod vix raro virorum illustrium senio dare solet, ut ætate hac vanitatem rerum humanarum et Fortunæ vim ac perfidiam agnoscatis, quæ profecto nullis aliis artibus vinci potest, nisi summa stabilis animi virtute. Illam vobis natura contulit, experientia firmavit, studium meditatioque perficiet: cuius ope vel hostium vel Fortunæ vincetis insidias. Remoto patre, regni salus et publicæ spei ancora in vestra virtute fundata est: quam Deus ideo belli casibus præservavit incolumem, ut esset per quem et sperari possent patris vel liberatio, vel vindicta, et tanti regni gubernacula regerentur. Onus grave, sed Deo auxiliante, possibile: et quod ætatem vestram excedat, fateor, non virtutem. Sed quoniam et recentis damni memoria et præsens occupatio vestra multiloquio staret adversa, finem verbis imponam: hoc adiecto, quod si vestris regnique vestri laboribus opem aliquam mea devotio ferre possit, quidquid sum aut possum affero pura fide vestræ inclytæ maiestati, quam mei memorem consolari, patre inclyto libertati ac gloriæ propriæ restituto, quamque feliciter serenare et stabilire divinitus ac victoriosam facere dignetur Altissimus. Vale.

---

## EPISTOLA LXIV.

FRANCISCUS PETRARCA EPISCOPO CAVALLICENSI S. P. D.

Quæ tempore anteacto ab eo accepit beneficia commemorat,  
et pro noviter collatis gratias agit.

Utcumque aliis, quorum vel libertate vel opera fretus eram, quid dicerem inveni, ad te scribere cogitanti mirum ut sæpe verba defuerunt. Quid enim dicerem? Ita mihi persuasum profundeque insitum est tuum te negotium agere dum meum agis, idque non emolumentum consideratione vulgaris, sed alia quadam generosa et ingenua æstimatione paucorum, et in primis tua. Sunt enim qui nihil nisi pecuniario pretio æstimare didicerunt; tempus amicitiiis impendunt quo nihil est carius, tam nil sibi videntur impendisse, nisi forsitan quantum lucri idipsum tempus intentis ad alia collaturum fuisse videbitur. Dant consilium, dant auxilium, dant animam, dant seipsos, nihil se dedisse putant: forte etiam nec falluntur: at si quid pecuniæ impensum est, id æstimatione tacita, id importunis verbis exaggerant; haud immerito: quando eis pecunia pretiosius nihil est, non tempus, non fama, non sanguis, non vita, non anima. Tantum imperii inter miseros mortales auro argentoque dedit insana cupiditas. Tibi vero mens alia, diversi mores, iudiciumque dissimile. Non te superficies rerum fallit; solerter introspicis, et suum pretium rebus ponis. Non tu ex me aurum speras, non ambitiosa suffragia, sed animum meum et obsides animi affectus tenes potius quam speras: de futuro etenim spes est;

itaque quod habet sperat nemo. Tu quidem pleno iure animum meum habes; ubicumque sim ille tecum est, quem tibi pulchra negotiatione mercatus es. Pietas, fides, humanitas, sapientia, eloquentia, litterarum amor, caritas mei, conversatio suavis, et servata dignitate familiaritas inaudita. Hæc sunt pretia quibus me hominem liberum comparasti. Posses, non inficior, contractum communi iure rescindere, ultra dimidium iusti pretii deceptus: non tamen id vereor, nam et præscripta res est, et multa præterea, licet exigua in se, adeo possessoribus cara sunt, ut ea vix ullis pretiis commutasse velint. Innumerabiles sunt affectuum humanorum causæ, et inæstimabiles æstimantium voluntates, investigabilesque respectus. Quidam vasti animi sunt, et appetitum nonnisi ad immensa transmittunt. His orbis ipse terrarum carcer videtur, et angustiae, quod de Alexandro Macedone, ac de Iulio Cæsare lectum est: contra alii minimis delectantur, magna fastidiunt: his tugurium regia est, ampla domus ergastulum. Tales puto fuisse Diogenem et Amiclam illum Cæsareum, prius quam vector sibi permaximus obtigisset. Multos quoque alios præcipue ex nostris, qui pauperem ducem nacti omni studio fecerunt sibi familiarissimam paupertatem, in scissuris lapidum atque in desertis specuum habitantes: sic et in reliquis invenies. Quidam purpuras mirantur et quidquid supra humanæ mensuræ modum attollitur attoniti et hiantes aspiciunt: his regnare felicitas prima est: id si fortuna negaverit, at saltem amicitiiis regum student, et proximum regno putant esse sub regibus. Alii omnem potestatem perosi ferre nequeunt regis occursum. Quibusdam melle dul-

cior, ut dixi, aliis amarior felle pecunia est. Itaque nummos alii non quasi fallax et fragile mortalis vitæ præsidium, sed quasi fratres aut filios amant, sæpe plus etiam quam se ipsos, quando ut nummis parcant fame pereunt. Horum alii contactum ceu contagiosum aliquid evitant, et quasi non sufficiat avaritiam declinasse, nisi in contrarium relabatur, bellum indixeré divitiis, quas ut valde optare imbecillis, sic non posse pati enervati animi est. Hinc apud Flaccum extrema illa ridicula procul a virtute distantia Laberii et Aristippi, quorum primus multiplici pœna hæredibus apposita ni paruissent, omnem ingentis patrimonii sui modum sepulchri saxo iussit insculpi, quo scilicet posteritati nota felicitas sua esset quam in divitiis reponebat: alter in Lybia servos aurum suum quo gravati tardius incedebant, quasi cœnum iussit abiicere, cum ille posset rem caducam penitus fœnerari, et hic in meliores usus largiendo quam proiiciendo convertere. Sunt quibus in rebus omnibus mediocritas placet. Horum ex numero esse velim, nec verebor pusillanimitatis infamiam, meque illo Senecæ testimonio tuebeor: *Magni, inquit, animi est magna contemnere, et mediocria malle quam nimia.* Sed omissa votorum varietate mortalium, ad nos et rem nostram redeo. Tu quidem quam industrie amicitias regum colas insigni nuper experimento et præclara usque ad exitum fide monstrasti, adeo ut te et amicum rex dum vixit, et nunc etiam regnum ipsum Siciliae patrem vocet. Nec ideo quod in monte stare consueveras vallem odis, doctus et suspicere et æqua conspicere, nec tamen ima despiciere. Omnia enim agere virtus docet, et diversissima licet, uno rationis imperio administrat. Non

sum rex. Quid refert si apud eum cuius sum, quantuluscumque sim, in pretio sum? Multi deformes coniuges ardentius amavere. Sæpe quo minor filiorum indoles, eo parentum amor fuit intentior. Scipio Africanus summus hominum, filium usque adeo dissimilem patri, ut hostis non filius videretur, plusquam paterne dilexisse traditur. Mirum; sed aliquid latet quod amorem excitet amantemque sollicitet: sine causa enim nullus amat, quamquam aliis non tam pronis ad amandum eadem causa tanto impar forsitan sit amori. Certe ego, dum me metior, quid de me ipso sentiam, in dubio sum. Fateor enim, ipse mihi non placeo, nec mirari sufficio quid est hoc quod clarissimis viris (neque enim vereor ne vanitati detur si hanc mihi veræ, licet immeritæ gloriæ, partem sumo), clarissimis, inquam, omnium qui nostra ætate vixerint, carum fecit. Dum equidem ipse res meas funditus excutio, nihil invenio, quod in me bonis amabile suspicer, præter unum hoc, quod ipse etiam quisquis sim, bonos semper amavi et colui, semperque ab his amari et volui et optavi, nec ullas mihi in vita maiores opes posse contingere ratus sum, quam benevolentiam bonorum, atque illustrium virorum, quorum quo minor est copia, maior est gratia optabiliorque convictus. Sed dum cogito tot claros viros haud facile in eo simul omnes errore versari, nescio quomodo de me mihi spes oboritur: ita, ut dixi, dubius sim, nec scio quid mihi, quid aliis credam. Vos videritis quicumque me vobis amandum, nullis causis apparentibus delegistis. Verum ut non alios sileam, de te loquar quem a principio crebrioribus et clarioribus indiciis patrem sensi. *Veni Mediolanum*, inquit Augusti-

nus, *ad Ambrosium episcopum, in optimis notum orbi terræ*: et post pauca: *Suscepit me, inquit, paterne ille homo Dei, et peregrinationem meam episcopaliter dilexit.* Quid tibi, quid mihi convenientius dici potest? Veni ego non Mediolanum, unde tibi tamen hæc scribo, quo pridem a te corpore digressus cum alio pergerem, Fortuna sic res hominum volvente, perveni, sed in ruris tui secreta, non te quidem, quem adhuc nisi facie non noram, sed solitudinem ab infantia dilectam ac locorum silentium quærens veni, ubi a te quam paterne susceptus sim, quam erga me familiariter simul episcopaliterque te gesseris, tu forte vel nihil æstimes, vel, quod valde beneficis inesse solet, oblitus sis; ego non si Lethæi gurgitis fluentia transierim obliviscar, ut me semper una fronte unoque animo videris: ut ad te inde venientem exceperis, morantem excitaveris, segnem increpueris, et adhortationum stimulis sæpe segnitiam excusseris, sæpe nec stimulis quidem parentem, urbe relictâ tua, quoque me dignatus sis consolatusque præsentia, teque hospitis amor attraxerit quo locorum tuorum caritas non trahebat. Me ne, ut cætera prætermittam, illius loci immemorem arbitraris, dum coactis sarcinulis Italiam repetens, sero ad te pro benedictione ac licentia venissem, ante solis occasum Druentiam transiturus; ut te graviter ægrotantem, quod dolori meo parcens me celaveras, mœstus et admirans reperi; ut subito factus alacrior totos penates læto quidem sed modesto clamore complesti, te sanitati redditum adventu meo prædicans; ut in egregium fratrem tuum versus nihil iam te de salute tua dubium dixisti, quia quem quærebas invenisses; ut mox, dum ego dolens quidem et

invitus, sed urgente hora quæ ad transitum rapidissimi fluminis iam tardior videbatur, propositi mei summam, et ad quid venissem, quove iter intenderem indicassem tibi, repente tristior et pene intermortuus orasti ut illam tibi noctem darem: adfuturum enim Deum et aliquid remedii monstraturum? Quod cum pietate tua victus annuissem, meruisti ut, precibus credo tuis, quod Scholastica quondam virgo sanctissima pro Benedicto fratre promeruit, ingens et inopinus imber adfuit, cum tota non pluisset æstate. Cæterum, quia seu laborum usus seu naturæ est, satis iam contra ventos, et fulgura, et æstus, et pluvias induruisse videor, uni forte cessurus impedimento, quod etsi librorum quos mecum ferendos assumpseram amore tangebar ac vehementissime retrahebar, post me tamen illos dimittere non vetabar, et tergum indomitum imbribus dare, obstaculo interim validiore detineor. Siquidem nocte illa priusquam a colloquio tuo in cubiculum transissem, rumor ad nos incredibilis pervenit, te gaudente, me propter miraculum fictam a te fabulam opinante: iter quod destinaveram bello fractum, quod nec nostra unquam nec avorum nostrorum ætas adiuverat. Qui cum mane percrebuisset auctus, substiti atque his causis in unum coeuntibus effectum est, ut sicut olim pia soror noctis spatium fraternæ moræ, sic tu pius pater moræ meæ prope integrum anni tempus adiungeres: cui totum quidquid id est vitæ reliquum adiungere potuisses, ut non a te magis corpore quam mente divellerer. Sed quod tunc nequivisti nunc implere satagis, idque non verbo, cui tamen fidei plurimum inesset, sed his quæ mentiri nesciunt rebus probas. Taces tu quidem, sed pietas tua



loquitur; clamant actus, pro quibus gratias agens clamat animus meus, lingua tamen silet, cui paria meritis tuis verba non suppetunt: id enim agis non ut vulgare aliquid, sed ut suprema vitæ gaudia, libertatem, solitudinem, otium, silentium, id agis ut laborum ferias, ut tranquillæ mentis statum, ut te postremo, ut me mihi restituas. In quo te adeo pervigilem probas quasi rerum immemor maximarum huic uni omne studium curamque devoveris; quod mihi stupens Socrates meus scribit et stilo efficit ut pene rebus ipsis interfuerim. Perfecisti iam tandem, ut spero, quod sæpe tentaveras, obluctantemque Fortunam pro nisu et indefessa diligentia fatigasti: victa iam nobis cedit, et patitur ut, quod semper optaveram, prope te vivam, prope te moriar; quod si ita est ut audio, fecisti rem, fateor, qua nescio an ulla mihi gratior fieri posset. Cæterum, ut principio finem iungam, conscientiam tuam interroga, illa tuum te quoque negotium fecisse fatebitur. Supple igitur inscientiam meam, et tu tibi gratias age, quod licet a nemine fieri ipsi ego patri nostro Meldensi scripserim, sic habeto efficacissimam uberrimamque omnium in terris esse gratiam, quam bene conscius animus in silentio refert sibi. Vive et vale.

Mediolani, VII Kalendas Maias.

---

## EPISTOLA LXV.

FRANCISCUS PETRARCA AD IGNOTUM.

Mittit versum Eglogæ X adiungendum.

Ut inter tot maiorum rerum cûras profundam et inexhaustam, ne dicam supervacuam et inutilem curam rerum etiam minimarum videas, scito quod anno altero, dum additationes illas magnas dictarem in bucolico carmine super litus sinus Hadriaci, ita ut nunc dexterum nunc sinistrum pedem alternus fluctus ablueret, die quodam, dum forte aliud agerem, occurrit animo versiculus unus iungendus aliis, ac ne elaberetur, parum fisus etiam senescenti memoriæ, in margine Africæ nostræ, quæ casu tunc sola aderat, illum scripsi, ratus fido loco repositum semper ad manum futurum. Longe vero aliter accidit: quod matri familias quæ sæpe quod diligentius reposuit, peius invenit. Interiectis diebus dum hunc sæpe et ubique nisi ubi erat quærerem, nusquam hactenus reperi, nisi quod pridie dum de eo nihil amplius cogitarem, oculis sese meis obtulit non sine risu et ira. Misi eum tum amicis de Mediolano opusculum illud habentibus et Donato nostro. Hunc tibi subscribo, quem sive adscribendum duxeris, sive ut intempestivum reiiciendum, tui erit arbitrii. Alii autem omnes, quamvis sero venientem, receperunt. De his loquor qui Mediolani sunt. Nam Donati super hoc responsum non habeo, nec expecto quia statim illuc eo. Est ergo versus decimæ Eglogæ CCLXVII. ni me fallit mens, et sequitur ita post illum:

Ilion eversum Troiamque a stirpe revulsam,

Quique nurum dotemque Iovi convexit opimam.  
Linquo senem etc.

XXII Decembris : Papiæ.

Adhuc octo, imo novem mensibus et eo amplius  
ex quo datæ erant, ad me rediere non sine commi-  
nationibus et iurgio, ideoque unam additionem de  
duabus æstatibus hic actis non miraberis.

II Septembris.

VARIARUM LIBER EXPLICIT.

## APPENDIX LITTERARUM.

Habes, amice lector, octo adhuc Francisci Petrarcae epistolas: quarum postremas duas, nondum a quopiam in vulgus editas, Romae in bibliotheca Barberiniana delitescens serius inveni. Illa quae Lucae Christiano inscribitur, ex codicibus Vaticanis et Barberinianis eruta, parum differt ab iis quae sub numeris 2, 3, 4 et 5 extant in Libro VIII. de Rebus Familiaribus. Cum tamen res aliquas scitu dignissimas illa contineat, operae pretium duximus eam quoque in hac appendice exhibere. Typis iamdiu impressa parum tamen nota, et nunquam inter opera Fr. Petrarcae in veteribus editionibus comprehensa illa est cui initium « *Fervet animus* », ludicra quidem nec absoluta, sed tamen auctoris gratia minime negligenda. Caeterae quatuor ad Nicolaum Tribunum Populi Romani, quum nec Familiaribus nec Variis possent accenseri, eas enim auctor ipse seorsim servandas duxit, dignae nobis visae sunt quae locum heic invenirent, quo singularis illius viri historia huiusmodi documentis testatior esset.

Haud denique ociosum duximus in extrema huius Appendicis parte Francisci nostri testamentum pro-

ferre : utpote quod typis quidem iamdiu editum, sed plurimis esset refertum erroribus : et auctoris pietati in Deum, ac singulari in amicos suosque benevolentiae declarandae peropportunum ipse facile perspicies.

Quæ autem hac in Appendice continentur sequens tibi pagina indicabit.

---

## INDEX APPENDICIS.

---

### EPISTOLA I. POPULO ROMANO. *Apud te quidem.*

*Arg.* Hortatur ut Nicolao Laurentli in vincula conlecto opem ferat, eiusque causam Romæ cognoscendam avocet a curia Avenionensi.

» II. AMICO SUO. *Dum sanctissimum.*

*Arg.* Commemorat sermonem de republica cum eo habitum, et futuri eventus spe magnopere delectatur.

» III. GUBERNATORI PATRIÆ. *Fervet animus.*

*Arg.* De vitæ suæ dispositione.

» IV. PRINCIPI ROMANO. *Leve est.*

*Arg.* Acriter indignatur adversus eos qui negabant cunctis expedire urbem Romam et Italiam concordem et pacificam esse.

» V. MALICIAE. *Malicia salutabis.*

*Arg.* Respondet cuidam obiurganti quod Mediolani constitisset.

» VI. LUCÆ CHRISTIANO. *Motus crebris.*

*Arg.* De iisdem rebus quæ ad Olympium litteris 2, 3, 4 et 5, libri VIII. FAM. scripta sunt.

» VII. IOHANNI MORI. *Orationis celeberrimæ.*

*Arg.* De oratione quam legendam miserat gratulatur.

» VIII. PRINCIPI ROMANO. *Quid hinc humanitatis.*

*Arg.* Nuncium eius ad Druentiam captum et vulneribus affectum esse in eoque læsam exprobrat maiestatem.

Testamentum Francisci Petrarce.

---



## EPISTOLA I.

FRANCISCUS PETRARCA POPULO ROMANO S. P. D.

Hortatur ut Nicolao Laurentii in vincula coniecto opem ferat, eiusque causam Romæ cognoscendam avocet a curia Avinionensi.

Apud te quidem, invictissime domitorque terrarum Popule meus, apud te clam paucis res magna tractanda est. Advertite animos, quæso obtestorque vos, viri clarissimi. Vestra res agitur, magna, inquam, nec solum magna, sed maxima, et cui in terris nulla par esse potest. Neve forsitan sciendi avidos expectatione conficiam, aut rem suapte natura permaximam nitar verbis augere: præfationibus omissis ad ipsam rem venio. Tribunus olim vester, nunc captivus alienus (oh ! triste spectaculum), ceu fur nocturnus aut patriæ proditor, ex vinculis causam dicit, et quæ nulli unquam sacrilego prærepta est, apud iudices orbis terrarum, et iustitiæ magistros iustæ sibi defensionis facultas eripitur. Est ille forte non indignus hæc perpeti, qui in suo ingenio suisque, ut ita dixerim, manibus plantatam et iam radicatam florentemque rempublicam in ipso gloriosissimi successus flore destituit. At minime digna est Roma, cuius olim cives lege inviolabiles et supplicio exempti, nunc non modo sine sceleris infamia, sed multa quoque cum laude virtutis passim



sævo quorumlibet arbitrio violantur. Ne enim causam ignoretis, viri illustres, qua olim caput et rector, nunc civis dicam an exul vester opprimitur, rem nescio an vobis incognitam, sed certe mirabilem et indignam audietis. Non ille quidem neglectæ, sed defensæ libertatis arguitur; nec deserti, sed occupati Capitolii reus est. Illud sibi summum, et crucibus expiandum scelus obii-citur quod affirmare præsumpserit romanum imperium nunc etiam Romæ et penes populum romanum esse. Oh ! impia sæcula. Oh ! truculentam invidiam. Oh ! malevolentiam inauditam. Tu vero nunc infallibilis et incorrupte rerum arbiter Christe quid agis? Ubi sunt oculi tui, quibus humanarum miseriarum nebulas serenare solitus es? Cur illos avertis? Cur non ancipiti fulmine causam dirimis sceleratam? Etsi non meremur, aspice in nos et miserere nostri. Respice inimicos nostros, nec minus tuos, quoniam multiplicati sunt, et odio iniquo oderunt nos, nec minus te. Discerne, quæsumus, inter partes omni ex parte dissimiles. Denique de vultu tuo iudicium nostrum prodeat, oculi tui videant æquitatem. Certe si iugo romano, quod omnium iustissimum atque suavissimum fuit, aliqua gens, imo vero gens omnis, ut cernimus, voluit colla subducere, nihil est quod indignemur aut miremur. Est enim animis mortalium libertatis insitus appetitus, sæpe etiam inconsultus ac præceps, et sæpe dum parere melioribus pudor vetat, qui bene subessent male præsident: sic omnia miscentur ac turbantur, unde nonnunquam in loco digni imperii servitium indignum, et in loco iusti servitii iniustum imperium videmus. Quod nisi ita esset, meliori loco essent res humanæ, et adhuc incolumi capite,

mundus integrior. Id si mihi non creditur, experientiæ credatur. Quando unquam tanta pax, tanta tranquillitas, tanta iustitia, tantus virtuti honos, tanta bonis præmia, tanta malis supplicia, tam bene consultum rebus quam postquam unum caput orbis habuit, caputque ipsum Roma fuit? Quo potissimum tempore amator pacis ac iustitiæ nasci Deus ex virgine terrasque visitare dignatus est? Singula quidem singulis corporibus data sunt capita, et orbis universus, cui a poeta magni corporis nomen adscribitur, uno temporali capite debet esse contentus. Monstruosum est enim omne animal biceps: quanto magis horrendum et immane prodigium est animal mille capitum diversorum, seque se mordentium invicemque pugnantium? Quod si capita plura sunt, unum tamen quod cuncta compescat atque omnibus præsit esse debere non ambigitur, ut totius corporis pax inconcussa permaneat. Certe quod experimentis innumeris et doctissimorum hominum auctoritate defensum est, et in cœlo et in terra optima semper fuit unitas principatus. Id sane supremum caput velle se Deus omnipotens non aliud esse quam Romam multiplicibus declaravit indiciis, quam belli pacisque gloria, quamque mirabilem sine exemplo virtutis tanta præminencia dignam fecit. Quæ quanquam ita sint, adhuc tamen si humani more animi malo suo quotidie gaudentis, aliqua gens, ut dixi, damnosam et ambiguam libertatem quam tutum et salutare publicæ matris imperium mallet amplecti, posset insolentiæ vel inscitiae venia deberi. Illud vero quis inoffensis auribus accipiat inter homines doctos quæri, an romanum imperium Romæ sit? Ergo apud Parthos Persasque et Medos Parthorum Persarum-

que et Medorum regna consistent, Romanum imperium vagum erit? Qui hanc indignitatem stomachus ferat? quis non potius evomat penitusque reiiciat? Si imperium Romanum Romæ non est, ubi, quæso, est? Nempe si alibi est, iam romanorum imperium non est, sed eorum penes quos illud volubilis Fortuna deposuit. Etsi enim sæpe romani imperatores pro necessitate reipublicæ in orientis aut occidentis extremo, sæpe sub Borea vel Austro cum exercitibus agerent, romanum tamen interim imperium Romæ erat, et de romanis imperatoribus quo vel præmio vel supplicio digni essent, Roma censebat. De Capitolio petebatur quis honorandus, quis plectendus, quis urbem privatus, quis ovans, quis triumphans introiret. Quin etiam post Iulii Cæsaris seu tyrannidem, seu dicere malumus monarchiam, romani principes, quamquam iam Deorum concilio adscripti, adhuc tamen a Senatu vel a populo romano gerendarum rerum licentiam postulasse compertum est, et data vel denegata licentia vel egisse quae destinaverant, vel cessasse. Imperatores igitur vagi esse possunt: stabile fixumque semper imperium est. Nec de temporali statu, sed de perpetuitate imperii dixisse credendus est Maro ubi ait:

Dum domus Æneæ Capitolii immobile saxum  
Accolet, imperiumque pater romanus habebit.

Neque enim hæc dicens centum aut mille annorum, sed immortalem illis duobus gloriam spondebat. Neve quisquam verba hæc blanditias vocet, quæ profecto nec lingua mea, nec vestris auribus dignæ sunt, digressionem opus est. Scio ego de hac re Virgilium quo-

dam loco ab Augustino reprehensum non iniuste, sed ibidem mox iustissime excusatum. Cum poeta loquentem de vobis Iovem faceret, sic ait:

Romulus excipiet gentem, et mavortia condet  
Mœnia, romanosque suo de nomine dicet,

et origini perpetuitatem adiiciens inquit:

His ego nec metas rerum nec tempora pono,  
Imperium sine fine dedi.

Hic non immerito quidem notat Augustinus; *quomodo enim imperium sine fine dabit, qui nihil unquam dedit aut dare potuit nisi quod homo sceleratus et mortalis potest, falsa divinitatis opinione non ornatus sed oneratus et oppressus?* Prætereo autem hæc: quisquis imperium romanum dedit (quod non dedisse certum est nisi omnipotentem Deum, cuius in cœlo et in terra imperium unum est, unde imperia cuncta descendunt) ubi tamen hoc ipsum sit quærit Augustinus: *in terra an in cœlo? Et utique, inquit, in terra est, et si esset in cœlo, cœlum et terra transient quæ ipse fecit Deus. Quanto citius quod condidit Romulus?* Hæc Augustinus in Virgilium. Et certe perspicuum est regna omnia, et quidquid usquam clarum et magnificum oculis nostris apparet, etsi ante non ruerint, tuac saltem ruitura esse dum cœlum et terra movebuntur illo concutiente qui creavit, quique novum cœlum novamque terram faciet, non mentiturus ut Iupiter, cum sit ipse veritas. Eius est illud regnum principio carens et fine cariturum, de quo scriptum est: *et regni eius non erit finis*: quod licet forte Virgilius ignoraret, cui Deus ingenium excellens eloquiumque præstiterat,

verum hæc a sapientibus abscondita et parvulis revelanda negaverat, illud certe non ignorabat peritura esse omnia regna quæ initium habuissent. Ingenti igitur cautela usus est. Siquidem ubi immortalitatem romano pollicebatur imperio, non ipse loquebatur ex persona propria, sed Iovem loquentem inducebat, ut mendacis Dei mendax oraculum esset, et falsa promissio. Ipse autem ad gratiam populi romani alieno utebatur mendacio. At alibi quando ex persona sua loqui voluit, veritatem ipsam idem poeta non tacuit:

At enim res romanæ perituraque regna.

Quis non clare videt inter imperium sine fine, perituraque regna quid intersit? Sed hic Virgilius, ibi Iupiter loquebatur: hic homo ingeniosus, ibi falsus Deus. Aliis quidem verbis, sed hac plane sententia Virgilium accusat et excusat Augustinus, secundum quam intelligo quod dixi et quod dicam. Certe romanus erat ille qui scripsit. Omnia orta occidunt, et aucta senescunt. Senescent ergo hæc omnia si durent: et si cuiusque rei finis est senectus sua, utique omnia senescent, nisi iam forte senuerint, quando et quæ stant cuncta occident, et occasum, si non prævenierit, saltem comitabitur senectus. Ita nulla est exceptio: seu durent seu non durent, orta omnia aut serius aut ocius tandem occident et senescent. Volvet motu continuo rotam suam instabilis Fortuna: et de gente in gentem volubilia regna versabit. Faciet illa cum volet reges ex servis, servos ex regibus, et in urbem Romam, et in orbem romanum suam ineluctabilem potentiam exercabit; quam præcipue in vos, viri optimi, multis for-

sitan miserantibus, nullo penitus succurrente, diu miserabilibus modis exercuit et exercet. Scio, doleoque, et plus quam credi possit indignor. Quod amplius faciam non habeo. Nec me angit quod Fortuna iure suo utitur, ut in reliquis sic in vobis, atque ut se rerum humanarum plane dominam probet ipsum rerum caput attingere non veretur. Scio violentiam, instabiles mores novi. Quarumdam vero indomitarum gentium inanem iactantiam ægre fero, quarum nunc romano trita iugo colla lasciviunt. Ita (oh ! pudor et infelix fabula) iam, ut cætera multa et gravia sileam, in quæstionem venit : an romanum imperium Romæ sit. Enim vero ubi nunc horrida silva est, poterunt regia tecta consurgere, atque ubi nunc atria sunt auro rutilante fulgentia, poterunt cupidi greges pasci, et penetralibus regum vagus pastor insistere. Non detrecto Fortunæ imperium. Potest illa funditus, ut urbes alias, sic reginam urbium pari nisu, ruina maiore prosternere, quod heu ! magna ex parte iam fecit. Illud profecto nunquam poterit efficere ut romanum imperium alibi sit quam Romæ : simul enim ut alibi esse cœperit, desinet esse romanum. Hæc se miserabilis civis vester affirmasse et affirmare non negat : et hoc est illud grave crimen unde in discrimen capitis adducitur. Addit autem se multorum consilio sapientum id dixisse, nec, puto, mentitur : et defensionis copiam advocatumque sibi dari flagitat. Negatur ; et nisi divina misericordia vesterque favor occurrerit, actum est : innocens indefensusque damnabitur. Hominum pars magna compatitur : nemo fere est qui non misereatur, præter eos quibus proprium erat misereri et parcere erroribus, non invi-

dere virtutibus. Iurisconsulti insignes hic etiam non desunt qui iure civili asserant hanc ipsam sententiam probari clarissima ratione. Nec desunt qui ex historiis se multa et valida probaturos dicant ad eiusdem sententiæ firmitatem, modo liberam vocem liceat emittere. Nunc tamen nemo est qui mutire audeat, præterquam in angulis, in tenebris, in timore. Ego ipse qui vobis hæc scribo, et forte pro veritate non recusem mori, si mea mors collatura aliquid reipublicæ videatur, nunc laceo, neque his ipsis ad vos scriptis meum nomen adiicio, stilum ipsum sufficere arbitratus, hoc adiecto, civem romanum esse qui loquitur. Quod si tuto in loco apud æquum iudicem et non ad tribunal hostium res agatur, spero, veritate animum illustrante, et linguam seu calamum dirigente Deo, posse aliquid dicere quo luce clarius appareat imperium romanum, quamquam Fortunæ iniuria attritum oppressumque diu, et quamquam varie ab Hispanis, Afris, Græcis, Gallis, Theutonis occupatum, adhuc tamen quantulumcumque est, Romæ esse, non alibi, ibidemque mansurum, etsi nihil prorsus ex tanta urbe, præter nudum saxum Capitolii superesset: quin etiam tunc quando nondum externis manibus agebamur, tantumque Romani Cæsares imperitabant, non penes eos, sed penes Capitolii arcem ac populum romanum omne ius imperii fuisse, si verum est quod malæ fidei possessor non præscribat.

In hoc autem rerum statu dum dies trahitur, quod forte desuper datum est ut, quod modo nec sperare quidem auderetis, tanta res in lucem veniat, unum quod ad vestram et Romani nominis dignitatem spe-

ctare visum est dissimulare non potui, cogente me ad calamum fide illa qua vos urbemque vestram inter omnes singulari quodam amore ac veneratione complector. Claritatem igitur vestram hortor atque obsecro ne civem vestrum in extremis positum deseratis, sed vestrum esse monstretis solemnibus eum nunciis repositoscentes. Etsi enim vobis imperii titulum nitantur eripere, nondum tamen eo vesaniæ sunt evecti ut negare audeant vos in vestros cives ius habere. Certe si quando homo iste peccavit, Romæ peccavit. Nec dubitari potest de commissis Romæ peccatis vestrum esse iudicium, nisi vobis fundatoribus legum atque cultoribus et qui iura gentibus tradidistis, eripitur ius commune. Ubi enim iustius delicta castiges quam ubi commissæ sunt, ubi scilicet et locus ipse memoriam criminis revocans sceleratis, pars non parva supplicii, et scelerum spectatores poenæ spectaculum aut soletur aut terreat? Quod si forte tribunus vester (quoniam multi, quin potius boni omnes ita sentiunt) non supplicio sed præmio dignus est, ubi nam melius quod meretur accipiet, quam ubi id fecit propter quod talia meretur? Nusquam dignius præmium viri fortis exolvitur quam ubi fortiter gessit, ut qui actum viderint, ad imitandum præmio accedant. Fidenter itaque reposcite civem vestrum : nihil novum, nihil iniustum poscitis, potiusque delinquitis si tacetis. Quod si communis iure patriæ, ubi nunc captus est puniendus asseritur, quanto verius communis patria Roma est, ubi ille natus educatusque est, ubi quidquid id est unde accusatur admisit, qui contra nihil hic vel laude vel vituperio dignum fecit? Si vero contra morem



maiorum cum fortuna ceciderunt animi, adeoque degeneratum est ut iustitiam poscere temeritas videatur his quorum patribus nihil olim difficile visum est, at saltem quod ab omni quæ legibus vivat barbarie posci potest, poscite ut civi vestro audientia publica, et defensionis legitimæ non negetur copia; neque qui in luce fecit omnia, imo qui quantum per hominem fieri poterat lucem mundo reddidit, in tenebris condemnetur. Ostendite vos denique causam ac fortunam non negligere civis vestri. Resistite iniuriæ: prohibete nefas: protegite innocentem, reum vel nocentem iudicate, aut saltem, ne pro cuiusque libidine iudicetur, occurrere. Ferte quam potestis, et quam debetis opem tribuno, vel si id nomen evanuit, civi vestro multum de republica benemerito, atque illud in primis quod quæstionem magnam atque utilem mundo, multis sopitam ac sepultam sæculis suscitavit, quæ una ad reformationem status publici atque ad aurei sæculi initium via est. Succurrite illi viro, neque contempseritis salutem eius, qui pro vestra salute sese mille periculis ac sempiternæ obiecit invidiæ. Illius propositum atque animum cogitate, et memineritis quo in statu res vestræ fuerant, et quam repente unius viri consilio atque opera quantam in spem non Roma tantum, sed Italia omnis erecta est: quantum subito nomen Italicum, quam renovata ac deteresa Romana gloria: quantus hostium metus ac dolor, quantum gaudium amicorum, quanta populorum expectatio, quam immutatus rerum tenor, quam facies orbis alia, quam diversus habitus animorum, quam nihil sibi simile ex omnibus quæ sub cœlo sunt: tam mira et

tam repentina mutatio rerum fuit. Septem enim mensium non amplius spatio fræna reipublicæ tenuit ut vix ab origine mundi maius aliquid attemptatum rear, et si successisset ut cœperat, divinum potius quam humanum opus esse videretur. Et profecto quidquid ab homine bene agitur divinum opus est. Huic ergo, quem vestræ gloriæ non ambitioni propriæ desudasse notum est, favor haud dubius debetur; de eventu Fortuna culpanda est. Si quis autem torpor ferventi principio intervenit; humanæ varietati atque imbecillitati veniam date: et dum licet vindicate civem vestrum ab iniuria, qui Græcos a Macedonum, Siculos a Carthaginensium, Campanos a Samnitum, Tuscos a Gallorum iniuriis non sine gravi vestro periculo vindicastis. Extenuatæ sunt, fateor, opes vestræ; at nunquam plus animorum patribus vestris fuit quam dum romana paupertas dives virtutum viguit. Imminutam vestram potentiam esse non ignoro: sed mihi credite, si qua pristini sanguinis gutta superest, non parva vobis est maiestas, neque mediocris auctoritas. Audete aliquid, adiuro vos, per memoriam rerum humanarum, per maiorum cineres ac gloriam, per nomen imperii, per misericordiam Iesu Christi qui diligi proximum et succurrere iubet afflictis. Audete, oro, aliquid præsertim cuius et honesta petitio, et inhonestum ac turpe silentium est: et si non propter illius salutem, at propter vestrum decus audete aliquid, si vultis esse aliquid. Nil minus romanum est quam timor. Prædico autem vobis, quoniam si timetis, si vos ipsos contemnitis, multi vos quoque contemnent, metuet nullus. Sin sperni nolle ceperitis, longe lateque metuemini, quod

quum sæpe olim, tum nuper apparuit illo rempublicam gubernante de quo loquor. Aperite tantum unanimiter ora vestra: sentiat mundus unam esse vocem populi romani. Nemo usquam illam irridebit aut spernet: nemo non venerabitur aut timebit. Reposcite modo captivum hunc, vel iustitiam poscite. Alterum non negabitur. Et qui parva quondam legatione regem Ægyptium sub obsidione Syriaca liberastis, nunc civem vestrum ab indignis carceribus liberate.

---

## EPISTOLA II.

FRANCISCUS PETRARCA AMICO SUO S. P. D.

Commemorat sermonem de republica cum eo habitum,  
et futuri eventus spe magnopere delectatur.

Dum sanctissimum gravissimumque sermonem repeto, quem mecum ante religiosi illius ac veteris templi fores nudius tertius habuisti, concalesco acriter, et ita sum ut oraculum a divis penetralibus emissum putem, et Deum mihi videar audisse non hominem. Adeo mihi divine præsentem statum, imo casum ac ruinam reipublicæ deplorare, adeo profunde digitos eloquii tui in vulnera nostra dimittere visus eras, ut quoties verborum tuorum sonus ad memoriam aurium mearum redit, saliens mœror ad oculos, dolor ad animum revertatur; et cor meum, quod dum loquebaris ardebat, nunc dum meminit, dum cogitat, dum prævidet resolvatur in lacrimas, non quidem foemineas, sed viriles,

sed masculas, et, si detur, pium aliquid ausuras, proque virili portione usque ad iustitiæ patrocinium erupturas. Cum sæpe igitur antea, tum precipue post eum diem solito sæpius tecum sum; sæpe subit desperatio, sæpe spes, sæpe autem inter utramque fluitante animo mecum dico: Oh! si unquam.... Oh! si in diebus meis accidat.... Oh! si tam clari operis et tantæ gloriæ sim particeps. Dehinc crebro ad eum, quem in deliciis Crucifixum habeo, versus, mœsta voce atque oculis humentibus exclamo: Iesu bone et nimium mansuete, quid hoc est? Exurge. Quare obdormis? *Exurge et ne repellas in finem. Quare faciem tuam avertis? Oblivisceris inopiæ nostræ et tribulationis nostræ? Protector noster aspice Deus.* Vide quæ patimur, et unde: quæve sub clypeo tui nominis ab hostibus tuis fiunt. Vide, et vindica: sin minus, occurre priusquam mortiferi vis veneni vitalia membra corripiat, et extremis malorum obruamur molibus. Quid agis in te sperantium salus? quid, Salvator, cogitas, quid hæres? quamdiu oculos avertes, quamdiu nostris non tangere miseriis, quamdiu nullum tantis laboribus modum pones? An mala nostra non vides, quem nec cœli ambitus, nec abyssi profunditas fallit, nec stillæ oceani, nec silvarum folia, nec arenæ maris, nec stellarum numerus, nec animantium multitudo, nec herbarum varietas? An odio tibi sumus quos usque adeo sic amare consueveras, ut nostri amore victus, cœli regnator Deus, in terram descenderes atque homo moriturus adscenderes in crucem? An forte vides et diligis, sed retrahit impotentia succurrendi? At si non es omnipotens, quid speramus? An te terret vis hostium tuorum? Sed nondum puto

sæculi nostri superbia fecit homines Deo pares. An potius misericordia iudicium frænat? Sed vide, iudex infallibilis, vide ne dum paucis parces perdas innumeros, et pietas sceleratis exhibita sit crudelitas bonis, innoxiiisque pernicies.... Sed quid loquor homuncio? quis ego sum qui tecum litigem? Tibi nos ac nostra committimus: tu videris, qui creasti, memor imbecillitatem nostram diutius sub tantarum ærumnarum cumulo non posse subsistere. Itaque fer opem opportunam, dum adhuc quidquam reliqui est, ne, si perire permiseris, suscitare habeas quos salvare potueris. Adesto, spes nostra, et quod quotidie iteramus, in adiutorium nostrum intende ac festina: et vel tot mundi mala, vel mundum ipsum finias precamur.

---

### EPISTOLA III.<sup>1</sup>

FRANCISCUS PETRARCA GUBERNATORI PATRIÆ S. P. D.

De vitæ suæ dispositione.

Fervet animus te videndi desiderio, pater alme. Sed civitas terret obstatque visco illita tenaci, cuius odio caritatis vincitur ardor. Crebro ad te venire assiduus quidem impetus urget: tunc sine mora egre-

<sup>1</sup> Hanc epistolam reperies post tractatum *De Vita Solitaria* Fr. Petrarcae impressum *Mediolani anno domini 1498 per magistrum Uldericum Scinzenzeler*, qui asservatur in urbana biblioth. Casanatensi (N. VI. 13): eiusdemque epistolæ primam partem habes etiam in quodam volumine cui titulus: *Rodolphus Agricola: de formando studio. Basilæ per HENRICUM PETRUM mense Martio An. MDXXXIII*, quod est Romæ in Bibl. Angelica (8. 6/100).

dior, et versus incedo patriam. Mox perhorresco murorum ingressum. Tunc redeo et intro, et mihi solamen unicum tecum pia mentis parte conversor, ibique cerno tui effigiem meo pectori sculptam. Hinc te video, hinc acquiesco, et mihi tecum moranti fari tuo incipis eloquio, et quid in hoc loco faciam rogas. Respondeo: utor pace, memetipso fruor, mihi famulor, mihi obsequor, mihi impero, et quod satis est posse, mihi dominor, mihi adhæreo. Cum iubeo sum præsto, et quod volo scio: placent mea, aliena negligo, nulli invideo, nonnulli mihi. — Cum quibus versor, rogas. Mirabile dictu! Cum mortuis versor. Cum mortuis dixi? Cum viventibus dicere debui.—Sed absentibus.—Imo præsentibus. Nam vocati et culti adsunt, vocati respondent, et inter vepres densis opertum sentibus patefactum rectum iter ostendunt.

Hoc loco dicturus eram vale, ni interim dum hanc litterulam dictito uberiores casus materiam obtulisset. Ecce ad me dum scribo quidam domestici intraverunt duo; unus quorum exclamat: Ubi hic solitarius ruricola? Illico aures erigo: vocem agnovi cuiusdam faceti sed nimis audacis domestici. Obviam illi pergo. Nihil ait ille: sed domum per omnem cursitans, brevem supellectilem in aperto positam versat, et hinc inde distrahit: demum lectulum meum intuens, inquit interrogans: Hiccine dormis? — Dormio. — Quid comedis? — Panem. — Aliud? — Polentam regum ferculum, rapas semiustas, olera, legumina, et aliquando lac bovis optimum. — Carnes? — Lupi carnes edunt. — Ubi lebes? — Non vidisti ollulam? — Ita, sed ansa carentem, nec uti quis ea potest. —

Vehemens tripode ferrum vide. — Video : sed ubi parapsides ? — En fictilia. — Habes famulum ? — Non habeo inimicum. — Habes mulierculam servientem tibi ? — Erebo Satanias est. — Cur non ducis uxorem ? — Decretum habeo a Cæsare nostro magna gratia impetratum ne qua mulier mihi nubere possit. — Iocarissine ? — Sæpe iocando exprimitur veritas. — Sed quid cum tuis facetiis ? — Ho he derides ne me ? — Quis ? Ego ne ? — Dimittam hæc. Quis tibi coquus ? — Ignis. — Quis suscitatur ignem ? — Ligna. — Quis purgat domum ? — Scopa. — Quis mensam parat ? — Panis et aqua. — Et aliud ? — Non ultra opus est. — Vellem bibere : ubi pocula ? — Urceum vide. — Ubi cellarium, ubi vina ? — Campo in illo puteus est. — Tractas ne me taliter ? — Frugaliter te tracto. — Quæ vita est ista ? — Bona cum sit quieta. — Vis mori ? — Imo vivere cupio. — Ita solus permanes ? — Imo associatus. — Qui sunt consocii ? — Perempti. — Ha, ha, he. — Cur rides ? — Quia linquis urbem, et cum mortuis degis. — Mala multa, et, ut verius dicam, infinita et sollicita, et tædiosa relinquo cum civitatem variis æstuantem fluctibus desero. — Spernis amicos ? — Si sint, colo. — Quomodo colis, si eos non vides ? — Coluntur sancti nec videntur. Nam mens intrinseca et caritate imbuta contemplatur, et intra se ipsos gerit. — Novus homo es. — Quonam vadis ? — Ad illam tui villici domum vado. — Ad quid ? — Vescuntur ibi agricolæ. Tu cum tua frugalitate mane, qua mihi non est opus.

Alter vero socius moderatior illo mecum remanens sic inquit : Cur non disponis uxorem ducere ? — Non sum Orpheus, alias ausus ut si possem (*sic*) limen

inferorum adire vellem. — Verba sunt hæc, sed veram causam explica quæso. — Imo tu explica cur mihi sit optanda. — Ut sit tibi socia, comes. — Socia, comes? Erras vehementer: imo ut sit mihi iurgium audax, murmur frequens, infesta suspicio, importuna zelotypia, pœna domestica, febris continua, decora spurcitia, facies culta, forma venerea, color fictus, viscosæ genæ, lascivi gestus, girovagi intuitus, oculi prodigi, ubera demissa, tumefactum pectus, ilia gracilia, escatæ illecebræ, verba petulca, blanda fraus, simulata suspiria, piæ indolis serpens, lacrimosi risus, discors consortium, infidelis comes, vorax Ætna, clandestinum dedecus, rivalet ignoti, cœnosi concubitus, abdita lenocinia, post tergum ludibria, domus prædo, occulta mala, præpostera obsequia, amicorum odiosa repulsio, expensa eximia inopiæ consors, inextimabile iugum, terrestre naufragium, et in fine, ablata pace, lis æterna. Causam audisti, nec cætera complector. — Num lex Dei sociam tori non instituit? — Simul et continentiam instituit, ac cœlibem vitam, et extra hanc infernam rabiem singulari gratia ipsemet voluit esse Deus. — Ita ergo, illum oderit Deus qui se matrimonio coniunxerit? — Non oderit, sed quæ homines ambiunt permittit. — Si hæc omnibus voluntas esset periclitaretur mundus. — Ne time ob hanc causam periclitari mundum. Extant enim pellicum et concubinarum greges, non tantum iugales frequentantes toros, sed et pontificum atria, sacerdotum domos, clericorum casas, monachorum cellulas, in hoc venereum volutabrum magno discursu fluentium, mutuis alternando vicibus passim cohabitare ne mundus desinat (*sic*). — Exul-



tatio nuptiarum non tibi placet? — Mihi displicet. Vana et effrænata lætitia, breve gaudium, longa iactura, damnosa expensa, ubi infinita enormia reperies, ebrietates, crapulas, ingluvies, tumultus, lites, scelera, bacchantium amentium fremitus, seditiosa obsequia, nauseantium vomitus, tubarum ac lituum stridores ignavos, et quas haud dubito edidit Pluto stultas subsiliendo choreas. Heu! me tædet amentium. — Multa ostendis mala — Pauca sunt respectu eorum quæ restant. De his pro nunc.

*(Cætera quæ sequuntur desiderantur in libro Basileæ edito, et in superiori adnotatione a me citato; exstant in altero Mediolani vulgato.)*

Sed quid de filiis? Nec habendi, nec optandi sunt? — Optandi aliis, non mihi. Si filii rebelles patri, ea mors carnis et animæ, corporis afflictio, vitæ oppressio, sollicitudo assidua, labor supervacuus, timor eximius, spes ambigua, amor perditus, infelix desiderium, anceps successio, ingratum genus, mortis paternæ mihi (*sic*) inhians expectatio. Hæreditatis gratia cupiunt filii patris obitum; quin diu cupiunt, imo nil aliud expectant, ut libertatem sibi vindicent. — Natos quamplurimos vidi voce mœstissima amissum genitorem acriter flere. — Bene extrinsecus vides, sed quod intra gerant ignoras. Simulata sunt omnia: in patris funere nati ploratum visus esse scito. — Ira et angore premeris: caussam novi. De filiis pravis loqueris. Sed si illustres et virtuosus erunt, nonne patrem famosum reddent? nam virtus in se ipsamet redundat, ac in se

ipsa relucens patres obumbrat. — Et quare? Quia fama propria virtutis est suæ (*sic*). Viri maximi sapientia, litteris, honestate vitæ, armisque plures fuere, quorum patres sine honore vixerunt et abierunt. Non potuit splendor patris aut filii patrem aut filium ignobilem notum facere. Ergo si strenui, si illustres erunt filii, præcellere volent, ipsosque unicos ac solos sua inspiciet claritudo. Ita patrem repudiando post obitum negligent si clari erunt, si pravi affligendo macerabunt. Oh! concupita, oh! damnosa proles. Oh! ignara discordia hominum: quid quæris te cruciando! Mala, mala parentum mihi contigisse queror. — Quid igitur agendum est si habentur, cum utroque modo adversentur patri? An expellendi sunt? — Si habentur, virtutibus nutriendi sunt et non divitiis. Nam si virtuti adhibiti erunt, eos sublimi gloriæ præstabis: si vero divitiis eos vecordes et volatiles reddes, ad summam miseriam mundanarum voluptatum eorum juvenilis ducet insania, ac in præcipitium verget, et labori vacuo insudabis moribus vitæ nocituro. — Si carebis filiis, indigebis hæredibus. — Oh! gens ignara et obstinata. Et quis unquam caruit hærede, nisi miser? — Possidebit tua extraneus hæres. — Et ego quæ mea iam non fuere possideo: attamen nihil habeo quod meum dici possit. Quod auferri potest nulli datum sed concessum, ut illud Senecæ: *non est tuum quod Fortuna fecit tuum*. Fortuna cui placet bona dispensat sua. Hæc omnibus vera et certa est hæres. Quod commodatur sine iniuria eripi potest. Sed vos ignari et præposterii et morituri creditis testando et legando in futuro inferni (*sic*) Fortunæ novas imponere leges. Ridet

illa ex alto, et insperato ad sui libitum disponit omnia. Vestrorum maiorum habetis exempla, mortales, quibus testantibus, et hæredes cara pignora relinquentibus, nihil in posterum ad vota successit, et quos noluerant, adversos hæredes et inopinatos habuere. — Hæc omnia fateor, et audivisse iuvat. Sed ad alia progrediendum est. Times ne hic solus morans aliquid? — Solum peccatum timeo. — Quid agis in die? — Lego, scribo. — Ad quid illud legere? — Ut bona ediscam, et mala dediscam, et minus malus fiam. — Quis nescit bona et mala? Nullus aut pauci sciunt. Ita moriuntur qui multa sciunt, sicut qui et pauca. — Minime: nam illi moriendo vivere incipiunt, hi vivendo quotidie occidunt. — Quomodo possunt illi et vivere et mori? — Non intelligis: ego dico mori et vivere. — Quid credis vivendo agere? — Bene facere. — Cui? — Mihi. — Tibi? — Ita et alteri, si quis volet. — Non vult alter: omnino deridet. — Et quare? — Quia ignari eligenda non vident. — Quis tot ac tanta videre potest? Nonnulli. Sed ignorantia simul et avaritia omnium honorum inimica est, omniumque malorum trames et via. — Mihi sufficit et satis est vivere. Omnia hæc aliis præmitto. Vivere quid maximum est. — Quid dicis? — Quid dico? Nonne vivo? — Es: haud vivis. — Et quid est vivere? — Naturam honeste sequi. — Nam naturam sequor. — Oppositum sequeris. — Nonne quod facio naturaliter facio? — Impetuose, sine ratione, sine consilio, et voluntate facis. Num hæc rationalia sunt? contra naturam, quia contra temetipsum. — Et quomodo agere debeo? — Disce, perage, dispone. — Non intelligo..... Sol ivit ad occasum: recedendi tempus est.

Vale sospes, et socium voca. — Heus o M. . . Audiens exit ille ore repleto, et rauca vix respondit voce: oh, oh. Accelerant, discedunt. Remaneo, mi Optime.

---

## EPISTOLA IV.

FRANCISCUS PETRARCA PRINCIPI ROMANO S. P. D.

Acrius indignatur adversus eos qui negabant cunctis expedire urbem Romam et Italiam concordem et pacificam esse.

Leve est quod nunc animum premit: egerendum tamen ne neglectum stomacho obsit. Plus enim quam pro quantitate bilem excitat, et parvum licet, ingentis nausæ materiam fert. Olet nempe virus abditum profundum vetustique odii. Ita mihi visum est, ita tibi visum iri certus sum; et si latius innotescat, totius Populi Romani atque omnium Italorum animis incussurum iustissimæ indignationis aculeos spero, excussurumque gravedinem torporis, quo nunc priscus generosæ indolis vigor tepet, cui vi vel sponte, totus olim orbis cessit, nunc (pudor!) ultimi hominum insultant. Non inutile opus reipublicæ, si successerit, ut opto. Brevis scintilla magnum movet incendium: verbum unum multarum et magnarum rerum fuit initium. Sed iam res ipsa tractanda est, nec tam magnis exaggeranda sermonibus, quam indignatione legentium. Nuper equidem inter quosdam ex iis qui sibi videntur sapientes, aliis forte non ita, dubitatum et in quæstionis formam propositum fuit: expediret necne terrarum orbi urbem Romam et Italiam

esse unanimes et pacificas. Et quamvis ipsa rerum dubitatio satis puerilis et inepta sit, tamen disputandi studio utrumque poterat excusari, nisi multis argumentis ultro citroque iactatis, is qui omnium sapientissimus habebatur, cum plausu et favore omnium, nullatenus expedire venenata definitione firmasset. Quod tu, quæso, vir eloquentissime, cum primum, ut soles, in publico perorabis, Populo Romano meis verbis indica, ut intelligat quæ sint horum procerum de nostra salute sententiæ, per quas, etsi nihil noceant, animos tamen suos ventosa loquacitate detegunt, dum quod de nobis cupiunt tam vehementer cupiunt, ut dissimulare non possint, et votum iniquissimum ac hostile propositum suum in rationis locum transferre contendunt cæcitate turpissima. Sed ipsi quidem in erroribus suis morientur. Nos in manibus Dei sumus, Fortunam non quam ipsi volunt, sed quam ipse nobis præparaverit habituri. Non tamen his deliramentis interfui. Contristassem fortasse aliquos; non enim aut honestum aut mihi possibile in tam impia loquacitate silentium fuisset. Cæterum ut res ad me perlata est, indignatus graviter: et tunc inter nostros contrarium definivi, et nunc apud te libertatis nostræ principem quantulacumque auctoritate definio; teque ante alios, et Romanum Populum atque universam Italiam, ut quod ego verbis assero rebus approbetis per omnes cœlicolas supplex oro: et in statu prospero diu vivas et rempublicam fortiter liberatam feliciter regas opto.

---

## EPISTOLA V.

FRANCISCUS PETRARCA MALICIÆ S. P. D.

Respondet cuidam obiurganti quod Mediolani constitisset.<sup>1</sup>

Malicia salutabis Ganum. Eius vulgare carmen responso non egere idem ipse qui scripsit fateretur, si videre omnia penitus posset. Sed error facti magna sæpe fallit ingenia. Multi similia scripserunt, sed nemo fuit qui, re comperta, sententiam non mutaret. Metus et suspicio, amantium comites, per absentiam crescunt. Multa de longinquo timemus quæ sub oculis posita ridenda cognoscimus. Ponat ergo metum et bonam spem concipiat de amico, cui non modo florentissima Italiæ pars, sed si oporteat, quivis Indorum angulus aut extrema Taprobane patria est. Super his secundum tuam illam prærapidam eloquentiam disputabis ut tibi videtur viva voce, sed non aspera ut solitus es : suaviter, oro te, sine clamore.....,<sup>2</sup> et sine accentibus horrificis, denique non barbarice, quæso, sed italice.

<sup>1</sup> *Huic epistolæ, quam e codice bibliothecæ deprompsimus, hæc præmissa leguntur* : Quidam eloquens Ganus de Colle misit vulgarem sonettum Fr. Petrarce per linguam cuiusdam lusoris nomine Malicia commode vulgaria recitantis, in quo præfatum dominum Franciscum commendat dicens ipsum esse mundi unicum solem et singulare lumen, hortans eum quod discedat a tyrannide dominorum de Mediolano, et accedat ad libertatis locum, et ipse dominus Franciscus alloquens portitorem sonetti qui proclamationem (sic) habebat quodammodo asperam et acutam, sic respondet.

<sup>2</sup> *Heic in codice sunt duo verba, quorum primum nullo modo intelligere, alterum orationi convenienter aptare mihi impossibile visum est ; scilicet corebu fingo.*

## EPISTOLA VI.

FRANCISCUS PETRARCA LUCÆ CHRISTIANO PRÆPOSITO  
S. ANTONINI PLACENTIÆ S. P. D.

De iisdem rebus quæ ad Olympium litteris 2, 3, 4 et 5  
libri VIII Fam. scripta sunt.

Motus crebris quidem et validis precibus magnifici Paduani domini, cui propter singularem atque egregiam humanitatem suam carus esse cœperam multis annis ante quam cognitus, et veritus ne mihi vel inertiae adscriberetur vel superbiæ, si tanti viri tam intensum desiderium diutius distulissem, de Parma discessi X. Martii hora III; V. autem Maii hora IX. Deo dante, sanus incolumis sum reversus. Et ut prius expediam quod te primum, frater, expectare arbitror, qualiter scilicet per illum mitissimum atque optimum dominum visus sum qualiterque tractatus, hoc unum dixisse velim, de illo quidem merito dici posse quod ait de Carthagine Sallustius, esse de actibus suis melius tacere quam parum loqui. Unum sane de multis omnium maximum, vulgari forte iudicio, meo autem, etsi magnum in se, maiorum tamen comparatione minimum, dicam, ut fraternum animum prosperitatis meæ, seu verius nostræ, participem faciam de longinquo. Si quidem generosus ille semper et artificiosissime liberalis mores meos atque animum solícite contemplatus, ut me ad trahendum interdum Paduæ moram honorificis quibusdam, ut ita dicam, compedibus alligaret, iuvenem quemdam canonicum Paduanum sanguine sibi coniunctum per viam permutationis ad resignandam

præbendam suam quædam sibi maiora pollicitus induxit, et ita per manus domini Legati, assistente episcopo Paduano, et grande mihi nimis atque humeris meis intolerabile testimonium perhibente, præbendam ipsam Paduæ obtinui, cumque ingenti totius ecclesiæ lætitia possessionem eius sum pacifice consequutus die sabbati post Pascha. Et hæc de tota illa materia dicta sint, reliquis omnibus in tempus aliud, et, si Deus annuerit, vivæ vocis oraculo reservatis.

Verum quia nihil ex omni parte felix aut dulce dum vivimus, omnisque dulcedo hominis multis amaritudinibus respersa est, ita mihi accidit, ut dum eo ac redeo, exoptatissimum mihi tuum et Mainardi nostri colloquium conspectumque, care frater, amiserim. Itaque lætus in itinere (quis crederet?), in domo propria tristis fui comperiens vos illic fuisse mei videndi desiderio, superatis Alpibus atque omni viarum asperitate calcata, tandem me in patria non invento, magna velut spe frustratos, dolentes ac sollicitos abiisse. Vix vere lacrimas continui hæc a meis famulis audiens, et litteras, quas tanquam eximiæ dilectionis obsides in bibliotheca mea dimiseratis abeuntes, relegens atque considerans cogitabam, et ex me ipso in eo statu vestros animos metiebar. Siquidem aspera in meliorem partem flectere sapientis est, cogitare cœpi fortasse hæc vobis divinitus accidisse. Siquidem me, ut optabatis, invisio, facile poterat uterque vestrum amici visione contentus, nihil aut modicum de reditu cogitare. Nunc vero non solum cum eadem qua veneratis siti, sed et ampliori, et per amici absentiam, ut auguror, irritata digressi, fiet quod assidue de reditu cogitetis,



ac mihi per paucorum dierum absentiam, multorum forsann annorum præsentiā in posterum compensetur. Certe ego sic mihi fingo, sic spero, et in hac spe multis licet obsessus angustiis acquiesco.

Et sic ad illud venio quod principalius in litteris vestris, ni fallor, intenditur. Hic igitur, fratres, aperite aures, quæso, animumque: de summa enim rerum nostrarum loquuturus sum. Multa quidem altius dici possent, at non multa, quæ quidem ego noverim, utilius. Sed de hoc omnes vos videritis, amici: quod enim uni dico omnibus dico; et cupio, si fieri possit, has litteras per ora omnium circumferri, et si quis ibit istinc ad occidentem nuntius, Ludovico nostro nominatim dirigi, ut omnes intelligant vel sensus meos, vel ineptias. Simpliciter forte sed certe fideliter loquutum fatebuntur. Nunc ad rem venio.

Frater, aut iam viri sumus, aut profecto nunquam erimus. Nemo nobis blandiatur; nemo iuventutis appellatione decipiat. Non sumus decrepiti certe, sed nec pueri. Decet itaque non muliebriter, non pueriliter, sed viriliter atque acriter cogitare quid sumus, et quibus undique periculis circumventi, qualis denique vita hominis, quam fugax, quam incerta, quam fragilis; meminisse quam brevi temporis spatio tanquam somnus aut umbra præterierit, et ab oculis nostris evanuerit quidquid in terris carius habebamus. Piget et impediore gemitu carissimas omnis status ac sexus et mihi vel sanguine vel amore iunctissimas enumerare personas, quas annus hic pestifer, et de omni sæculorum serie eradendus, intempestiva morte præripuit. Pauci quidem ex omni grege hominum, pauci

admodum fateor superstites, cum quibus vivere cupiam et mori; et ut ad præsens de absentibus tantum loquar, estis vos duo quos pridie ignorans hospites habui: est Ludovicus noster; nec Guidonem Septem, nec Barbatum meum, certe nec Romanellum ab hoc numero segregarem, nisi quia in eis difficultates non modicas, atque alia vocatos eos fortuna video. Ad vos itaque tres restringor. Neque nunc de dominis loquor, quorum benevolentia sperari potest, conversatio non potest. Obstat enim mutuo convictui disparitas fortunarum: alioquin alios dinumerarem, atque in primis dominum episcopum, de quo utinam aliquid videamus, quod quotidie videor videre, quod et valde possibile est, Deo simul et gloriæ eius et quieti nostræ misericorditer providente. Sed redeo ad id quod non modo possibile, quin facile etiam reor. Tres estis et ego sum quartus. Omnium animos ut meum proprium noscere videor. Quid nos impedit quominus pariter istas vitæ reliquias, quantæcumque sint, in tranquillitate animi et studiis bonarum artium transigamus, et *si in freto vivimus*, ut ait Seneca, *moriāmur in portu*? Quid nos impedit? Dicat qui novit: ego enim fateor me nescire. An quod uni quondam et communi domino obsequentes fecimus, id nobis iam viventes non audebimus, plusque in nobis potuit servitutis studium quam libertatis amor? Animos scio hominum, ut dixi: sed nescio forsā impedimentum Fortunæ. Et tamen omnia didicisse iam pridem debui, experientia magistra. Quid enim in ullo vestrum unquam fuit mihi occultum? Non sumus principes terræ et maris, ut ait Aristoteles: certe: nec oportet ad beatam vitam. Habemus quantum sufficere

potest animis modestis et sese componentibus ad naturam. Et si habet unusquisque quod sufficit, quid metuendum suspicemur? Omnibus abundabimus, mihi crede, magisque forsitan invidia nobis quam inopia metuenda est. Quid expectamus igitur? Cur mari, cur montibus, fluminibusque disiungimur? cur non eosdem iungit una domus quos iunxit ab olim unitas voluntatum? Quid, precor, obstaculi, aut quid difficultatis intervenit, nisi quia nova et insueta quælibet reformidat animus? Ego quidem non solum conscientiae meae, sed et praesentis epistolae fretus testimonio, culpam omnem, ignoscite fratres mei, in vos, seu vestrum aliquos, quicumque illi fuerint, ad salutare consilium tardiores retorqueo, coram Deo et hominibus proclamans per me non stare quominus identitatem animorum nostrorum corporalis praesentia comitetur. Omnium nempe minimus sum, et si non essem, fieri volo. Vel vocantem sequimini, vel unanimiter evocate. Quid stamus, quid expectamus, quid somniamus? Vel praecipite, vel parete: mihi sane praecipere durum, parere facile est; ideoque vocanti saepe Ludovico nostro paratum me obtuli, si negotium Cavallicense succederet, per quod et honestus in illis locis manendi color, et vitae necessaria quaererentur, ire quo sibi libuisset, non ignarus quidem rerum harum et illarum, sed sciens vos ibi esse quos mihi solos fortuna reliquerat, amoris nostri veluti uncis validissimis ac tenacibus retrahebar, licet, ut in epistola quadam testatus sum, viderer mihi e portu in tempestates medias reversurus: sed, ut dixi, omnia vincens aut vinciens amor, non dissimulantem quos in scopulos agerer, urgebat. Nunc, frater, mutata

sunt omnia : et vos inde abestis, et Ludovicus meus qui solus ibi est, quamvis unus in animo meo possit omnia, quamvis inveteratæ consuetudinis vi, et ipse ibi esse, et omnes suos, meque ante alios secum habere cupiat, nunquam tamen audebit omni spe abscissa, illas me ad terras arcessere, ubi omnes alienigenæ et peregrini sumus. Neque enim ludus est hominibus mortalia et caduca corpuscula trahentibus, dicere quod animæ felices corpore resolutæ apud Virgilium loquuntur :

Nulli certa domus, lucis habitamus opacis,  
Riparumque toros, et prata recentia rivis  
Incolimus.

Si enim ista sufficerent, posset utique Vallisclausa nobis omnibus abunde rivulos et herbosa cubilia ministrare. Sed alia quædam exigit natura. Est enim certa vel physicæ vel poeticæ necessitatis meta, quam præterire suspectum est. Non est per se sufficiens, ut ait Aristoteles, naturam speculari ; sed oportet et corpus sanum esse, et cibum et reliquum famulatum existere :

neque enim cantare sub antro  
Pierio, tyrsumve potest contingere sæva  
Paupertas, atque æris inops, quo nocte dieque  
Corpus eget,

ut Satyricus ait, magno ac perpetuo apud doctos philosophici poeticique dogmatis consensu rerum, sed verborum varietate multiplici. Igitur Clausavallis, ut cœptum sequar, ad aliquod breve tempus, urbanarum voluptatum tædio affectis, ut olim, diverticula non inamœna sufficeret : in longum certe nec promitteret

necessaria, nec præstaret. Nobis sane, si sapimus, non in longum modo, sed in finem quoque prospiciendum est, ut vitemus illud Senecæ quod humano generi facit improprium, ubi ait: *de partibus vitæ cogitare omnes, neminem de tota*. Vere sic est enim, et hoc est quod consilia nostra præcipitat, ut inter occupationes tam varias (miserandum simul et ridiculum) ignoremus quonam fluctuantis vitæ gubernacula dirigamus. Scio Clausævallis optabilem æstivo præsertim tempore stationem: et si ulli unquam secessus ille gratus fuit, mihi fuisse gratissimum, decennis indicio est mora. Quod si apud te, imo vero apud alterum me, sine iactantia gloriari licet, pace montium, ac fontium, ac silvarum quid habet locus ille gloriosius habitatore Francisco? Quod idcirco dixerim ne quis dubitet me illud rus nunc spernere, quod mihi meisque rebus aptissimum semper inveni, ubi sæpe curas urbanas rustica requie permutavi: quod non tantum electione ipsa, sed agrestibus muris, et, ut spero, solidiore cœmento, verbis atque carminibus illustrare studui. Illic, iuvat enim meminisse, Africam meam cœpi tanto impetu tantoque nisu animi, ut nunc limam per eadem referens vestigia, ipse meam audaciam, et magna operis fundamenta quodammodo perhorrescam. Illic et epistolarum utriusque stili partem non exiguam, et pene totum Bucolicum carmen absolvi, quam brevi dierum spatio, si noris, stupeas. Nullus locus aut plus ocii præbuit, aut stimulos acriores. Ex omnibus terris ac sæculis illustres viros in unum contrahendi illa mihi solitudo dedit animum. Solitariam vitam religionisque otium, singula ibi singulis voluminibus per-

stringenda et laudanda suscepi. Denique iuvenilem æstum qui me multos annos torruit, ut nosti, sperans illis umbraculis lenire, eo iam inde ab adolescentia sæpe confugere, velut in arcem munitissimam solebam. Sed heu! mihi incauto: ipsa nempe remedia in exitium vertebantur. Nam et his quas mecum adduxeram curis incenditibus, et in tanta solitudine, nullo prorsus ad incendium occurrente, desperatius urebar; itaque per os meum flamma cordis erumpens, miserabili, sed, ut quidam dixerunt, dulci murmure valles coelumque complebat. Hinc illa vulgaria iuveniliū laborum meorum cantica, quorum hodie pudet ac pœnitet, sed eodem morbo affectis, ut videmus, acceptissima. Quid multa? Si quæcumque alibi, cum his quæ ibi scripsi, conferantur, loca omnia locus ille, me iudice, hactenus superat. Est igitur eritque dum vixero, sedes illa mihi gratissima, commemoratione iuveniliū curarum, quarum usque ad hanc ætatem in reliquiis elaboro. Veruntamen nisi nosmetipsos fallimus, alia quædam sunt viro tractanda quam puero: et ego aliud illa ætate non videram. Obstabat enim recto iudicio cæcus amor; obstabat ætatis imbecillitas paupertasque consilii: obstabat reverentia ducis nostri, sub quo esse pluris erat quam libertas: imo sine quo nec libertas, nec vitæ iucunditas plena erat. Nunc et illum et quidquid dulce supererat uno pene naufragio amisimus; quodque sine suspirio dici nequit, virentissima olim laurus mea, vi repentinæ pestis exaruit; quæ una mihi non Sorgiam modo, sed Druentiam Ticino fecerat cariorem: velumque, quo oculi mei tegebantur, ablatum est, ut videam quid inter Vallem-

clausam Venusini, et apertas Italiæ valles collesque pulcherrimos et urbes amœnissimas ac florentissimas intersit. Et tamen vide quantum vetus consuetudo valet. Adhuc ad illam vallem remeare non renuo, si tamen honestus ibi vitæ modus ostenditur, qui quoniam ostendi nullo pacto potest, et de re certissima nimis diu disputo, ideo, frater, tuum et Mainardi consilium sine hæsitatione complector, et ambobus videor proprie admodum responsurus Iulii Cæsaris exemplo qui Oppio Cornelioque scribens *consilio*, inquit, *vestro utor libenter, et hoc lubentius quod mea sponte facere id constitueram* et sic in litteris dicere: sic constitueram, sic faciam, eoque securior quod video mecum talium amicorum concordare sententiam. Non ibo, nisi forte, quod non spero, Socrates ille meus efficacioribus me vocibus excitaret: consilioque vestro in Italiæ finibus ætatem agam. Vita<sup>1</sup> enim, ut spero, erit hic iucundior, et mors felicior, et suavius sepulcrum, sicuti in quodam loco dixisse me recolo, et ut me ipsum aliquando incipiam allegare,

post prælia tanta

Fortunæ Ausonia saltem tellure recondi,  
Dulce mihi, et patriis longum requiescere saxis,  
Seraque cum fragile tumulum convulserit ætas  
Lenius Hesperia cinis hic agitabitur aura.

Vos etiam, fratres, vos etiam huc, si qua quietis est cura, dissolutis vel potius abscissis occupationum vestrarum laqueis, festinanter dicerem venite, et videte. Sed venistis et vidistis. Quæ si vobis regio me absente usque adeo placuit, quid faceret me præsentem,

<sup>1</sup> Quæ sequuntur in codice Barberiniano desiderantur.

quum naturalis amœnitas locorum amici convictu et sermonibus condiretur?

Neque mihi superbiæ detur quod ad me alios trahere potius quam ipse sequi videar: ad utrumque ex æquo paratus est animus. Quod si omnibus circumspectis nusquam nostris tempestatibus tranquillior portus est, quod uterque vestrum suis testatur litteris, et testimonio nostro, cui forte plus fidei dabit Ludovicus cui notum fieri postulo; quid tandem unum in locum convenire nos vetat, qui, ut idem sæpe repetam, in una iampridem convenimus voluntate? Habemus quod satis est. Quidquid amplius petimus, non naturæ sed cupiditatis appetitus est, cui nullus modus, nullus est terminus. Declinemus infinitum, quæso, illud chaos et inextricabilem labyrinthum. Habet hoc avaritia proprium atque pessimum: torquet curis inanibus, nec animum satiat sed incendit, et quo nihil est deterius, præsentibus uti prohibet, dum ventura pollicetur. Nunquam hæc habendi sitis plura quærendo sedatur. Ego quidem, quod de vobis, amici, tanto magis spero quanto plus in vobis modestiæ novi, ego posui cupiditatibus meis modum, et oraculi loco Horatianum illud accepi:

Semper avarus eget: certum voto pone finem.

Posui, fateor, hunc finem, et Deo favente attigi, nec verebor ne mihi segnitiem obiiciat hæres meus. Mihi enim vivo non sibi, et rerum mearum cum amicis dominus, non negotiorum eius, qui fortasse nondum mihi cognoscitur, gestor sum. Pro me autem quid tantopere laborandum est? Plus obtulit mihi Fortuna quam ne-



cessitas requirebat, et timeo ne sim onustior quam oportet. Decet expeditum esse impedito itinere gradientem. Quid igitur nunc etiam inutiles sarcinulas cogitamus? Eleganter ait Flaccus :

Vitæ summa brevis  
Spem nos vetat inchoare longam.

Ita est ; non fallitur ; nihil est verius. Etsi enim vitæ huius angustias, quo possumus modo, ætatum scilicet operosa distinctione laxemus, et in quantaslibet minutias dividamus, reduc tamen in unam cuncta congeriem, et curiosius scissa redintegrans, a primo ad ultimum quamvis longissimæ vitæ diem totum simul mente complectere : fateberis summam huius rapidissimi temporis esse brevissimam. Huius ipsius, si retro circumque respicimus, bona pars nobis exacta est. Colligamus nos igitur ad extrema viarum, quodque non ambigitur, duriora, abiectisque supervacuis, necessaria teneamus. Quid procrastinamus? quid differimus? Dies diem, mensis mensem sequitur,

Atque in se sua per vestigia volvitur annus,

ut præclare ait Maro : desinendoque reincipit et nunquam sic desinit ut quiescat. Quis igitur expectandi modus? Aut quis finis? Canos iam comites senectutis et nuntios mortis aspeximus. Quid amplius præstolamur? An ut oculi senio caligent, tremant poplites, terga curventur? Primum, quis mathematicus tam longæ nobis sponsor est vitæ? Esto : sit Petosiris, sit Necepsus, sit Nigidius ex nostris, sit veritas demum ipsa : quanta tamen amentia est quod iustis in spatiis

et ex commodo fieri potest, inter angustias differre? Præsertim quia ut vini et olei, sic temporis et vitæ fæx in fundo iacet. Ad illam te, cum superiora neglexeris, reservare ridiculum. Votum solet esse viatoribus ante noctem hospitari. Accingamur, obsecro, et post multos itinerum labores, illi nos æterno tandem hospitio præparemus. In hoc vobis, luce mihi cariores fratres, si quid in me opis aut consilii est, si quid oblectationis aut gratiæ ex me sperari potest, si quid subsidii ex his rebus, quas improprie meas dicunt, cum Fortunæ sint, denique me ipsum, quod sine arrogantia possum, libellos atque hortulos meos offero, et si quid est aliud. Sunt autem non pauca, quorum indiget inops hæc et mortalis vita, quæ nominatim stilo inseri decor vetat.

Habitationem meam *per me non* (sic) approbare videmini. Parva est, fateor, sed iucunda, sed salutaris, sed salubris, et certe paucorum hominum ac bene concordum late capax. Habemus aliam domum vicinam ecclesiæ, non quidem nostram, sed archidiaconatus nostri propriam. Illam, ut arbitror, non vidistis, quam idcirco non inhabito quia ibi cum tribus aut quatuor famulis solus sum: sed si tres in unum Fortuna coniungeret, non deerit nobis urbe media, quale apud Virgilium habuit rex Latinus:

Tectum augustum ingens centum sublime columnis.

Illam me domus expectat vacua interim et deserta, et de vestra conqueritur tarditate, qua (*desunt nonnulla*).... Paduæ iuvabit moram trahere. Erit nobis hinc Bononia, studiorum nutrix, in qua primum adolescentiæ

tempus expendimus, et dulce erit, mutatis iam non solum animis sed capillis, antiqua revisere, et firmiore iudicio civitatis illius, simulque nostrorum animorum habitum, et ex collatione temporum, quantulum vivendo processerimus contemplari, *cuius et terræ domino miro, meo ac mihi propitium negabis* (sic). Erit inde Placentia et Antonini tui venerabilis domus, ubi et omnium hospes eris. Occurrent, si paulo longius proficisci libeat, hinc Mediolanum, illinc Ianua: illa terrestrium hæc maritimarum decus urbium, ubi etiam me amicis non carere gaudebitis, hanc quoque, qua nulla pretiosior est supellex, participantes ut reliqua. Quis enim dimidium amare, et dimidium non amare poterit? Recte quidem Horatius Virgilium dimidium animæ suæ vocat, quod dictum placuisse legimus Augustino. Qui ergo unum ex nobis amaverit, amet alterum necesse erit. Sic erimus bonis omnibus carissimi, malis autem, quorum infinitus est exercitus, nec hostes erimus, nec amici profecto, nec coniuncti. Vultus aspicient, animos ignorabunt. Sequemur enim illius consilium qui monet ut inter omnia dissimillima frons nostra populo placeat. Putabunt illi nos agere quod vulgus agit: nos nostrum aliud negotium et forte maius aliquod agemus. Denique, ut semel expediam, aut felices erimus, aut non multum a felicitate distantes: quo nobis studiosius celerandum est. Est enim nobis naturaliter felicitatis innata cupiditas, quam scimus sine amicorum solatio non posse contingere, et licet veniat ad nos, ut ait Seneca, ex his quos amamus gaudium, quod est, ut ibidem ait idem, leve et evanidum: conspectus, et præsentia, et conversatio

habent aliquid vivæ voluptatis. Ibimus vacui curarum per eos quibus incredibiliter delector Tyrreni maris anfractus, et optatum semper otium, quod nobile illud amicorum par Scipio ac Lælius post labores bellicos in Caietæ litoribus consequutos fuisse novimus, nos post studiorum vigilias in Ianuæ litoribus sortiemur. Si qua autem hac terrarum parte satietate erunt animi, alia nobis Patavii in regione Vallis Cispadanæ nec minus tranquilla, nec minus idonea sedes est, ubi non parva portio felicitatis nostræ fuerit, talis illius viri ac de nobis benemeriti meruisse convictum. Eritque nobis ad latus omnium quas ego viderim (et vidi cunctas fere quibus Europæ regio superbit) miraculosissima Venetiarum civitas, eiusque dux illustris, honoris quoque causa nominandus, Andreas, non minus bonarum artium studiis, quam tanti magistratus insignibus vir clarus, qui et ipse de illorum numero esse non erubuit, qui, nescio quo falso nomine decepti, me ante omnes quidem conspexerunt et dilexerunt. Erit et Tarvisium æstivis deliciis et fluminibus civitas insignis et fontibus, unde omnis tristitia quam longissime relegata est. Ita quotiens identitas tædii mater offenderit, aderit optima fastidii medicina varietas, et quidquid molestiæ obrepserit, alterno colloquio, et locorum talium mutatione purgabitur. Nescio quid aliud dicam; et sentio me animi calore longius quam destinaveram processisse. Unum hoc identidem, quod sine hortatu meo tibi in animo esse perpendi, inculcare non desinam. Conveniamus, oro, impigre in hunc locum omnes, si locus hic omnibus placet: alioquin e toto orbe terrarum (nullum enim mundi latus, nullam barbariem

recuso) eligite qui vobis tribus placeat locum. Ego affectus meos exuo, ac iudicium proprium abiicio, vestrum sequor: et modo simul esse liceat, bene erit. Eligite ubi quod restat pacifice vivamus, ubi æquanimiter moriamur; et ut in preces ac vota concludam, inspiret utinam nobis consolator Spiritus in hoc saltem conspirare, ut dum spiramus adhuc, ad requiem aspiremus, et qui tota die suspiravimus, respiremus ad vesperam. Vale, frater amantissime, nostri memor.

XVIII. Mai.

Ille tuus F.

---

### EPISTOLA VII.

FRANCISCUS PETRARCA IOHANNI MORI DE FLORENTIA S. P. D.

De oratione quam legendam misit gratulatur.

Orationis celeberrimæ, quam his diebus proximis nomine reipublicæ legatus in oculis Romani Pontificis habuistis tantillo mihi mandantes examen, oratorum decus, geminam sensibus meis admirationis materiam præbuistis. Tanti enim eloquii inspectorem me voluisse, quando ita videbatur, et stuporem tacitum ingerere satis erat. Ipsa siquidem oratio talis est ut reprehensorem spernat et laudatore non egeat, admiratorem vero bene culta non respuat. Ego autem nec ille sum a quo etiam ubi res exposceret, possent tam grandia sperari, et, ut Virgilii verbis utar, *haud equidem tali me dignor honore*. Ad hæc, quisquis sum, vobis non ignotus esse crediderim, sed una licet visione notissi-

mus. Cæterum utriusque mihi admirationis molem meditatio confestim subsequuta discussit. Primum enim quod attinet ad orationis eximiæ venustatem, scio naturaliter inesse formosis ut sint præ cæteris de augendo servandoque decore sollicitæ. Hinc non suo tantum, sed alieno comuntur arbitrio, nec accuratius se ulla circumspicit, et mendas quantaslibet meditatur in speculo, quam quæ suæ formæ præcellentis est conscia. Et sane in egregia facie defectus omnis apparet offenditque oculos quidquid vel minimum a reliqui oris candore discordat. At contra cui satis sua displicent, secura progreditur, et alium de se, satis ipsa sibi nota, non consulit, nec speculo iam creditura, nec amicæ. Nihil igitur miri est si oratio quoque vestra in publicum ventura subsistit parumper, et de coloribus suis alteri credere mavult quam sibi.

Quod autem in hac re, in tanta turba doctorum hominis unius indocti consilium delegistis, atque intra tot, ut ita dixerim, lince carens talpa luminibus placuit, non vester, sed amoris est error, cuius, ut nostis, cæca solent esse iudicia. Consilium occidendi Iulii Cæsaris, quo nullum unquam maius de morte puri hominis agitatum est, nondum vel tenui syllaba extra principes coniurationis effluxerat. Idipsum coniuratorum princeps M. Brutus vir acer et strenuus ad eam diem viris amicissimis diligentissime occultatum, uxori propriæ dissimulare non potuit, quodque vix apud se ipsum tacitus sine pavore cogitabat, id illi narrare non timuit. Quid igitur? Nunquam ego virum talem tam pueriliter errasse crediderim, nisi quia suggerebat amor animum foemineum tanto non impa-

rem arcano sic ducere cui superædificari posset, et cui tuto quævis altissima crederentur; nec mihi persuaderi potest aut tunc illum mulierculæ, aut vos nunc mihi. . . . .<sup>1</sup> vos quodammodo fraternus amor coegisset. Cæterum ne longe evager, de transmissa oratione grates ago, qualicumque iudicio vestro lætus, sive dignum tanto honore credidistis, sive dignum efficere voluistis.

### EPISTOLA VIII.

FRANCISCUS PETRARCA PRINCIPI ROMANO S. P. D.

Nuncium eius ad Druentiam captum et vulneribus affectum esse, in eoque læsam exprobrat maiestatem.

Quid hinc humanitatis ac clementiæ, seu quid omnino iustitiæ sperare possis, excellentiæ tuæ nuncius expertus testabitur. Novum genus sævitæ: puerum incomitatum, incautum, innocentem hostiliter aggredi: virgulam, si quid sacri esset, et vereri et timere debuerant, capsulam quoque gravissimis et suavissimis litteris referatam in caput immeritum, donec utrumque frangeretur, allidere: ipsas quoque litteras, quæ marmoreos animos mollire potuissent, disceptas effundere. En hospitalitas, en caritas! Ad Druentiam captus, tortus, flagellatus, et civitatis ingressu prohibitus nuncius tuus, minasque cum verberibus ac vulneribus referens, ad pedes tuos vertice cruentato redit. Oh! vere Durentia, ut vulgus ap-

<sup>1</sup> Nonnulla in Codice certo certius hic desunt quæ, si voluissem, facile supplere poteram. Satius tamen duxi lectoris id arbitrio demandare.

pellat, durities gentium, sive ut quidam scriptores vocant, Ruentia, a ruendo diceris, præceps flumen damnosumque, cuius accolæ nihil undis et alveo mitiores, et ipsi tanto impetu in quodlibet scelus ruunt. O impudenter elati: o irreverentes et indevoti omnes: o nōn tua sorbens, et tumide in dominum insurgens Sorgia; o Rhodanus rodens omnia, sic Tyberim recognoscitis, sic Romam dominam honoratis? O Avinio, cuius vinea (si quid coniectionibus fidei est) botros amarissimos et cruentam profert vindemiam, sic dominam Romam colis, sic tui, sic illius, sic propriæ servitutis, sic summi imperii memor es? Væ tibi, infelix, si illa coeperit expergisci, imo vero si caput extulerit, et dormienti sibi illatas iniurias et damna prospexerit. Expectata enim iam nunc est, crede mihi: non dormit, sed silet, et somnia præteriti temporis sub silentio repetit, et quid surgens actura sit cogitat. Expectato paululum et videbis magnalia in orbe terrarum, fierique mirare quæ ante factum impossibilia iudicasses. An quid sis, an ubi sis, an cui subsis ignoras? An provinciæ nomen nescis unde descendat? Quisnam furor hic, quænam ista dementia? Sic modico sereno tempestatum omnium subrepsit oblivio? Siccine provinciarum dominam veneraris? Sopita erat, tu mortuam credidisti ac velut morte dominæ libertati reddita adhuc servam te putasti, nisi libertatem ipsam flagitiis approbares. Esse aliquid, posse aliquid videri cupis: nos aliquandiu te voti compotem deliberando fecimus. Tempus est ut, nobis admonentibus, resipiscas. Multorum nempe potentia non in propriis viribus, sed in aliena debilitate fundata est: verum hæc, adversario convalescente, cor-



ruat oportet. Tunc ergo quid fueras intelliges, cum quid adhuc sit Roma cognoveris, cuius modo nuntiis sic insultas, putans non esse qui vindicet. Falleris, ineptis, insanis. Est qui vindicet in cœlo Deus, est qui vindicet in terris amicus Dei, quem tu nescis: sunt vires, quas ne suspicari quidem potes. Ah misera! Sed experiere illico, ut spero. Tuæ nobis vim nostram iniuriæ reddere. Cum primum dolere cœperimus, magno tractu et ad sanitatem et ad robur accessimus. Tu vero res nostras miserearis, vir illustris. Erige surgentem patriam, et gentibus incredulis quid nunc etiam Roma possit ostende. De reliqua enim Italia, cui dubium est quin quantum potuit possit, nec vires, nec opes, nec animos deficere, sed consensum? Qui si unus adfuerit, illudentibus nomini Italico tenore præsentis epistolæ propinquam stragem perniciemque denuncio. Tu, inquam, quem tantæ rei ducem fata constituunt, perge qua cœpisti. Nihil formidabis: nubeculæ istæ sole radiante dissilient: vulpecularum insidiæ leonis impetum non ferent. Ingressus es gloriose: i fortiter, i constanter ad reliqua. Ostende superbiae quantum humilitate sit inferior, avaritiæ quantum largitate pauperior, fallaciæ quam stulta sit adiecta prudentiæ, voluptati quam turpis admota temperantiæ ac decori. Agnoscat tandem fucus hypocrisis quam nihil sit ubi vera virtus affulserit. Eia age rumpe moras, et ranam tumore ridiculo molem solidi bovis imitantem protere, frange, conculca. Non loquor ut incitem. Non impulsore, nec lenitore indiges, et calcar et frænum in potestate habes, sed dolorem animi tacitus ferre non potui. Dolor loquendo actus querelam auxit, et vicissim sermo indignationi alimentum præbuit,

et indignatio sermoni. Quis enim tranquillus hæc videat? Violatum ius gentium, spreta humanitatis fœdera in nuncii tui persona! Oh! immemor honestatis ira: melius inter barbaros hostes fuisset nuncius tuus, quam inter eos, quos et rebaris latinos et benevolos merebaris. Evolvant historias! si modo quidquam, præter quibus inbiant divitias, spectare queant; inquirent, et mihi respondeant. Quæ barbaries legatos violavit unquam, nisi perraro, nulla præsertim caussa interveniente? Tentavit hoc quondam in legatis nostris fallax et infida Carthaginensium plebs, sed prohibita vis est magistratum interventu. Hanc vim, quæso, quis prohibuit? Quis factam punivit? Durior sum: imo vero quis arguit, vel reprehendit? Quanto tutius nuncius tuus isset in Parthiam, truncatis Crassi et legionibus nostris fuis! Quanto intactior isset in Germaniam, cæsis Teutonis et Mario triumphante, quam huc venit, te romanam Ecclesiam filialiter venerante? Certe nec victoris insolentia, nec victi hostis dolor tantum præsumpsisset quantum fictæ amicitiae præsumpsit invidia. Facilius puer tuus nemorosum Pelion et argentes Tauri colles hieme media, quam Orgonis planitiem autumnali tempore transivisset. Liberior Gangem et Tanaim, quam Druentiam transnatasset. Hæc levandi animi caussa dixisse volui. Te vero, vir magnifice, nec iniuriæ illatores, nec ulla prorsus falsæ magnitudinis simulacra permoveant. Non est vera magnitudo, nec verum robur posse nocere: id enim minimis atque infirmissimis animantibus datum est. Magnitudo vera est posse prodesse: verior autem velle. Potuerunt nocere nocentissimi hominum innocenti puero, et boni nuntii vicem hanc re-

ferre. Quid hoc magni est, imo vero quid nisi nihilo minus? Si enim peccatum omne nihil est, eo magis est nihil quo peccatum maius. Ita peccati magnitudo, si dici potest magnitudo, nihil est. Hac modo magnitudine viri fortes et suis artibus usi sunt. Potuerunt quod scorpius, quod aranea potuisset. Nocuerunt uni ex tuis, et quod est in hac immanitate conspectius, tibi nocere voluerunt, nec tibi ut tibi, sed ut libertatis ac iustitiæ defensori. Te enim nonnisi propter illas odio habent; illas autem propter se, ut quas iniusto, quo superbiunt imperio, contrarias norunt. Tu si ad magnitudinem animi tui redis, horum tumidum et inane propositum simul oderis et contemnes. Acria quidem ista et acuta, sed parva sunt. De maioribus agitur. Hæc cum universitate transibunt, et servi tui ultio latebit sub reipublicæ vindicta. Vale: et perface quod cœpisti.



## FRANCISCI PETRARCÆ TESTAMENTUM.

Sæpe de eo mecum cogitans, de quo nemo nimis, pauci satis cogitant, de novissimis scilicet ac de morte, quæ cogitatio neque superflua esse potest, neque nimium festina, cum et mors omnibus certa sit, et hora mortis incerta; utile atque honestum credo antequam me mors impediat, quia mors ipsa quæ per varios et ambiguos rerum casus semper nobis impendens propter vitæ brevitatem procul esse non potest, nunc Dei gratia, dum corpore simul atque animo sanus sum, de me ipso ac de rebus meis testando disponere. Quamvis, ut verum fatear, tam parvæ et tam paucæ res sunt meæ, ut de iis quodammodo pudeat me testari. Sed divitum atque inopum curæ de rebus licet imparibus pares sunt. Volo igitur hanc meam voluntatem ultimam ordinare, et scriptis committere, et propter quamdam honestatem, et ob id maxime, ne de huiusmodi rebus meis propter meam incuriositatem post meum obitum litigetur.

In primis animam meam peccatricem, sed divinam misericordiam implorantem et de illa sperantem, commendo humiliter Iesu Christo, eique flexis ipsius animæ genibus, ut a se creatam suique sanctissimi sanguinis pretio redemptam, protegat effusus supplico,

nec permittat ad suorum manus hostium pervenire. Ad hoc et auxilium Beatissimæ Virginis matris suæ, et beati Michaelis Archangeli reverenter et fideliter imploro; et sanctorum reliquorum quos intercessores apud Christum invocare sum solitus ac sperare.

Corpus autem hoc terrenum ac mortale nobilium gravem sarcinam animorum, terræ, unde sibi origo est, volo restitui: et hoc absque omni pompa, sed cum summa humilitate et abiectioe quanta esse potest: de quo hæredem meum et amicos omnes rogo, obsecro; et obtestor, et adiuro per viscera misericordiæ Dei nostri, et per caritatem si quam unquam ad me habuerunt, nec falsi specie honoris hoc neglegant; cum sic omnino me deceat, ac sic velim: ita ut si forte, quod absit, contrafecerint, teneantur Deo et mihi de gravi utriusque offensa in die iudicii respondere. Et hoc quidem de funere, nunc de sepultura: hoc addito quod nemo me fleat, nemo det lacrimas, sed pro me Christo preces, et qui potest Christi pauperibus caritatem pro me orare monitis porrigat. Hoc mihi prodesse poterit: fletus autem et defunctis inutile, et flentibus est damnosus. De loco autem non magno pere curo. Contentor poni ubicumque Deo placuerit, et his qui hanc curam suscipere dignabuntur. Si tamen expressius mea de hoc voluntas exquiratur, sepeliri vellem, si Paduæ ubi nunc sum moriar, in ecclesia Sancti Augustini quam fratres prædicatores tenent, quia et locus animo meo gratus est, et iacet illic is qui me plurimum dilexit; inque has terras piis precibus attraxit præclarissimæ memoriæ Iacobus de Carriaria tunc Paduæ dominus. Si autem Arquadæ, ubi

ruralis habitatio mea est diem clausero, et Deus tantum mihi concesserit quod valde cupio, cappellam ibi exiguam ad honorem Beatissimæ Mariæ Virginis extruere, illic sepeliri eligo; alioquin inferius in aliquo loco honesto iuxta ecclesiam Plebis. Sin Venetiis moriar, poni volo in loco sancti Francisci de Vineis illic ante ostium ecclesiæ. Sin Mediolani, ante ecclesiam beati Ambrosii iuxta primum introitum qui civitatis muros aspicit. Sin Papiæ, in ecclesia sancti Augustini ubi fratribus visum fuerit. Si autem Romæ, in ecclesia sanctæ Mariæ Maioris, vel sancti Petri, ubi fuerit opportunius, vel iuxta ecclesiam hanc vel illam sicut canonicis placebit. Nominavi loca quibus per Italiam conversari soleo. At si Parmæ, in ecclesia maiori, ubi per multos annos archidiaconus fui inutilis et semper fere absens. Sin ubicumque terrarum alibi, in loco Fratrum minorum si sit ubi: sin minus in quacumque alia ecclesia, quæ vicinior fuerit loco mortis. Hæc de sepulcro plura, fateor, quam virum doctum deceat, licet ab indocto dicta sint.

Nunc accedo ad dispositionem earum rerum quæ vocantur bona hominum, cum potius sint sæpe impedimenta animi. Et primo equidem huic sanctæ ecclesiæ Paduanæ, unde percepi et commoda et honores, ordinavi animo iampridem pusillum terræ emere quod eidem testamento dimitterem usque ad summam videlicet ducentarum librarum huius parvæ monetæ, vel plus si possim. Sed ad hanc summam habeo iam verbo licentiam a magnifico Paduæ domino ac domino meo Francisco de Carraria, quam vel in vita mea, vel post obitum, quotiens seu quandocumque petita fuerit, datu-

rum esse non dubito; sicut ille cuius non actus modo, sed verba multam habeant in proposito veritatis firmitatem. Huiusmodi autem terram hactenus, intervenientibus aliis impensis, emere non valui. Si ergo ipsam emero, ut spero, faciam instrumento emptionis poni quod ipsam emo animo ecclesiæ relinquendi: et ex nunc ita facio, quamvis eiusdem terræ situm nondum possum in scriptis inserere. Sin autem, quoniam nonnunquam piæ voluntates propter peccata hominum deduci nequeunt ad effectum, dictam terram emere vel propter impotentiam vel propter negligentiam omisero, lego ipsi ecclesiæ Paduæ ducatos ducentos auri ad emendum aliquantulum terræ ubi melius fieri poterit, de cuius proventibus perpetuum anniversarium animæ meæ fiat: et ipsi domino supplico, si tunc vivet, sicut cupio et Deum precor, ut multos postea annos lætus et felix vivat; vel si (quod Deus avertat) tunc ipse non viveret, precor alium quemcumque penes quem rei huius erit arbitrium, quatenus ob reverentiam Mariæ Virginis, et mei, licet indigni et pusilli hominis respectum, concedat hoc fieri; et decretum suum super hoc favorabiliter interponat.

Lego autem ecclesiæ apud quam sepeliar ducatos XX: aliis autem ecclesiis quatuor ordinum mendicantium, si ibi fuerint, ducatos V. pro qualibet.

Pauperibus Christi lego C. ducatos distribuendos ut videbitur Iohanni a Bocheta custodi ecclesiæ Paduanæ: et hoc si hic moriar. Sin alibi, ad arbitrium prælati illius ecclesiæ in qua reconditus fuero: ita tamen ut de dicta quantitate nullus ultra singulos ducatos accipiat.

Transeo ad dispositionem aliarum rerum. Prædicto igitur magnifico domino meo Paduano, quia ipse per Dei gratiam non eget, et ego nihil habeo dignum se, dimitto tabulam meam sive iconam Beatæ Virginis Mariæ opus Iotti pictoris egregii, quæ mihi ab amico meo Michaelē Vannis de Florentia missa est, cuius pulchritudinem ignorantes non intelligunt, magistri autem artis stupent. Hanc iconam ipsi magnifico domino lego, ut ipsa Virgo Benedicta sit sibi propitia ad filium suum Iesum Christum.

Amicis minoris status, sed carissimis mihi, libenter magna dimitterem, si facultas esset uberior : sed affectum libabunt.

Magistro Donato de Prato, veteri grammaticæ præceptori, nunc Venetiis habitanti, si quid mihi debet ex mutuo, quod quantum sit nescio, sed utique parum est, remitto et lego : nec volo quod hæredi meo ob hanc causam ad aliquid teneatur.

De equis meis, si quos habuero in tempore transitus mei qui placeant Bonzanello de Vigoncia, et Lombardo a Serico concivibus Paduanis, volo quod inter eos sortiantur qui primum elegat, quis secundum.

Et præter hoc, dicto Lombardo, qui rerum suarum curam deposuit ut res meas ageret, obligatum me confiteor in CXXXIV. ducatis auri et solidis XVI. quos expendit in utilitatibus meis, et multo amplius. Sed facta ultima inter nos ratione, dictæ quantitatis debitor remansi, quam si ante acceperit, sicut spero cito facere, bene erit. Alioquin volo quod hæres meus ante omnia sibi satisfacere teneatur ; de quo debito chirographum meum habet, quod restituat hæredi meo ipse



Lombardus. Item lego eidem Lombardo scyphum meum parvum rotundum argenteum et auratum, cum quo bibat aquam, quam libenter bibit, multo libentius quam vinum.

Presbytero autem Iohanni a Bocheta custodi ecclesiæ nostræ breviarium meum magnum quod Venetiis emi pretio C. librarum. Ea tamen lege illud ei dimitto ut post eius obitum remaneat in sacristia ecclesiæ Paduæ ad obsequium perpetuum presbyterorum, ut ipse presbyter Iohannes et alii orent, si eis placeat, Christum et Beatam Virginem Mariam pro me.

Iohanni de Certaldo seu Boccatio, verecunde admodum tanto viro tam modicum, lego quinquaginta florenos auri de Florentia pro una veste hiemali ad studium lucubrationesque nocturnas.

Magistro Thomæ Bambasio de Ferraria lego leuthum meum bonum, ut eum sonet non pro vanitate sæculi fugacis, sed ad laudem Dei æterni.

Prædicti autem mei amici de parvitate huiusmodi legatorum non me accusent sed Fortunam, si quid est Fortuna. Propter hunc respectum distuli ad ultimum quem primum esse decuit, Magistrum Iohannem de Horologio physicum, cui lego quinquaginta ducatos auri pro emendo sibi unum parvum anulum digito gestandum in memoriam mei.

De familiaribus autem domesticis sic ordino. Bartholomæo de Senis, qui dicitur Pancaldus, XX ducatos, quos non ludat.

Zilio de Florentia, domicello meo, supra salarium suum, si quid sibi debetur, XX ducatos, et si haberem alios aut plures paucioresve domicellos, supra salarium

sum pro quolibet, florenos seu ducatos XX. Famulis duos pro quolibet : Coquo duos : isti, vel amici, et si vel domicelli seu famuli obiissent priusquam moriar, quod eis legabam volo ut redeat ad hæredem meum.

Omnium sane bonorum mobilium et immobilium quæ habeo vel habiturus sum, ubicumque sunt vel erunt, unum solum hæredem instituo Francisculum de Brosano filium quondam domini Amicoli de Brosano civem Mediolani portæ Verzellinæ : et ipsum rogo non solum ut hæredem, sed ut filium carissimum, ut pecunia quantacumque sit, plurima sive minima, quia magna utique non erit, quam meis in rebus invenerit, dividatur in duas partes, et unam sibi habeat, alteram numeret cui scit me velle, et de ea fiat quod me etiam velle scit.

Duo antequam finiam hanc scripturam addenda sunt. Unum est, quod modium illud terræ quod habeo ultra montes in Comitatu Venusino in villa seu castro Valclusiæ Diœcesis Cavallicensis, quia sine dubio eundo illuc vel etiam mittendo quodammodo plus expenderetur quam res valeat, volo quod sit hospitalis dicti loci, et in usus pauperum Christi, et si forte hoc fieri non posset impediante aliquo iure vel statuto, volo quod sit Iohannis et Petri fratrum filiorum quondam Raymundi Clarimontis, qui Monetus communiter dicebatur, et fuit obsequiosus et fidelis mihi valde. Et si dicti fratres, vel eorum alter obiisset, volo quod veniat ad filios vel nepotes in memoriam dicti Moneti.

Alterum, quod illud modicum quod habeo de bonis immobilibus in Padua vel territorio Paduano, vel in posterum habiturus sum, volo quod sit hæredis

mei, ut cætera : sed hac lege quod nec per se. nec per alium possit horum aliquid alienari venditione, aut donatione, aut perpetua emphytheusi, aut alio quovis modo, nec etiam pignorari usque ad completos XX annos a die mei obitus computandos : quod propter utilitates ipsius hæredis ordino qui ex ignorantia rerum labi posset ; quas cum plene noverit puto non libenter alienabit.

Si autem forte, quia omnes sumus mortales, nec omnino ullus est ordo moriendi, dictus Franciscus de Brosano (quod avertat Deus) ante me moreretur, tunc hæres meus esto Lombardus a Serico prædictus, qui plene animum meum novit, quem ut in vita fidelissimum expertus sum, non minus fidelem spero post obitum.

Hæc iure testamenti, seu alterius ultimæ voluntatis seu quocumque alio modo melius valitura conscripsi manu propria Paduæ in domo ecclesiæ quam habito anno Domini MCCCLXX. pridie Nonas Aprilis.

Et Nicolaum filium quondam ser Bartholomæi ac Nicoletum filium ser Petri notarios infrascriptos rogavi prout in eorum subscriptionibus infrascriptis continetur.

Unum addo, quod statim post transitum meum hæres meus scribat super hoc meo fratri germano Petrarco monacho Carthusiensi in Conventu de Materino prope Massiliam : et det sibi optionem utrum velit centum florenos auri, an singulis annis quinque vel decem sicut sibi placet : et quod ipse elegerit illud fiat.

Ego Franciscus Petrarcha scripsi ; qui testamentum aliud fecissem si essem dives, ut vulgus insanum putat.

## AD AMICUM LECTOREM.

Memineris fortasse, lector, dictum in Prolegomenis (Vol. I. pag. XX) hæsisse me an litteris hisce notas animadversionesque subnecterem, quæ earumdem diem, occasionem et materiem declarantes, ex ipsius Petrarcae verbis deprompta validissima argumenta suppeditarent, quibus et civilis historia, et litteraria, et præclarissimorum eius ætatis virorum vitæ resque gestæ illustrarentur: re tamen mature perpensa, omne notarum et animadversionum opus Italicæ epistolarum traslationi adiungendum reservasse.

Id scilicet non alia de causa mihi proposueram, nisi quod vel paucos intra menses, vel certe non serius duobus annis hanc epistolarum editionem perfectum iri autumabam, quos quum formis typographicis recognoscendis et emendandis, tum italicæ interpretationi quam simul una vulgandam typographo iamdiu tradideram, perpoliendae, vix suffecturos existimavi. Quum vero aliud expectanti mihi contra votum evenerit, et quinque pene annorum spatium ex quo opus vulgari inceptum est hactenus effluxerit,

partum invito ocium haud minus recte impensurus mihi visus sum, si quas italicæ translationi addideram, hisce etiam Petrarcae ipsius litteris eodem quo is usus est idiomate animadversiones subiungerem, et quarto volumine *Indici* rerum notabilium præponendas evulgarem. Sique Deus adsit et dies, illum etiam tantæ cunctationis fructum, lector, accipies, ut hanc epistolarum de Rebus Familiaribus et Variarum editionem Senilium quoque evulgatio earumque italica interpretatio subsequatur. Id boni æquique consulas. Vale.

IOSEPHUS FRACASSETTUS.

FINIS TERTII VOLUMINIS.

# INDEX.

---

Liber vicesimus . . . . .	Pag.	1
Liber vicesimus primus. . . . .		57
Liber vicesimus secundus. . . . .		117
Liber vicesimus tertius . . . . .		179
Liber vicesimus quartus. . . . .		247
VARIARUM liber unicus . . . . .		309
APPENDIX litterarum . . . . .		489
Index Appendicis . . . . .		491
TESTAMENTUM Francisci Petrarcae . . . . .		535















